
This is a reproduction of a library book that was digitized by Google as part of an ongoing effort to preserve the information in books and make it universally accessible.

GoogleTM books

<https://books.google.com>




This is a reproduction of a library book that was digitized by Google as part of an ongoing effort to preserve the information in books and make it universally accessible.

GoogleTM books

<https://books.google.com>





27386-B.

GRETTIS SAGA

ved

G. MAGNÚSSON OG G. THORDARSON.

Øversat af

G. Thordarson.

Udgivet

af

det nordiske Literatur-Samfund.

KJØBENHAVN.

BERLINGSKE BOGTRYKKERI ved N. H. STENDERUP.

1859.

27386-8

16

Forord.

Med Hensyn til Text-Udgaven af Grettars Saga, der udkom i 1853, findes følgende Bemærkninger nødvendige:

Nuværende Adjunkt ved Reykjavik lærde Skole, Gísli Magnússon, har afskrevet Texten efter AM. Nr. 551A. 4^{to} (i Udgaven betegnet A), hvilken Membran han saaledes har lagt til Grund for Udgaven, og skjønnes der ikke bedre, end at han i det Hele taget har gjort et heldigt Valg. Ved sin Bortreise havde han allerede besørget endel Varianter optagne efter Membranerne AM. Fol. Nr. 152 (i Udgaven betegnet B), Nr. 556 A, 4^{to} (C) og Nr. X. i M. de la Gardie's Samling i Upsala (D), hvilken sidste i dette Æie-med var skaffet tilstede her paa Universitetsbibliotheket. Mit Arbeide ved Udgaven var saaledes, saafremt den hele Plan ikke skulde forandres, indskrænket til at fuldstændiggjøre det Begyndte.

Foruden de anførte Membraner findes der over 30 Haandskrifter af Grettars Saga, dels her paa Universitetsbibliotheket og det kongelige Bibliothek, hvoriblandt 2 yngre Membraner, dels paa det kongelige Bibliothek i Stockholm; som Følge af den oprindelige Plan ere disse Haandskrifter ikke benyttede ved Udgaven.

Løvrigt ere alle de herværende Haandskrifter af Grettars Saga af et yngre Slags, hvilket tydelig fremgaar af flere

Grunde, og det samme er uden Tvivl Tilfældet med dem, som findes i Stockholm.

Tidsbestemmelserne Side 173 fremstilles paa to Maader i Haandskrifterne, og med Hensyn hertil kunde de inddeles i 2 Klasser. I Modsætning til Udgaven anføres her i saa Henseende AM. Nr. 152 Fol. Ved derimod at betragte Fremstillingsmaaden i hele Sagaen i og for sig, vil der findes i det mindste 8 forskellige Bearbejdelser, uden at der dog kan siges, at Meningen hovedsagelig er forskjellig.

Afdøde Dr. Egilsson har redigeret Versene i Text-Udgaven.

Gretters Saga er en Gang før udgivet, nemlig i B. Markusens Sagasamling, Hol. 1756. 4^o.

Nærværende Oversættelse af Gretters Saga har jeg søgt at gjøre saavidt muligt brugbar.

En dansk Oversættelse af den egentlige Gretters Saga, af Torfæus, findes i Nr. 1019 F i gammel kongelig Manuskriptsamling paa det kongelige Bibliothek, hvilken Oversættelse jeg ikke har benyttet.

I P. E. Müllers Sagabibliothek, Kjöbenhavn 1817, 8^o, I. B., Side 249—263, findes nogle oplysende Bemærkninger om Gretters Saga.

G. Thordarson.

(Midlertidigt Titelblad.)

G R E T T I S S A G A ,

udgivet

for det nordiske Literatur-Samfund

af

G. MAGNUSSON og G. THORDARSON.

Förste Hefte.

KJÖBENHAVN.

TRYKT I DET BERLINGSKE BOGTRYKKERI.

1853.

Midlertidigt Forord.

Nærværende Saga er udgivet efter Skindbogen Nr. 551 a, 4to, i den Arna-Magnæanske Haandskriftsamling, sammenholdt med A-M. Nr. 556 a, 4to, (C), Nr. 152, Fol., (B), og Nr. X i M. de la Gardie's Samling i Upsala (D).

Andet Hefte skal indeholde: en dansk Oversættelse tilligemed Register over Persons- og Stedsnavne, samt Titelblad og Fortale til det Hele.

Følgende Trykfeil har jeg bemærket: Side 5^s mættum f. møettum; nederst paa samme Side 11^r f. 9^r; 10¹⁴ ymsum f. ýmsum; nederst paa samme Side ölheila f. ölheita; 12³⁹ islands f. Íslands;

14⁹ ;) *f.*); — 14²⁷ frækinn *f.* frækinn; 15³¹ fræknastr *f.* fræknastr; 27³⁰ Torfii *f.* Torfi; 34¹¹ takreins *f.* takreins; 36³¹ Haramð *f.* Haramsö; 39⁷ á *f.* at; 40¹⁷ háleyskir *f.* háleygskir; 44¹⁷ svarfast *f.* svarfast; 45²⁶ hörfuði *f.* hörfuðu; 49²⁸ gjöri *f.* gjörði; 52²⁷ hvart *f.* hvárt; 55²⁸ orði *f.* orð; 73¹⁰ Tvíðægri *f.* Tvíðægri; 108³⁰ kendu *f.* kenndu.



1. **Ö**nundr hét maðr; hann var Úfeigsson þurlufótar, Ívarssonar beytils. Önundr var bróðir Guðbjargar, móður Guðbrands kúlu, föður Ástu, móður Ólafs konungs hins helga. Önundr var upplenzkr at móðurætt, en föðurkyn hans var mest um Rogaland ok Hörðaland. Önundr var víkingr mikill, ok herjaði vestr um haf. Með hánum var í hernaði Báلكi Blængsson af Sótanesi, ok Ormr hinn auðgi; Hallvarðr hét hinn þriðl fèlagi þeirra; þeir höfðu fimm skip, ok öll vel skipuð. Þeir herjuðu um Suðreyjar; ok er þeir kvámu í Barreyjar, var þar fyrir konungr sá, er Kjarvalr hét; hann hafði ok fimm skip. Þeir lögðu til bardaga við hann, ok varð þar hörð hrið; váru Önundar menn hinir áköfustu. Fèll margt af hvárumtveggja; en svá lauk, at konungr flýði einskipa. Tóku menn Önundar þar bæði skip ok fè mikit, ok sátu þar um vetrinn. Þrjú sumur herjuðu þeir um Írland ok Skotland; síðan fóru þeir¹ til Noregs.

2. Penna tíma var úfriðr mikill í Noregi; brauzt þar til ríkis Haraldr lúfa, son Hálfdanar svarta. Hann var áðr konungr á Upplöndum². Síðan fór hann norðr í land ok átti³ þar margar orrustur, ok hafði jafnan sigr⁴. Herjaði hann svá suðr eptir landinu, ok lagði undir sik, hvar sem hann fór; en er hann kvam upp⁵ á Hörðaland, kvam í móti hánum múgr ok margmenni. Váru þar formenn Kjötvi hinn auðgi ok

¹) *optaget* efter B, C. ²) *Hele Sætningen er optagen* efter B. Hann ræð Ari Upplöndum, C, hans raðð konung, A. ³) saal. B, C. hann, tilf. A. ⁴) *de sidste 4 Ord tilføiede* efter B, C. ⁵) suðr, B.

þórir haklangr¹, ok þeir Suðrrýgirnir ok Stúlki² konungr. Geirmundr heljarskinn var þá fyrir vestan haf, og var hann eigi við þenna bardaga, ok þó átti hann ríki á Hörðalandi³. Þetta haust kvámu þeir vestan um haf, Önundr ok hans fèlagar; en er þeir fréttu þat, Þórir haklangr ok Kjötvi konungr, þá sendu þeir menn til móts við þá, ok báðu þá liðs ok hētu þeim sæmdum. Ræðust þeir þá í lið með þeim Þóri, því at þeim var mikil forvitni á at reyna sik, og sögðust þeir vildu þar vera, sem ströngust væri orrustan. Fundr þeirra Haralds konungs varð á Rogalandi⁴, í firði þeim, er heitir í Hafsfirði; höfðu þeir hvárirtveggja mikit lið. Þessi orrusta⁵ hefir einhver mest verit í Noregi; koma hær ok við flestar sögur, því at frá þeim er jafnan flest sagt, er sagan er helzt frá gör. Kvam þar ok lið um allt land, ok margt ór öðrum löndum ok fjöldi víkinga. Önundr lagði skip sitt á annat⁶ borð skipi Þóris haklangs; var þat mjök í miðjum hernum. Haraldr konungr lagði at skipi Þóris haklangs, því at Þórir var hinn mesti berserkr ok fullhugi. Var þar hin hardasta orrusta af hvárumtveggja. Þá hæt konungr á berserki sína til framgöngu; þeir váru kallaðir Úlfhæðnar, þá bitu engi járn; ok er þeir geystust fram, þá hëlzt ekki við. Þórir varðist alldjarfliga, ok fèll á skipi sínu með mikilli hreysti. Var þá hroðit með stöfnum⁷ skipit, ok höggvit ór tengslum; seig þat þá aptr millum skipanna⁸. Lögðu þá konungsmenn at skipi Önundar; hann var fram á skipinu, ok harðisk drengiliga. Þá mæltu konungsmenn: sá gengr fast fram í⁹ söxin; látum hann hafa

1) hökulangr, B, höklangr, D. 2) optaget efter B, C; Aer er et Hul i A for omtrent 6 Bogstaver. 3) efter Landnama: Rogaland. 4) Hörðalandi, A.

5) Aer mangler et Blad i A. Næste Side begynder med Ordene: leggja 5 skip o. s. v. See Side 817. Texten er tagen efter C. 6) tilf. B. 7) milll stafna, D.

8) ok skutu þeir því út í millum skipanna, D. 9) á, i Stedet for fram i, D.

nökkurar minjar, at hann hafi komit í bardagann. Önundr stóð út á borðit öðrum fœti, ok hjó til manns, ok í því var lagt til hans spjóti; ok er hann bar af sèr lagit, kiknaði hann við. Þá hjó einn af stafnbúum konungs til Önundar, ok kvam á fótinn fyrir neðan knè, ok tók af fótinn. Önundr varð þegar úvígr. Fèll þá mestr hluti liðs á skipi hans. Önundi varð komit á skip til þess manns, er Þrándr hét; hann var Bjarnarson, bróðir Eyvindar austmanns. Hann var í móti Haraldi konungi, ok lá á annat borð skipi Önundar. Þessu næst brast meginflóttinn. Þeir Þrándr ok aðrir víkingar höfðu sik í brott, hverr sem mátti, ok sigldu vestr um haf. Önundr fór með hánum, ok Báлки, ok Hallvarðr súgandi. Önundr varð græddr, ok gekk við trèfót síðan alla æfi; var hann af því kallaðr Önundr trèfótr, meðan hann lifði.

3. Þá váru fyrir vestan haf margir ágætir menn, þeir er flýit höfðu óðul sín ór Noregi fyrir Haraldi konungi; því at hann gördi alla útlæga, þá er í móti hánum höfðu barizt, ok tók undir sik eignir þeirra. Þá er Önundr var gróinn sára sinna, fóru þeir Þrándr til móts við Geirmund heljarskinn, því at hann var þá frægastr af víkingum fyrir vestan haf, ok spurðu, hvárt hann vildi nökkut leita aptr til ríkis þess, er hann átti á Hörðalandi, ok buðu hánum fylgd sína; þóttust þeir eiga þar eptir eignum sínum at sjá, því at Önundr var stórættaðr ok ríkr. Geirmundr kvað þá orðinn svá mikinn styrk Haralds konungs, at hánum þótti þess lítil ván, at þeir fengi þar sœmdir með hernaði, er þá fengu menn úsigr, er at var dreginn nálíga allr landslýðr; kvezt ok eigi nenna at görast konungsþræll, ok biðja þess, er hann átti sjálfr; kvezt heldr mundu leita sèr annarra forráða¹; var hann þá ok af æskuskeiði. Fóru þeir Önundr

¹) forlaga, B.

þá aptr til Suðreyja, ok hittu þar marga vini sína. Úfeigr hèt maðr, ok var kallaðr grettir; hann var sonr Einars Ölvissonar barnakarls. Hann var bróðir Óleifs breiðs, föður Þormóðar skapta. Steinúlfr hèt ok sonr Ölvis barnakarls, faðir Unu, er átti Þorbjörn laxakarl. Steinmóðr var enn sonr Ölvis barnakarls, faðir Konáls, föður Áldísar¹ hinnar barreyksu². Son Konáls var Steinmóðr, faðir Halldóru, er átti Eilífr, son Ketils einhenda. Úfeigr grettir átti Ásnýju Vestarsdóttur, Hængssonar. Ásmundr skegglauss ok Ásbjörn váru synir Úfeigs grettis; en dótr hans váru þær Áldís ok Ása ok Ásvör. Úfeigr hafði stokkit vestr um haf fyrir úfriði Haralds konungs, ok svá Þormóðr skapti, frændi hans, ok höfðu með sér skuldalið sitt. Þeir herjuðu um Skotland, ok víða fyrir vestan haf. Þrándr ok Önundr tréðótr ætluðu vestr til Írlands á fund Eyvindar austmanns, bróður Þrándar. Hann hafði landvörn fyrir Írlandi. Móðir Eyvindar var Hlíf, dóttir Hrólfs Ingjaldssonar, Fróðasonar konungs, en móðir Þrándar var Helga, dóttir Öndotts kráku. Björn hèt faðir þeirra Eyvindar ok Þrándar, son Hrólfs frá Ám. Hann stökk ór Gautlandi fyrir þat, er hann brenndi inni Sigfast, mág Sölvers³ konungs. Síðan hafði hann farit til Noregs, ok var um vetrinn með Grími hersi, syni Kolbjarnar sneypis; hann vildi myrða Björn til fjár. Þaðan fór Björn til Öndotts kráku, er bjó í Hvinisfirði⁴ á Ögðum. Hann tók vel við Birni, ok var hann með hánum á vetrum, en í hernaði á sumrum, þar til er Hlíf lézt, kona hans. Eptir þat gipti Öndottr Birni Helgu dóttur sína, ok lét Björn þá af herferðum. Eyvindr hafði þá tekit við herskipum föður síns, ok var nú orðinn höfðingi mikill fyrir vestan haf. Hann átti Raförtu, dóttur Kjarvals Írakonungs. Þeirra

1) Ásdísar B, D. *Efter Landnama*; Áldís.

2) bareysku, C, D.

3) Sörla, D.

4) Hvammsfirði, D.

synir váru þeir Helgi hinn magri, ok Snæbjörn. En er þeir Þrándr ok Önundr kvámu í Suðreyjar; fundu þeir þá Úfeig gretti ok Þormóð skapta, ok gördist með þeim vinátta mikil, því at hverr þóttist annan ór helju heimt hafa, þann er eptir hafði verit í Noregi, meðan úfriðr var sem mestr¹. Önundr var hljóðr mjök; ok er Þrándr fann þat, spurði hann eptir, hvat hánúm bjó í skapi. Önundr svarar ok kvað vísu:

Glatt er-at mēr, sízt mættum
[margt hremmir til snemma]
(oss stóð geigr af gýgi)
galdri ellþrimu (skjaldar).
Hygg ek, at þegnum þykki
(þat er mest) koma flestum
(oss til yndississu
einhlítt) til mín lítið.

Þrándr kvað hann þar mundu þykkja röskvan mann, sem hann væri þá helzt. Er þær sá til, at staðfesta ráð þitt ok kvángast; skal ek þar til leggja orð mín ok liðsinni, ef ek veit, hvar þú horfir á. Önundr kvað hánúm drengiliga fara; en kvað þó horft hafa vænna um kvánföngin, þau er slægr væri til. Þrándr svarar: Úfeigr á dóttur, er Ása heitir; megu vit þar til vikja, ef þú vilt. Önundr læzt þat ok vilja. Síðan töluðu þeir þetta við Úfeig. Hann svarar vel, og kvezt vita, at maðr var stórættaðr ok ríkr at lausafè; en jarðir hans legg ek údyrt; þykki mēr hann ok eigi heill til ganga, en dóttir mín er barn at aldri. Þrándr kvað Önund röskvara, en marga þá, er heilfættir væri; ok með liðveizlu Þrándar var þessu keypt. Skyldi Úfeigr gefa dóttur sinni heiman lausafè; því at jarðir þær, sem í Noregi váru,

¹) Her har D's *Afskriver* sprunget, som det synes, eet Blad over, idet her følger umiddelbart paa: Høst þegar af Suðreyjum o. s. v. See Side 117.

vildu hvárigir fê kaupa. Litlu síðar fékk Þrándr dóttur Þormóðar skapta. Skyldu þær sitja í festum þrjá vetr. Síðan fóru þeir í hernað á sumrum, en váru í Barreyjum á vetrum.

4. Vigbjóðr ok Vestmarr hétu víkingar tveir; þeir váru suðreyskir, ok lágu úti bæði vetr ok sumar. Þeir höfðu þrettán skip, ok herjuðu mest um Írland, ok gördðu mörg illvirki, þar til er Eyvindr austmaðr tók þar landvörn. Síðan stukku þeir í Suðreyjar, ok herjuðu þar, ok allt inn í Skotlandsfjörðu. Þeir Þrándr ek Önundr fóru til móts við þá, ok spurðu, at þeir höfðu siglt inn til eyjar þeirrar, er Bótz¹ hêt. Nú koma þeir Önundr þar með fimm skipum; ok er víkingar sjá skip þeirra, ok vita, hversu mörg eru, þykkjast þeir hafa nógan liðsafla, ok taka til vápna sinna, ok leggja skip sín millum hamra tveggja. Þar var mjótt sund ok djúpt; mátti þar einu megin at sækja, ok eigi fleirum skipum, en fimm senn. Önundr var manna vitrastr, ok lét hann leggja fimm skip fram í sundit, svá at þeir máttu þegar láta síga á² hömlu, er þeir vildu, því at rúmsævi var mikit at baki þeim. Var ok hólmr nökkurr á annat borð; lét hann þar liggja undir eitt skipit, ok færðu þeir grjót mikið fram á hamarinn, þar er eigi mátti sjá af skipunum. Víkingar lögðu at alldjarfliga, ok þóttu hinir kvíddir³. Vigbjóðr spurði, hverir þessir væri, er þar váru svá kvíðir. Þrándr segir, at hann var bróðir Eyvindar austmanns; ok síðan er hær félagi minn, Önundr tréfótr. Þá hlógu víkingar, ok mæltu þetta:

Tröll hafi tréfót allan,

tröllin steypi þeim öllum!

Ok er oss þat fásæð, at þeir menn fari til orrustu, er ekki mega sèr. Önundr kvað þat eigi vita mega, fyrr en reynt væri. Eptir þat lögðu þeir saman skipin. Tókst

¹) Bót, B, D.

²) Ór, C.

³) kemnir í kvíar (stilli, B), C.

⁴) tilf. C.

þar mikill bardagi, ok gengu hvárirtveggja vel fram. Ok er festist bardaginn, lét Öundur sigast at hamrinum; ok þá er víkingar sá þat, hugðu þeir, at hann myndi flýja vilja, ok lögðu at skipi hans, ok undir hamarinn, sem þeir máttu við komast. Í því bili kvámu þeir fram¹ á hjargit, er til þess váru settir; færðu þeir á víkingana svá stórt grjót, at ekki hélzt við. Föll þá fjöldi liðs af víkingum, en sumir meiddust, svá at eigi váru vápnfærir. Þá vildu víkingar frá leggja, ok máttu eigi, því at skip þeirra váru þá komin þar sem mjóst var sundit. Þröngdi þeim þá bæði skipin ok straumur; en þeir Öundur sóttu at með kappi, þar er Vígbjóðr var fyrir; en Þrándr lagði at Vestmari, ok vannst þar lítið at. Þá er fækkaðist fólkit á skipi Vígbjóðs, reðu menn Öundar þar² til uppgöngu, ok hann sjálfr. Þat sá Vígbjóðr ok eggjaði með ákafa lið sitt. Snèri hann þá í móti Öundi, ok stukku flestir frá. Öundur bað sína menn sjá, hversu færi með þeim; því at Öundur var rammr at afli. Þeir skutu stubba nökkurum undir knè Öundi, ok stóð hann heldr fast. Víkingrinn sótti aptan eptir skipinu, allt þar til er hann kvam at Öundi ok hjó til hans³ með sverði, ok kvam í skjöldinn, ok tók af þat er nam. Síðan hljóp sverðit í stubbann, þann er Öundur hafði undir knènu, ok varð fast sverðit. Vígbjóðr laut, er hann kippti at sèr sverðinu. Í því hjó Öundur á öxlina, svá at af tók höndina. Þá varð víkingrinn úvígr. Þá er Vestmarr vissi, at félagi hans var fallinn, hljóp hann á þat skip, er yzt lá, ok flýði, ok allir þeir, er því náðu. Eptir þat rannsökuðu þeir valinn. Vígbjóðr var þá kominn at bana. Öundur gekk at hánun, ok kvað:

Sjáðu, hvárt sár þín blæða;
sáttu nökkut mik hrökkva?

1) *MS. C.* 2) *MS. B.* 3) *saal. B. C;* at Öundi, A.

auðslöngvir fékk engva
einfœttir af þèr skeinu.
Meirr er mörgum snerru
málskálp lagit Gjálpar
brjót (er-at þegn í þrautir
þrekvandr), en hyggjandi.

Þeir tóku þar herfang mikit, ok fóru aptr í Barreyjar um haustið.

5. Annat sumar eptir¹ bjuggust þeir at fara vestr til Írlands. Þá reðust þeir Bálki ok Hallvarðr vestan um haf, ok fóru út til Íslands, því at þaðan váru sagðir landskostir góðir. Bálki nam land í Hrútafirði; hann bjó á Bálkastöðum hvárumtveggja. Hallvarðr nam Súgandafjörð, ok Skálavík til Stiga, ok bjó þar. Þeir Þrándr ok Önundr kvámu á fund Eyvindar austmanns, ok tók hann vel við bróður sínum; en er hann vissi, at Önundr var þar kominn, þá varð hann reiðr, ok vildi veita hánum atgöngu. Þrándr bað hann eigi þat göra; kvað þat eigi standa, at göra úfrið norrœnum mönnum, allra sízt þeim, er með engri úspekt fara. Eyvindr kvað hann farit hafa fyrr, ok gört úfrið Kjarval konungi; sagði hann nú þess skyldu gjalda. Áttu þeir bræðr lengi um þetta at tala, allt þar til er Þrándr kvað eitt skyldu ganga yfir þá Önund báða. Lèt þá Eyvindr sefast. Dvöldust þeir þar lengi um sumarit, ok fóru þeir með Eyvindi í herfarir. Þótti hánum Önundr hinn mesti hreystimaðr. Fóru þeir til Suðreyja um haustið. Gaf Eyvindr Þrándi arf allan eptir föður þeirra, ef Björn andaðist fyrr en Þrándr. Váru þeir nú í Suðreyjum, þar til er þeir kvæntust, ok nökkura vetr síðan.

6. Þat bar næst til tíðinda, at Björn andaðist, faðir Þrándar; ok er þat frètti Grímr hersir, fór hann til móts

¹⁾ 1147. c.

við Öndott kráku, og kallaði til fjárins eptir Björn; en Öndottr kvað Þránd eiga arf eptir föður sinn. Grímr kvað Þránd fyrir vestan haf, en Björn gauzkan at ætt, ok kvað konung eiga at erfa alla útlenda menn. Öndottr kvazt halda mundu fenu til handa Þrándi dóttursyni sínum. Fór Grímr við þat á brott, ok fækk ekki af fjárheimtunni. Þrándr spurði nú lát föður síns, ok bjóst þegar af Suðreyjum, ok Önundr tréfótr með hánum; en þeir Úfeigr grettir ok Þormóðr skapti fóru út til Íslands með skuldalið sitt, ok kvámu út á Eyrum fyrir sunnan land, ok váru hinn fyrsta vetr með Þorbirni laxakarli. Síðan námu þeir Gnúpverjahrepp. Úfeigr nam hinn yzta¹ hlut, milli þverár ok Kálfár; hann bjó á Úfeigsstöðum hjá Steinsholti; en Þormóðr nam hinn eystra hlut, ok bjó hann í Skaptaholti. Dætr Þormóðar váru þær Þórvör móðir Þórodds goða á Hjalla, ok Þóru², móðir Þorsteins goða, föður Bjarna hins spaka. Nú er at segja frá þeim Þrándi ok Önundi, at þeir sigldu vestan um haf til Noregs, ok fengu svá mikit hraðbyri, at engi njónn fór um ferð þeirra, fyrr en þeir kvámu til Öndotts kráku. Hann tók vel við Þrándi, ok sagði hánum tilkall Gríms hersis um arf Bjarnar. Lízt mér betr komit, frændi, at þú erfir föður þinn, en konungsþrælar. Hefir þér ok gæfusamliga til tekizt, er engi veit um ferðir þínar; en grunar mik, at Grímr stefni at öðrumhvárum okkar, ef hann má. Vil ek, at þú takir arfinn undir þik, ok hafir þik til annarra landa. Þrándr kvezt svá göra mundu. Tók hann þá við fenu, ok bjóst sem skyndiligast í brutt ór Noregi. Áðr Þrándr sigldi á haf, þá spurði hann Önund tréfót, hvárt hann vildi eigi leita til Íslands. Önundr kvezt áðr vilja sinna frændr sína ok vini suðr í landi. Þrándr mælti: þá munu vit nú skilja. Vilda ek, at þú sinnaðir frændum

1) vestra, D. 2) Þorvör, D, Þoranna, C.

mínum; því at þangat man hefndum snúit, ef ek komumst undan. Man ek fara út til Íslands, ok svá vilda ek, at þú færir. Önundur hét því. Skildu þeir með kærleikum. Fór Pránder út til Íslands. Tóku þeir Úfeigr ok Þormóðr skapti vel við hánum. Pránder bjó í Pránderholti; þat er fyrir vestan Þjórsá.

7. Önundur fór suðr á Rogaland, ok hitti þar marga frændr sína ok vini. Dvaldist hann þar á laun með þeim manni, er Kolbeinn hét. Hann spurði, at Haraldr konungr hafði tekit undir sik eignir hans, ok skipat þeim manni, er Hárekr hét; hann var ármaðr konungs. Önundur fór til hans um nátt, ok tók hús á hánum. Var Hárekr til höggs leiddr. Önundur tók þar allt lausafé, þat er þeir náðu, en brenndu bæinn. Hafðist hann þá við í ymsum stöðum um vetrinn. Þetta haust drap Grímr hersir Öndott kráku, fyrir þat er hann náði eigi fenu til handa konungi; en Signý, kona Öndotts, bar á skip allt lausafé þeirra þegar hina sömu nátt, ok fór með sonu sína, Ásmund ok Ásgrím, til Sighvats föður síns. Litlu síðar sendi hón sonu sína í Sóknadal¹, til Hèðins föstra síns, ok undu þeir þar litla bríð, ok vildu fara aptr til móður sinnar. Fóru þeir síðan, ok kvámu til Ingjalds tryggva í Hvini at jólum. Hann tók við þeim fyrir áeggjan Gyðu konu sinnar. Váru þeir þar um vetrinn. Um várit kvam Önundur norðr á Agðir, því at hann hafði spurt, at Öndotr var drepinn; en er hann fann Signýju, spurði hann hana, hverja liðveizlu þau vildi af hánum þiggja. Hón sagði, at þau vildi gjarna hefna Grími hersi fyrir víg Öndotts. Var þá sent eptir Öndotts sonum; ok er þeir fundu Önund tréfót, lögðu þeir saman lag² sitt, ok hældu fröttum til³ um athafnir Gríms. Um sumarit var ölhita⁴ mikil at Gríms, því at hann hafði boðit

1) Sokkadal, D, Snókadal, B. 2) lið, B, D. 3) haf, B, C. 4) ölheita, B, C, D.

heim Auðuni jarli; ok er þat frétu þeir Önundr ok Öndotts synir, fóru þeir til bæjar Gríms, ok báru þar eld at húsum, því at þeir kvámu á úvart, ok brenndu Grím hersi inni, ok nær þrjátigi manna. Þeir tóku þar marga góða gripi. Önundr fór til skógar; en þeir bræðr tóku bát Ingjalds fóstara síns, ok ræru í brutt, ok lágu í leyni skammt frá böenum. Auðunn jarl kvam til veizlu, sem ætlat var, ok saknaði þar vinar í stað. Safnaði hann at sèr mönnum, ok dvaldist þar nökkurar nætr, ok fréttist ekki til Önundar ok þeirra félaga. Jarl svaf í lopti einu við þriðja mann. Önundr vissi öll tíðindi af böenum, ok sendi eptir þeim bræðrum; ok er þeir fundust, spurði Önundr, hvárt þeir vildu heldr geyma bæinn, eðr ganga at jarli. Þeir kjöru at ganga at jarli. Þeir skutu stokki á loptsdyrnar, svá at hurðin brotnaði. Síðan greip Ásmundr þá tvá, er váru með jarli, ok rak niðr svá hart, at þeim hëlt við bana. Ásgrímr hljóp at jarli, ok bað hann greiða sèr föðurgjöld, því at hann hafði verit í atfötr ok ráðum með Grími hersi, þá er Öndottr var drepinn. Jarl kvezt ekki sè hafa hjá sèr, ok bað fresta um gjaldit. Ásgrímr setti þá spjótsoddinn fyrir brjóst jarli, ok bað hann greiða í stað. Jarl tók þá men af hálsi sèr, ok þrjá gullbringa ok guðvefjarskikkju¹. Ásgrímr tók við fenu, ok gaf jarli nafn, ok kallaði hann Auðun geit. Þá er bæendr ok héraðsmenn urðu varir við, at úfriðr myndi at kominn, gengu þeir út, ok vildu veita lið jarli. Varð þar hörð hríð, því at Önundr hafði margt manna. Þar fellu margir góðir bæendr ok hirðmenn jarls. Nú kvámu þeir bræðr, ok sögðu, hversu færit hafði með þeim jarli. Önundr kvað þat illa, er jarl var eigi drepinn; væri þat Haraldi konungi hefnd nökkur fyrir þat, er vèr höfum misst fyrir hán um sè ok frændr vára². Þeir kváðu jarli þetta meiri smán; ok fóru síðan á

¹) gullveðvarskikkju, D.

²) sè ok f. v. 114f. C.

brutt, ok inn í Súrðadal¹ til Eiríks ölfuss², lends manns. Hann tók við þeim um vetrinn öllum. Þá höfðu þeir samdrykkju um jólin við þann mann, er Hallsteinn hét, ok kallaðr hestr, ok veitti Eiríkr fyrr, vel ok trúliga. Síðan veitti Hallsteinn, ok varð þeim þá at áskilnaði. Hann laust Eirík með dýrshorni. Eiríkr gat eigi hefnt sín, ok fór heim við þat. Þetta líkaði stórilla Öndotts sonum; ok nökkuru síðar fór Ásgrímr til bæjar Hallsteins, ok gekk inn einn, ok veitti Hallsteini mikinn áverka. Þeir hlupu upp, sem inni váru, ok sóttu at Ásgrími. Ásgrímr varðist vel, ok kvamst ór höndum þeim í myrkrinu; en þeir þóttust drepa hann. Þat frétu þeir Önundr ok Ásmundr, ok hugðu, at Ásgrímr væri dauðr, ok þóttust ekki mega at göra. Ræð Eiríkr þeim, at þeir leitaði til Íslands; kvað þeim eigi duga mundu, at vera þar í landi, þegar konungr mætti sèr svá við koma. Þeir görðu svá; bjuggust nú til Íslands, ok hafði sitt skip hvárr þeirra. Hallsteinn lá í sárum, ok læzt, áðr en þeir Önundr sigldu. Kolbeinn ræzt í skip með Önundi, sá er fyrr er getið.

8. Þeir Önundr ok Ásmundr létu í haf, er þeir váru búnir, ok höfðu samflota. Þá kvað Önundr þetta:

Þóttu ek hæfr at brotta
hreggvindi fyrr seggjum,
þá er geirhríðar gnúði
grand hvasst, ok Súgandi.
Nú verðr á ske skorðu
(skáldi sígr) at stíga
út með einum fæti
Íslands á vit (þvísa).

Þeir höfðu útivist harða ok veðr þver mjök af suðri. Bar þá norðr í haf. Þeir fundu Ísland, ok váru þá komnir

¹) Sýnnadal, B. ²) Ölvísonar, B, D.

fyrir norðan Langanes, er þeir kenndust við. Þá var svá skammt í milli þeirra, at þeir töluðust við. Sagði Ásmundr, at þeir myndi sigla til Eyjafjarðar, ok því játtuðu hváirtveggja. Beittu þeir þá undir landit. Þá tók veðrit at styrma af landsuðri. En er þeir Önundr lögðu í nauðbeitu, þá lestist ráin. Felldu þeir þá seglit, ok í því rak þá til hafs undan. Ásmundr kvæmst undir Hrísey, og beið til þess, er hán um byrjaði inn á¹ Eyjafjörð. Hán um gaf Helgi hinn magri Kræklingahlíð alla. Hann bjó at Glerá hinni syðri. Ásgrímr bróðir hans kvam út nökkurum vetrum síðar. Hann bjó at Glerá hinni nyrðri. Hann var faðir Elliðagríms, föður Ásgríms Elliðagrímssonar.

9. Nú er at segja frá Önundi tréfót, at þá rak undan nökkur dægr. Síðan gekk veðrit á haf. Sigldu þeir þá at landinu. Kenndust þá við þeir er áðr höfðu farit, at þeir vátu komnir vestr um Skaga. Sigldu þeir þá inn á Strandafloa, ok nær suðrströndunum. Þá ræru at þeim sex menn á teinæringi, ok kölluðu upp á hafskipit, hverr fyrir ræði. Önundr nefndi sik, ok spurði, hvaðan þeir væri. Þeir kváðust vera húskarlar Þorvalds frá Dröngum. Önundr spurði, hvárt numin væri öll lönd um Strandirnar. Þeir kváðu lítið únumit á innströndum, en ekki norðr þangat. Önundr spurði skipverja sína, hvárt þeir vildi leita fyrir vestan landit, eða hafa slíkt, er þeim var til vísat. Þeir kjöru at kanna landit fyrst. Sigldu þeir þá inn eptir flóanum, ok lögðu fyrst á víkina fyrir Árnesi; skutu þar báti, ok ræru til lands. Þá bjó þar ríkr maðr, Eiríkr snara, er land hafði numit í milli Ingólfsfjarðar² ok Úsfæru í Veðileysu. En er Eiríkr vissi, at Önundr var þar kominn, bauð hann hán um af sér at þiggja slíka hluti, sem hann vildi; en kváð lítið þat, er eigi væri numit áðr. Önundr

¹⁾ gaf innbyr í, D. ²⁾ Ingólfsfjörð, D.

kvezt sjá vilja fyrst, hvat þat væri. Fóru þeir þá inn yfir fjörðu, ok er þeir kvámu inn til Úfœru, mælti Eiríkr: hér er á at líta; hëðan frá er únumit, ok inn til landnáms Bjarnar. Þar gekk fjall mikit fram þeim megin fjarðanna, ok var fallinn á snjár. Önundr leit á fjallit, ok kvað vísu þessa:

Rèttum gengr hin ranga
 (rennr sæfarinn) æfi
 (fákr um fold ok ríki
 fleinhvessanda þessum;)
 hefi ek lönd ok fjöld frænda
 flýit, en hitt er nýjast:
 kröpp eru kaup ef hreppig
 Kaldbak, en ek læt akra.

Eiríkr svarar: margr hefir svá mikils misst í Noregi, at menn fá þess eigi bætr. Hygg ek ok, at numin sè flestöll lönd í meginhërudum; kann ek því eigi at fýsa þik í brutt hëðan. Man ek þat halda, at þú hafir af mínum jörðum þat er þèr hentar. Önundr kvezt þat þiggja mundu; ok nam síðan land frá Úfœru, ok þær þrjár víkr: Byrgisvík ok Kolbeinsvík ok Kaldbaksvík allt til Kaldbakskleifar. Síðan gaf Eiríkr hánúm Veiðilausu alla, ok Reykjarfjörð, ok Reykjanes allt út þeim megin; en um rekann var ekki skilit, því at þeir váru svá nógir þá, at hverr hafði þat, er vildi. Önundr gördi bú í Kaldbak, ok hafði mannmargt; en er fè hans tók at vaxa, átti hann annat bú í Reykjarfirði. Kolbeinn bjó í Kolbeinsvík, ok sat Önundr um kyrrt nökkura vetr.

10. Önundr var svá frækinn maðr, at fáir stóðust hánúm, þótt heilir væri; hann var ok nafnkunnigr um allt land af forellrum sínum. Þessu næst hófust deilur þeirra. Úfeigs grettis ok Þorbjarnar jarlakappa¹, ok lauk svá, at Úfeigr féll fyrir Þorbirni í Grettisgeil² hjá Hæli. Þar varð

¹) laxakaris, D. ²) Grettisgróf, B. D.

mikill liðsdráttir at eptirmáli með sonum Úfeigs. Var sent eptir Önundi tréfót, ok reið hann suðr um várit, ok gisti í Hvammi at Audar hinnar djúpauðgu. Hón tók allvel við hánum, því at hann hafði verit með henni fyrir vestan haf. Þá var Ólafr feilan, sonarson hennar, fullroskinn. Mjök var Auðr þá ellimóð. Hón veik á við Önund, at hón vildi kvæna Ólaf frænda sinn, ok vildi, at hann bæði Áldísar¹ hinoar barreysku. Hón var bræðrunga Ásu, er Önundr átti. Önundi þótti þat vænligt, ok reið Ólafr suðr með hánum; ok er Önundr hitti vini sína ok mága, þá buðu þeir hánum til sín. Var þá talat um málin, ok váru lögð til Kjalarnessþings, því at þá var enn eigi sett Alþingi. Síðan váru málin lágín í görd, ok kvámu miklar bætr fyrir vígin; en Þorbjörn jarlakappi² var sekr görr. Hans son var Sölmundr, faðir Sviðukára. Váru þeir frændr lengi utanlands síðan. Þrándr bauð heim Önundi ok þeim Ólafi, ok svá Þormóðr skapti³. Fluttu þeir þá bónordit Ólafs. Var þat auðsótt, því at menn vissu, hver rausnarkona Auðr var. Var þessu keypt. Riðu þeir Önundr heim við svá búit. Auðr þakkaði Önundi liðveizlu við Ólaf. Þetta haust fékk Ólafr feilan Áldísar¹ innar barreysku. Þá andaðist Auðr hin djúpauðga, sem segir í sögu Laxdæla.

11. Þau Önundr ok Ása áttu tvá sonu; hét enn ellri Þorgeirr, en inn yngri Úfeigr grettir. Litlu síðar andaðist Ása. Eptir þat fékk Önundr þeirrar konu, er Þórdís hét; hón var dóttir Þorgríms frá Gnúpi í Midfirði, ok skyld Miðtjardar Skeggja. Við henni átti Önundr þann son, er Þorgrímr hét; hann var snemma mikill maðr ok sterkr, búsyslumaðr mikill ok vitr maðr. Önundr bjó í Kaldbak til elli; hann varð sótt dauðr, og liggir í Tréfótshaugi. Hann hefir fræknastr verit ok fimastr einfættir maðr á Íslandi.

1) Áldísar, D. 2) Laxakarl, D. 3) Þormóði skapti, B. D.

Þorgrímr var fyrir sonum Önundar, þótt aðrir væri ellri; en er hann var hálfþritugr at aldri, þá hafði hann hærur í höfði; því var hann kallaðr hærukollr¹. Þórdís, móðir hans, giptist síðan norðr í Víðidal, Auduni skökli; þeirra son var Ásgeirr at Ásgeirsá. Þeir Þorgrímr hærukollr ok bræðr hans áttu eignir miklar allir saman, ok skiptu engu með sèr. Eiríkr bjó í Árnesi, sem fyrr var getið. Hann átti Álöfu, dóttur Ingólfs ór Ingólfsfirði. Flosi hét son þeirra; hann var efniligr maðr, ok átti marga frændr. Þá kvámu út hingat þeir bræðr, Ingólfr ok Úfeigr ok Eyvindr, ok námu þeir þá þrjá sjörðu, er við þá eru kenndir, ok byggðu þar síðan. Ólafr hét son Eyvindar; hann bjó fyrst í Eyvindarfirði, en síðan at Dröngum, ok var mikill maðr fyrir sèr. Engi varð áskilnaðr með mönnum þar, meðan hinir ellri menn lifðu; en þá er Eiríkr var látinn, þótti Flosa Kaldbeklingar eigi hafa lögligar heimildir á jörðum þeim, er Eiríkr hafði gefit Önundi. Af því görðist sundrþykki mikit meðal þeirra; en þó hældu þeir Þorgrímr, sem áðr. Ekki máttu þeir þá leika saman eiga. Þorgeirr var fyrir búi þeirra bræðra í Reykjarfirði, ok reri jafnan til fiska, því at þá vátu firðirnir² fullir af fiskum. Nú göra þeir ráð sitt í Víkinni. Maðr hét Þorfinnr; hann var húskarl Flosa í Árnesi. Þenna mann sendi Flosi til höfuðs Þorgeiri. Hann leyndist í naustinu. Þenna morgin bjóst Þorgeirr á sjá at róa, ok tveir menn með hánum, ok hét annarr Hámundr, en annarr Brandr. Þorgeirr gekk fyrstr; hann hafði á baki sèr leðrflösku, ok í drykk. Myrkt var mjök; ok er hann gekk ofan frá naustinu, þá hljóp Þorfinnr³ at hánum, ok hjó með öxi á milli herða hánum, ok sökk öxin ok skvakkadi⁴ við. Hann lét lausa öxina, því at hann

¹) hærukarl, D. ²) firðir allir, D. ³) her mangler eet Blad i D; det næste Blad begynder med fullt verð &c.

⁴) skvæði, B; skvattadi, C.

ætladi, at eigi mundi þurfa um at binda, ok vildi forða sér sem skjótast. Er þat af Þorfinni at segja, at hann hljóp norðr í Árnes, ok kvam þar áðr enn alljóst var, ok sagði víg Þorgeirs, ok kvezt mundu þurfa ásjá Flosa; kvað þat ok eitt til, at bjóða sættir; ok bœtir þat helzt vart mál, svá mikit sem at er orðit. Flosi kvezt fyrst mundu hafa frèttir; ok ætla ek, at þú sèrt allhræddr eptir stórvirkin. Nú er at segja frá Þorgeiri, at hann snaraðist við höggit, ok kom öxin í flöskuna, en hann varð ekki sár. Þeir leituðu ekki mannsins, því at myrkt var at. Reru þeir út eptir fjörðum, ok kvámu í Kaldbak, ok sögðu atburð þennan. Þeir gerðu at þessu kalls mikit, ok kölluðu hann Þorgeir flöskubak, ok svá hèt hann síðan. Þá var þetta kveðit:

Fyrr lauguðu frægir
fránhvítinga rítar
rausnarmenn í ranni
ræfrhvössu bensæfar;
nú rauð, sá er var víða
vómr frá tekinn sóma,
benjaskóðs af bleyði
bæði hlýr í sýru.

12. Í þann tíma kom hallæri svá mikit á Ísland, at ekki hefir jafnmikit komit. Þá tók af nálíga allan sjáfaralla ok reka. Þat stóð yfir mörg misseri. Á einu hausti urðu þangat sæhafa kaupmenn á hafskipi, ok brutu þar í vikinni. Flosi tók við þeim fjórum eða fimm. Steinn hèt sá, er fyrir þeim var. Víða vistuðust þeir þar um vikina, ok ætluðu at göra sér skip ór skipbrotunum, ok varð þeim þat úhægt. Skipit varð lítið til skutanna, en breitt um miðbyrðit. Um vart kom veðr mikit af norðri; þat hëlzt nær viku. Eptir veðrit könnuðu menn reka sína. Þorsteinn hèt maðr, er hjó á Reykjanesi. Hann fann hval rekinn

innan fram á nesinu, þar sem hæt á Rífskerjum; þat var reyðr mikil. Hann sendi þegar mann til Flosa í Vík, ok svá til næstu bæja. Einarr hæt sá maðr, er bjó at Gjögri; hann var landseti, Kaldbeklinga, ok skyldi geyma reka þeirra þeim megin fjarða. Hann varð varr við, at hvalrinn var rekinn. Hann tók þegar skip sitt, og reri yfir um fjörðuna til Byrgisvíkr. Þaðan sendi hann mann í Kaldbak; ok er þetta spurði Þorgrímr ok þeir bræðr, bjuggust þeir sem hvatast, ok váru tólf á teinæringi. Þeir Kolbeinssynir fóru ok með þeim, Ívarr ok Leifr, ok váru 6 saman. Allir bæendr, þeir er við komust, fóru til hvalsins. Nú er at segja frá Flosa, at hann sendi eptir frændum sínum norðr í Ingólfsfjörð ok Úfeigsfjörð, ok eptir Ólafi Eyvindarsyni, er þá bjó at Dröngum. Flosi kom fyrst, ok þeir Víkrmenn. Þeir tóku þegar til skurðar, ok var dreginn á land¹, sá er skorinn var. Þeir váru nær 20 menn í fyrstu; en skjótt fjölgadist fólkit. Í því komu Kaldbeklingar með 4 skip. Þorgrímr veitti tilkall til hvalsins, ok fyrirbauð Víkrmönnum skurð ok skipti ok brautflutning á hvalnum. Flosi bað hann sýna, ef Eiríkr hefði gefit Önundi trèfót með ákveðnum orðum rekann, ella kvezt hann mundu vígi verja. Þorgrímr þóttist liðfár, ok ræð því eigi til atgöngu. Þá reri skip innan yfir fjörðu, ok sóttu knálíga róðrinn. Þeir komu at brátt. Þar var Svanr af Hóli ór Bjarnarfirði, ok húskarlar hans. Ok þegar hann kom, bað hann Þorgrím eigi láta ræna sik; en þeir váru áðr vinir miklir, ok bauð Svanr hánnum lið sitt. Þeir bræðr kváðust þat þiggja mundu. Lögðu þeir þá at röskliga. Þorgeirr flöskubakr ræð fyrst upp á hvalinn at húskörlum Flosa. Þorfinnr, er fyrr var getið, skar hvalinn. Hann var fram við höfudit, ok stóð í spori, er hann hafði gört sér. Þorgeirr mælti: þar særi ek

¹) upp, *altf.* B.

þær öxi þína. Síðan hjó hann á hálsinn, svá at af tók höfuðit. Flosi var uppi á mölinni, er hann sá þetta. Hann eggjaði þá sína menn til móttöku. Nú berjast þeir lengi, ok veitti Kaldbeklingum betr. Fáir menn höfðu þar vápn, nema öxar þær, er þeir skáru með hvalinn, ok skálmir. Hrukku Víkmenn af hvalnum í fjöruna. Austmenn höfðu vápn, ok urðu skeinuhættir. Steinn stýrimaðr hjó fót undan Ívari Kolbeinssyni; en Leifr, bróðir Ívars, laust fella Steins í hel með hvalrifi. Þá var með öllu barit, því er til fékkst, ok fellu þar menn af hvárumtveggjum. Þessu næst kvámu þeir Ólafr frá Dröngum með mörgum skipum. Þeir veittu Flosa. Urðu Kaldbeklingar þá bornir ofrliði. Þeir höfðu áðr bláðit skip sín. Svanr bað þá ganga á skip sín. Létu þeir þá berast fram at skipunum. Víkmenn sóttu þá eptir; ok er Svanr var kominn at sjánum, hjó hann til Steins stýrimanns, ok veitti hán um mikinn áverka. Síðan hljóp hann á skip sitt. Þorgrímr særði Flosa miklu sári, ok komst við þat undan. Ólafr hjó til Úfeigs grettis, ok særði hann til úlífis. Þorgeirr þreif Úfeig í faug sér, ok hljóp með hann á skip. Reru þeir Kaldbeklingar inn yfir fjörðu. Skildi þá með þeim. Þetta var kveðit um fundinn:

Hörð, frá ek, heldr at yrði
hervápn at Rífskerjum,
mest því at margir lustu
menn slyppir hvalklyppum;
en málmgautar móti
mjök fast hafa kastað
(oss lízt ímun þessi
úknyttin) þvestslyttum.

Síðan varð komit á með þeim gríðum, ok lögðu þeir málin til alþingis. Veittu þeir Kaldbeklingum, Þóroddr goði ok Miðfjarðar-Skeggi ok margir Sunnlendingar. Varð Flosi sekr,

ok margir þeir, er at höfðu verit með hánum. Varð hánum þá feskylft mjök, því at hann vildi einn halda upp fébótum. Þeir Þorgrímr gátu eigi sýnt, at þeir hefði fê lagit fyrir jarðirnar ok rekann, er Flosi kærði eptir. Þorkell máni hafði þá lögsögn. Var hann þá beiddr órskurðar. Hánum kvezt þat lög sýnast, at nökkut hefði fyrir komit, þótt eigi væri fullt verð; því at svá gerði Steinvör hin gamla við Ingólf afa minn, at hón þá af hánum Rosmhvalanes allt, ok gaf fyrir heklu flekkótta, ok hefir þat aldri rift orðit; munu þar stærri rið í vera. En hær legg ek til ráð, segir hann, at skipt sê brotgeiranum, ok hafi hváirtveggju at jafnaði; síðan sê þat lögtekít, at hverr eigi reka fyrir sinni jörðu. Þetta var gört. Var þá svá skipt til, at þeir Þorgrímr létu Reykjarfjörð, ok allt út þeim megin, en þeir skyldu eiga Kamb. Úfeigr var bætt miklu fê. Þorfinnr var úgildir. Þorgeiri var bætt fyrir fjörráð. Síðan sættust þeir. Flosi ræzt til Noregsferðar með Steini stýrimanni, en seldi jarðir sínar í Víkinni Geirmundi hjúkatimbri¹. Bjó hann þar síðan. Skip þat, er kaupmenn höfðu gört, var mjök breiðvaxit. Þat kölluðu menn Trékylli², ok þar er Víkin við kennd. Á því fór Flosi utan, ok varð aptreka í Öxarfjörði. Þaðan af gerðist saga Böðmóðs ok Grímúlfs ok Gerpis.

13. Eptir þetta skiptu þeir Þorgrímr ok Þorgeirr bræðr fê með sêr; tók Þorgrímr lausafê, en Þorgeirr löndin. Ræzt Þorgrímr þá inn til Miðfjarðar, ok keypti land at Bjargi með ráði Skeggja. Þorgrímr átti Þórdísi, dóttur Ásmundar undan Ásmundargnúpi, er numit hafði Þingeyrasveit. Þau Þorgrímr ok Þórdís áttu son, er Ásmundr hét; hann var mikill maðr ok sterkr, ok vitr maðr, ok hærðr manna bezt. Hann hafði snemma hærur í höfði; því var hann kallaðr hærulangr eða hærulagðr³. Þorgrímr görðist þá búsyslumaðr

¹) hjúka, C, D.

²) Trékylting, D.

³) eða hærulagðr, u. B, D.

mikill, og hafði alla menn mjök í starfa, þá er með hánum váru. Ásmundr vildi lítt vinna, ok var fátt um með þeim sedgum. Fór svá þar til Ásmundr var roskinn at aldri. Þá beiddi Ásmundr fararefna af föður sínum. Þorgrímr kvað þau lítil verða mundu, ok fèkk hánum þó nökkut af slytjanda eyri. Fór Ásmundr þá utan, ok græddist hánum brátt fè. Hann sigldi til ýmissa landa, ok görðist hinn mesti kaupmaðr ok vellauðigr. Hann var vinsæll maðr ok skilríkr, ok átti marga frændr í Noregi, þá er göfgir váru. Á einu hausti vistaðist Ásmundr austr í Vík með göfgum manni, þeim er Þorsteinn hét. Hann var upplenzkr maðr at ætt, ok átti systur, er Rannveig hét; hón var hinn bezti kvennkostr. Þeirrar konu bað Ásmundr ok fèkk með ráði Þorsteins frænda hennar. Staðfestist Ásmundr þar um hríð, ok var vel virðr. Þau Rannveig áttu þann son, er Þorsteinn hét, manna fríðastr ok sterkr maðr, raddmaðr mikill, ok hár maðr á vöxt, ok nökkut seinligr í viðbragði, því var hann drómundr kallaðr. En er Þorsteinn var lítt á legg kominn, tók móðir hans sótt ok andaðist. Eptir þat festi Ásmundr eigi yndi í Noregi. Tóku þá móðurfrændr Þorsteins við hánum ok fè hans; en Ásmundr ræzt þá enn í sigling, ok varð nafnfrægr maðr. Ásmundr kom skipi sínu í Húnavatn. Þá var Þorkell krafla höfðingi yfir Vatnsdælum¹. Hann frétti útkvámu Ásmundar. Reið Þorkell þá til skips, ok bauð Ásmundi til sín. Þorkell bjó á Mársstöðum í Vatnsdal. Fór Ásmundr þangat til vistar. Þorkell var son Þorgríms kornsárgoða², hann var stórvitr maðr. Þetta var eptir útkomu Friðreks byskups, ok þeirra Þorvalds Koðráns-sonar. Þeir bjuggu þá at Lækjamóti, er þetta var. Þeir boðuðu kristni fyrst fyrir norðan land. Lèt Þorkell primsignast, ok margir menn með hánum. Margt bar til tíðinda um

¹) Vatnsdellingum, D. ²) Karms ríðdara goða, D, Karms argoða (arggoða C.) B, C.

sameign þeirra byskups ok Norðlendinga, þat er eigi kemr við þessa sögu. Með Þorkeli fæddist upp kona sú, er Ásdís hét; hón var dóttir Bárðar Jökulssonar, Ingimundarsonar hins gamla, Þorsteinssonar, Ketilssonar raums. Móðir Ásdísar var Áldís, dóttir Úfeigs grettis, sem fyrr er sagt. Ásdís var úgefin, ok þótti vera hinn bezti kvennkostr, bæði sakir ættar ok fjár. Ásmundi leiddist nú í siglingum. Vildi hann nú staðfestast á Íslandi. Hefir hann þá uppi orð sín, ok biðr þessar konu. Þorkell vissi górla skil á hánum, at hann var ríkr maðr ok ráðinn til fjárhalds; ok fór þat fram, at Ásmundr fékk Ásdísar. Görðist hann þá aldaviur Þorkells, ok búsyslumaðr mikill, lögvittr ok framgjarn. Litlu síðar andaðist Þorgrímr hærukollr at Bjargi. Tók Ásmundr arf eptir hann, ok bjó þar síðan.

14. Ásmundr hærulangr setti bú at Bjargi, mikit ok reisuligt, ok hafði mannmargt með sér. Hann var vinsæll maðr. Þessi váru börn þeirra Ásdísar. Atli var ellstr. Hann var gegn maðr ok gæfr, hægr ok hógværr; við hann líkaði hverjum manni vel. Annan son áttu þau, er Grettir var kallaðr. Hann var mjök úðell í uppvexti sínum; fátalaðr ok úþýðr, bellinn¹ bæði í orðum ok tiltektum. Eigi hafði hann ástríki mikit af Ásmundi föður sínum; en móðir hans unni hánum mikit. Grettir Ásmundarson var fríðr maðr sýnum, breiðleitr ok skammleitr, rauðhærðr ok næsta frekkuóttr, eigi bráðgörr, meðan hann var á barnsaldri². Þórdís hét dóttir Ásmundar, er síðan átti Glúmr, son Úspaks Kjarlakssonar af Skriðinsenni³. Rannveig hét önnur dóttir Ásmundar. Hana átti Gamli Þoraldsson, Vindlendingr. Þau bjuggu á Melum í Hrutafirði. Þeirra son var Grímr. Sonr Glúms ok Þórdísar Ásmundardóttur var Úspakr, er deildi við Odd Úfeiggsson, sem segir í Bandamannasögu.

1) hvepsinn, D. 2) í bernsku, B, D. 3) Skriðinsenni, B, D.

Grettir óx upp at Bjargi, þar til er hann var tíu vetra gamall. Hann tók þá heldr við at gangast. Ásmundr bað hann starfa nökkut. Grettir sagði sér þat eigi mundu vera vel hent, ok spurði þó at, hvat hann skyldi göra. Ásmundr svarar: þú skalt gæta heimgása minna. Grettir svarar ok mælti: lítið verk ok lœðrmannglt. Ásmundr svarar: leys þú þetta vel af hendi, ok man þá batna með okkr. Síðan tók Grettir við heimgásunum. Þær váru 50, ok með kjúkl-ingar margir. Eigi leið langt, áðr enn hánúm þóttu þær heldr bágrækar, en kjúklingar seinfœrir. Hánúm görði mjök hermt við þessu, því at hann var lítill skapdeildarmaðr. Nökkuru síðar fundu fœrumenn kjúklinga dauða úti ok heimgæss vængbrotnar. Þetta var um haustið. Ásmundi líkaði stórilla, ok spurði, hvárt Grettir hefði drepit fuglana. Hann glotti at, ok svarar:

Þat göri ek víst, er vetrar,
ving ek háls á kjúklingum;
enn þótt ellri finnist,
einn berr ek af sérhverri.

Ok skaltu eigi lengr af þeim bera, sagði Ásmundr. Vinr er sá annars, er ills varnar, sagði Grettir. Fást man þær verk annat, sagði Ásmundr. Fleira veit sá, er fleira reynir, sagði Grettir; eðr hvat skal ek nú göra? Ásmundr svarar: þú skalt strjúka bak mitt við eld, sem ek læt jafnan göra. Heitt man þat um hönd, sagði Grettir; en þó er verkit lœðrmannglt¹. Fœr nú svá fram um hríð, at Grettir heldr þessum starfa. Tekr nú at hausta; görðist Ásmundr heit-fengr mjök, ok eggjar Gretti at strjúka fast bak sitt. Þat var háttir í þann tíma, at eldaskálar váru stórir á bæjum. Sátu menn þar við langelda á öptnum. Þær váru borð sett fyrir menn, ok síðan sváfu menn upp² frá eldunum. Konur

1) vesalmannglt, C. D. 2) út, D.

unnu þar ok¹ tó á daginn. Þat var eitt kveld, at Grettir skyldi hrífa bak Ásmundar, at karl mælti: nú mantu verða af þér at draga slenit, mannskæfan, segir hann. Grettir segir: illt er at eggja úbilgjarnan. Ásmundr mælti: aldri er dugr í þér. Grettir sèr nú, hvar stóðu ullkambar í setinu; tekr kambinn, ok lætr ganga ofan eptir baki Ásmundar. Hann hljóp upp, ok varð óðr við, ok vildi ljósta Gretti með staf sínum, en hann skauzt undan; þá kwam húsfreyja at, ok spurði, hvat þeir ættist við. Grettir kvað þá vísu þessa:

Mik vill menja stökkvir
 (mjök kenn ek þess) brenna,
 (hoddagrund!) á höndum
 (höfugt ráð er þat) báðum.
 Læt ek á hringa hreyti,
 (hörgerðr!) tekit verða
 (gjör sè ek gildra sára
 gögl) úskornum nöglum.

Illa þótti húsfreyju, er Grettir hafði þetta til bragðs tekit, ok kvað hann eigi fyrirleitinn verða mundu. Eigi batnaði frændsemi þeirra Ásmundar við þetta. Nökkurri stundu síðar talaði Ásmundr til, at Grettir skyldi geyma hrossa hans. Grettir kvað sèr þat betra þikkja, enn bakeldagjörðin. Þá skaltu svá at fara, sagði Ásmundr, sem ek býð þér. Hryssu á ek bleikalótta, er ek kalla Keingálu; hón er svá vís at um veðráttu ok vatnagang, at þat man aldri bresta, at þá man hríð eptir koma, ef hón vill eigi á jörð ganga; þá skaltu byrgja í húsi hrossin, en halda þeim norðr á hálsinn, þegar er vetr leggr á; þætti mér þurfa, at þú leystir þetta verk betr af hendi, en þau tvau, sem áðr hefi ek skipat þér. Grettir svarar: þetta er kalt verk ok karl-

1) *ulfr. B.*

mannligt; en illt þykir mér at treysta merrinni, því at þat veit ek öngvan fyrr gjört hafa. Nú tekr Grettir við hrossageymslunni, ok leið svá fram yfir jól; þá gjörði á kulda mikla með snjófum ok illt til jarða. Grettir var lítt settr at klæðum, en maðr lítt harðnaðr; tók hann nú at kala, en Keingála¹ stóð á, þar sem mest var svæðit, í hverju illviðri; aldri kwam hón svá snemma í haga, at hón myndi heim ganga fyrir dagsetr. Grettir hugsar þá, at hann skal gjöra eitthvert þat bellibragð, at Keingálu yrði goldit fyrir útiganginn. Þat var einn morgin snemma, at Grettir kwam til hrossabúss, lýkr upp, ok stóð Keingála fyrir stalli; því at þótt hrossum væri fóðr gefit, þeim er með henni váru, þá hafði hón þat ein. Nú fór Grettir upp á bak henni; hann hafði hvassan kníf í hendi, ok rekr² um þverar herðar Keingálu, ok lætr svá ganga aptr tveim megin hryggjar. Hrossit bregðr nú við hart, því at þat var feitt ok sælit; eyss svá, at hófarnir brustu í veggjunum. Grettir fell af baki; ok er hann kwamst á fætr, leitar hann til bakferðar; er þeirra viðreign en snarpasta, ok svá lýkr, at hann flær af henni alla baklengjuna aptr á lend; rekr síðan út hrossin, ok til haga. Eigi vildi Keingála bíta, nema til baksins; en er skammt var af hádegi, bregðr hón við, ok hleypr heim til húss. Grettir þyrgir nú húsit, ok gengr heim. Ásmundr spyr Gretti, hvar hrossin væri. Grettir kvezt geymt³ hafa í húsi eptir vanda. Ásmundr segir, at þá myndi skammt til hríðar, er hrossin vilðu eigi á standa í því líku vedri. Grettir svarar: skýzt þeim mörgum vísdómrinn, er betri ván er at. Líðr nú af nóttin, ok kwam eigi hríðin. Rekr Grettir hrossin, ok þolir Keingála eigi í haga. Undarligt þótti Ásmundi þat, en vedráttu brá eigi úr því, sem áðr hafði

¹) *sauf*. B, C, *overalt*; A *har reirelris* Keingála og Keingála: D *alene det sidste*.
²) *þverskurð*, *ulf*. C, D. ³) *hylet*. B, C, D.

verit. Enn þriðja morgun fór Ásmundr til hrossanna, ok at¹ Keingálu, ok mælti: illa þyki mér hrossin við hafa orðit at jafngóðum vetri; en þú mant sízt bregðast at bakinu², Bleikála. Verðr þat, er varir, sagði Grettir, ok svá hitt, er eigi varir. Ásmundr strauk bakit á hrossinu, ok fylgdi þar húðin. Hánum þótti undarligt, hví svá var orðit, ok kvað Gretti þessu valda mundu. Grettir glotti at, ok svaraði öngvu. Bóndi fór heim, ok var málóði mjök. Hann gekk til eldaskála, ok heyrði, at húsfreyja mælti: vel skyldi nú reynzt hafa hrossageymslan frænda míns. Ásmundr kvað vísu:

Fyrst hefir flegna trausta
(fær pretað mik Grettir;
þjóð eru flest hin þrúðu
fullmálug) Keingálu.
Víst man venja flestar
vittr drengir af sèr lengi
(bróðr nemi hrings hin fríða
hlín) kvaðningar mínar.

Húsfreyja svarar: eigi veit ek, hvárt mér þykir meir frá móti, at þú skipar hánum jafnan starfa, eða hitt, at hann leysir alla einn veg af hendi. Nú skal ok um enda gjört fyrir þat, sagði Ásmundr; en hafa skal hann viðrgjörning því verra. Teli þá hvárigir á aðra, sagði Grettir; ok svá fór fram um stund. Ásmundr lét drepa Keingálu. Mörg bernskubrögð gjörði Grettir, þau sem eigi eru í sögu sett. Hann gjörðist nú mikill vexti; eigi vissu menn gjörla afl hans, því at hann var úglíminn; orti hann jafnan vísur ok kviðlinga, ok þótti heldr niðskældinn. Eigi lagðist hann í eldaskála, ok var fátalaðr lengstum.

15. Þá váru margir uppvaxandi menn í Miðfirði³. Skáld-

¹) tók a, B, C, D.

²) bakheldunum, C, D.

³) ok Hrútafirði, *MS.*, C, D.

torfa¹ bjó þá á Torfustöðum. Bessi hét son hennar²; hann var manna gjörfiligastr ok skáld gott. Þeir bjuggu á Mel bræðr, Kórmákr ok Þorgils. Með þeim óx upp sá maðr, er Oddr hét. Hann var framfærslumaðr þeirra, ok var kallaðr Oddr úmagaskáld. Auðunn hét maðr; hann óx upp á Auðunarstöðum í Víðidal; hann var gegn maðr ok góðfengr, ok sterkastr norðr þar sinna jafnaldra. Kálfr Ásgeirsson bjó á Ásgeirsá, ok Þorvaldr bróðir hans. Atli, bróðir Grettis, gjörðist ok þroskamaðr, ok allra manna gæfastr; við hann likaði hverjum manni vel. Þessir lögðu knattleika með sèr³ á Miðfjarðarvatni; kvámu þar til Miðfirðingar ok Víðdælar; þar kvámu ok margir menn ór Vestrbópi ok af⁴ Vatnsnesi, svá ok ór Hrutafirði. Sátu þeir þar við, er lengra fóru til⁵. Var þar skipat saman þeim sem jafnsterkastir váru, ok varð at því hin mesta gleði lengstum á haustum. Grettir fór til leika fyrir böen Atla bróður síns, þá er hann var fjórtán vetra gamall. Síðan var skipat mönnum til leiks. Var Gretti ætlat at leika við Auðun, er fyrr var nefndr; hann var þeirra nökkurum vetrum eldri. Auðunn sló knöttinn yfir höfuð Gretti, ok gat hann eigi náð; stökk hann langt eptir ísinum. Grettir varð reiðr við þetta, ok þótti Auðunn vilja leika á sik; sækir þó knöttinn ok kemr aptr, ok þegar hann náði til Auðunar, setr hann knöttinn rétt framan í enni hánum, svá at sprakk fyrir. Auðunn sló Gretti með knattgildrunni, er hann hèlt á, ok kom lítt á, því at Grettir hljóp undir höggit; tókust þeir þá á fangbrögðum, ok glímdu; þóttust menn þá sjá, at Grettir var sterkari, enn menn ætludu, því at Auðunn var rammr at afli. Áttust þeir lengi við, en svá lauk, at Grettir féll; lét Auðunn þá fylgja

1) Torfi skáldi, B. 2) hans. B. 3) saman, A. 4) illr., C. D. 5) Sátu þeir lengst við, er lengra kvámu til, B; sátu þeir þar við, sem lengst varu til komnir, B, D.

knè kviði, ok fór illa með hann. Hfupu þeir þá til Atli ok Bessi ok margir aðrir, ok skildu þá. Grettir kvað eigi þurfa at halda á sèr, sem ólmum hundi, ok mælti þetta: þræll einn þegar hefnist, en argr aldri. Eigi létu menn þetta sèr at sundrþykki verða, því at þeir Kálfr ok Þorvaldr bræðr vildu at þeir væri sáttir; váru þeir ok skyldir nökkut Auðunn ok Grettir, ok hëlzt leikrinn sem áðr, ok varð eigi til sundrþykkis fleira.

16. Þorkell krafla gjörðist nú gamall mjök; hann hafði Vatnsdæla göðorð, ok var höfðingi mikill. Hann var alda-vin Ásmundar hærulangs, sem tengdum þeirra höfði. Hann var því vanr, at ríða til Bjargs hvert vár, at sækja þangat til kynnis; ok enn gjörði hann svá næsta vár eptir þat, sem áðr var sagt, at hann fór til Bjargs. Tóku þau Ásmundr ok Ásdís við hánum báðum höndum; var hann þar þrjár nætr, ok töluðu þeir mágar marga hluti milli sín. Þorkell spurði, hversu Ásmundi segði hugr um sonu sína, hverlr iðnarmenn þeir mundu verða. Ásmundr kvezt ætla, at Atli yrði búmaðr mikill, forsjáll ok fæmaðr. Þorkell svarar: þarfr maðr ok þèr líkr; en hvat segir þú af Gretti? Ásmundr mælti: af hánum er þat at segja, at hann man verða sterkr maðr ok ústýrilátr; þykkjumikill ok þungr hefir hann mèr orðit. Þorkell svarar: eigi er þat heillavænligt, mágr, sagði hann; en hversu skulum vit skipa um þingferð okkra í sumar? Ásmundr svarar: ek gjörumst þungfærr, ok vilda ek sitja heima. Viltu at Atli fari fyrir þik? sagði Þorkell. Hann þykkjumst ek eigi missa mega, segir Ásmundr, fyrir sakir starfa ok aldráttar, en Grettir vill ekki starfa; er hann svá vili borinn, at ek get, at hann kunni halda upp lögsögn¹ fyrir mik með þinni umsjá. Þú skalt ráða, mágr, segir Þorkell. Reð hann nú heim, þá er hann var

¹ lögskiðum, B. C.

búinn, ok leysti Ásmundr hann burt með góðum gjöfum. Nökkuru síðar bjóst Þorkell heiman til þings; hann reið með 60 manna, fóru þeir allir með hánum, er í hans goðorði váru. Kemr hann til Bjargs, ok reið Grettir þaðan með hánum. Þeir riðu suðr heiði þá, er Tvidægra heitir. Áfangar váru litlir á fjallinu, ok riðu þeir mikinn ofan í byggðina; ok er þeir kvámu ofan í Fljótstungu¹, þótti þeim mál at sofa, ok hleyptu beizlum af hestum sínum, ok létu ganga með söðlum. Lágu þeir [langt á dag fram² ok sváfu; en er þeir vöknudú, svipuðust menn at hestum sínum; höfðu hestarnir sinn veg farit hverr þeirra, en sumir höfðu velzt³. Grettir fann seinast sinn hest. Þat var þá háttir, at menn vistuðu sik sjálfir til þings, ok reiddu flestir mali um söðla sína. Söðull var undir kviði niðri á hesti Grettis, en í burt malrinn; ferr hann nú ok leitar, ok fann eigi; sèr hann nú, hvar maðr gengr, sá fór hart. Grettir spyrr, hverr þar færi. Hann svarar, ok kvezt Skeggi heita, ok vera húskarl norðan ór Ási í Vatnsdal; er ek í ferð með Þorkeli bónda, sagði hann, en mèr hefir tekizt til gálausliga, ek hefi týnt vistamal mínum. Grettir svarar: eindæmin eru verst, ek hefi ok týnt mal þeim, er ek átti, ok leitum nú báðir samt. Þat líkaði Skeggja vel. Ganga þeir nú um hrið; en er minnst varði, tekr Skeggi á rás upp eptir móunum ok grípr þar upp malinn. Grettir sá, er hann laut, ok spyrr, hvat hann tók upp. Malinn minn, segir Skeggi. Hverir bera þat fleiri, enn þú? sagði Grettir; ok lát mik sjá, því at margt er öðru líkt. Skeggi kvað öngvan mann taka af sèr, þat er hann ætti. Grettir þreif til malsins, ok toguðust þeir um hann, ok vildi sitt mál hvárrtveggi hafa. Undarlíga ætli þèr, segir húskarlinn, þó menn sè eigi jafnstórauðgir allir, sem þèr, Vatnsdælur⁴, at menn

¹) Fjötskúlið, D. ²) *fra* [a fram langt, A ³) meizt, C, D. ⁴) Miðfirðingar, C, D.

muni eigi þora at halda á sínu fyrir yðr. Grettir kvað þetta eigi eptir mannvirðingu ganga, þótt hverr hefði þat, er ætti. Skeggi mælti: of fjarri er nú Auðunn at kyrkja þik, sem við knattleikinn. Vel er þat, sagði Grettir; en eigi mantu mik kyrkja, hvern veg sem hitt hefir verit. Skeggi greip þá öxi, ok hjó til Grettis; en er Grettir sá þat, þreif hann vinstri hendi öxarskaptit fyrir framan hendr Skeggja, svá hart¹, at þegar varð laus öxin. Grettir setti þá sömu öxi í höfuð hánú, svá at þegar stóð í heila; féll húskarl þá dauðr til jarðar. Grettir tók malinn, ok kastar um söðul sinn. Hann reið síðan eptir förunautum sínum. Þorkell reið undan, því at hann vissi eigi, at þetta myndi til hafa borit. Menn söknuðu nú Skeggja ór flokkinum; en er Grettir fann þá, spyrja þeir hann, hvat hann vissi til Skeggja. Grettir kvað þá visu:

Hygg ek, at hljóp til Skeggja
hamatröll með för ramri
(blóð var á gunnar gríði
grád) fyrir stundu áðan.
Sú gein um haus hánú
hardmynnt er lítt spardi
(var ek hjá viðreign þeira)
vígtenn, ok klauf enni.

Þá hlupu fylgdarmenn Þorkels upp, ok sögðu eigi mundu tröll hafa tekit manninn um ljósan dag. Þorkell þagnaði, ok mælti síðan: önnur efni munu í vera, ok man Grettir hafa drepit hann; eða hvat bar til? Grettir segir þá allan áskilnað þeirra. Þorkell mælti: all-illa hefir þetta til tekizt, því at Skeggi var fenginn til fylgdar við mik, en maðr góð-ættaðr, ok man ek taka málit² á þann hátt, at ek man boeta slíku, sem dæmt verðr, en sektum má ek eigi ráða;

1) *ulfr*. B, C, D. 2) *saal*. B, C, D; *ámælit*, A.

eru tveir kostir fyrir hendi við þik, Grettir, hvárt þú vilt heldr fara til þings, ok hætta á, hvern veg til tekst, eða hverfa hér aptr. Grettir kjöri at fara til þings, ok svá var, at hann fór. Var þetta mál kært¹ af erfingjum hins vegna. Gekk Þorkell til handsala, ok hèlt upp fëbótum; en Grettir skyldi vera sekr, ok vera utan þrjá vetr. En er þeir riðu af þingi höfðingjarnir, áðu þeir uppi undir Sleðaási, ádr enn þeir skildu; þá hóf Grettir stein þann, er þar liggir í grasinu, ok nú heitir Grettishaf. Þá gengu til margir menn, at sjá steininn, ok þótti þeim mikil furða, at svá ungr maðr skyldi hefja svá mikit bjarg. Reið Grettir heim til Bjargs, ok sagði frá ferðum sínum. Ásmundr tók lítt á, ok kvað hann óeirðarmann verða mundu.

17. Haflíði hèt maðr, er bjó á Reyðarfelli á Hvitársíðu; hann var siglingamaðr ok átti skip í för; þat stóð uppi í Hvitá. Sá maðr var á skipi með hánum, er Bárðr hèt; hann átti konu unga ok fríða. Ásmundr sendi mann til Haflíða, at hann skyldi taka við Gretti, ok sjá um með hánum. Haflíði kvað sèr sagt, at maðrinn væri vanstilltr; en fyrir sakir vináttu þeirra Ásmundar tók hann við Gretti. Bjóst hann þá til utanferðar. Engi vildi Ásmundr fararefni fá hánum, utan hafnest ok lítið af vaðmálum. Grettir bað hann fá sèr vápn nökkut. Ásmundr svarar: eigi hefir þú mèr hlýðinn verit, veit ek ok eigi, hvat þú munir þat með vápnum vinna, er þarft er; man ek ok þau eigi til láta. Grettir mælti: þá er eigi þat at launa, sem eigi er gjört. Síðan skildu þeir feðgar með litlum kærleikum. Margir báðu hann vel fara, en fáir aptr koma. Móðir hans fylgdi hánum á leið; ok ádr þau skildu, mælti hón svá: eigi ertu svá af garði gjörr, frændi, sem ek vilda, svá vel borinn maðr, sem þú ert; þyki mèr þat mest á skorta, at þú hefir

¹) a þingst, *uif.*, C, D.

ekki vápn, þat er neytt sè, en mèt segir svá hugr um, at þú munir þeirra við þurfa. Hón tók þá undan skikkju sinni sverð búið; þat var allgóðr gripr. Hón mælti þá: sverð þetta átti Jökull föðurfaðir minn ok hinir fyrri Vatnsdælar, ok var þeim sigrsælt; vil ek nú gefa þér sverðið, ok njót vel. Grettir þakkaði henni vel gjöfina, ok kvað sèr þetta betra þykkja, en aðrir fémunir, þótt meiri væri. Síðan fór hann veg sinn, en Ásdís bað hánum margra virkta¹. Grettir reið suðr um heiði, ok létti eigi fyrr enn hann kom suðr til skips². Haflíði tók vel við hánum; fann hann Gretti, ok spurði at fararefnum hans. Grettir kvað visu:

Hygg ek, at heimað bjuggu
heldr auðigir snaudan,
blakkpollr byrjar skikkju,
beidendr móins leiðar.
Enn ræð orðskvið sanna
auðnorn við mik fornan
ern, at bezt er barni,
benskóðs fyrir gjöf, móðir.

Haflíði kvað þat sýnt, at henni var mest um hann hugat. Létu þeir í haf, þegar þeir váru búnir ok byr gaf; ok er þeir kvámu út yfir grunn öll, undu þeir segl. Grettir gjörði sèr gróf undir bátinum, ok vildi þaðan hvergi hrœra sik, hvárki til austr, nè at segli at gjöra, ok ekki starfa, þat sem hann átti at skipi at gjöra til jafnaðar við aðra menn; eigi vildi hann ok kaupa af sèr. Þeir sigldu suðr um Reykjanes, ok svá suðr fyrir land, ok er landit var horfit, fengu þeir rætt mikinn. Skipit var heldr lekt, ok þoldi illa rættinn; fengu þeir vás mikit. Grettir lét þá sjúka í kviðlinga; þat líkaði mönnum stórilla. Einn dag var þat, at veðr var bæði hvasst ok kallt; þá kölluðu sveinar, báðu Gretti nú

¹) hluta, A. ²) snal, B, C, D; yðr heiði, A.

duga: því at oss kólnar á klónum¹. Grettir leit upp, ok mælti:

Happ er, ef hær skal kropna
hverr fingr á kyrpingum.

Eigi fengu þeir af hánum starfann, en líkaði nú verr enn áðr, ok kváðu hann skyldu taka gjöld á sjálsum sér fyrir nið sitt, ok lögleysu þá, er hann gjörði; þykkir þær betra, sögðu þeir, at klappa um kviðinn á konu Bárðar stýrimanns, enn at gjöra skyldu þína á skipi, ok er slíkt úþolanda. Vedrit gekk upp at eins; stóðu þeir þá í austri, svá at dægnum skipti. Þeir heituðust þá við Gretti. Ok er Haflíði heyrði þetta, gekk hann þar at, er Grettir lá, ok mælti: eigi þykki mér samkeypi yðvart kaupmanna gott; þú gjörir þeim úlög, en niðir þá á svá gjört ofan, en þeir beitast at steypa þær fyrir borð. Nú er slíkt útíttækiligt. Hvi munu þeir eigi ráða tiltektum sínum? segir Grettir; en þat vilda ek, at eptir dveldist einu eðr tveir hjá mér, áðr enn ek ganga fyrir borð. Slíkt er úgjöranda, segir Haflíði; man oss aldri vel gefa, ef þær herist þetta fyrir; man ek leggja ráð til með þær. Hvert er þat? sagði Grettir. Þeir finna at við þik, at þú niðir þá; nú vil ek. sagði Haflíði, at þú kveðir til mín nökkura niðvísu, ok má vera, at þeir umberi betr við þik. Aldri kveð ek til þín, sagði Grettir, utan gott; gjöri ek þik eigi líkan kyrpingum². Haflíði mælti: kveða má svá, at segri sè vísan, ef grafin er, þótt fyrst sè eigi allfögr. Þetta hefi ek ok nægst til, sagði Grettir. Haflíði fór til þeirra skipverja, þar sem þeir vóru at ausa³, ok mælti: mikit er erfiði. yðvart, ok ván, at yðr líki illa við Gretti. Verri þykkja oss kviðlingar hans, enn hvetvetna

¹) knounum, B, C; knjanum, D.
oplaget efter B. C.

²) krypplingum, D.

³) þar sem — ausa,

annat, segja þeir. Haflíði mælti þá hátt: hann man ok illa af því fara um síðir; en er Grettir heyrði Haflíða ámæla sér, kvað hann¹ vísu:

Annat var þá, er at inni
 át Haflíði drafla
 (hann þóttist þá heima)
 hvelr, at Reyðarfelli.
 Ok dagverðar darra
 dómskreytandi neytir
 tysvar tveggja nesja
 tak reins dēgi einum.

Kaupmönnum þótti all-illa, ok sögðu, at hann skyldi eigi til einskis göra, at níða Haflíða bónda. Haflíði mælti þá: núga hefir Grettir verðleika til þess, þótt þér gjörðut hán um nökkura smán, en eigi vil ek hafa sæmd mína í vœði til móts við illgirni hans ok forsjáleysi; nú munu vær þessa eigi at sinni hefna, meðan vær erum í svá miklum háska staddir, en minnst þessa þá, er þér komit á land, ef yðr líkar. Þeir svöruðu: man oss eigi mega, sem þér? hvert man oss heldr hita níð hans, enn þik? Haflíði bað þá svá gjöra. Þaðan frá vönduðu skipverjar miklu miðr, um kvíðl- inga, enn áðr. Þeir höfðu harða útivist ok langa; kvámu þá lekar at skipinu, tóku menn þá at lýjast mjök á erfíði. Stýrimannskona sú hin unga var því jafnan vön, at sauma at höndum Grettis, ok höfðu skipverjar þat mjök í fleymingi við hann. Haflíði gekk þar til, er Grettir lá, ok kvað vísu:

Stattu upp ór gröf, Grettir!
 Grefr knörr hola vörru;
 minnstu á mál við svanna
 meginkátr binn gláðláta.

1) Grettir, A.

Fast hefir brund at höndum,
hörnauma, þér saumat;
skorð vill, at þú vel verðir
við, meðan lönd eru niðri.

Grettir stóð skjótt upp, ok kvað:

Stöndum upp, þó at undir
all-tíðum skip ríði;
veit ek, at víf man láta
verr, ef ek ligg á knerri.
Því man öllungis illa
aldygg kona hyggja
hvít, ef hær skal láta
hvert sinn fyrir mik vinna.

Síðan hljóp hann aþr til, þar er þeir váru at austrinum, ok spurði, hvat þeir vildu, at hann gjörði. Þeir sögðu, at hann lítið gott gjöra mundu. Hann sagði: munr er at mannsliði. Haðliði bað þá eigi neita liði hans; má vera, at hann þykist leysa sínar hendr, ef hann býðr lið sitt. Þá var eigi dœluaustr á hafskipum; kölluðu menn þat byttuaustr eðr stampaustr. Hann var bæði vássamr ok erfiðr; skyldi þar hafa byttur tvær; fór þá önnur niðr, er önnur fór upp. Sveinar báðu, at Grettir skyldi sökkva byttunum; kváðu nú reyna skyldu, hvat hann mætti. Hann segir, at lítil raun myndi beztt um þat. Ferr hann þá niðr ok sökkvir byttunum, ok váru þá fengnir til tveir at ausa til móts við hann; hældust þeir eigi lengi við áðr þeir váru yfirkomnir af mæði; þá gengu til fjórir, ok fór allt á sömu leið. Svá segja sumir menn, at átta jusu þeir við hann, áðr enn lauk, var þá ok upp ausit skipit. Þaðan af skiptist mjök um orðalag kaupmanna við Grettli, því at þeir sá, hvat hann átti undir sèr fyrir alls sakir, var hann ok þaðan frá hinn fræknasti til liðs, hvers sem við þurfti. Berr þá nú austr

í haf, lágu á myrkr mikil; fundu þeir eigi fyrr eina nótt, enn þeir sigldu upp á sker skipinu, svá at undan gekk undirhlutrinn; var þá hrundit bátnum, og fluttar af konur ok allt þat, er laust var. Þar var hólmr lítill skammt frá þeim, ok færðu þeir þangat fōng sín, sem þeir komust við um nóttina, en er lýsa tók, áttu þeir um at tala, hvar þeir vāru komnir; kenndust þeir þá við, sem áðr höfðu farit milli landa, at þeir vāru komnir at Sunnmæri í Noregi. Þar var ein ey skammt frá þeim til meginlands, er heitir Haramsey¹, þar var byggð mikil í eyjunni; þar var ok lēnds manns ból.

18. Þorfinnr hēt lēndr maðr, sá er þar átti bú í eyjunni; hann var son Kárs hins gamla, er þar hafði lengi búit. Þorfinnr var höfðingi mikill; ok er alljóst var orðit, sáu menn til ór eyjunni, at kaupmenn vāru nauðuliga staddir. Var þá sagt til Þorfinni; hann brá við skjótt, ok lēt setja fram karfa stóran, er hann átti; rēru sextán menn á borð. Þeir vāru á karfanum nær þrjátigi manna; fóru til sem hvatast, ok burgu fē kaupmanna, en hafskipit sökk niðr; týndist þar mikit góðs. Þorfinnr flutti alla menn heim af skipinu til sín, vāru þeir þar viku, ok þurrkuðu varning sinn. Síðan fóru kaupmenn suðr í land, ok eru þeir ór sögunni.

Grettir var eptir hjá Þorfinni, ok lēt lítið um sik; var sátalaðr lengstum. Þorfinnr lēt gefa hánum mat, ok gaf sēr eigi mikit at hánum. Grettir var hánum úfylgjusamr, ok vildi eigi ganga með hánum úti á daginn; þat líkaði illa Þorfinni, en nennti þó eigi at kviðja hánum mat. Þorfinnr

¹) dette synes at være det rigtige Navn paa denne Ø, i det A paa det følgende Sted (Pag. 40) ogsaa skriver det saaledes, og det desuden stemmer overens med det nuværende Navn: Haramsø; cfr. *Ströms Søndmøres Beskrivelse, I, Sorø 1672*. Iøvrigt har A. paa dette Sted: Aramarsey; Aramarsey B, Haramsey eller Haramsey, C, Armansey, D.

var hýbýlapróður ok gleðimaður mikill; vildi hann ok, at aðrir menn væri glaðir. Grettir var húsgöngull, ok fór á aðra bæi þar í eyggi. Auðunn hét maður, er bjó þar, sem heitir á Vindheimi; þangat fór Grettir dagliga, ok gjörði sér kært við hann; sat Grettir þar jafnan á dag fram. Þat var eitt kveld harðla síð, er Grettir bjóst heim at ganga, at hann sá eld mikinn gjósa upp á nesi því, er norður var frá bæ Auðunar. Grettir spurði eptir, hvat nýjungu þat væri. Auðunn kvað hánnum eigi á liggja þat at vita. Þat myndi mælt, sagði Grettir, ef slíkt sæist á váru landi, at þar brynni af fè. Bóndi svarar: sá einn man fyrir þeim eldi ráða, at eigi man gagn í um at forvitnast. Þó vil ek vita, segir Grettir. Þar á neginu stendr haugr, segir Auðunn, stórr ok sterkligr, en þar var í lagðr Kárr hinn gamli, faðir Þorfinns; áttu þeir feðgar fyrst eitt bóndaból í eyggi, en síðan Kárr dó, hefir hann svá aptr gengit, at hann hefir eytt á burt öllum böendum þeim, er hér áttu jarðir, svá at nú á þorfinnr einn alla eyga, ok engum verður þeim mein at þessu, er Þorfinnr heldr hendi yfir. Grettir kvað hann vel hafa sagt; man ek hér koma á morgun, ok lát til reiðu graftól. Let ek þik, segir Auðunn, at fást þar við, því at ek veit, at Þorfinnr man fjandskap á þik leggja. Grettir kvezt hætta mundu á þat. Nú leið af nóttin; kemr Grettir þar snemma, váru þá til reiðu graftólin. Ferr bóndi með hánnum til haugsins. Grettir braut nú hauginn, ok var at mikilvirkr; létir eigi fyrr, enn hann kemr at viðum, var þá mjök áliðinn dagrinn; síðan reif hann upp viðuna. Auðunn latti hann þá mjök at ganga í hauginn. Grettir bað hann geyma festar, en ek man forvitnast, hvat hér býr fyrir. Gekk Grettir þá í hauginn; var þar myrkt ok þeygi þesgott. Leitast hann nú fyrir, hversu háttað var; hann fann hestbein, ok síðan drap hann sér við stólbrúði,

ok fann at þar sat maðr á stóli. Þar var fê mikit í gulli ok silfri borit saman, ok einn kistill settr undir fœtr hánúm, fullr af silfri. Grettir tók þetta fê allt, ok bar til festar, ok er hann gekk utar eptir hauginum, var gripit til hans fast; lét hann þá laust fêit, en ræzt í mót þeim, ok tókust þeir þá til¹ heldr úþyrmiliga. Gekk nú upp allt þat, er fyrir varð; sólti haugbúinn með kappi. Grettir fór undan lengi, ok þar kemr, at hann sêr, at eigi man duga at hlífast við. Sparir nú hvárrgi annan; fœrast þeir þangat, sem hestbeinin váru, kipptust þeir þar um lengi, ok fóru fmsir á knè, en svá lauk, at haugbúinn féll á bak aptr, ok varð af því dynkr² mikill; hljóp Auðunn frá festarhaldinu, ok ætlaði, at Grettir myndi dauðr. Grettir brá nú sverðinu Jökuls-naut, ok hjó á hálsinn haugbúanum, svá at af tók hūfuðit; setti hann þat við þjó hánúm, gekk síðan til festar með fêit, ok var Auðunn allr í brutu; varð hann þá at handstyrkja upp festina. Hann hafði knýtt fênu í snæri, ok dróg þat upp síðan. Grettir var orðinn stirðr mjök af sameign þeirra Kárs; snýr nú heim til bæjar Þorfinns með fêit; þá var fólk allt undir borð komit. Þorfinnr hvessti á Gretti augun, er hann kom í drykkjuðofuna, ok spurði, hvat hann ætti svá nauðsynligt at starfa, at hann geymdi eigi hátta með öðrum mönnum. Grettir mælti, margt er smátt, þat er til herr á síðkveldum. Lagði hann þá fram á borðit fê þat allt, er hann hafði tekit ór hauginum. Einn gripr var sá, er Gretti stóðu mest augu³ til; þat var sax eitt, svá gott vápn, at aldri kvezt hann sèt hafa betra; þat lét hann síðast fram. Þorfinnr varð léttrbrunn við, er hann sá saxit, því at þat var menjagripr þeirra, ok hafði aldri ór ætt gengit. Hvaðan kom þær fê þetta? sagði Þorfinnr. Grettir kvað vísu:

1) á, C, D. 2) dykr B, C. 3) stóð mest hugr, D.

Mèr hefir-a brugðizt, báru
 blikrýrandi, (at skýru
 brátt spyri bragnar þetta)
 bauga ván í haugi.
 Þó sè ek hitt, at brotta
 hriðullr muni síðan
 fár á Fáfnis mýri
 fullteitr þinnig leita.

Þorfinnr svarar: eigi man þèr allt í augu blæða¹, ok engan
 hefir þessa fýst fyrr, at brjóta hauginn; en fyrir því, at
 ek veit, at þat sè er illa komit, er fólgit er í jörðu eðr í
 hauga borit, þá man ek eigi gefa þèr hèr skuld fyrir, með
 því at þú særðir mèr; eðr hvar náðir þú saxinu góða?
 Grettir svaraði, ok kvað:

Fèkk ek í firna dökkum
 (fèll draugr) tekit haugi
 sax, þat er seggja vexir
 sár, hyllestir báru.
 Ok skyldi mèr aldri,
 álms, dýrr logi hjálma,
 ýtum hættir, ef ek ætta,
 angrs, hendi firr ganga.

Þorfinnr svarar: vel er til mælt, en sýna skaltu nökkut
 áðr, þat er fræðð þykki í vera, enn ek gefi þèr saxit, því at
 þat fèkk ek aldri af feðr mínum, meðan hann lifði. Grettir
 svarar: eigi má vita, hverjum at mestu gagni kemr, um þat
 er lýkr. Þorfinnr tók við fènu, ok geymdi saxit hjá sæng
 sinni. Leið svá vetrinn framan til jóla, at eigi bar fleira
 til frásagna.

19. Þetta sumar hit næsta áðr² bjóst Eiríkr jarl
 Hákonarson ór landi vestr til Englands, á fund Knúts kon-

¹) bredda. D. ²) 1147, H. C.

ungs hins ríka, mágs síns, en hann setti eptir til ríkis í Noregi Hákon son sinn, ok fékk hann í hendr Sveini jarli bróður sínum til forsjá ok ríkisstjórnar, því at Hákon var barn at aldri. En áðr Eiríkr jarl fór ór landi, stefndi hann til sín lendum mönnum ok ríkum bóndum; töludu þeir margt um lög ok landsskipan, því at Eiríkr jarl var stjórn-samr; þótti mönnum þat mikill úsiðr í landinu, at úthlaups-menn eðr berserkir skorudu á hólm göfga menn til fjár eðr kvenna; skyldu hvárir úgildir falla, sem fëllu fyrir öðrum; fengu margir af þessu smán ok fjármissu, en sumir líftjón með öllu, ok því tók Eiríkr jarl af allar hólmgöngur í Noregi; hann gerði ok útlaga alla ránsmenn ok berserki, þá sem með úspektir fóru. Var í þessarri skipan ok ráðagjörð með jarli Þorfinnr Kársson ór Haramsey¹, því at hann var vitr maðr ok kær vinr jarlanna. Tveir bræðr eru nefndir til, at verstir² váru; hét annarr Þórir þömb, en annarr Ögmundr illi; þeir váru háleyskir at ætt, meiri ok sterkari enn aðrir menn; þeir gengu berserksgang, ok eirðu engu, þegar þeir reiddust; þeir tóku á burt konur manna³, ok höfðu við hönd sér viku eðr hálfan mánuð, ok særðu síðan aptr þeim, sem áttu; þeir ræntu, hvar sem þeir komu, eðr gjörðu aðrar úspektir. Eiríkr jarl gerði þá útlæga fyrir endilangan Noreg; gekk Þorfinnr mest manna fyrir sekt þeirra; þóttust þeir hán um eiga fullan fjandskap at gjalda. Síðan fór jarl ór landi, sem segir í sögu hans, en Sveinn jarl hafði yfirvald í Noregi ok ríki. Þorfinnr fór heim til bús síns, ok sat heima mjök til jóla, sem fyrr er sagt. Í móti jólum býst Þorfinnr at fara til bús síns, þangat sem heitir í Slysfirði⁴; þat er á meginlandi. Hafði hann boðit þangat mörgum

¹) Aramannsey, B. Haramsey, C. Ármannsey, D. ²) óeirðarmenn, *hlíf. D.*

³) ok dætr, *hlíf. B, C, D.* ⁴) *saaledes alle Haandskrifterne; efter Fagtekstene Slys-fjórðr; Fornmannasögur 10: Slaygsarfjórðr (ay=ey).*

vinum sínum. Húsfreyja Þorfinns mátti eigi fara með bónda, því at dóttir þeirra frumvaxta lá sjúk, ok váru þær báðar heima. Grettir var heima ok húskarlar átta. Þorfinnr fór nú við þrjátígi frelsingja¹ til jólaveizlunnar; var þar hinn mesti mannfagnaðr ok gleði. Nú kemr atfangadagr jóla; þa var veðr hjart ok kyrrt. Grettir var lengstum úti um daginn, ok sá, at skip fóru suðr ok norðr með landi, því at hverr sótti til annars, þangat sem samdrykkjan var sett. Bóndadóttur var þá batnat, svá at hón gekk með móður sinni. Leið nú á daginn; þá sá Grettir, at skip ræri at eyinni; þat var eigi mikit, ok skarar skjöldum milli stafna, skipit var steint fyrir ofan sjá. Þeir ræru knálíga, ok stefndu at naustum Þorfinns; ok er skipit kenndi niðr, hlupu þeir fyrir borð, sem á váru. Grettir hafði tölu á mönnum þessum, at þeir váru tólf saman. Eigi þótti hán um þeir friðlíga láta; þeir tóku upp skip sitt ok báru af sjá; eptir þat hlupu þeir at naustinu; þar stóð inni karfinn Þorfinns sá hinn stóri, hann settu aldri færri menn á sjó, enn 30, en þeir tólf rykktu hán um þegar fram á fjörugrjótið; síðan tóku þeir upp sitt skip, ok báru inn í naustið. Þá þóttist Grettir sjá, at þeir myndi ætla at bjóða sér sjálfir beina; hann gekk þá til móts við þá ok fagnaði þeim vel, ok spyrr, hverlr þeir væri, eðr hversu formaðr þeirra hæt. Sá svarar skjótt, er til var mælt, ok kvezt Þórir heita, ok kallaðr þómb, ok bróðir hans Ögmundr ok aðrir kompánar þeirra; væntir ek, sagði Þórir, at Þorfinnr húsbóndi yðvarr hafi heyrt vár getið; eðr hvárt er hann heima? Grettir svarar: gæfumenn miklir munu þér vera, því at þér hafit hér góða atkvámu, ef þeir eru mennirnir, sem ek ætla; bóndi er heiman farinn með alla heimamenn, þá sem frjálsir eru, ok ætlar eigi heim fyrr enn á bak jólunum; húsfreyja er heima

¹) manna, D.

ok bóndadóttir, ok ef ek þœttumst nökkurn mótgang eiga at gjalda, þá vilda ek þann veg helst at koma, því at hér er hvetvetna þat, er hafa þarf, bæði öl ok annarr fagnaðr. Þórir þagði, meðan Grettir lét ganga töluna; síðan mælti hann til Ögmundar: fór nökkut fjarri því, sem ek gat til? sagði hann; ok væri mér þat í hug at hefna Þorfinni, er hann hefir gjört oss útlaga; er þessi maðr ok góðr¹ af tíðindum, þursum vèr eigi at togast eptir orðum við hann. Orða sinna á hverr ráð, sagði Grettir, ok gjöra skal ek yðr slíkan forbeina, sem ek má, ok gangit heim með mér. Þeir báðu hann hafa þökk fyrir, kváðust hans boði hlíta mundu; en er þeir kvámu heim at bænum, tók Grettir í hönd Þóri, ok leiddi hann til stofu; Grettir var þá málreifr mjök. Húsfreyja var í stofunni, ok lét tjalda hana ok búast um vel, en er hón heyrði til Grettis, nam hón staðar á gólfinu, ok spyr, hverjum Grettir fagnaði svá alvarliga. Hann² svarar: þat er ráð, húsfreyja, at taka vel við gestum; hér er kominn Þórir bóndi þömb ok þeir tólf saman, ok ætla hér at sitja um jólin, er þat allgott, því at vær áttum heldr fámennt áðr. Hón svarar: eigi tel ek þá með bóndum eðr góðum mönnum, því at þeir eru hinir verstu ránsmenn ok illvirkjar; vilda ek gjarna hafa gefit til mikinn hlut eigu minnar, at þeir hefði hér eigi komit í þetta sinn; launar þú ok illa Þorfinni fyrir þat, er hann tók þik af skipbroti felausan, ok hefir haldit þik í vetr sem frjálsan mann. Grettir svarar: betra er nú fyrst at taka vásklæði af gestunum, enn at ámæla mér; þess man lengi kost. Þórir mælti þá: ver eigi stygg, húsfreyja; engi missir skal þèr í verða, þó at bóndi sè eigi heima, því at fá skal mann í stað hans, ok svá dóttur þinni ok öllum heimakonum. Slíkt er karlmannliga talat, sagði Grettir; mega þær þá eigi yfir sinn

1) lætur, D. 2) mangler i A.

hlut sjá. Nú stukku fram konur allar, ok sló á þær úhug miklum ok gráti. Grettir mælti til berserkjanna: selld mér þat í hendr, sem þér villt af leggja, vápn ok vásklæði, því at eigi man oss fólkit stýrilátt, meðan þat er óhrætt. Þórir kvæzt eigi hirða, hvat konur nögguðu¹, en mikinn mun eigu vèr at gjöra þín edr annarra heimamanna; lízt mér, sem vèr munu þik hafa at trúnaðarmanni. Sjái þér fyrir því, sagði Grettir, en eigi gjöri ek mér alla menn jafna. Síðan lögðu þeir af flestöll vápn. Eftir þat mælti Grettir: ráðligt þykkir mér, at þér farit til borðs, ok drekkit nökkt, því at yðr man þyrsta af róðrinum. Þeir kváðust þess álbúnir, en sögðu sér úkunnigt til kjallara. Grettir spyrr, hvárt þeir vildi hlíta hans forsjá ok umgangi. Berserkirnir létust þat gjarna vilja. Grettir ferr til ok sækir öl, ok gefr þeim at drekka. Þeir váru mjök móðir, ok sulgu stórum², lætr hann úspart ölit, þat er áfengast var til, ok gekk því lengi, hann segir þeim ok margar kátligir sögur. Varð af þessu öllu saman háreysti til þeirra at heyra. Eigi fýsti heimamenn til þeirra at koma. Þá mælti Þórir: eigi hefi ek þann mann fundit úkunnan, er svá vel vildi við oss gjöra, sem þessi maðr, edr hver laun viltu af oss felögum þiggja fyrir þína þjónustu? Grettir svarar: eigi ætla ek hær til launa fyrir at svá gjörvu, en ef vèr erum þvílíkir virir, þá er þér farit á burt, sem nú horfist á, þá man ek ráðast til lags með yðr, en þó at ek mega minna, enn einhverr yðar, þá man ek eigi letja stórræðanna. Þeir urðu mjök glaðir við, ok vildu þegar binda fèlag sitt með fastmælum. Grettir kvæð þat eigi skyldu; því at þat er satt, sem mælt er, at öl er annarr maðr; ok skal eigi bráðabug at þessu gjöra, framar enn áðr hefi ek sagt; erum vèr litlir skapdeildarmenn hváirtveggja. Þeir sögðust eigi ætla þessu at bregða. Leidd

¹) nádda, D. ²) fast drykkinn, D.

nú á kveldit, svá at mjök tók at myrkva; þá sèr Grettir, at þeir gjörast mœddir nökkut af drykknum. Hann mælti þá: þykkir yðr eigi mál at fara til svefns? Þórir kvað svá vera skyldu, ok skal efna þat, er ek hèt húsfreyju. Grettir gekk fram, ok mælti hátt: gangit til sængr, konur, segir hann; svá vill Þórir bóndi skipa. Þær báðu hánnum ills á móti; var hinn mesti úlfabytr til þeirra at heyra. Berserkirnir kvámu fram í þessu. Grettir mælti: göngum út, ok man ek sýna yðr fatabúr Þorfinns. Þeir létu þat leidast. Kvámu þeir at útibúri ákafliga stóru; þar váru á útidyrr, ok sterkr láss fyrir; þat var allsterkt hús. Þar var hjá salerni mikit ok sterkt, ok eitt skjaldþili milli húsanna; húsinn stóðu hátt, ok var nökkut rið upp at ganga. Berserkirnir gjörðust nú umfangsmiklir, ok skotruðu¹ Gretti; hann fór undan í flæmingi; ok er þeim var minnst ván, hljóp hann út ór húsinu, ok greip í hespuna, ok rekr aptr húsit ok setr lás fyrir. Þórir ok hans fèlagar ætluðu fyrst at svarfast myndi aptr hafa hurðin, ok gáfu sèr ekki at; þeir höfðu ljós hjá sèr, því at Grettir hafði sýnt þeim marga gripi, þá er Þorfinnr átti, litu þeir þar á um stund. Grettir flýtir ferdinni heim at bænum; ok þegar hann kemr í dyrnar, kallar hann hátt, ok spyrr, hvar húsfreyja væri. Hón þagði, því at hón þorði eigi at svara. Hann mælti: hær er næsta veiðarefni; eðr eru nökkur vápn, þau sem neyt eru? Hón svarar: eru vápnin, en eigi veit ek, til hvers þær koma. Tölum síðar um þat, segir hann; dugi nú hverr sem mál, eigi man síðar vænna. Húsfreyja mælti: nú væri guð í garði², ef nökkur mætti um bætast várn hag; yfir sæng Þorfinns hangir krókaspjótið stóra, er átt hefir Kárr hinn gamli; þar er ok hjálmr ok brynja, ok saxit góða, ok munu eigi bila vápnin, ef þær dugir hugrinn. Grettir þrífir hjálminn

¹) spottuðu, D. ²) ístedelfor guð í garði áar D guð ván í; ok góð jöl, tilf. B, D.

ok spjótið, en gyrðir sik með saxinu, ok gengr út skjótt. Húsfreyja kallar á húskarla, ok bað þá fylgja svá góðum dreng. Þeir blupu til vápna fjórir, en aðrir fjórir þorðu hvergi nærri at koma.

Nú er at segja frá berserkjunum, at þeim þótti Gretti dveljast apttrkváman. Grunar þá nú, hvárt eigi muni vera svik í, hlaupa þeir á hurðina, ok finna, at hón var læst; treysta nú á timbrveggina, svá brakar í hverju trè. Hér kemr um síðir, at þeir fá brotið skjaldþilit¹, ok kvámust svá fram í gangrúmit, ok þar út á riðit; kemr á þá berserks-gangr, ok grenja sem hundar. Í því bili kvam Grettir at; hann tvíhenti spjótið á Þóri miðjum, er hann ætlaði ofan fyrir riðit, svá þegar gekk í gegnum hann. Fjöðrin var bæði löng ok breið á spjótinu. Ögmundr illi gekk nær Þóri, ok hratt hánum á lagit², svá allt gekk upp at krókunum; stóð þá spjótið út um herðarnar á Þóri, ok svá framan í brjóstið á Ögmundi; steiptust þeir báðir dauðir af spjótinu. Þá hljóp þar hverr út af riðinu, sem kominn var. Grettir sótti at sérhverjum, gjörði ýmist, at hann hjó með saxinu, eða lagði með spjótinu, en þeir vörðust með trjá, er lágu á vellinum, ok öllu því, er þeir fengu til; var þat hin mesta mannþætta, at fást við þá, fyrir alls sakir, þó at þeir hefði eigi³ vápn. Grettir drap þá tvá af Háleygjum þar í túninu. Húskarlar fjórir kvámu þá at; höfðu þeir eigi ásáttir orðit, hver vápn at hverr skyldi hafa; sóttu þá at, þegar berserkirnir hörfuði undan, en er þeir snérist á mót, brukku húskarlar upp undir húsin. Sex féllu þar víkingar, ok varð Grettir banamaðr allra. Síðan leituðu aðrir sex undan; bárust þeir þá ofan at naustinu ok inn í naustið; vörðust þeir þá með árum. Fekk Grettir þá stór högg af þeim, svá at við meiðingum var búit. Húskarlar fóru þá

1) skeldþilit, D. 2) spjótið, D. 3) *ilff. after B, C; engi, D.*

heim, ok sögðu mikit af framgöngu sinni. Húsfreyja bað þá vita, hvat af Gretti yrði, en þat fékkst eigi af þeim. Tvá drap Grettir í naustinu, en fjórir kvámust út hjá hánum. Fóru þá sinn veg hvárir tveir; hann elti þá, sem nær hánum váru. Gjörði nú myrkt af nótt. Þeir hlupu í kornblöðu nökkura á þeim bæ, sem fyrr var nefndur, er á Vindheimi hét. Þar áttust þeir lengi við, en um síðir drap Grettir báða; var hann þá ákaflega móðr ok stíðr, en mikit var af nótt; veðr gerði kalt mjök með fjúki. Nennti hann þá eigi at leita víkinganna þeirra tveggja, er þá váru eptir. Gekk hann nú heim til bæjar. Húsfreyja lét kveikja ljós í hinum efstum loptum við gluggana, at hann hefði þat til leiðarvísis. Var ok svá, at hann fat af því heim, er hann sá ljósið. En er hann kvam í dyrnar, gekk húsfreyja at hánum, ok bað hann vera velkomiinn; ok hefir þú, segir hún, mikla frægð unnit, ok leyst mik ok hjú mín frá þeirri skemmd, er vèr hefðim aldri bót fengit, nema þú hefðir borgit oss. Grettir svarar: ek þikjumst nú mjök hinn sami, ok í kveld, er þèr töluðut hrakligast við mik. Húsfreyja mælti svá: vær vissum eigi, at þú værir slíkr afreksmadr, sem nú höfum vèr reynt; skal þèr allt sjálfbodit innanbæjar, þat sem ek hefi til at veita, en þèr sæmd í at þiggja, en mik varir, at Þorfinnr launi þèr þó betr, er hann kemr heim. Grettir svarar: lítils man nú við þurfa fyrst um launin, en þiggja man ek boð þitt, þar til er bóndi kemr heim; en þess væntir mik, at þèr megit sofa í náðum fyrir berserkjunum. Grettir drakk lítið um kveldit, ok lá með vápnum sínum um nóttina. Um morgininn þegar lýsa tók, var mönnum saman stefnt um eyna; var þá farit at leita berserkjanna, þeirra sem undan höfðu komizt um kveldit. Þeir fundust at áliðnum degi undir einum steini, ok váru þá dauðir af kulda ok sárum. Síðan váru þeir færðir í

flæðarurð eina, ok dysjaðir þar. Eptir þat fóru þeir heim, ok þóttust eyjarskeggjar í frið þegnir. Grettir kvað visu þessa, er hann kvam heim til húsfreyju:

Tólf höfum gröf hjá gjálfri
gunnelde búið runnum;
einn nam ek öllum vinna
útrauðr bráðan dauða.
Hver munu gild of gjörvast,
(gulls vel-borin selja)
verk, þau er einn fær orkat
(itr), ef slík eru lítil?

Húsfreyja mælti: víst ertu fárra manna líki, þeirra sem nú eru uppi. Setr hón hann í öndugi, ok gjörði til hans alla bluti vel. Leið nú svá fram, unz Þorfinns var heim ván.

20. Eptir jólin býst Þorfinnr til heimferðar, ok leysti marga með góðum gjöfum burt, þá er hann hafði til sín boðið. Síðan ferr hann með sínu föruneysi, þar til er hann kemr mjök at naustum sínum. Þeir sjá, at skip lá á sandinum, ok bera brátt kennsl á, at þat var karfi hans enn stóri. Ekki hafði Þorfinnr þá spurt til víkinganna. Hann hað þá flýta sér at landi; því at mik grunar, sagði hann, at hér hafi eigi vinir um vælt. Þorfinnr gekk fyrst á land sinna manna, ok þegar at naustinu. Hann sá þar skip standa, ok kenndi, at þat var skip berserkja. Hann mælti þá til sinna manna: þat grunar mik, sagði hann, at þeir atburðir muni hér orðið hafa, at ek vilda gefa til eyna ok allt þat, sem hér stendr saman, at eigi hefði orðið. Þeir spurðu, hví svá væri. Hann mælti þá: hér hafa komit þeir víkingar, er ek veit versta í öllum Noregi, sem er Þórir þömb ok Ögmundur illi. Munu þeir hafa eigi búið heppiliga fyrir oss, en ek treysti eigi vel Íslendingi. Talaði hann

hèr til margt við fèlaga sína. Grettir var heima, ok olli¹ hann því, er seint var til strandar gengit. Kvast hann eigi hirða, þótt bónda blikraði nökkut til, hvat fyrir væri; en er húsfreyja bað hann leysis, sagði hann, at hón skyldi ráða ferðum sínum, en hvergi læzt hann fara mundu. Hón gekk skjótt til fundar við Þorfinn, ok fagnaði hánun vel. Hann varð gláðr við þat, ok mælti: guð hafi lof fyrir, er ek sè þik heila ok káta, ok svá dóttur mína; eða hversu hefir ykkir til gengit, síðan er ek fór heiman? Hón svarar: vel hefir ór ráðizt, en lá oss við svá mikilli svívirðingu, at vèr hefðim aldri bót fengit, ef eigi hefði vetr-taksmaðr þinn hjálpat oss. Þorfinnr mælti þá: nú skal setjast niðr, en þú seg frá tíðindum. Hón segir þá greiniliga alla atburði, sem þar höfðu gjörzt ok lofaði² mjök hreysti Grettis ok framgöngu. Þorfinnr þagði á meðan³; ok er hón hafði úti söguna, svarar hann svá: satt er þat er mælt er: lengi skal manninn reyna, eða hvar er Grettir nú? Húsfreyja sagði: hann er heima í stofu. Síðan gengu þau heim á bæinn. Þorfinnr gekk til Grettis, ok hvarf til hans, ok þakkar hánun með mörgum fögnum orðum þann drengskap, er hann hafði hánun sýnt; ok þat man ek til þín mæla, sagði Þorfinnr, sem fáir munu mæla til vinar síns, at ek vilda, at þú þyrftir manna við, ok vissir þú þá, hvárt ek gengi⁴ þér fyrir nökkurn mann, eða eigi, en aldri fæ ek laumat þér þinn velgjörning, ef þik stendr engi nauðr; en vist þín skal standa hér hjá mér, nær sem þú þarft at þiggja, ok þú skalt framast haldinn af mínum sveinum. Grettir bað hann hafa mikla þökk fyrir; ok munda ek þegit hafa, þó at þú hefðir fyrr boðit. Nú sat Grettir þar um vetrinn, ok var í hinum mestum kærleikum við Þorfinn; varð hann nú ok frægr af verki þessu um allan Noreg, ok

1) reð, D. 2) lofðu allir, B, D. 3) hón sagði, *ilff.* B, D. 4) stæði, B, C, D.

þar mest, sem þeir höfðu mestar úspektir gjört, berserkirnir. Um vart spurði Þorfinnr Gretti, hvat hann vildi at hafast. Hann kvazt ætla at fara norðr í Vága, meðan þar var stefnutími. Þorfinnr kvað hánnum til reiðu skyldu penningar, sem hann vildi. Grettir kvazt eigi þurfa at sinni penninga, meir enn til skotsilfrs. Þorfinnr kvað þat skylt, ok fylgd; hánnum til skips: þá gaf hann Gretti saxit góða; þat bar Grettir, meðan hann lifði, ok var hin mesta gersemi. Bað Þorfinnr hann til sín fara, þegar hann þyrfti liðs við. Grettir fór nú norðr í Vága, ok var þar allmikit fjölmenni. Fögnuðu þeir margir hánnum þar vel, sem hann höfðu eigi sët fyrr, fyrir sakir þess frægðarverks, sem hann hafði unnit, þá er hann drap víkingana. Buðu hánnum margir göfgir menn til sín, en hann vildi fara aptr til Þorfinns vinar síns. Ræzt hann þá í byrðing, er átti sá maðr, *er Þorkell hét; hann bjó í Sálfti¹ á Hálógalandi, ok var göfgr maðr. En er Grettir kwam heim til Þorkels, tók hann við hánnum harðla vel, ok bað Gretti með sèr vera um vetrinn, ok lagði til þess mörg orð. Þat þekktist Grettir, ok var með Þorkeli þenna vetr í góðu yfirlæti.

21. Björn hét maðr, er þar var á vist með Þorkeli; hann var ákafamaðr í lyndi ok góðrar ættar, skyldr nökkut Þorkeli. Eigi var hann vinsæll maðr af alþýðu, því at hann aflutti mjök fyrir þeim mönnum, er váru með Þorkeli; kwam hann svá mörgum á brott. Fátt kwam² á með þeim Gretti; þótti Birni hann lítills verðr hjá sèr, en Grettir var útillátssamr, ok kwam til þverúðar með þeim³. Björn var hávadamaðr mikill, ok gjöri um sik mikit; fylgdu hánnum at því margir ungir menn, ok höfðu þeir opt á kveldum slentr mikit úti. Þat bar til á öndverðum vetri, at híðbjörn

¹) Sálfti, C, Saltey, B. ²) fell, D. ³) Kvaru í með þeim orð mikil, D; kwam í með þeim þverúð mikil, B.

einn grimmr hljóp ór híði sínu, ok varð svá grimmr, at hann eirði hvárki mönnum nè fè; ætluðu menn, at hann myndi vaknat hafa af háreysti því, er Björn hafði gjört með kumpánum sínum. Gjörðist dýrit svá illt viðfangs, at þat reif niðr hjörð fyrir mönnum; hafði Þorkell af þessu mestan skaða, því at hann var maðr ríkastr í þessu byggðarlagi. Á nökkurn dag kvaddi Þorkell til fylgdar menn sína, at leita, hvar híð bjarnarins væri; þeir fundu þat í sjáfarhömrum; var þar háfr klettr einn, ok hellisskúti framan í hamrinum einum, en einn stigr¹ til at ganga[; bjarg var undir² hellinum, ok urð við sjóinn; var þar viss bani því, er ofan hrapaði. Lá björninn í híðinu á daginn, en leitaði á burt jafnan er náttáði. Hældu engar grindr fènu fyrir hánum. Kvámu þeir eigi hundum við. Þótti mönnum þetta hit mesta vandræði. Björn, frændi Þorkels, kvað vera at gjört hit mesta, er híðit var fundit; skal ek nú prófa, sagði hann, hversu leikr ferr með okkr nöfnum. Eigi lét Grettir, sem hann vissi, hvat Björn talaði³ um þetta. Jafnan bar svá til á kveldum, þá er menn fóru at sofa, at Björn hvarf út. Þat var eina nátt, at Björn fór til híðsins; hann varð varr við, at dýrit var þar fyrir, ok grenjaði illiliga. Björn lagðist niðr við einstigit, ok hafði yfir sér skjöldinn, ok ætlaði at bíða, þar til er dýrit leitaði á burt eptir vanda. Bessi hafði veðr af manninum, ok seinkaði heldr ferðinni. Björn syfjaði heldr mjök, þar sem hann lá, ok getr eigi vakat; ok í þessu ræðr dýrit ór híðinu; getr nú sèt, hvar maðrinn ligg, krækir til hramminum, ok hnykkir af hánum skildinum, ok kastar ofan fyrir bjargit. Björn bregðr við hart, er hann vaknar, tekr hann til fóta ok hleypr heim; var þá búit við, at dýrit myndi⁴ grípa hann. Vissu þetta fèlagar

¹) *istedelf*, einn stigr *Aar* C einstigi. ²) *fra* [upp bergit at, D. ³) brak-
aði, B, C; sagði, D. ⁴) na hánum ok, *allf.* C, D.

hans, því at þeir höfðu njósn á um ferðir Bjarnar; fundu þeir skjöldinn um morgininn, ok gjörðu at þessu hit mesta gabb. Á jólum¹ fór Þorkell sjálf til híðsins, ok þeir átta saman; þar var þá Björn ok Grettir ok aðrir fylgdarmenn Þorkels. Grettir hafði yfir sér loðkápu, ok lagði hana af sér, meðan þeir sóttu at dýrinu. Þar var úhægt á at sækja, því eigi mátti við koma nema spjótalögum, ok beit hann þau af sér. Björn eggjaði þá mjök til atsóknar, en þó gekk hann eigi svá nær, at hán um væri við. nökkuru hætt; ok er minnst varði, þrífir Björn kápu Grettis, ok kastaði í híðit til bjarnarins. Ekki gátu þeir at gjört, ok hurfu aptr, er á leið daginn; en er Grettir bjóst heim at ganga, saknar hann feldar síns. Hann gat sèt, at björninn hafði drepit² undir sik kápuna. Hann mælti þá: hverr hefir sveina gletzt við mik, ok kastat feldi mínum í híðit. Björn svarar: sá cinn man þat gjört hafa, er þora man við at ganga. Grettir svarar: eigi legg ek slíkt langt upp. Þá snèru þeir heim á leið; ok er þeir höfðu gengit um hrið, slitnaði hosnasterta³ Grettis⁴. Þorkell bað þá bíða hans. Grettir kvað þess eigi þurfa. Þá mælti Björn: eigi þurfit þèr þat at ætla, at Grettir renni frá kápu sinni; man hann vilja hafa frægd af, ok drepa einn dýrit, þat er vèr höfum frá gengit átta; þá væri hann slíkr, sem hann er sagður, en allslæliga⁵ hefir hann fram gengit í dag. Eigi veit ek, sagði Þorkell, hversu þèr ferr af, en eigi munu þit jafnir breystimenn vera, ok legg þú fátt til hans. Björn kvað hvárnigan þeirra kjósa orð ór munni sér. Nú bar leiti á milli; Grettir snèri þá aptr at einstiginu; var þá eigi at metast við aðra um atgöngu; hann brá þá sverðinu Jökulsnaut, en hann hafði hönk á

¹ *hlíf*. B, C, D. ² dregit, C, D. ³ hosureim, D, hosnareim, C. ⁴ mín, segir Grettir, B, D. ⁵ allslæliga, B.

meðalkaflanum á saxinu, ok smeygði á hönd sèr; því gerði hann svá, at hann þóttist heldr mega taka til þess, er hann vildi, ef laus væri höndin. Hann gekk þegar í einstigit; ok er dýrit sá manninn, hljóp þat upp¹ með grimmd mikilli ok í móti Gretti, ok laust til hans með hramminum, þeim er firr var berginu. Grettir hjó í móti með sverðinu, ok kvam á hramminn fyrir ofan klærnar, ok tók þar af. Þá vildi dýrit ljósta með þeim fætinum, sem heill var, ok skaut á stúfinn, ok yarð hann lægri, enn hann ætlaði, ok féll þá dýrit í fang Gretti. Hann þrífir þá meðal hlusta dýrinu, ok hèlt því frá sèr, svá þat náði eigi at bíta hann. Svá hefir Grettir sagt, at hann þóttist þá aflraun mesta gjört hafa, at halda dýrinu; en með því at dýrit brauzt um fast, en rúmit lítið, þá ruku² þeir báðir ofan fyrir bjargit. Nú var dýrið þyngra, ok kvam þat fyrr niðr á urðina; varð Grettir þá efri, en dýrit lamdist þá mjök þeim megin, sem niðr vissi. Grettir þrífir þá til saxins, ok lagði björninn til hjartans, ok var þat hans bani. Eptir þat fór hann heim, ok tók feld sinn, ok var hann allr rifinn í sundr. Hann hafði með sèr þat er hann hafði höggvit af hramminum. Þorkell sat at drykkju, þá er Grettir kvam í stofuna; hlógu þeir at feldarslitrinu, er Grettir hafði yfir vèr. Hann setr nú upp á borðit þat er hann hafði höggvit af hramminum. Þorkell mælti: hvar er nú Björn frændi minn? aldri sá ek þèr svá bíta járnin, ok vil ek, at þú bjóðir Gretti söemd fyrir þessa svívirðing, sem þú hefir til hans gjört. Björn kvæð þat frestast mundu; ok hirði ek aldri, hvart hánum líkar vel eða illa. Grettir kvað vísu þessa:

Opt kvam heim í húmi,
hræddr þá engum blæddi,

1) *af*. B, D. 2) *brutu*, C, D.

sá er vetrliða vitja
vígnejörðr í haust gjörði.
Sá engi mik sitja
síð fyrir bjarnar biði;
þú kwam ek ullar otra
út ór helliskúta.

Bæði er, sagði Björn, at þú hefir vel fram gengit, enda berr þú okkr úlíkt söguna; skil ek, at þú mant þykjast mér þessa sneið stinga. Þorkell mælti: þat vilda ek, Grettir, sagði hann, at þú hefnir þín eigi á Birni, en ek man bæta fyrir hann fullum manngjöldum, ok sè þit sáttir. Björn kvað hann verja mega betr sè sínu, enn bæta fyrir þetta; þykir mér þat ráð, at hær hafi eik, þat er af annarri skefr, er við Grettir eigumst við. Grettir kvað sèr þat allvel líka. Þá mantu, Grettir, sagði Þorkell, gjöra þat fyrir mína skuld, at gera eigi á hluta Bjarnar, á meðan þit erut hjá mér. Þat skal vera, sagði Grettir. Björn kvazt úbræddr ganga skyldu fyrir Gretti, hvar sem þeir fyndist. Grettir glotti at, en vildi eigi þiggja fèit fyrir Björn, ok váru þeir þar um vetrinn.

22. Um várit fór Grettir norðr í Vága með byrðingsmönnum; skildu þeir Þorkell með vínáttu; en Björn fór vestr til Englands, ok var fyrir skipi Þorkels, því er þangat fór. Hafðist Björn þar við um sumarit, ok keypti til handa Þorkeli þá hluti, sem hann hafði hánun um boðit. Sigldi hann vestan. er á leið haustið. Grettir var í Vágum til þess, er flotinn leysti. Síðan sigldi hann norðan með byrðingsmönnum nökkurum, þar til er þeir kvámu í höfn þá, er í Gaulkum¹ heitir; þat er fyrir Þrándheims munni, ok tjölduðu þar yfir sèr; ok er þeir höfðu um búizt, sigldi skip at höfninni sunnan fyrir land. Þeir kenndu brátt, at þat var Englandsfar.

1) Gaulam D, Ganglunum B, Gortum C.

Þessir lögðu at utar við ströndina, og gengu á land. Grettir ok hans félagar viku til móts við þá; en er þeir fundust, sèr Grettir, at Björn er þar í liði, ok mælti: þat er vel, at vit höfum hær fundizt; munu vit nú taka til hinna fornu greina okkarra; vil ek nú reyna, hvárr okkar meira má. Björn kvað sèr þat fornt vera; en ef þat hefir nökkut verit, þá vil ek bæta, svá at þú þykist vel haldinn¹ af. Grettir kvað þá visu:

Ígultanna gat ek unnit
(orð læk á því forðum);
feld reif hart af höldi
hugstriðr meginsiðan.
Baugis olli því bellinn
baldr, en nú skal gjalda,
(opt þykkjumst ek ekki
allhöelinn) í kappmælum.

Björn sagði bætt hafa verit fyrir stærri sakir², enn þessar³. Grettir kvað fá til hafa orðit, at gera sèr öfundarbrögð, enda læzt hann aldri fæ hafa á tekit, ok sagði, at enn myndi svá fara; skulu vit báðir eigi hëðan heilir ganga, ef ek má ráða; legg ek nú bleyðiorð á bak þær, ef þú þorir eigi at berjast. Björn sá nú, at hánú tjáði eigi undan at mælast; tók nú vápn sín ok gekk á land. Síðan hlupust þeir at, ok börðust, ok eigi lengi, áðr enn Björn varð sárr, ok því næst fell hann dauðr til jarðar. En er þat sá fylgdarmenn Bjarnar, gengu þeir á skip sitt; snëru norðr með landi til móts við Þorkel, ok sögðu hánú þenna atburð. Hann kvað þat eigi fyrr hafa fram komit, enn ván var at. Brátt eptir þetta fór Þorkell suðr til Þrándheims, ok fann þar Svein jarl. Grettir fór suðr á Mœri eptir víg Bjarnar,

¹) sœmdr, B, C, D, *istledatfor* vel haldinn.
þessar, *udelader* C, D.

²) mál, D, verk, C.

³) enn

ok hitti Þorfinn vin sinn, ok sagði hánú þat sem til hafði borit. Þorfinnr tók vel við hánú; ok er þat gott, sagði hann, at þú ert vinþurfi, skaltu með mér vera, þar til er lýkr þessum málum. Grettir þakkaði hánú fyrir boð sitt, ok kvazt þat nú þiggja mundu. Sveinn jarl sat iðn í Þrándheimi at Steinkerum, þá er hann spurði víg Bjarnar. Þá var þar með hánú Hjarandi, bróðir Bjarnar; hann var hirðmaðr jarls. Hann varð við reiðr mjök, er hann spurði víg Bjarnar, ok beiddi jarl liðveizlu til málsins. Jarl hēt hánú því. Sendi hann þá menn til Þorfinns, ok stefndi þeim Gretti¹ báðum á sinn fund. Bjóst hann þegar, ok þeir Grettir báðir eptir boði jarls, ok fóru inn í Þrándheim á hans fund. Átti jarl þá stefnu at málinu, ok bað Hjaranda hjá vera. Hjarandi kvazt eigi mundu bera bróður sinn í sjöð; skal ek annathvært fara slíka för, sem hann, ella hefna hans, sagði hann. Nú er málit var skodað, fannst jarli, sem margar sakir hefði Björn gjört við Gretti; en Þorfinnr bauð feðætr eptir því, sem jarli þœtti erfingjar sæmdir af, ok talaði um þat langt eyrindi, hvert frelsi at Grettir hefði unnit mönnum norðr í landi, þá er hann drap berserkina, sem fyrr var sagt². Jarl svaraði: satt segir þú þat, Þorfinnr, þat var hin mesta landhreinsun, ok vel samir oss at taka feðætr fyrir þín orði; er ok Grettir frægr maðr fyrir sakir aßs ok hreysti. Hjarandi vildi eigi sættum taka, ok skildu þeir málstefnuna. Þorfinnr fœkk til Arnbjörn, frænda sinn, at ganga með Gretti hvern dag, því at hann vissi, at Hjarandi sat um líf hans.

23. Þat var einn dag, er Grettir ok Arnbjörn gengu út um stræti at skemmta sér; ok er þeir kvámu fram fyrir garðshlið nökkut, hljóp maðr fram ór garðshliðinu með reidda öxi, ok hjó til Grettis tveim höndum. Hann varði einskis

1) *Nif. B. D.* 2) sem aðr var, A.

um þetta, ok gekk undan seint. Arnbjörn gat seð manninn, þreif til Grettis, ok bratt hán um á fram svá hart, at hann fell á knè. Öxin kom á herðarblaðit, ok renndi út¹ undir höndina; var þat mikit sár. Grettir snaraðist við fast, ok brá saxinu; hann kenndi, at þar var kominn Hjarandi. Öxin stóð föst í strætinu, ok varð hán um seint at sér at kippa, ok í því hjó Grettir til Hjaranda, ok kvam á höndina uppi við öxl, svá af tók. Þá hlupu at fylgdarmenn Hjaranda fimm saman. Sló þá í bardaga með þeim; urðu þar skjót umskipti; drápu þeir Grettir ok Arnbjörn þá, er með Hjaranda váru, en einn komst undan, ok fór sá þegar á fund jarls, ok sagði hán um þessi tíðendi. Jarl varð afar reiðr, er hann frétti þetta, ok stefndi þing annan dag eptir. Kvámu þeir Þorfinnr ok Grettir á þingit. Bar jarl sakir á hendir Gretti um vígin, en hann gekk við, ok sagðist hann hafa átt hendir sínar at verja; man ek ok hafa merki á mèr, sagði Grettir, hefða ek bana af fengit, ef Arnbjörn hefði eigi borgit mèr. Jarl segir, at þat var illa, er hann var eigi drepinn; man þat verða margs manns bani, ef þú lifir. Þá var til jarls kominn Bessi Skáldtorfuson, fèlagi Grettis ok vin. Gengu þeir Þorfinnr fyrir jarl, ok báðu gríða til handa Gretti, ok buðu, at jarl skyldi einn dæma um þessi mál, ok þægi Grettir gríð ok landvist. Jarl var tregr í öllu sáttmáli, en lét þó leidast eptir bænastað þeirra. Var þá komit á gríðum til várs fyrir hönd Grettis, en þó vildi jarl eigi sættast, fyrr enn við væri Gunnarr, bróðir þeirra Bjarnar ok Hjaranda. Gunnarr var garðsbóndi í Túnsbergi. Um várit stefndi jarl þeim Gretti ok Þorfinni austr til Túnsbergs, því at hann ætlaði þar at vera, meðan mest atsigling væri austr þar. Fóru þeir þá austr þangat. Var jarl þar fyrir í böenum, er þeir kvámu austr. Grettir fann þar Þor-

¹) *slf.* B, C, D.

stein drómund bróður sinn; tók hann við hánum allvel, ok bauð hánum til sín. Þorsteinn var þar garðsbóndi í bœnum. Sagði Grettir hánum af málum sínum, ok tók Þorsteinn vel undir, en bað hann vera varan um sik fyrir Gunnari. Leið nú svá fram á várit.

24. Gunnarr var í bœnum, ok sat um Gretti, nær sem særi gæfi á hánum. Þat bar til á einhverjum degi, at Grettir sat í búð nökkurri ok drakk, því at hann vildi eigi verða fyrir Gunnari, ok er hann varði minnst, var hlaupit á hurðina svá hart, at hón brotnaði í sundr. Þar hlupu inn fjórir menn alvápnadir; var þar kominn Gunnarr ok fylgdarmenn hans. Þeir sóttu at Gretti. Hann þreif vápn sín, er hengu uppi yfir hánum; hopaði hann þá upp í hyrninguna, ok varðist þaðan, hann hafði fyrir sèr skjöldinn, en hjó með saxinu. Sóttist þeim eigi fljótt; kvam hann þá höggi á einn fylgdarmann Gunnars; þurfti sá eigi fleiri. Rýmdi Grettir þá fram á gólfitt; hrukku þeir þá utar eptir búðinni; féll þar annarr maðr af Gunnari. Þá vildi Gunnarr undan leita, ok hans förunautar; kvamst sá til dyranna ok drap fótunum í þrepskjöldinn, ok lá fallinn ok komst seint upp. Gunnarr hafði fyrir sèr skjöldinn, ok hopaði undan Gretti, en hann sótti at með kappi, ok hljóp upp í þverpallinn við dyrnar; bar þá hendr Gunnars inn ór dyrunum, ok svá skjöldinn. Grettir hjó þá niðr í milli Gunnars ok skjaldarins, ok af hánum báðar hendrnar í úlfliðinum; féll hann á bak aptr út ór dyrunum. Grettir hjó hann banahögg, ok í því kvamst sá á sætr, er hánum hafði fylgt, ok fór þegar á fund jarls, ok sagði hánum þessi tíðendi. Sveinn jarl varð ákafliga reiðr við þessa sögu, ok stefndi þegar þing í bœnum; en er þeir Þorfinnr ok Þorsteinn drómundr vissu þetta, heimtu þeir at sèr tengdamenn sína ok vini, ok fjölmenntu mjök til þingsins. Jarl var allstygg, ok

mátti lítt orðum við hann koma. Þorfinnr gekk fyrst fyrir jarl, ok mælti: því er ek hér kominn, at ek vil bjóða yðr sátt ok sæmd fyrir víg þessi, er Grettir hefir vegit; skulu þèr einir skera ok skapa, ef maðrinn hefir grið. Jarl svarar reiðr mjök: seint leidist þèr et biðja griða til handa Gretti, en grunar mik, at þú hafir þar eigi gott at sök: hefir hann nú drepit þrjá bræðr, hvern á fœtr öðrum, váru þeir svá hraustir menn í sèr, at engi þeirra vildi annan í sjóð bera. Nú tjár þèr, Þorfinnr, eigi at biðja fyrir Gretti, því at ek vil eigi leiða svá inn rangindi í landit, at taka bætr fyrir slík úhæfuverk. Þá gekk fram Bessi Skáldtorfuson, bað jarl taka sættum; vil ek, sagði hann, þar til bjóða mitt góðs, því at Grettir er maðr stórættaðr ok góðr vin minn; megi þèr sjá, herra, at betra er at gefa einum manni grið, ok hafa í móti margra manna þökk, en ráða einn fêsektum, heldr enn brjótast í móti sæmd sinni, ok hætta, hvárt þèr náit mannum, eða eigi. Jarl svarar: vel ferr þèr, Bessi, þetta, ok sýnir þú þat jafnan, at þú ert góðr drengr; en þó nenni ek eigi, at brjóta svá landslögin, at gefa þeim grið, sem úlífismenn eru. Þá gekk fram Þorsteinnu drómundr, ok kvaddi jarl, ok bauð boð fyrir Gretti, ok fór þar um mörgum fögrum orðum. Jarlinn spurði, hvat hánú gengi til at bjóða boð fyrir þenna mann. Þorsteinn sagði, at þeir váru bræðr. Jarl kvazt þat eigi vittað hafa; en drengskapr er þèr í, þó at þú vildir hjálpa hánú. En fyrir því, at vèr höfum eigi ætlað at taka fêbætr fyrir þessi mál, þá munu vèr hér alla jafndýra um gjöra; skulu vèr hafa líf Grettis, hvat er kostar, þegar vær komumst við. Hljóp jarl þá upp, ok vildi eigi á líta um sættirnar. Þeir Þorfinnr gengu þá heim í garð Þorsteins, ok bjuggust þar um. En er jarl sá þetta, lét hann vápnast alla hirð sína, gengr síðan með fylktu liði þangat; ok áðr liðit kvam at,

skipuðust þeir til varnar fyrir garðshliðinu. Stóðu þeir fremstir Þorfinnr ok Þorsteinn ok Grettir, ok þá Bessi; hafði hverr þeirra mikla sveit manna. Jarl bað þá selja fram Gretti, ok halda sik eigi í úfæru. Þeir buðu öll hin sömu boð, sem fyrr. Jarl vildi þat eigi heyra. Þeir Þorfinnr ok Þorsteinn kváðu jarli skyldu meira fyrir verða at ná lífi Grettis, því at eitt skal yfir oss ganga, ok man þat mælt, at þær vinnit mikit til eins manns lífs, ef vèr erum allir við velli lagðir. Jarl kvazt engvan þeirra spara skyldu. Var þá við sjálfu búið, at þeir myndi berjast. Þá gengu at jarli margir góðgjarnir menn, ok báðu, at hann hældi eigi til svá mikils vandræðis; sögðu, at þeir myndi mikit afhroð gjalda, áðr þeir væri drepnir. Jarl fann, at þetta var heilræði; lét hann þá heldr sefast. Síðan var dregin saman sættin; váru þeir Þorfinnr ok Þorsteinn þess fúsir, þegar Grettir næði gridum. Jarl mælti: þat skulu þær vita, sagði hann, þó at ek gjöri hær mikit miðlunarmál um víg þessi, at ek kalla þetta enga sætt, en eigi nenni ek at berjast við menn mína, þó at ek sjái, at þær metið mik lítils í þessu máli. Þá mæltu Þorfinnr: þetta er yðr meiri sæmd, herra, því þær skulut einir ráða fægjöldum. Jarl sagði þá, at Grettir skyldi fara í friði fyrir hánúum út til Íslands, þegar skip ganga, ef þeim líkaði þá vel. Þeir kváðust þat þiggja mundu. Luku þeir jarli fê, svá hánúum gazt at, ok skildu með engum kærleikum. Fór Grettir með Þorfinni. Skildust þeir Þorsteinn bróðir hans með vináttu. Varð Þorfinnr frægr af fylgd þeirri, er hann hafði veitt Gretti, við slíkt ofrefi, sem hann átti at eiga. Engi af þeim mönnum kvamst í kærleika við jarl þaðan frá, þeirra er Gretti höfðu lið veitt, nema Bessi einn. Svá kvað Grettir:

Var Þorfinnr,
Þundar sessi

aldar, alinn
 oss til hjálpar:
 þá er mik víf
 í valskorum
 lukt ok læst,
 lífs um kvaddi.

Var stórskip
 stálgoðs bana
 Rauða hafs
 ok Regins skáli,
 er Býlests
 bróðurdóttur
 manna mest
 mæð varnaði.

Ok enn þessa:

Þótti þá
 þengils mönnum
 eigi dælt
 við oss at sóknum,
 er hlèbarðr
 hlífar eldi
 bragða borg
 brenna vildi.

Grettir fór með Þorfinni norðr aptr, ok var með hánum þar til, er hann kvam hánum í skip með kaupmönnum þeim, er út ætluðu til Íslands, ok gaf hánum mörg góð þing í klæðum, ok söðul steindan ok bitil með. Skildu þeir með vináttu; bað Þorfinnr hann sín vitja, ef hann kvæmi aptr til Noregs.

25. Ásmundr hærulangr bjó á Bjargi, meðan Grettir var utan, ok þótti hann þá gildastr bóndi í Miðfirði. Þórkell

krafla andaðist á þeim misserum, er Grettir var eigi á Íslandi. Þorvaldr Ásgeirsson bjó þá í Ási í Vatnsdal, ok gjörðist höfðingi mikill. Hann var faðir Döllu, er átti Ísleifr, er síðan var biskup í Skálaholti. Var Ásmundi at Þorvaldi hinn mesti styrkr til málafulltings ok margra hluta annarra. Með Ásmundi vóx upp sá maðr, er Þorgils hét; hann var kallaðr Þorgils Máksson, hann var náskyldr frændi Ásmundar. Þorgils var sterkr at afli, ok græddi mikit fê með umsjá Ásmundar. Keypti hann til handa Þorgils landit at Lækjamóti, ok bjó hann þar. Þorgils var atdráttarmaðr mikill, ok fór á Strandir hvert ár; aflaði hann þar hvala ok annarra fanga. Þorgils var fullbugi mikill; hann fór allt á almenninga hina¹ eystri. Í þenna tíma var uppgangr þeirra fóstbræðra sem mestr, Þorgeirs Hávarðssonar ok Þormóðar kolbrúnarskálds. Þeir áttu ferju, ok létu víða verða til dregit, ok þóttu eigi miklir jafnaðarmenn. Þat bar til á einu sumri, at Þorgils Máksson fann hval á almenningum, gekk hann þegar á skurð ok hans fêlagar. En er þeir fóstbræðr fréttu þat, fóru þeir þangat til, ok horfðist þar fyrst líkliga á um viðtal þeirra. Bauð Þorgils, at þeir skyldi hafa at helmingi þann hvalinn er úskorinn var; en þeir vildu hafa einir, þann er úskorinn var, ella skipta í helminga bæði skorinn ok úskorinn. Þorgils þverneitti því, at leggja þann af, er skorinn var. Sló þá í heitan með þeim, ok því næst vápnuðust hvárrtveggja, ok börðust eptir þat. Þorgeirr ok Þorgils sóttust lengi, svá at engi skakkaði með þeim, ok var hvárrtveggja hinn ákafasti. Var þeirra viðskipti bæði hart ok langt, en sá vandr endir á. at Þorgils féll dauðr fyrir Þorgeiri til jarðar. En Þormóðr ok aðrir fylgdarmenn Þorgils börðust í öðrum stað. Sigraði Þormóðr í þeirra viðskiptum. Fëllu þrír fêlagar Þorgils fyrir hánun. Eptir víg Þorgils snëru fylgdarmenn hans

¹ Strandir hínor. C, D.

aptr inn til Miðfjarðar, ok fluttu lík Þorgils með sér. Þótti mönnum at hánú hinn mesti skaði. Þeir fóstbræðr tóku þar allan hvalinn til sín. Þessa fundar getr Þormóðr í erfiðrápu þeirri, er hann orti um Þorgeir. Ásmundr hærulangi frétti víg Þorgils frænda síns. Hann var aðili at eptirmálinu um víg Þorgils; fór hann til, ok nefndi vátta at þenjum, ok stefndi málinu til alþingis, því at þat sýndist þá lög, er málit hafði¹ til borit² í öðrum fjórðungi, ok liðu svá stundir fram.

26. Maðr er nefndr Þorsteinn; hann var sonr Þorkels kugga, Þórðarsonar gellis, Ólafssonar feilans, Þorsteinsonar rauðs, Audarsonar hinnar djúpaudgu. Móðir Þorsteins Kuggasonar var Þuríðr, dóttir Ásgeirs æðikolls. Ásgeirr var föðurbróðir Ásmundar hærulangs. Þorsteinn Kuggason átti eptirmál um víg Þorgils Mákssonar jafnfram Ásmundi hærulangi. Gjörði hann nú orðsending til Þorsteins, at hann kæmi til móts við hann. Þorsteinn var kappi mikill, ok ofstopamaðr hinn mesti. Fór hann þegar til móts við Ásmund frænda sinn, ok töluðu þeir um vígsmálit. Var Þorsteinn hinn ákafasti, kvað hér eigi skyldu feðr fyrir koma, sagði, at þeir hefði nógan frændaalla til þess, at annathvart kæmi fyrir vígit sekt eðr mannhefndir. Ásmundr kvazt hánú mundu at fundi fylgja, hverju sem hann vildi fram fara. Riðu þeir norðr til Þorvaldar frænda síns, ok beiddu hann liðveizlu; en hann játaði því skjótt. Þjuggu þeir málit til á hendr Þorgeiri ok Þormóði. Þorsteinn reið heim til bús síns; hann bjó þá í Ljárskógum í Hvamssveit. Skeggi bjó í Hvammi; hann ræzt í málit með Þorsteini. Skeggi var sonr Þórarins fýlsennis, Þórðarsonar gellis. Móðir Skeggja var Friðgerðr, dóttir Þórðar frá Höfða. Þeir fjölmenntu mjök til alþingis, ok höldu málum fram með miklu kappi.

1) var, C, D. 2) búit, D, búit at lögum, C.

Ríðu þeir Ásmundr ok Þorvaldr norðan með sex tigu manna, ok sátu í Ljárskógum margar nætr.

27. Þorgils bjó þá á Reykjahólum; hann var son Ara Márssonar, Atlasonar hins rauða, Úlfssonar hins skjálga, er nam Reykjanes. Móðir Þorgils Arasonar var Þorgerðr, dóttir Álfs ór Dölum. Önnur dóttir Álfs var Þórelfr, móðir Þorgeirs Hávarðssonar. Átti Þorgeirr þar traust mikit fyrir frændsemis sakir, því at Þorgils var mestr höfðingi í Vestfirðinga-fjórðungi. Hann var svá mikill þegnskaparmaðr, at hann gaf hverjum frjálsum manni mat, svá lengi sem þiggja vildi; varð af þessu jafnan fjölmennt á Reykjahólum. Hafði Þorgils rausn mikla af búnaði sínum. Hann var góðgjarn maðr, ok forvittr. Þorgeirr var með Þorgils á vetrum, en fór á Strandir á sumrum. Eptir víg Þorgils Mákssonar fór Þorgeirr á Reykjahóla, ok sagði Þorgils þessi tíðendi. Þorgils sagði hánnum þar vist til reiðu hjá sér; en þat hygg ek, segir hann, at þeir verði þungir í málinu, en ek em úfúss at auka vandræðum. Nú man ek senda mann til Þorsteins, ok ljóða fêbætr fyrir víg Þorgils; en ef hann vill eigi sættum taka, þá man ek þetta mál eigi með kappi verja. Þorgeirr kvazt hans forsjá hlíta mundu. Um haustið sendi Þorgils mann til Þorsteins Kuggasonar at leita um sættir, en hann var þverr í því, at taka fé fyrir vígsmálið við Þorgils, en um önnur víg kvazt hann gjöra mundu eptir skynsamra manna tillögum; ok er Þorgils frétti þetta, kallar hann Þorgeir á tal við sik, ok spyrr, hver liðveizla hánnum þætti sér þá hallkvæmust. Þorgeirr kvazt helzt vildu utan fara, ef hann yrði sekr. Þorgils sagði, at þessa mundi freistað verða. Skip stóð uppi í Norðrá í Borgarfirði; í því skipi keypti Þorgils á laun far til handa þeim fóstbræðrum. Leið svá af vetrinn. Þorgils frétti, at þeir Þorsteinn fjölmenntu mjök til alþingis, ok sátu í Ljárskógum. Því frestaði hann

heiman at ríða, at hann vildi, at þeir Þorsteinn væri undan suðr riðnir, þá er hann kvæmi vestan; ok svá varð. Reið Þorgils suðr, ok þeir fóstbræðr með hánum. Í þessi ferð drap Þorgils Böggul-Torfa at Márskeldu; þá drap hann ok þá Skúf ok Bjarna í Hundadal. Svá segir Þormóðr í Þorgeirsdrápu:

Kapp lét höldr (með heppni

hríð gerðist þá sverða:

hrátt gat hrafn at slíta

hold) Máks syni goldit.

Enn var (vígs) at vígi

viggríðandi síðan

(kænn bar greipr at gunni

gjarna) Skúfs ok Bjarna.

Þorgils sættist þar þegar á vígin Skúfs ok Bjarna þar í dalinum, ok dvaldist hánum lengr, enn hann hafði áðr ætlat. Fór Þorgeirr til skips, en Þorgils til þings, ok kvam eigi fyrr enn gengit var til dóma. Þá bauð Ásmundr hærulangi til varna um vígsmálit Þorgils Mákssonar; Þorgils gekk at dóminum, ok bauð fæbætr fyrir vígit, ef Þorgeirr yrði þá sýkn. Hann leitaði til varna í málinu, hvárt þeir ætti eigi allan veidiskap frjálsan á almenningum. Var þá lögmadr at spurðr, hvárt þetta væri lögvörn. Skapti var þá lögmadr, ok fylgði hann Ásmundi fyrir frændsemis sakir; sagði hann, at þat væri lög, ef þeir væri jafnir menn, en sagði, at fyrr ætti at taka böendr, enn einbleypingar. Ásmundr sagði, at Þorgils hefði boðit þeim fóstbræðrum jafnadarскипти á þeim hvalnum, sem úskorinn var, þá er þeir kvámu til, ok var þá lokit þeirri vörn. Gengu þeir Þorsteinn ok frændr hans þá at með kappi, ok létu sér eigi annat líka, enn Þorgeirr væri sekr gjörr. Sá Þorgils, at þá varð annathvært at gjöra, at ganga at með fjölmenni, en þó úvíst, hvat í

aflaðist, eða láta þá fara fram, sem þeim líkaði; ok við þat, at Þorgeiri var í skip komit, leiddi Þorgils hjá sér málit. Var Þorgeirr sekr gjörr, en fyrir Þormóð váru teknar sebætr, ok skyldi hann sýkn vera. Þeir Ásmundr ok Þorsteinn þóttu mikit vaxa af þessu eptirmáli. Ríðu menn þá heim af þinginu. Töluðu sumir menn, at Þorgils hefði lítt fylgt málinu, en hann gaf sér fátt at því, ok lét hvern tala hér um slíkt er vildi. En er Þorgeirr frétti sekt sína, sagði hann svá: þat munda ek vilja, at þeir, er mik hafa sekan gjört, hefði þessa full gjöld áðr enn lýkr, ef ek mætti ráða.

Gautr hét maðr, ok var kallaðr Sleituson; hann var frændi Þorgils Mákssonar. Gautr var ráðinn í skip þetta, er Þorgeirr skyldi sigla í. Hann ýfðist mjök við Þorgeir, ok lét úfrýnliga; en er kaupmenn fundu þat, þótti þeim eigi einsætt, at þeir færi í einu skipi. Þorgeirr sagðist eigi hirða, hversu Gautr læti síga brýnnar, en þó var þat til ráðs tekit, at Gautr ræzt ór skipinu, ok fór norðr til sveita. Varð ekki at með þeim Þorgeiri at því sinni, en þó reis af þessu sundrþykki með þeim, sem síðar bar raun á.

28. Grettir Ásmundarson kvam þetta sumar út í Skaga-firði. Hann var þá svá frægr maðr fyrir sakir afls ok hreysti, at engi þótti þá slíkr af ungum mönnum. Hann reid brátt heim til Bjargs, ok tók Ásmundr þá við hánum sæmiliga. Atli hafði þá húsforráð; féll vel á með þeim bræðrum. Þá gjörðist ofsi Grettis svá mikill, at hánum þótti sér ekki úfært. Þá gjörðust þeir margir fullhraustir menn, er þá váru ungir, er Grettir var at leikum á Mið-fjarðarvatni með þeim, áðr enn hann fór utan. Einn af þeim var Auðunn, er þá bjó á Auðunarstöðum í Víðidal; hann var Ásgeirsson, Auðunarsönnar, Ásgeirssonar æðikolls. Auðunn var góðr bóndi ok gegn maðr; allra manna var hann sterkastr norðr þar; hann þótti hinn gæfasti í byggðarlagi.

Gretti kvam nú þat í hug, at hann þóttist hafa orðit varhluta fyrir Auðuni at knattleiknum, sem áðr er sagt, ok vildi hann prófa, hvárr þeirra meira hefði við gengizt síðan. Af því gjörir Grettir heiman ferð sína á Audunarstaði; þat var um öndverðan sláttutíma. Grettir barst á mikit, ok reið í steindum söðli mjök vönduðum, er Þorfinnr gaf hánú. Hann hafði ok góðan hest, ok vápn öll hinu beztu. Grettir kvam snemma dags á Audunarstaði, ok drap á dyrr. Fátt var manna heima. Grettir spurði, hvárt Auðunn væri heima. Menn sögðu, at hann væri fariun til sels eptir mat. Grettir hleypti beizli af hesti sínum. Túnit var úslegit, ok gekk hestrinn þangat, sem loðnast var. Grettir gekk til skála, ok settist niðr á setstokkinn, ok síðan sofnaði hann. Litlu síðar kvam Auðunn heim; hann sá, at hestr var í túninu með steindum söðli. Auðunn bar mat á tveimr bestum, ok bar skyr á hesti, ok var þat í húðum, ok bundit fyrir ofan; þat kölluðu menn styrkylla. Auðunn tók af hestum, ok bar inn skyr í fangi sér; hánú var myrkt fyrir augum. Grettir rætti fótinn fram af stokkinum, ok féll Auðunn á fram, ok varð undir hánú skyrkyllirinn, ok gekk af yfirbandit. Auðunn spratt upp, ok spurði, hvat skelmi þar væri. Grettir nefndi sik. Auðunn mælti: þann veg var úspakliga farit; eða hvert er eyrindi þitt? Ek vil berjast við þik, sagði Grettir. Sjá man ek fyrst ráð fyrir mat mínum, sagði Auðunn. Vel má þat, sagði Grettir, ef þú mátt eigi öðrum mönnum at því hlíta. Auðunn laut þá niðr, ok þreif upp skyrkylliun, ok sletti framan í fang Grettis, ok bað hann fyrst taka við því, er hánú var sent. Grettir varð allr skyrugr. Þótti hánú þat meiri smán, enn þó Auðunn hefði veitt hánú mikinn áverka. Síðan ræðust þeir á, ok glímdu heldr sterkliga. Sækir Grettir með ákefð, en Auðunn ferr undan; sínnr hann þó, at Grettir heflr dregit undan

hánnum. Gengr upp allt þat, er fyrir þeim verðr, ok rekast þeir víða um skálann. Spardi hvárrgi af, en þó verðr Grettir drjúgari, ok fellr Auðunn at lyktum; hann hafði slitið öll vápnin af Gretti. Knýjast þeir fast, ok verðr brak mikit um þá, ok þá kemr dýr mikill undir bæinn, ok heyrir Grettir, at riðit var at húsunum, ok af baki stigit, ok inn gengit snúðigt. Sér hann, at maðr gengr inn, þrífligr, í jauðum kyrtli, ok hafði hjálm á höfði. Sjá snèri til skálaus, því at hann heyrði umfang mikit, er þeir áttust við. Hann spurði, hvat í skálanum væri. Grettir nefndi sik, eða hvern spyrir at? Barði heiti ek, sagði sá er kominn var. Ertu Barði Guðmundarson ór Ásbjarnarnesi? Sá er maðr hinn sami, sagði Barði: eða hvat hefstu at? sagði hann. Grettir svarar: vit Auðunn eigum hægamanleika. Eigi veit ek um gaman þat, sagði Barði, er ok eigi jafn komit á með ykk; þú ert újafnaðarmaðr ok ofrkappsfullr, en hann er gæfr ok góðfengr, ok láttu hann upp standa skjótt. Grettir svarar: margr seilist um hurð til lokunnar, þætti mæg þér nær at hefna Halls bróður þíns, enn at hlutast til með okkr Auðuni, hvat vit eigumst við. Jafnan heyrir ek þat, sagði Barði, en eigi veit ek, hvárt þess verðr nökkut hefnt, en þó vil ek, at þú látir Auðun vera í náðum, því at hann er spakr maðr. Grettir gjörði svá fyrir tillögur Barða, ok líkaði þó illa. Barði spurði, hvat til saka væri með þeim. Grettir kvað vísu:

Eigi veit, nema utan,
Jálfaðr, at þér sjálfum
kverk fyrir kapp ok orku
(kvelling er þat) svelli;
svá bannaði sinnir
seimgauts, er vark heima,

ungum endr fyrir löngu
ákall þinul fjalla.

Barði kvað þat víst várkunn, ef hanq ætti sín í at hefna. Man ek nú gjöra með ykk^r, sagði Barði; vil ek, at þit skiltit at svá gjörvu, ok sè nú slitið með ykk^r, ok þat létu þeir haldast, því at þeir váru skyldir, ok líkaði Gretti heldr illa við Barða ok bræðr hans. Riðu á burt allir saman. Ok er þeir váru á veg komnir, þá mælti Grettir: þat hafi ek spurt, at þú ætlar suðr til Borgarfjarðar í sumar; uú vil ek bjóða þér, Barði, at fara suðr með þér, ok þykkjumst ek þá gjöra við þik verðleikum betr. Barði varð glaðr við þetta, ok játaði skjótt þessu, ok bað hann hafa þökk fyrir; síðan skildu þeir. Þá veik Barði aptr ok mælti: þat vil ek til skilja, segir hann, at þú farir eigi, nema Þórarinn fóstri minn¹ leyfi, því hann skal ráða ferðinni. Vel þætti mèt þú mega einhlítr vera at ráðum þínum, á ek eigi, sagði Grettir, ferðir mínar undir öðrum mönnum, en illa man mèt þykja, ef þú gjörir mik liðrækan. Nú fóru sína leið hvárir, ok kvazt Barði skyldu gjöra Gretti vissu, ef Þórarinn vildi, at þú farir, en ella skyldi hann sitja um kyrrt. Grettir reið heim til Bjargs, en Barði til bús síns.

29. Um sumarit var lagt hestaping fjölmennt á Langafit, ofan frá Reykjum; kwam þar margt manna. Atli at Bjargi átti hest góðan móalóttan, af Keingálu kyni; höfðu þeir feðgar mætr miklar á hestinum. Þeir bræðr Kormákr ok Þorgils á Mel², áttu hest brúnan öruggan til vígs; þeir skyldi etja saman ok Atli frá Bjargi. Margir váru þar aðrir góðir hestar. Oddr úmagaskáld, frændi Kormáks, skyldi fylgja hesti þeirra frænda sinna um daginn. Oddr gjörðist sterkr maðr, ok lét um sik mikit, údæll ok úfyrirleitinn. Grettir spurði Atla bróður sinn, hverr fylgja skyldi hans

¹) *urf. B.* ²) *urf. B, C.*

hesti. Eigi er mér þat svá glöggt, sagði hann. Viltu, at ek standi hjá? sagði Grettir. Vertu vel stilltr þá frændi, sagði Atli, því at hér er við metnadmenn um at eiga. Gjaldi þeir sjálfir ofstopa síns, sagði Grettir, ef þeir hafa hann eigi í hófi. Nú eru hestarnir fram leiddir, en hrossin stóðu framarliga á árbakkanum, ok váru bundin saman. Hylr mikill var fyrir framan bakkann. Hestarnir bitust allvel, ok var þat en mesta skemmtan. Oddr fylgdi með kappi, en Grettir lét hefjast við, ok tók í taglit annarri hendi, en hēlt með annarri stafnum, er hann keyrði með hestinn. Oddr stóð framarliga hjá sínum hesti, ok var eigi trausl, at hann styngi eigi hest Atla af takinu. Eigi lét Grettir, sem hann sæi þat. Bárust hestarnir fram at ánni; þá stingr Oddr stafinum til Grettis, ok kvam á herðarbláðit, því at Grettir horfði öxlinni at hánum. Þat var mikit tilræði, svá at undan hljóp holdit, en lítt skeindist Grettir. Í því bili risu hestarnir hátt upp; Grettir hljóp undir hömina á hesti sínum en rak stafinn á síðu Oddi svá hart, at þrjú rifin brotnuðu í hánum, en Oddr braut út á hylinn, ok svá hestr hans, ok hrossin öll, þau er bundin váru. Var þá lagzt til hans, ok dreginn af ánni. Þá var óp mikit gjört at þessu. Þeir Kormákr hlupu til vápna, en Bjargsmenn í öðrum stað; en er þat sá Hrútfurðingar ok Vatnsnesmenn, gengu þeir í milli, ok urðu þeir þá skildir, ok fóru heim ok höfðu hvárir ill heit við aðra, ok sátu þó um kyrrt um hríð. Atli var fátalaðr um þetta, en Grettir var heldr úsvifr, ok kvað þá finnast skyldu annat sinn, ef hanu mætti ráða.

30. Þorbjörn hét maðr, er bjó á Þóroddsstöðum í Hrútafyrði; hann var sunr Arnórs heynefs Þóroddssonar, er numit hafði Hrútafjörð þeim megin til móts við Bakka. Þorbjörn var allra manna sterkastr; hann var kallaðr öxna-

megin. Þóroddr hét bróðir hans, hann var kallaðr drápuþúfr. Móðir þeirra var Gerðr, dóttir Böðvars ór Böðvarshólum. Þorbjörn var garpr mikill, ok hafði mannmargt með sér. Hann var til þess tekinn, at hánú var verra til hjóna, enn öðrum mönnum, ok galt nær engum manni kaup; eigi þótti hann dæll maðr. Þorbjörn hét frændi hans, ok var kallaðr ferðalangr; hann var siglingamaðr, ok áttu þeir nafnar félag saman. Var hann á Þóroddsstöðum jafnan, ok þótti hann lítið bæta um fyrir Þorbirni. Hann var tilfýndinn ok fór með dárskap til ýmsra manna. Þórir hét maðr, son Þorkels á Borðeyri. Þórir bjó fyrst á Melum í Hrútafirði. Hans dóttir var Helga, er Sleituhelgi¹ fékk. En eptir² vígít á Fagrabrekku ræzt Þórir suðr í Haukadal, ok bjó á Skarði, en seldi landit á Melum Þórhalla Gamlasyni viðlending³. Hans son var Gamli, er átti Rannveigu, dóttur Ásmundar hærulangs, systur Grettis. Þau bjuggu í þenna tíma á Melum, ok áttu gott ráð. Þórir á Skarði átti tvá sonu, hét annarr Gunnarr⁴, en annarr Þorgeirr⁴. Þeir váru efniligir menn, ok höfðu þeir þá tekit við búi eptir föður sinn, en þó váru þeir jafnan með Þorbirni öxnamegin; þeir gjörðust offorsfullir. Þetta sumar, sem nú var frá sagt, ridu þeir Kormákr ok Þorgils ok Narfi frændi þeirra suðr til Norðrárdals at erindum sínum. Oddr úmagaskáld var ok í ferð með þeim; var hánú þá hatnat stírdleikans, er hann hafði fengit á hestaþinginu. Ok meðan þeir váru fyrir sunnan heiðina, fór Grettir heiman frá Bjargi, ok með hánú tveir húskarlar Atla. Þeir ridu yfir til Búrfells, ok þaðan yfir hálsinn til Hrútafjardar, ok kvámu til Mela um kveldit. Þrjár nætr váru þeir þar. Þau Rannveig ok Gamli tóku allvel við Gretti, ok buðu hánú með sér at vera, en hann

¹) Sleituhelgi, B, Sleituhelgi, D. ²) *Jf. Pag.* 22. ³) *Grimr*, D. ⁴) Þorgeirr, B.

vildi heim ríða. Þá frétti Grettir, at þeir Kormákr váru sunnan komnir, ok höfðu gist í Tungu um náttina. Grettir bjóst snemma frá Melum. Gamli bauð hánú menn til fylgðar. Grímr hét bróðir Gamla; hann var allra manna hvatastr. Hann reið með Gretti við annan mann. Þeir váru timm saman; riðu unz þar til, er þeir kvámu á Hrutafjarðarháls, vestr frá Búrfelli. Þar stendr steinn mikill, er kallaðr er Grettishaf; hann fékkst við lengi um daginn at hefja steininn, ok dvaldi svá þar til er þeir Kormákr kvámu. Grettir snéri til móts við þá, ok hlupu af baki hvártveggja. Grettir sagði, at frjálsmannliga væri nú at höggva sem stærst, heldr enn berjast með stöfum sem förumenn. Kormákr bað þá verða við mannliga, ok duga sem bezt. Eptir þat hlupust þeir at, ok börðust. Grettir var fremstr af sínum mönnum, ok bað þá geyma, at eigi væri gengit at baki hánú. Sóttust þeir um hrið, ok urðu hvártveggja sárir. Þorbjörn oxnamegin hafði riðit þenna dag yfir háls til Búrfells, ok er þeir riðu aptr, sèr hann fundinn. Þar var þá með hánú Þorbjörn ferðalangr, ok Gunnarr ok Þorgeirr Þóris-synir, ok Þóroddr drápustúfr. Ok er þeir kvámu at, heitir Þorbjörn á menn sína til meðalgöngu. Hinir váru svá ákafir, at þeir gátu ekki at gjört. Grettir ruddist um fast. Þeir urðu fyrir hánú Þóris-synir, ok féllu báðir senn, er hann hratt þeim frá sèr. Þeir urðu óðir mjök við þat, svá at Gunnarr hjó húskarl Atla banahggg, ok er Þorbjörn sá þat, biðr hann þá skilja; kvast hann skyldu þeim lið veita, er hans orð vildi rækja. Þá váru fallnir¹ tveir húskarlar Kormáks. Þá sá Grettir, at varla mundi duga, ef Þorbjörn ræðist í lið með þeim, ok því lætr hann verða upp gefinn bardagann. Allir váru þeir sárir, sem á fundinum höfðu verit. Illa þótti Gretti, er þeir váru skildir. Eptir þa

¹) saal. B, C; farair, A.

riðu þeir heim hváirtveggja. Eigi sættust þeir á mál þessi. Þorbjörn ferðalangr gjörði at þessu mikit kalls; því tók at versna með þeim Bjargsmönnum ok Þorbirni öxnæmegin, svá at af því gjörðist fullr fjandskapr, sem síðar kvam fram. Engar bætr váru Atla boðnar fyrir húskarl sinn; eigi lét hann, sem hann vissi þat. Grettir sat á Bjargi fram til tvímánadar. Eigi er sagt, at þeir fyndist Kormákr síðan, svá þess sè getið.

31. Barði Guðmundarson ok bræðr hans riðu heim í Ásbjarnarnes, þá er þeir Grettir skildust; þeir váru synir Guðmundar Sölmundarsonar. Móðir Sölmundar var Þórlaug, dóttir Sæmundar hins suðreyska, fóstbróður Ingimundar hins gamla. Barði var göfugmenni mikit. Hann reið nú brátt at finna Þórarin hinn spaka, fóstura sinn. Hann fagnaði Barða vel, ok spurði, hvat hann hefði þá um árnat liðveizluna¹, því at þeir höfðu áðr gjört ráð um ferð Barða. Barði svarar, at hann hefir fengit þann mann til fylgdar við sik, er hán um þætti betra hans lið, enn tveggja annarra. Þórarinn þagnaði við, ok mælti: þat man vera Grettir Ásmundarson. Spá er spaks geta, sagði Barði, sá er maðr hinn sami, fóstri minn. Þórarinn svarar: satt er þat, a mikit afbragð er Grettir annarra manna, þeirra er nú er kostur á váru landi, ok seint man hann vápnum verða sótt, ef hann er heill, en grunar mik um, hversu heilladrjúgr hann verðr, ok mantu þess þurfa, at eigi sé allir úgæfumenn í þinni ferð, ok nóg man at gjört, þó eigi fari hann með; skal hann hvergi fara, ef ek ræð. Eigi varði mik þess, fóstri minn, sagði hann, at þú myndir fyrirmuna mæðr hins vaskasta manns, hvat sém í gjörist; má eigi fyrir öllu sjá, þá er menn verða svá neyddir til, sem ek þykkjumst vera. Duga man þér, sagði Þórarinn, þó at ek sjái fyrir. Varð

¹) *Isledelfor de fire sidste Ord har B: atorkat.*

nú svá at vera, sem Þórarinn vildi, at Grettir væru engi orð send, en Barði fór suðr til Borgarfjarðar, ok urðu þá Heiðarvígin. Grettir var at Bjargi, er hann frétti, at Barði var suðr riðinn. Hann brást við reiðr, er hánnum væru engi orð gjör, ok kvað þá eigi svá búit skyldu skilja. Hafði hann þá spurn af, nær þeirra væri sunnan ván, ok reið hann þá ofan¹ til Þóreyjargnúps², ok ætlaði at sitja þar fyrir þeim Barða, þá er þeir riði sunnan. Hann fór frá bænum í hlíðina, ok beið þar. Penna sama dag riðu þeir Barði sunnan af Tvídægru frá Heiðarvígum. Þeir væru sex saman, ok allir sárir mjök; ok er þeir kvámu fram fyrir bæinn, þá mælti Barði: maðr er þar uppi í hlíðinni, mikill, með vápnum, eða hvern kenni þér þar? Þeir sögðust eigi vita, hverr var. Barði mælti: þat hygg ek, sagði hann, at þar sè Grettir Ásmundarson, ok ef svá er, þá man hann vilja oss finna; get ek hánnum hafa mislíkat, er hann hefir eigi farit með oss, en mèt þykkir vèr nú eigi vel við látnir, ef hann gjörir nökkura úvissu af sèr; man ek nú senda eptir mönnum til Þóreyjargnúps, ok eiga eigi undir újafnaði hans. Þeir segja þat allráðligt, ok svá gjörðu þeir. Síðan riðu þeir Barði veg sinn. Grettir sá ferð þeirra, og snèri þegar fyrir þá, ok er þeir fundust, heilsa hvárir öðrum. Grettir spurði at tíðendum, en Barði segir úfelmtliga³ slík sem váru. Grettir spurði, hvat manna væri í ferð með hánnum. Barði kvað þar vera bræðr sína ok Eyjólf mág sinn. Af þér hefir þú rekit ánnælit nú, sagði Grettir, enda er nú ok næst, at vit reynim með okkr, hvárr hèr má meira. Barði mælti: legit hafa mèt annvirki nær garði, enn at berjast við þik fyrir sakleysi, ok þykkjumst ek nú hafa rekit þat af mèt. Grettir svarði: bleyðast þykki mèt þú, Barði, sagði Grettir, ef þú þorir eigi at berjast við mik. Kalla þú þat

1) upp, D. 2) Þorunups, D. 3) af letta, B.

sem þú vilt, sagði Barði, en í öðrum stað vilda ek, at þú kvæmir fram újafnaði þínum, enn við mik; er þat eigi úlíklígt, því at nú gengr ór hófi offrs þitt. Gretti þótti illar spár hans, ok efar nú fyrir sèr, hvárt hann skyldi ráða til einhvers þeirra, ok sýnist hánú þat úforsjálígt, er þeir váru sex, en hann einn, ok í því bili kvámu menn heiman frá Þóreyjargnúpi til liðs við þá Barða; lætr Grettir þá dragast sundr með þeim, ok snýr til hests síns, en Barði ok hans fèlagar fóru leiðar sinnar, ok varð eigi af kveðjum með þeim at skilnaði. Eigi áttust þeir Barði ok Grettir fleira við, svá þess sè getið. Svá hefir Grettir sagt, at hann þóttist öruggur til vígs við flesta menn, þó at þeir væri saman, en hann myndi eigi flýja fyrir fjórum at úreyndu, en því at eins berjast við fleiri, nema¹ hann ætti hendr sínar at verja, sem segir í þessarri vísu:

Treysti ek mèr við, Mistar
mótkennandi, þrenna,
hvat er í Hildar vedri
heiptminnigt skal vinna;
vilk eigi fleiri, enn fjórum,
farsætendum mæta
at gnýfengnum gungnis
gráð, ef ek skal ráða.

Eptir skilnað þeirra Barða fór Grettir aptr til Bjargs. Þá þótti Gretti mikit mein, er hann mátti hvergi prófa afl sitt, ok frèttist fyrir, ef nökkut væri þat, er hann mætti við fást.

32. Þórhallr hèt maðr, er bjó á Þórhallsstöðum í Forsæludal. Forsæludalr er upp af Vatnsdal. Þórhallr var Grimsson, Þórhallssonar², Friðmundarsonar, er nam Forsæludal. Þórhallr átti þá konu, er Guðrún hèt. Grímr hèt son þeirra, en Þuríðr dóttir; þau váru vel á legg komin. Þórhallr var

¹) at, B, D. ²) Þórarinnssonar, D.

vel auðigr maðr, ok mest at kvikfè, svá at engi maðr átti jafnmargt ganganda fè, sem hann. Eigi var hann höfðingi, en þó skilríkr bóndi. Þar var reimt mjök, ok fékk hann varla sauðamann, svá at hán um þœtti duga. Hann leitaði ráðs við marga menn, hvat hann skyldi til bragðs taka, en engi gat þat ráð til gefit, er dygði. Þórhallr reið til þings hvert sumar. Hann átti hesta góða. Þat var eitt sumar á alþingi, at Þórhallr gekk til búðar Skapta lögmanns Þóroddssonar. Skapti var manna vitrastr, ok heilráðr, ef hann var beiddr. Þat skildi með þeim feðgum. Þóroddr var forspár, ok kallaðr undirhyggjumaðr af sumum mönnum¹, en Skapti lagði þat til með hverjum manni, sem hann ætlaði at duga skyldi, ef eigi væri af því brugðit; því var hann kallaðr feðrbetrungr. Þórhallr gekk í búð Skapta; hann fagnaði vel Þórhalli, því hann vissi, at hann var ríkr maðr at fè, ok spurði, hvat at tíðendum væri. Þórhallr mælti: heilræði vilda ek af² yðr þiggja. Í litlum færum em ek til þess, sagði Skapti; eða hvat stendr þik? Þórhallr mælti: þat er svá háttað, at mér helzt lítt á sauðamönnum, verðr þeim heldr klaksárt, en sumir gjöra engar lyktir á; vill nú engi taka, sá er kunnigt er til, hvat fyrir býr. Skapti svarar: þar man liggja meinvættir nökkur, er menn eru tregari til at geyma síðr þíns fjár, enn annarra manna. Nú fyrir því, at þú hefir at mér ráð sótt, þá skal ek fá þér sauðamann, þann er Glámr heitir, ættaðr ór Sviðþjóð, ór Sylgsdölum³, er út kvam í fyrra sumar, mikill ok sterkr, ok eigi mjök við alþýðu skap. Þórhallr kvazt eigi um þat gefa, ef hann geymdi vel fjárins. Skapti sagði öðrum eigi vænt horfa, ef hann geymdi eigi fyrir afls sakir ok áræðis. Þórhallr gekk þá út. Þetta var at þinglausnum. Þórhalli var vant hesta tveggja ljósbleikra, ok fór sjálf at leita; af því þykkjast

¹) *utq.* B, C. ²) at, G. ³) ór Syrgilsdölum, B; í Fylkisdölum, D.

menn vita, at hann var eigi mikilmenni. Hann gekk upp undir Sledás¹, ok suðr með fjalli því, er Ármannsfelli heitir; þá sá hann, hvar maðr fór ofan ór Godaskógi, ok bar hris á bestu. Brátt bar saman fund þeirra. Þórhallr spurði hann at nafni, en hann kvezt Glámr heita. Þessi maðr var mikill vexti ok undarligr í yfirbragði, bláeygðr ok opineygðr, ulfgrár á hárslit. Þórhalli brá nökkut í brún, er hann sá þenna mann, en þó skildi hann, at hánú myndi til þessa vísat. Hvat er þér best hent at vinna? sagði Þórhallr. Glámr kvað sér vel hent at geyma sauðfjár á vetrum. Viltu geyma sauðfjár míns? sagði Þórhallr; gaf Skapti þik á mitt vald. Svá man þér hentust mín vist, at ek fara sjálfráðr, því ek em skapstygg, ef mér líkar eigi vel, sagði Glámr. Eigi man mér mein at því, sagði Þórhallr, ok vil ek, at þú farir til mín. Gjöra má ek þat, sagði Glámr; eða eru þar nökkurvandhæfi á? Reimt þykkir þar vera, sagði Þórhallr. Eigi hræðumst ek flykur² þær, sagði Glámr, ok þykkir mér at údaufligra. Þess mántu við þurfa, sagði Þórhallr, ok hentar þar betr at vera eigi alllítill fyrir sér. Eptir þat kaupa þeir saman, ok skal Glámr koma at vetrnátum. Síðan skildu þeir, ok fann Þórhallr hesta sína, þar hann hafði nýleitað. Reið Þórhallr heim, ok þakkaði Saptu sinn³ velgjörning. Sumar leið af, ok frétti Þórhallr eigi til sauðamanns, ok engi kunni skyn á hánú, en at ánefndum tíma kvam hann á Þórhallsstaði. Tekr bóndi við hánú vel, en öllum öðrum gæzt eigi at hánú, en húsfreyju þó minnst. Hann tók við fjárvarðveizlu, ok varð hánú lítið fyrir því; hann var hljóðmikill ok dimmraddaðr, ok fæit stökk allt saman, þegar hann hóaði. Kirkja var á Þórhallsstöðum; eigi vildi Glámr til hennar koma; hann var úsöngv-

¹) Sleðas, C. ²) freykjar, B. ³) tilf. B.

inn ok trúlauss, stirfinn¹ ok viðskotailr; öllum var hann hvítleidr.

Nú leið svá þar til er kemr atfangadagr jóla; þá stóð Glámr snemma upp, ok kallaði til matar síns. Húsfreyja svarar: eigi er þat háttr kristinna manna at matast þenna dag, því at á morgin er jóladagr hinn fyrsti, segir hón, ok er því fyrst skylt at fasta í dag. Hann svarar: marga hindrvitni hafi þér, þá er ek sè til einskis koma; veit ek eigi, at mönnum fari nú betr at, heldr enn þá, er menn fóru eigi með slíkt; þótti mér þá betri siðr, er menn váru heiðnir kallaðir, ok vil ek hafa² mat minn, en engar refjur. Húsfreyja mælti: víst veit ek, at þér man illa farast í dag, ef þú tekr þetta illbrigði til. Glámr bað hana taka mat í stað; kvað henni annat skyldu vera verra. Hón þorði eigi annat, enn at gjöra sem hann vildi; ok er hann var mettr, gekk hann út, ok var heldr gustillr. Veðri var svá farit, at myrkt var um at litast, ok flögraði ór drífa, ok gnýmikit, ok versnaði mjök sem á leið daginn. Heyrðu menn til sauðamanns öndverðan daginn, en miðr er á leið daginn. Tók þá at sjúka, ok gjörði á hrið um kveldit. Kvámu menn til tíða, ok leið svá fram at dagsetri. Eigi kvam Glámr heim. Var þá um talat, hvárt hans skyldi eigi leita, en fyrir því, at hrið var á ok niðamykr, þá varð eigi af leitinni. Kvam hann eigi heim jólanáttina; biðu menn svá fram um tíðar. At ærnum degi fóru menn í leitina, ok fundu seint víða í fenum, lamit af ofviðri, eða blaupit á skjöll upp. Því næst kvámu þeir á traðk mikinn ofarliga í dalnum; þótti þeim því líkt, sem þar hefði glímt verit heldr sterkliga, því at grjótið var víða upp leyst, ok svá jörðin. Þeir hugðu at vandliga, ok sá, hvar Glámr lá skammt á burt frá þeim. Hann var dauðr, ok blár sem hel, en digr sem naut. Þeim

1) tyrinn, B. 2) ufr. B.

baud af hánum úþekkt mikla, ok hraus þeim mjök hugr við hánum, en þó leituðu þeir við at færa hann til kirkju, ok gátu eigi komit hánum, nema á einn gilspröm þar skammt ofan frá sèr, ok fóru heim við svá búit, ok sögðu bónda þenna atburð. Hann spurði, hvat Glámi myndi hafa at bana orðit. Þeir kvádust rakit hafa spor svá stór, sem keraldsbotni væri niðr skellt þaðan frá, sem traðkrinn var, ok upp undir björg þau, er þar váru ofarlíga í dalnum, ok fylgdu þar með blóðdresfjar miklar. Þat drógu menn saman, at sú meinvættir, er áðr hafði¹ verit, myndi hafa deytt² Glám, en hún myndi fengit hafa hær nökkura áverka, þá er tekit hafi til fulls, því at við þá meinvætti hefir aldri vart orðit síðan. Annan dag jóla var farit at leita við enn at færa Glám til kirkju; váru eykir fyrir beittir, ok gátu þeir hvergi fært hann, þegar sléttlendit var ok eigi var forbrennis at fara; gengu nú frá við svá búit. Hinn þriðja dag fór prestur með þeim, ok leituðu allan daginn, ok fannst Glámr eigi. Eigi vildi prestur optar til fara, en sauðamaðr fannst, þegar prestur var eigi í ferð. Lætu þeir þá fyrir vinnast, at færa hann til kirkju, ok dysjuðu hann þar, sem þá var hann kominn. Litlu síðar urðu menn varir við þat, at Glámr lá eigi kyrr; varð mönnum at því mikit mein, svá at margir fællu í úvit, ef sá hann, en sumir hældu eigi vitinu. Þegar eptir jólin þóttust menn sjá hann heima þar á boenum. Urðu menn ákalliga hræddir; stukku þá margir menn í burt. Því næst tók Glámr at ríða búsum á nætr, svá at lá við brotum³; gekk hann þá nálíga nætr ok daga. Varla þorðu menn at fara upp í dalinn, þó at ætti nóg eyrindi. Þótti mönnum þar í héraðinu mikit mein at þessu.

33. Um vartit fékk Þórhallr sèr hjón, ok gjörði bú á jörðu sinni; tók þá at minnka aþtrgangr, meðan sólargangr

1) þar sèn, tilf. B, C.

2) saal, B, C; deymt, A.

3) hœlt við brot, B.

var mestr¹; leið svá fram á miðsumar. Þetta sumar·kvam út skip í Húnavatni; þær var á sá maðr, er Þorgautr hét. Hann var útlendr at kyni, mikill ok sterkr; hann hafði tveggja manna afl; hann var lauss ok einn fyrir sèr; hann vildi fá starfa nökkurn, því hann var felauss. Þórhallr reið til skips, ok fann Þorgaut, spurði, ef hann vildi vinna fyrir hánun. Þorgautr kvað þat vel mega vera, ok kvezt eigi vanda þat. Svá skaltu við búast, segir Þórhallr, sem þar sè eigi veslingsmönnum hent at vera fyrir aptrgöngum þeim, er þar hafa verit um hrið, en eigi vil ek þik á talar draga. Þorgautr svarar: eigi þykkjumst ek upp gefinn, þó at ek sjái smávofur; man þá eigi öðrum dælt, ef ek hræðumst, ok eigi bregð ek vist minni fyrir þat. Nú kemr þeim vel kaupstefnan, ok skal Þorgautr gæta sauðfjár at vetri. Leið nú af sumarit. Tók Þorgautr við fènu at vetrnátum. Vel líkadi öllum við hann. Jafnan kwam Glámr heim ok reið húsum. Þat þótti Þorgauti allkátligt, ok kvað þrælinn þurfa mundu nær at ganga, ef ek hræðumst. Þórhallr bað hann hafa fátt um; er bezt, at þit reynit eigi með ykk. Þorgautr mælti: sannliga er² skekinn³ þróttr ór yðr, ok dett ek eigi niðr milli dægra við skraf þetta. Nú fór svá fram um vetrinn allt til jóla. Atfangakveld jóla fór sauðamaðr til fjár. Þá mælti húsfreyja: þurfa þætti mæ, at nú særi eigi at fornum brögðum. Hann svarar: ver eigi hrædd um þat, húsfreyja, sagði hann, verða man eitthvert söguligt, ef ek kem eigi aptr. Síðan gekk hann aptr til fjár síns. Veðr var heldr kalt, ok sjúk mikit. Því var Þorgautr vanr at koma heim, þá er hálförökkvat var, en nú kwam hann eigi í þat mund. Kvámu tíðamenn, sem vant var. Þegar þótti mönnum eigi úlíkt á horfast, sem fyrr. Bóndi vildi leita láta eptir sauðamanni, en tíðamenn töldust undan, ok

1) hæstr, D. 2) ístedelfor sannl. er, har D: sèt er þat, at. 3) er tilf. D.

sögdust eigi mundu hætta sèr út í tröllahendr um nætr, ok treystist bóndi eigi at fara, ok varð eigi af leitinni. Jóladag er menn váru mettir, fóru menn til ok leituðu sauðamanns. Gengu þeir fyrst til dysjar Gláms, því at menn ælluðu af hans völdum mundi orðit um hvarf sauðamanns; en er þeir kvámu nær dysinni, sá þeir þar mikil tðendi, ok þar fundu þeir sauðamann, ok var hann brotinn á háls, ok lamit sundr hvert bein í hánnum. Síðan færðu þeir hann til kirkju, ok varð engum manni mein at Þorgauti síðan, en Glámr tók at magnast af nýju; gjörði hann nú svá mikit af sèr, at menn allir stukku þurt af Þórhallsstöðum, utan bóndi einn ok húsfreyja. Nautamaðr hafði þar verit lengi hinn sami, vildi Þórhallr hann eigi lausan láta fyrir góðvilja sakir ok geymslu; hann var mjök við aldr, ok þótti hánnum mikit fyrir at fara á burt; sá hann ok, at allt fór at únytju, þat er bóndi átti, af engi geymdi. Ok eptir miðjan vetr var þat einn morgin, at húsfreyja fór til fjóss at mjólka kýr eptir tíma; þá var alljóst, því at engi treystist fyrr úti at vera annarr, enn nautamaðr; hann fór út, þegar lýsti. Hón heyrdi brak mikit í fjósit, ok heljan öskrliga; hón hljóp inn æpandi, ok kvazt eigi vita, hver úðæmi um væri í fjósinu. Bóndi gekk út, ok kvam til nautanna, ok stangaði hvert annat. Þótti hánnum þar eigi gott, ok gekk innar at hlöðunni. Hann sá, hvar lá nautamaðr, ok hafði höfuðit í öðrum bási, en fætr í öðrum; hann lá á bak aptr. Bóndi gekk at hánnum, ok þreifaði um hann, finnr brátt, at hann er dauðr ok sundr hrygrinn í hánnum; var hann brotinn um báshelluna. Nú þótti bónda eigi vært, ok fór í burt af bænum með allt þat, sem hann mátti í burt flytja, en allt kvikfé þat, sem eptir var, deyddi Glámr, ok því næst fór hann um allan dalinn, ok eyddi bæi alla upp frá Tungu. Var Þórhallr þá með ýmissum vinum sínum þat eptir var

vetrarins. Engi maðr mátti fara upp í dalinn með hest eðr hund, því at þat var þegar drepit. En er váraði, ok sól-argangr var sem mestr, lætti heldr aptrgöngunum. Vildi Þórhallr nú fara aptr til lands síns. Urðu hánú eigi auðfengin hjón, en þó gjörði hann bú á Þórhallsstöðum. Fór allt á sama veg, sem fyrr. Þegar at haustaði, tóku at vaxa reimleikar. Var þá mest sótt at bóndadóttur, ok svá fór, at hón læzt af því. Margra ráða var í leitað, ok varð eigi at gjört. Þótti mönnum til þess horfast, at eyðast myndi allr Vatnsdallr, ef eigi yrði bætr á ráðnar.

34. Nú er þar til at taka, at Grettir Ásmundarson sat heima at Bjargi um haustið, síðan þeir Vígabardi skildu á Þóreyjargnúpi; ok er mjök var komit at vetrnáttum, reið Grettir heiman norðr yfir hálsa til Víðidals, ok gíeti á Auðunarstöðum. Sættust þeir Auðunn til fulls, ok gaf Grettir hánú öxi góða, ok mæltu til vináttu með sèr. Auðunn bjó lengi á Auðunarstöðum, ok var kynsæll maðr. Hans sun var Egill, er átti Úlfheiði¹, dóttur Eyjúlfs Guðmundarsonar; ok var þeirra sun Eyjúlfr, er veginn var á alþingi; hann var faðir Orms kapilans² Þorláks byskups. Grettir reið norðr til Vatnsdals, ok kvam á kynnisleit í Tungu. Þar bjó þá Jökull Bárðarson, móðurbróðir Grettis. Jökull var mikill maðr ok sterkr, ok hinn mesti ofsamaðr; hann var siglingamaðr, ok mjök údæll, en þó mikilhæfr maðr. Hann tók vel við Gretti, ok var hann þar þrjár nætr. Þá var svá mikit orð á aptrgöngum Gláms, at mönnum var ekki jafntíðrætt, sem þat. Grettir spurði inniliga at þeim atburðum, er höfðu orðit. Jökull kvað þar eigi meira af sagt, enn til væri hæft; eða er þær forvitni á, frændi, at koma þar? Grettir sagði, at þat var satt. Jökull bað hann þat eigi gjöra, því þat er gæfuraun mikil, en frændr

¹) úlfhildr, D. ²) er var kapalln, D.

þínir eiga mikit í hættu, þar sem þú ert, sagði hann; þykir oss nú engi slíkr af ungum mönnum, sem þú, en illt man af illum hljóta, þar sem Glámr er; er ok miklu betra, at fást við mennska menn, enn við úvættir slíkar. Grettir kvað sèr hug á at koma á Þórhallsstaði, ok sjá, hversu þar væri um gengit. Jökull mælti: sè ek nú, at eigi tjáir at letja þik, en satt er þat sem mælt er, at sitt er hvárt, gæfa eðr gjörfugleikr. Þá er öðrum vá fyrir dyrum, er öðrum er inn um komit, ok hygg at, hversu þèr man fara sjálfum, áðr enn lýkr kvað Grettir. Jökull svarar: vera kann, at vit sjáim báðir nökkut fram, en hvárrgi fáir við gjört. Eptir þat skildu þeir, ok líkaði hvárigum annars spár.

35. Grettir reið á Þórhallsstaði, ok fagnaði bóndi hánum vel. Hann spurði, hvert Grettir ætlaði at fara, en hann sagðist þar vilja vera um náttina, ef bónda líkaði at svá væri. Þórhallr kvazt þökk fyrir kunna, at hann væri, en fám þykkir slægr til at gista hèr um-tíma; mantu hafa heyrt getið um hvat hèr er at veila, en ek vilda gjarna, at þú hlytir engi vandhæfi af mèr; en þó at þú komist heill á hurt, þá veit ek fyrir víst, at þú missir hests þíns, því engi heldr hèr heilum sínum fararskjól, sá er kemr. Grettir kvað gott til hesta, hvat sem af þessum yrdi. Þórhallr varð glaðr við, er Grettir vildi þar vera, ok tók við hánum báðum höndum. Var hestr Grettis læstr í húsi sterkliga. Þeir fóru til svefns, ok leid svá af náttin, at eigi kvam Glámr heim. Þá mælti Þórhallr: vel hefir brugðit við þína kvámu, því at hverja nátt er Glámr vanr at ríða húsum, eða brjóta upp hurðir, sem þú mátt merki sjá. Grettir mælti: þá man vera annathvært, at hann man eigi lengi á sèr sitja, eða man af reimast¹ meir, enn eina nátt; skal ek vera

¹) venjast, B, C, D.

nátt aðra, ok sjá, hversu ferr. Síðan gengu þeir til hests Grettis, ok var ekki við hann gletzt. Allt þótti bónda at einu fara. Nú er Grettir þar aðra nátt, ok kvam eigi þrællinn heim. Þá þótti bónda mjök vænkast. Fór hann þá at sjá hest Grettis. Þá var upp brotið húsit, er bóndi kvam til, en hestrinn dreginn til dyra ular, ok lamit í sundr í hánnum hvert bein. Þórhallr sagði Gretti, hvar þá var komit, ok bað hann forða sér, því at viss er dauðinn, ef þú bíðr Gláms. Grettir svarar: eigi má ek minna hafa fyrir hest minn, enn at sjá þrælinn. Bóndi sagði, at þat var eigi bati, at sjá hann, því at hann er úlíkr nökkurri mannligri mynd, en góð þykki mér hver sú stund, er þú vilt hér vera. Nú líðr dagrinn, ok er menn skyldi fara til svefns, vildi Grettir eigi fara af klæðum, ok lagðist niðr í sætið gegnt lokrekkju bónda; hann hafði röggarfeld¹ yfir sér, ok kneppti annat skautið niðr undir fœtr sér, en annat snaraði hann undir höfuð sér, ok sá út um höfuðsmáttina. Setstokkr var fyrir framan sætið, mjök sterkr, ok spyndi hann þar í. Dyrumbúningrinn allr var frá brotinn útidyrnum, en nú var þar fyrir bundinn hurðarflaki, ok úvendiliga um búit. Þverpillit var allt brotið frá skálanum, þat sem þar fyrir framan hafði verit, bæði fyrir ofan þvertrèit ok neðan. Sængr allar váru ór stað særðar. Heldr var þar úvistligt. Ljós brann í skálanum um náttina; ok er af myndi þriðjungr af nátt, heyrði Grettir út dynur miklar; var þá farit upp á húsin, ok ridit skálanum ok barit-hælunum um þekjuna svá at brakði í hverju trè. Því gekk lengi, þá var farit ofan af húsunum, ok til dyra gengit; ok er upp var lokit hurðunni, sá Grettir, at þrællinn rétti inn höfuðit, ok sýndist hánnum afskræmiliga mikit ok undarlíga stórskorit. Glámr fór seint, ok réttist upp, er hann kvam inn í dyrnar; hann

¹⁾ saal. B, C, D. raufgarfeld, A.

gnæfði ofarliga við rjáfrinu; snýr at skálanum, ok lagði handleggina upp á þvertrèit, ok gæðist inn yfir skálann. Eigi lét bóndi heyra til sín, því at hánú þótti ærit um, er hann heyrði, hvar um var úti. Grettir lá kyrr, ok hrærdi sik hvergi. Glámr sá, at hrúga nökkur lá í sætinu, ok ræzt nú innar eptir skálanum, ok þreif í feldinn stundarfast. Grettir spyrndi í stokkinn, ok gekk því hvergi. Glámr hnykkti í annat sinn miklu fastara, ok bifaðist hvergi feldrinn. Í þriðja sinn þreif hann í með báðum höndum svá fast, at hann rætti Gretti upp ór sætinu; kipptu nú í sundr feldinum í millum sín. Glámr leit á slítrit, er hann hêlt á, ok undradist mjök, hvern svá fast myndi togast við hann; ok í því hljóp Grettir undir hendr hánú, ok þreif um hann miðjan, ok spennti á hánú hrygginn sem fastast gat hann, ok ætlaði hann, at Glámr skyldi kikna við; en þrællinn lagði at handleggjum Grettis svá fast, at hann hörfaði allr fyrir orku sakir. Fór Grettir þá undan í ýms sætin. Gengu þá frá stokkarnir, ok allt brotnaði þat sem fyrir varð. Vildi Glámr leita út, en Grettir færði við fœtr, hvar sem hann mátti, en þó gat Glámr dregit hann fram ór skálanum; áttu þeir þá all-harða sókn, því at þrællinn ætlaði at koma hánú út ór bænum; en svá illt, sem var at eiga við Glám inni, þá sá Grettir, at þó var verra at fást við hann úti, ok því brauzt hann í móti af öllu afli at fara út. Glámr færðist í aukana, ok kneppti hann at sêr, er þeir kvámu í andýrit; ok er Grettir sêr, at hann fékk eigi við spornat, hefir hann allt eitt atriði, at hann hleypr sem harðast í fang þrælum, ok spyrnir báðum fótum í jarðfastan stein, er stóð í dyrunum. Við þessu bjóst þrællinn eigi; hann hafði þá togast við at draga Gretti at sêr, ok því kiknaði Glámr á bak aptr, ok rauk öfugr út á dyrnar, svá at herðarnar námu uppdyrit, ok

rjáfrít gekk í sundr, bæði viðirnir ok þekjan frerin, féll svá opinn ok öfugr út ór húsunum, en Grettir á hann ofan. Tunglskin var mikit úti, ok gluggaþykkn; hratt stundum fyrir, en stundum dró frá. Nú í því, er Glámr féll, rak skjót frá tunglinu, en Glámr hvessti augun upp í móti, ok svá hefir Grettir sagt sjálfr, at þá eina sýn hafi hann sèt svá, at hánúm brygði við. Þá sigaði¹ svá at hánúm af öllu saman, mœði ok því, er hann sá at Glámr gaut sínum sjónum harðliga, at hann gat eigi brugðit saxinu, ok lá nálíga í milli heims ok heljar. En því var meiri úfagnaðar kraptr með Glámi, enn flestum öðrum aþtrgöngumönnum, at hann mælti þá á þessa leið: mikit kapp hefir þú á lagit, Grettir, sagði hann, at finna mik, en þat man eigi undarligt þykja, þó at þú hljótir eigi mikit happ af mër; en þat má ek segja þér, at þú hefir nú fengit helming aðs þess ok þroska, er þér var ætlaðr, ef þú hefðir mik eigi fundit; nú fæ ek þat afl eigi af þér tekit, er þú hefir áðr hreppt, en því má ek ráða, at þú verðr aldri sterkari, enn nú ertu, ok ertu þó nógu sterkr, ok at því man mörgum verða. Þú hefir frægr orðit hér til af verkum þínum, en hëðan af munu falla til þín sektir ok vígaferli, en flest öll verk þín snúast þér til úgæfu ok hamingjuleysis. Þú mant verða útlægr gjörr, ok hljóta jafnan úti at búa einn samt; þá legg ek þat á við þik, at þessi augu sè þér jafnan fyrir sjónum, sem ek ber eptir, ok man þér þá erfitt þykja einum at vera, ok þat man þér til dauða draga. Ok sem þrællinn hafði þetta mælt, þá rann af Gretti úmegit, þat sem á hánúm hafði verit. Brá hann þá saxinu, ok hjó höfuð af Glámi, ok setti þat við þjó hánúm. Bóndi kvam þá út, ok hafði klæzt á meðan Glámr lét ganga töluna, en hvergi þerði hann nærat koma, fyrr enn Glámr var fallinn. Þórhallr

¹) sykaði, B.

lofaði guð fyrir, ok þakkaði vel Gretti, er hann hafði unnit þenna úhreina anda. Fóru þeir þá til, ok brendu Glám at köldum kolum. Eptir þat háru þeir ösku hans í eina hit ok grófu þar niðr, sem sízt váru fjárhagar eða mannavagir; gengu heim eptir þat, ok var þá mjök komit at degi. Lagðist Grettir niðr, því at hann var stirðr mjök. Þórhallr sendi menn á næstu bæi eptir mönnum, sýndi ok sagði, hversu farit hafði. Öllum þótti mikils um vert um þetta verk, þeim er heyrdi; var þat þá almælt, at engi væri þvílíkr maðr á öllu landinu fyrir afis sakir ok hreysti ok allrar atgjörfi, sem Grettir Ásmundarson. Þórhallr leysti Gretti vel af hendi, ok gaf hánun góðan hest, ok klæði sæmilig, því at þau váru öll sundr leyst, er hann hafði áðr borit. Skildu þeir með vináttu. Reid Grettir þaðan í Ás í Vatnsdal, ok tók Þorvaldr við hánun vel, ok spurði inniliga at sameign þeirra Gláms, en Grettir segir hánun viðskipti þeirra, ok kvazt aldri í þvílíka afraun komit hafa, svá langa viðreigu sem þeir höfðu saman átt. Þorvaldr bað hann hafa sik spakan, ok man þá vel duga, en ella man þær slysgjarnt verða. Grettir kvað eigi batnat hafa um lyndisbragðit, ok sagðist nú miklu verr stilltr, enn áðr, ok allar mótgjörðir verri þykja. Á því fann hann mikla muni, at hann var orðinn maðr svá myrkfælinn, at hann þorði hvergi at fara einn saman, þegar myrkva tók; sýndist hánun þá hvers kyns skrípi, ok þat er haft síðan fyrir orðtæki, at þeim ljái Glámr augna eðra gefi glámsýni, er mjök sýnist annan veg, enn er. Grettir reid heim til Bjargs, er hann hafði gjört eyrindi sín, ok sat heima um vetrinn.

36. Þorbjörn öxnamegin hafði haustboð mikit, ok kwam þar margt manna; þetta var meðan Grettir fór norðr til Vatnsdals um haustið. Þorbjörn ferðalangr var þar at boðinu. Þar varð margt talat. Spurðu þeir Hrútfirðingar

at sameign þeirra Grettis á hálsinum um sumarit. Þorbjörn öxnamegin bar Gretti allvel söguna; kvað Kormák verra mundu af hafa fengit, ef engir hefði til komit at skilja þá. Þá mælti Þorbjörn ferðalangr: þat var bæði, sagði hann, at ek sá hann Gretti ekki til frægðar vinna, enda hyggek, at hánú skyti skelk í bringu, er vèr kvámum at, ok allfúss var hann at skilja, ok eigi sá ek hann til hefnda leita, er húskarl Atla var drepinn, ok því ætla ek aldri hug í hánú, ef hann hefir eigi nógan liðsafla. Gjörði Þorbjörn at þessu hit mesta gabh. Margir tóku undir, at þetta væri þarfleysuglens, ok Grettir myndi eigi svá búit hafa vilja, ef hann frètti þessi orð. Eigi bar þar til tíðinda fleira at boðinu. Fóru menn heim. Váru dylgjur miklar með þeim um vetrinn, en hvárigir ræðu á aðra; bar þá ekki til tíðinda um vetrinn.

37. Snemma um várit eptir kvam skip út af Noregi; þat var fyrir þing. Þeir kunnu at segja mörg tíðendi: þat fyrst, at höfðingjaskipti var orðit í Noregi; var þá kominn til ríkis Ólafr konungr Haraldsson, en Sveinn jarl ór landi stokkinn, um várit eptir Nesjaorrustu. Váru margir merkiligir blutir sagðir frá Ólafu konungi, ok þat með, at hann tók þá menn alla bezt, sem váru atgjörfismenn um nökkura hluti, ok gjörði sèr þá handgengna. Við þetta urðu glaðir margir ungir menn, ok fýstust til utanferðar; ok svá sem Grettir spurði þessi tíðendi, gjörist hánú hugr á at sigla; vænti hann sèr sæmdað, sem aðrir, af konunginum. Skip stóð uppi at Gásúm í Eyjalirði; þar tók Grettir sèr far, ok bjóst til utanferðar; eigi hafði hann enn mikil fararefni. Ásmundr gjörðist nú mjök brumr af elli, ok reis nú lítt ór rekkju. Þau Ásdís áttu ungan son, er Illugi hét, manna efnillígastr. Atli tók nú við allri búsyslu ok fjárvarðveizlu; þótti þat mikit batna, því at hann var gæfr ok forsjáll. Grettir fór til skips. Í

þetta sama skip hafði ráðizt Þorbjörn ferðalangr, áðr enn þeir vissu, at Grettir myndi þar í sigla. Löttu margir Þorbjörn at sigla samskipa við Gretti, en Þorbjörn kvezt fara mundu fyrir allt þat. Bjóst hann til utanferðar, ok varð heldr síðbúinn; kvam hann eigi fyrr norðr á Gáseyri, enn skipit var albúit. Áðr Þorbjörn færi vestan, hafði Ásmundr hærulangr tekit krankleika nökkurn, ok reis þá eigi ór rekkju. Þorbjörn ferðalangr kvam síð dags í sandinn; váru menn þá búnir til borða, ok tóku handlaugar úti hjá búðinni. En er Þorbjörn reid fram í búðarsundit, var hánnum heilsat, ok spurðr tíðinda. Hann læzt engi segja kunna: utan þess get ek, at kappinn Ásmundr at Bjargi se nú dauðr. Margir tóku undir, at þar færi gildir bóndi af heiminum, sem hann var; eða hversu bar þat til, sögðu þeir? Hann svarar: lítið lagðist nú fyrir kappann, því at hann kafnaði í stofureyk, sem hundr, en eigi var skaði at hánnum, því at hann gjörðist nú gamalærr. Þeir svara: þú talar undarlíga við þvílíkan mann, ok eigi myndi Gretti vel líka, ef hann heyrði. Þóla má ek þat, sagði Þorbjörn, ok herra man Grettir bera verða saxit, enn í fyrra sumar á Hrutafjarðarhálsi, ef ek hræðumst hann. Grettir heyrði fullgjörla, hvat Þorbjörn sagði, ok gaf sér ekki at, meðan Þorbjörn lét ganga söguna; en er hann hætti, þá mælti Grettir: þat spái ek þér Ferðalangr, sagði hann, at þú deyir eigi í stofureyknum, ok þó má vera, at þú verðir eigi ellidauðr, en þat er undarlíga gjört, at tala sneydilíga til saklausra manna. Þorbjörn mælti: eigi man ek apra mër at þessu, ok eigi þótti mër þú svá snœfrlíga láta, þá er vër tókum þik undan, er þeir Melamenn börðu þik sem nautshöfuð. Grettir kvað þá vísu:

Jafnan verðr til orða
of löng boga slöngvi

(því kemr þar til sumra
þung hefnð fyrir) tunga.
Margr hefir beiðir borgar
benlinns sakir minni,
Ferðalangr, þótt fengir
fjörtjón, enn þú gjörvar.

Þorbjörn mælti: jafnfeigr þykkjumst ek, sem áðr, þótt þú skjalar slíkt. Grettir svarar: eigi hafa spár minar átt langan aldr hær til, ok enn man svá fara; vara þik ef þú vilt, eigi man síðar sýnna. Síðan hjó Grettir til Þorbjarnar, en hann brá við hendinni, ok ætlaði svá at bera af sér höggit: en höggit kwam á höndina fyrir ofan úlfliðinn, ok síðan hljóp saxit á hálsinn, svá at af sauk höfuðit. Kaupmenn sögðu hann stórhöggvæn, ok slíkt væri konungsmenn, ok eigi þótti þeim skaði at, þótt Þorbjörn væri drepinn, því at hann hafði bæði verit kísinn ok köllsugr. Litlu síðar létu þeir í haf, ok kvámu at áliðnu sumri til Noregs suðr við Hörðaland. Fréttu þeir þá, at Ólafr konungr sat norðr í Þrándheimi. Fékk Grettir sér far með byrðingsmönum norðr þangat, því at hann vildi fara á konungs fund.

38. Þórir hét maðr, er hjó í Garði í Adaldal; hann var Skeggjason, Bótúlfssonar. Skeggi hafði numit Keldu- hverfi upp til Kelduness. Hann átti Helgu, dóttur Þorkels á Fiskilæk. Þórir, son hans, var höfðingi mikill ok siglingamaðr. Hann átti tvá sónu; hét Þorgeirr annarr, en annarr Skeggi, þeir váru báðir efniligir menn, ok mjök fulltíða, er þetta var. Þórir hafði verit í Noregi um sumarit, þá er Ólafr konungr kwam vestan af Englandi, ok kwam sér þá í kærleika mikla við konung, ok svá við Sigurð byskup, ok er þat til marks um, at Þórir hafði látið gjöra knörr mikinn í skógi, ok bað Sigurð byskup vígja, ok svá gjörði hann. Eptir þat fór Þórir út til Íslands, ok lét höggva

upp knörrinn, þá er hánú leiddust siglingar, en brandana af knerrinum lét hann setja yfir útidyr sínar, ok váru þeir þar lengi síðan, ok svá veðrspáir, at í öðrum þaut fyrir sunnanvedri, en í öðrum fyrir norðanvedri. En er Þórir spurði, at Ólafr konungr hafði fengit einvald yfir öllum Noregi, þóttist hann þar eiga at vitja vináttumála. Þá sendi Þórir sonu sína til Noregs á konungs fund, ok ætladi, at þeir skyldi verða hánú handgengnir. Kvámu þeir at sunnarliga síð um haustið, ok fengu sèr eina róðrarskútu, fóru norðr með landi, ok ætluðu at fara á konungs fund. Þeir kvámu á höfn eina fyrir sunnan Stað, ok lágu þar nökkurar nætr. Þeir hældu sik vel at vist ok drykk, ok höfðu sik eigi úti, er eigi váru góð veðr. Nú er at segja frá því, er þeir Grettir fóru norðr með landi, ok fengu opt hörð veðr, því at þetta var öndverðan vetr; ok þá er þeir sóttu norðr at Staði, fengu þeir illviðri mikit með fjúki ok frosti, ok tóku nauðuliga land eitt kveld allir mjök væstir, ok lögðu þar við bala nökkurn, ok gátu þá borgit fè sínu ok föngum. Þeir bárust illa af kaupmennirnir, því at þeir gátu eigi tekit eld; en þeim þótti þar nálíga við liggja heilsa sín ok líf. Lágu þeir þá um kveldit, allílla staddir. Þá er á leið kveldit, sá þeir, at eldr kvam upp mikill öðru megin þess sunds, er þeir váru þá við komnir. En er skipverjar Grettis sá eldinn, töluðu þeir til, at sá væri heppinn, er hánú gæti náð, ok esuðust í, hvárt þeir skyldi leysa skipit, en þat sýndist öllum eigi hættulaust. Þá höfðu þeir um tal mikit, hvárt nökkurr maðr myndi svá vel fær, at næði eldinum. Grettir gaf sèr fátt at, ok segir, at verit myndi hafa þeir menn, er þat myndi eigi traudat hafa. Kaupmenn sögðu, at sèr væri eigi at borgnara, hvat er verit hafði, ef þá væri til einskis at taka; eða treystir þú þèr? Grettir, sögðu þeir, því at þú ert nú mestr atgjörfismaðr af

islenzkum mönnum kallaðr, en þú veizt nú gjörla hvat oss
 liggir á. Grettir svarar: eigi lízt mér mikit þrekvirki at ná
 eldinum, en eigi veit ek, hvárt þér launit betr, enn sá ferr
 á leit, er þat gjörir. Þeir mæltu: hví ætlar þú oss þá
 svívirðingarmenn, at vèr myndim þat eigi góðu launa?
 Reyna má ek þetta, ef þat er, at yðr þykkir hær allmikit
 á liggja, en eigi segir mér vænt hugr um, at ek hafa gott
 at sök hær fyrir. Þeir kváðu þat eigi skyldu vera, ok báðu
 hann mæla drengja heilastan. Eptir þat bjóst Grettir til
 sunds, ok kastaði af sér klæðunum. Hann fór í kufl einn
 klæða, ok söluváðarbrækr; hann stytta upp um sik kuflinn,
 ok rak at sér utan basttaug at sér miðjum, ok hafði með
 sér kerald. Síðan hljóp hann fyrir borð. Hann lagðist nú
 yfir þvert sundil, ok gekk þar á land. Hann sér þar standa
 eitt hús, ok heyrði þangat mannamál ok glaum mikinn.
 Grettir snéri at húsinu. Nú er at segja frá þeim, sem fyrir
 váru, at hær váru komnir þeir Þórisssynir, sem fyrr var
 getið. Þeir höfðu legit þar margar nætr, ok beðit þar
 veðrfalls, at þeim gæfi norðr fyrir Staði. Þeir höfðu setzt
 til drykkju, ok váru tólf saman. Þeir lágu í meginhöfninni,
 ok var þar gjört sæluhús mönnum þeim til vistar, er fóru
 með landi fram, ok var borinn í húsit hálmr mikill; eldr
 var ok mikill á gólfinu. Grettir ræzt nú inn í húsit, ok
 vissi eigi, hverlr fyrir váru. Kuflinn var sýldr allr, þegar
 hann kvam á land, ok var hann furðu mikill tilsýndar,
 sem tröll væri. Þeim sem fyrir váru, brá mjök við þetta,
 ok hugðu, at úvættir myndi vera. Börðu þeir hann með
 öllu því, er þeir fengu til, ok varð nú brak mikit um þá,
 en Grettir bratt fast af handleggjum. Sumir börðu hann
 með eldiþröndum; braut þá eldrinn um allt húsit; kvamst
 hann við það út með eldinn, ok fór svá aptr til fæla sinna.
 Lofuðu þeir mjök hans ferð ok frækleik, og kváðu engan

hans jafningja mundu vera. Leið nú af náttin, ok þóttust þeir þegar hólpnir, er þeir fengu eldinn. Um morgunin eptir var gott veðr; vöktu þeir við snemma kaupmennirnir, ok bjuggust til ferðar; töluðu þá um, at þeir skyldi sinna þá, er fyrir eldinum höfðu ráðit, ok vita, hverir þeir væri. Leystu þeir nú skipit, ok fóru yfir sundit; fundu þeir þá eigi skálann, en sá þar öskuhrúgu mikla, ok þar í fundu þeir mannabein mörg; þóttust nú vita, at sæluhúsit myndi hafa brunnit allt upp, ok þeir menn, sem þar höfðu í verit. Þeir spurðu, hvárt Grettir hefði ollat þessu úhappi, ok sögðu þetta hit mesta illvirki. Grettir kvað nú þat fram komit, er hann grunaði, at þeir myndi hán um illa launa elðssóknina, ok segir illt údrengjum lið at veita. Af þessu fékk Grettir svá mikit úlið, at kaupmenn sögðu, hvar sem þeir kvámu, at Grettir hefði þessa menn inni brennt. Þat frétlist nú brátt, at í þessu húsi höfðu þeir látizt Þórisssynir ór Gardi, sem fyrr váru nefndir, ok fylgdarmenn þeirra. Nú ráku þeir Gretti í burt ór skipinu, ok vildu eigi hafa hann með sér. Varð hann nú svá fyrirleitinn, at nær engir vildu hán um gott gjöra. Þótti hán um nú allúvænt horfa, ok vildi nú fyrir hvern mun fara á konungs fund, ok leitaði nú norðr til Þrándheims. Þar var konungr fyrir, ok hafði spurt allt þetta, áðr Grettir kvæmi; var hann allmjök af-fluttur fyrir konunginum. Var Grettir nökkura daga í bænum, áðr hann næði at ganga á konungs fund.

39. Þat var einn dag, þá er konungr sat at málstefnu, at Grettir gekk fyrir konunginn, ok kvaddi hann vel. Konungr leit við hán um, ok mælti: ertu Grettir hinn sterki? Hann svarar: kallaðr hefi ek svá verit, ok er ek af því hær kominn, at ek vænti af yðr nökkurar linunar um þat illmæli, er mærl helir kennt verit, en ek þykkjumst þessa eigi valdr. Ólafr konungr mælti: ærit ertu gildir, en eigi veit ek, hverja gæfu

þú berr til at hrinda þessu máli af þér, en líkara væri, at þú hefðir eigi viljandi mennina inni brennt. Grettir kvazt gjarna vilja af sér koma þessu mæli, ef konungi þœtti þat mega vera. Konungr bað hann satt frá segja, hversu farit hefði með þeim. Grettir sagði þá allt, sem áður var greint, ok þat með, at þeir lifðu allir, er hann kvamst út með eldinn; vil ek nú bjóða mik til slíkrar undanfærslu, sem yðr þykkja lög til standa. Ólafr konungr mælti þá: unna viljum vèr þér at bera járn fyrir þetta mál, ef þér verðr þess auðit. Gretti líkaði þat allvel; tók hann nú at fasta til járnsins, ok leið til þess, er sá dagr kvam, er skirslan skyldi fram fara. Þá gekk konungr til kirkju ok byskup ok fjöldi fólks, því at mörgum var forvitni á at sjá Gretti, svá mikit sem af hánum var sagt. Síðan var Grettir til kirkju leiddr; ok er hann kvam til kirkju, litu þeir margir til hans, er fyrir váru, ok töluðu þeir, at hann væri úlíkr flestum mönnum fyrir sakir afis ok vaxtar. Gekk Grettir nú innar eptir gólfinu; þá hljóp fram piltir einn frumvaxta, heldr svipligr, ok mælti til Grettis: undarligr háttr er nú hær í landi þessu, þar sem menn skulu kristnir heita, at illvirkjar ok ránsmenn ok þjófar skulu fara í friði, ok gjöra þeim skirslur; en hvat myndi illmenninu fyrir verða, nema forða lífinu, meðan hann mætti? Hær er nú einn údádamaðrinn, er sannreyndr er at illvirkjum, ok hefir brennt inni saklausa menn, ok skal hann þó enn ná undanfærslu, ok er þetta all-mikill úsiðr. Hann fór at Gretti, ok rætti hánum fingr, ok skar hánum höfuð¹⁾, ok kallaði hann margýgjuson, ok mörgum öðrum illum nöfnum. Gretti varð skapfátt mjök við þetta, ok gat þá eigi stöðvat sik. Grettir reiddi þá upp hnefann, ok sló piltinn undir eyrat, svá at hann lá þegar í úviti, en sumir segja, at hann væri dauðr þá þegar;

¹⁾ skar höfuð at hánum D. ♦

en engi þóttist vita, hvaðan sjá piltur kwam, eða hvað af hánnum varð, en þat ætla menn helzt, at þat hafi verit úhreinn andi, sendr til úheilla Gretti. Nú varð hark mikit í kirkjunni, ok var nú sagt til konunginum, at sá bardist um, sem járnit skyldi bera. Ólafr konungr gekk nú fram í kirkjuna, ok sá, hvað um var, ok mælti: mikill úgæfumaðr ertu, Grettir, sagði konungr, er nú skyldi eigi skírslan fram fara, svá sem nú var allt til búit, ok man eigi hægt at gjöra við úgæfu þinni. Grettir svarar: þat hafði ek ætlat, at ek myndi meiri sæmd til yðvar sækja, herra, en nú horfist á, fyrir sakir ættar minna, ok sagði, hversu mönnum var farit með þeim Ólafr konungi, sem fyrr var talat. Vilda ek nú gjarna, sagði Grettir, at þér tækist við mér; hafit þér þá marga með yðr, at eigi munu vigligri þykkja, enn ek. Sè ek þat, sagði konungr, at fáir menn eru nú slíkir fyrir alls sakir ok breysti, sem þú ert, en miklu ertu meiri úgæfumaðr, enn þú megir fyrir þat með oss vera. Nú skaltu fara í friði fyrir mér, hvert er þú vilt, vetrarlangt, en far þú at sumri út til Íslands, því at þar man þér auðit verða þín bein at bera. Grettir svarar: ek vilda fyrst færast undan brennumálinu, ef ek mætta, því at þat hefi ek eigi viljandi gjört. Þat er alllíkligt, sagði konungr, en fyrir sakir þess, at nú úneyttist skírslan fyrir sakir þolleysis þíns, þá mantu þessu máli eigi fá af þér brundit framur enn svá sem nú er orðit, ok hlýtr jafnan illt af athugaleysinu, ok ef nökkurum manni hefir verit fyrirmælt, þá man þér hóti helzt. Eptir þat dvaldi Grettir í bænum nökkura stund, ok sèkk eigi meira af Ólafr konungi, enn nú var sagt. Síðan fór hann suðr í land, ok ætlaði austr til Tunsbergs at finna Þorstein drómund bróður sinn, ok er eigi sagt af hans ferðum, fyrr enn hann kwam austr á Jaðar.

40. At jólum kwam Grettir til þess bónda, er Einarr

hèt; hann var ríkr maðr ok kvænt, ok átti dóttur gjafvaxta, er Gyriðr er nefnd; hón var fríð kona, ok þótti harðla góðr kostr. Einarr bauð Gretti með sèr at vera um jólin, ok þat þá hann. Þat var þá víða í Noregi, at markamenn ok illvirkjar blupu ofan af mörkum, ok skorudu á menn til kvenna, eðr tóku á burt fè manna með ofríki, þar er eigi var liðsfjöldi fyrir. Svá bar hèr til, at þat var einn dag á jölunum, at kvámu til Einars bónda illvirkjar margir saman; hèt sá Snækollr, sem fyrir þeim var; hann var berserkr mikill. Hann skoraði á Einar bónda, at hann skyldi leggja upp við hann dóttur sína, eða verja hana, ef hann þættist maðr til. En bóndi var þá af æskuskeiði ok engi styrjaldar-maðr; þótti hánú nú mikill vandi at höndum kominn, ok spurði Gretti í hljóði, hvat hann vildi til leggja, því at þú ert kallaðr frægr maðr. Grettir bað hann því einu játa, er hánú þótti sèr smánarlaust. Berserkrinn sat á hesti, ok hafði hjálm á höfði, ok eigi spennt kinnbjörgunum; hann hafði skjöld jární rendan fyrir sèr, ok lét hann hit ógurligasta. Hann mælti við bónda: kjós skjótt annanhvárn kostinn, eða hvat ræðr sá þèr hinn mikli hrottinn, er þar stendr hjá þèr? eða er eigi þat, at hann vill eiga leik við mik? Grettir sagði: jafnkomit er á með okkr bónda, því at hèr er hvárrgi skesinn maðr. Snækollr mælti: heldr man ykk ægja við mik at fást, ef ek reidumst. Þá veit þat, er reynt er, sagði Grettir. Berserkrinn fann nú undandrátt í málinu; tók hann þá at grenja hátt, ok beit í skjaldarröndina, ok setti skjöldinn upp í munn sèr, ok gein yfir hornit skjaldarins, ok lét allólmiga. Grettir varpaði sèr um völlinn; ok er hann kemr jafnfram hesti berserksins, slær hann fæti sínum neðan undir skjaldarspordinn svá hart, at skjöldrinn gekk upp í munninn, svá at rifnaði kjaþrinn, en kjálkarnir blupu ofan á bringuna; hann hafði þá allt eitt atriði, at

hann þreif í hjálminn vinstri hendi, ok svipti víkinginum af baki, en hægri hendi brá hann saxinu, er hann var gyrdur með, ok setti á hálsinn, svá af tók höfuðit. En er þetta sá fylgdarmenn Snækolls, flýði sinn veg hverr þeirra. Eigi nemnti Grettir at elta þá, því at hann sá, at engi var hugr í þeim. Pakkaði bóndi hánnum vel fyrir þetta verk, ok margir menn aðrir. Þótti þessi atburður bæði vera af hvatleik ok harðfengi unninn. Var Grettir þar um jóljn vel haldinn, leysti bóndi hann vel af garði. Fór Grettir síðan austr til Túsbergs, ok hitti Þorstein bróður sinn. Tók hann við Gretti með blíðu, ok spurði at ferðum hans, ok at hann vann berserkinn. Grettir kvað vísu:

Snart at snæðings porti
 Snækolls, þrimu rækis,
 ímunbukl, þat er ökla
 áspyrnu fékk þyrnis.
 Svá tvískipti tóptum
 tanngarðs hinn járnvarði
 broddagangs, at á bringu,
 bákr rifnuðu kjálkar.

Þorsteinn mælti: slyngt yrði þér um margt, frændi, ef eigi fylgdi slysin með. Grettir svarar: þess verður þó getið, er gjört er.

41. Nú var Grettir með Þorsteini, þat sem eptir var vetrarins, ok fram á várit. Þat var einn morgin, er þeir bræðr, Þorsteinn ok Grettir, lágu í svefnlopti sínu, at Grettir hafði lagit hendr sínar undan klæðunum; Þorsteinn vakti ok sá þat. Grettir vaknaði litlu síðar. Þá mælti Þorsteinn: set hefi ek handleggi þína, frændi, sagði hann, ok þykkir mér eigi undarligt, þó at mörgum verði þung högg þín, því at einiskis manns handleggi hefi ek slíka sèt. Vita mátti þó þat, sagði Grettir, at ek mynda eigi slíku til

leiðar koma, sem ek hefi unnit, ef ek væri eigi allknár. Betr þætti mér, segir Þorsteinn, þó at væri mjórri, ok mökkuru gæfusamligri. Grettir sagði: satt er þat, sem mælt er, at engi maðr skapar sik sjálf; láttu mik nú sjá þína handleggi, sagði hann. Þorsteinn gjörði svá; hann var manna lengstr ok grannvaxinn. Grettir brosti at. ok mælti: eigi þarf at horfa á þetta lengr, krökt er saman rifjum í þér, ok eigi þykkjumst ek slskar tengr sèt hafa, sem þú berr eptir, ok varla ætla ek þik kvennstyrkan vera. Má þat vera, sagði Þorsteinn; en þó skaltu þat vita, at þessir hinir mjófu handleggir munu þín hefna, ella man þín aldri hefnt verða. Hvat má vita, hversú verðr, um þat er lýkr. Eigi er þá getið fleira um viðrtal þeirra. Leið nú á varit; kvam Grettir sèr í skip, ok fór út til Íslands um sumarit. Skildu þeir bræðr með vináttu, ok sáust aldri síðan.

42. Þar er nú til at taka, er áðr er frá horfit, at Þorbjörn öxnamegin spurði víg Þorbjarnar ferðalangs, sem fyrr var sagt; brást hann við þat reiðr mjök, ok kvezt vilja, at ýmsir ætti högg í annars garði. Ásmundr hærulangr lá lengi sjúkr um sumarit; ok er hán um þótti at sèr draga, heimti hann til sín frændr sína, ok sagði, at hann vildi, at Atli tæki við allri fjárvarðveizlu eptir hans dag; en uggir mik, sagði Ásmundr, at þú megir varla í kyrrðum sitja fyrir újafnaði, en þat vilda ek, at allir mínir tengdamenn væri sinnandi hán um, sem bezt; en til Grettis kann ek ekki at leggja, því at mér þykkir á hverfanda hjóli mjök um hans lagi; ok þó hann sè maðr sterkr, þá uggir mik, at hann eigi meir um vandræði at veila, enn fulltingja frændum sínum; en þótt Illugi sè ungr, þá mæn hann þó verða þroskamaðr, ef hann heldr heilum sèr. Ok er Ásmundr hafði skipat með sonum sínum, sem hann vildi, dró at hán um sóttin; andaðist hann litlu síðar, ok var jarðaðr at Bjargi, því at Ásmundr

hafði þar kirkju gjöra látið; ok þótti þeraðsmönnum þat mikill mannskaði. Atli gjörðist nú gildir bóndi, ok hafði mannmargt með sér; hann var atfangamaðr mikill. At áliðnu sumri fór hann út á Snæfellsnes at fá sér skreið; hann rak marga besta, ok reið heiman til Mela í Hrútafjörð, til Gamla mágs síns. Ræzt þá til ferðar með Atla Grímr Þórhallsson, bróðir Gamla, við annan mann, riðu þeir Haukadalsskarð vestr, ok svá sem liggir út á Nes; keyptu þar skreið mikla, ok báru á sjau¹ hestum, snèru heimleiðis, er þeir vátu albúnir.

43. Þorbjörn öxnamegin spurði, at Atli ok Grímr vátu heiman farnir; vátu hjá hánun Þórisssynir frá Skarði, Gunnarr ok Þorgeirr. Þorbirni læk öfund á vinsældum Atla, ok því eggjaði hann þá bræðr, Þórissonu, at þeir skyldi sitja fyrir Atla, er þeir færi utan af Nesinu. Riðu þeir þá heim til Skarðs, ok biðu þar til þess, er þeir Atli fóru upp um með lestina. En er þeir kvámu fram um bæinn á Skarði, þá var sèn för þeirra; brugðu þeir bræðr þá skjótt við með húskarla sína, ok riðu eptir þeim. En er þeir Atli sá ferð þeirra, bað hann þá taka ofan klyfjarnar af hestunum; ok munu þeir vilja bjóða mèt bætr fyrir húskarl minn, er Gunnarr drap í fyrra sumar; orkum eigi á fyrri, en verjum hendr várar, ef þeir vekja fyrri við oss. Nú koma hinir fyrri at, ok hlaupa af baki. Atli fagnar þeim, ok spurði at tíðendum; eða viltu bæta mèt nökkuru, Gunnarr, fyrir húskarl minn? Gunnarr svarar: annars væri þer verðir, Bjargsmenn, enn ek bæta þat góðu, væri ok meiri bóta vert fyrir víg Þorbjarnar, er Grettir vá. Eigi á ek því at svara, sagði Atli, enda ertu eigi aðili þess máls. Gunnarr kvað nú fyrir þat ganga mundu, ok göngum at þeim, ok neytum þess nú, at Grettir er nú eigi nærri.

¹⁾ smíttan, B.

Þeir hlupu at Atla, ok váru átta saman, en þeir Atli sex¹ saman. Atli gekk fram fyrir sína menn, ok brá sverðinu Jökulsnaut, er Grettir hafði gefit hánun. Þá mælti Þorgeirr: margt er líkt með þeim, er góðir þykkjast, ofarliga bar Grettir saxit í fyrra sumar á Hrútafjarðarhálsi. Atli svarar: hann man ok vanari við stórvirkin enn ek. Síðan börðust þeir. Gunnarr sótti at Atla með ákefð, ok var hinn ódasti; ok er þeir höfðu barizt um stund, mælti Atli: engi frami er í því, at vit drepum verkmenn hvárir fyrir öðrum, ok er þat næst, at vit sjálfir leikumst við, því ek hefi aldri með vápnum vegit fyrr enn nú. Gunnarr vildi þat eigi. Atli bað húskarla sína at geyma at lestinni, en ek man sjá, hvat þeir gjöra at. Gekk hann þá svá hart fram, at þeir Gunnarr brukku fyrir. Drap Atli þá tvá fylgdarmenn þeirra bræðra. Eptir þat snèri hann á móti Gunnari, ok hjó til hans, svá at í sundr tók skjöldinn fyrir neðan mundriða um þvert, ok kvam á fótinn fyrir neðan knèt; ok þegar hjó hann annat högg, svá þat varð at banasári. Nú er at segja frá Grími Þórhallssyni, at hann ræzt á móti Þorgeiri, ok áttust þeir lengi við, því at hvárrtveggja þeirra var hraustr maðr. Þorgeirr sá fall Gunnars bróður síns; vildi hann þá undan leita. Grímr hljóp eptir hánun, ok elti hann þar til, at Þorgeirr drap fæti ok fell á fram; þá hjó Grímr með öxi milli herða hánun, svá stóð á kafi. Þá gáfu þeir grið fylgdarmönnum þeirra þrimr, sem eptir váru. Eptir þat bundu þeir sár sín, ok hófu upp klyfjar á hestana, ok fóru síðan heim, ok lýstu vígum þessum. Sat Atli þá heima með fjölmenni um haustið. Þorþirni öxnamegin líkaði stórilla, ok gat þó ekki at gjört, því at Atli var mjök vinsæll, Grímr var með hánun um vetrinn, ok svá Gamli mágr hans. Þar var þá ok Glúmr Úspaksson, annarr mágr hans; hann

¹ Jorian, B.

bjó þá á Eyri í Bitru. Höfðu þeir setu-fjölmenni á Bjargi, ok var þar glaumur mikill um vetrinn.

44. Þorbjörn öxnamegin tók við eptirmáli um víg Þórissona; bjó hann málit til á hendir þeim Grími ok Atla, en þeir bjuggu til varna um atfarir ok frumhlaup til úhelgi þeim bræðrum. Váru málin lögð til Húnavatnsþings, ok fjölmennu mjök hváirtveggja. Varð Atla gott til liðs, því at hann átti frændasta mikinn. Gengu þá at beggja vinir; töludu um sættir, ok sögðu allir, at Atla væri vel um farit: útilleitinn, en þú öruggur í einangri. Þóttist Þorbjörn sjá, at eigi myndi annat virðingarvænna, enn taka sættinni. Skildi Atli þat til, at hann vildi hvártki hafa héraðssektir, nè utanferðir. Váru þá teknir menn til gjörðar, Þorvaldr Ásgeirsson fyrir hönd Atla, en af Þorbjarnar hendi var Sölvi hinn prúði; hann var son Ásbrands Þorbrandssonar, Haraldssonar hrings, er numit hafði Vatnsnes allt utan til Ambáttarár fyrir vestan, en fyrir austan allt inn til Þverár, ok þar yfir um þvert til Bjargaáss, ok allt þeim megin Bjarga út til sjáfar. Sölvi var ofláti mikill, ok vitr maðr, ok því kjöri Þorbjörn hann til gjörðar fyrir sína hönd. Ok eptir þat sögðu þeir upp gjörðina, at þá Þórissonu skyldi bæta hálfum bótum, en hálfar fellsu niðr fyrir atförl ok frumhlaup ok fjörráð við Atla. Víg húskarls Atla, þess er var drepinn á Hrutafjarðarhálsi, stózt þat á endum, ok víg þeirra tveggja, er fellsu með Þórissonum. Grímr Þórhallsson skyldi láta héraðsvist sína, en Atli vildi einn halda upp fébótum. Þessi gjörð líkaði Atla vel, en Þorbirni heldr illa, ok skildu þó sáttir at kalla, en þó hraut þat upp fyrir hánum Þorbirni, at eigi myndi fyrir enda um gjört með þeim, ef svá færi, sem hann vildi. Atli reið heim af þinginu, ok þakkaði Þorvaldi vel fyrir liðveizlu sína. Grímr Þórhallsson rézt

þá suðr í Borgarfjörð, ok bjó þá at Gilsbakka, ok var gildir bóndi.

45. Sá maðr var með Þorbirni öxnamegin, er Áli¹ hét; hann var húskarl, ok heldr úgæfr ok vinnultill. Þorbjörn bað hann starfa betr, ella kvezt hann mundu lemja hann. Áli kvazt þess enga fýst hafa, ok var hinn kífnasti í móti. Þorbjörn þoldi hánnum eigi, ok rak hann niðr undir sik, ok fór með hann illa. Eptir þat fór Áli burt ór vistinni, ok fór norðr yfir háls til Miðfjarðar; létti eigi fyrr, enn hann kvam til Bjargs. Atli var heima, ok spurði, hvert hann skyldi fara. Hann kvazt leita sèr vistar. Ertu eigi vinnumaðr Þorbjarnar? kvað Atli. Eigi fór þat svá keypiliga með okkr, sagði Áli; ek var þar eigi lengi, en mèr þótti illt, meðan ek var, skildum vit svá, at mèr þótti hann eigi vel syngja at kverkum mèr, ok man ek þangat aldri fara til vistar, hvat sem annat verðr af mèr; er þat ok satt, at mikill munr er, hvarum ykkar verðr betr til hjóna sinna, vilda ek gjærna nú vinna hjá þèr, ef þess væri kostr. Atli svarar: nóga hefi ek vinnumenn, þó at eigi seilumst ek í hendr Þorbirni til þeirra manna, er hann hefir ráðit, en mèr þykkir enginn slægr til þín², ok far aptr til hans. Áli mælti: þar kem ek eigi únauðigr. Nú dvaldist Áli þar um stund. Einn morgin fór hann til verks með þeim húskörlum Atla, ok vann svá, at hvaðanæfa váru á hánnum hendrnar. Lèt Áli svá ganga fram á sumarit. Atli lagði ekki til hans, en lèt þó gefa hánnum mat, því at hánnum líkaði starfinn vel. Þorbjörn frèttir nú, at Áli er á Bjargi. Hann reið þá til Bjargs við þriðja mann, ok kallaði Atla til tals við sik. Atli gekk út, ok heilsaði þeim. Þorbjörn mælti: enn viltu endrýja við mik, Atli, um mótgang ok áleitni; eða hví hefir þú tekit vinnumann minn? ok er slíkt

¹) Atli, G. D. ²) saaf. B, C, D; þa þollaus. A.

úskilsliga gjört. Atli svarar: eigi er mér þat sýnt, at hann sè þinn vinnumaðr, en eigi vil ek á hánnum halda, ef þú sýnir skilríki til, at hann sè þitt hjón, en eigi nenni ek at draga hann ór húsum út. Þú mant ráða at sinni, sagði Þorbjörn; en kref ek mannsins, ok fyrirbyð ek vinnu hans, en koma man ek annat sinn, ok er eigi víst, at vit skiljumst þá betri vinir, enn nú. Atli svarar: heima man ek bíða, ok taka við því, sem at höndum kemr. Síðan reid Þorbjörn heim. En er verkmenn kvámu heim um kveldit, segir Atli þá viðtal þeirra Þorbjarnar, ok bað Ála fara leið sína, ok sagðist eigi vildu dvelja vist hans. Áli svarar: satt er hit fornkvæðna: ofleyfingjarnir bregðast mér mest; ok ætlaði ek þat eigi, at þú myndir nú reka mik á burtu, þar sem ek hefð unnit hær til sprengs í sumar, ok vánat til þess, at þú myndir mér nökkura forstöðu veita, en þann veg farit þær, þó at þær látið allgóðvænliga; nú skal mik hær lemja fyrir augum þær, ef þú vilt mér enga forstöðu veita eða hjálp. Atla gekkst hugr við umtal hans, ok nemnti nú eigi at reka hann á burtu frá sær. Leið nú þar til er menn tóku til sláttar. Þat var einn dag nökkuru fyrir miðsumar, at Þorbjörn oxnamegin reid til Bjargs; hann var svá búinn, at hann hafði hjálm á höfði, ok gyrðr við sverð ok spjót í hendi; þat var fjaðraspjót, ok breið mjök fjöðrin. Væta var úti um daginn. Atli hafði sent húskarla sína til sláttar, en menn hans sumir váru norðr við Horn til ælla. Atli var heima, ok fáir menn aðrir. Þorbjörn kvað þar nær hádegi um daginn; hann var einn í ferð, ok reid at útidrym. Aptr var hurð, engir menn úti. Þorbjörn drap á dyrr ok fór síðan á bak húsum, svá at mátti eigi sjá hann frá dyrunum. Heimamenn heyrðu, at barit var, ok gekk út kona ein. Þorbjörn hafði svip af konunni, ok lét eigi sjá sik, því hann ætlaði

annat at vinna. Hón kvam í stofu. Atli spurði, hvat komit var. Hón kvazt ekki hafa sæt koma úti; ok er þau töludu þetta, þá laust Þorbjörn mikit högg á dyrnar. Þá mætti Atli: mik vill sjá sinna, ok man hann eiga eyrindit við mik, hversu sem þarft er. Gekk hann þá fram, ok út í dyrnar. Hann sá engan úti. Væta var úti mikil, ok því gekk hann eigi út, ok hèlt sinni hendi í hvárn dyrustafinn, ok litast svá um. Í því bili snaraði Þorbjörn fram fyrir dyrnar, ok lagði tveim höndum til Atla með spjótinu á hánum miðjum, svá stóð í gegnum hann. Atli mælti við, er hann fékk lagit: þau tíðkast hinu breiðu spjótin, segir hann; síðan féll hann fram á þrepskjöldinn. Þá kvámu fram konur, er í stofunni höfðu verit; þær sá, at Atli var dauðr. Þá var Þorbjörn á bak kominn, ok lýsti víginu á bendr sèr, ok reið heim eptir þat. Ásdís húsfreyja sendir eptir mönnum, ok var búit um lík Atla, ok var hann jarðaðr hjá föður sínum; hann var mjök harmdauði, því hann hafði verit bæði vitr ok vinsæll. Engi kvámu fram fegjöld fyrir víg Atla; enda beiddist engi bóta, því at Grettir átti eptirmálit, ef hann kvæmi út. Stóðu þessi mál kyrr um sumarit. Varð Þorbjörn lítt þokkaðr af þessu verki, ok sat þó um kyrrt í búi sínu.

46. Þetta sumar, er nú var frá sagt, kvam skip út fyrir þing á Gásum. Var þá sagt frá ferðum Grettis; þar með sögðu þeir um húsbrennuna. Við þessa sögu varð Þórir í Garði afar reiðr, ok þóttist hann þar at sonarhesndum sjá eiga sem Grettir var. Reið Þórir við fjölmenni mikit, ok reifði á þingi brennumálit, en menn þóttust ekki kunna til at leggja, meðan engi var til svara. Þórir kvezt eigi annat vilja, enn Grettir væri sekr gjörr um allt landit fyrir slík úverk. Þá svarar Skapti lögsögumaðr: víst er þetta illt verk, ef svá er, sem þetta er sagt; en jafnan er hálsögð

saga, ef einn segir, því at fleiri eru þess fúsari, at færa þangat, sem eigi berr betr, ef tvennt er til; nú man ek eigi leggja órskurð á, at Grettir sè sekr gjörr um þetta at svá gjöru. Þórir var maðr héraðsríkr ok höfðingi mikill, en vinsæll af mörgu stórmenni; gekk hann at svá fast, at engu kwam við um sýkn Grettis. Gjörði Þórir Gretti þá sakan um allt landit, ok var hán um síðan þyngstr allra sinna mótstöðumanna, sem opt bar raun á; hann lagði þá þegar fè til höfuðs hán um sem öðrum skógarmönnum, ok reið við þat heim. Margir mæltu, at þetta væri meir gjört af kappi, enn eptir lögum, en þó stóð svá búit. Varð nú tíðindalaust fram yfir miðsumar.

47. At áliðnu sumri kwam Grettir Ásmundarson út í Hvítá í Borgarfirði; fóru menn til skips um héraðit. Þessi tíðindi kvámu öll senn til Grettis: þat fyrst, at faðir hans var andaðr, annat þat, at bróðir hans var veginn, þat þriðja, at hann var sekr gjörr um allt landit. Þá kvað Grettir vísu þessa:

Allt kwam senn at svinnum,
sekt mín, bragar tíni;
föður skal drengr af dauða
drjúghljóðr, ok svá bróður;
þó skal margr í morgin
(mótrunnr Hèðins snótar)
brjótr um slíkar sútir
sverðs daprari verða.

Svá segja menn, at Grettir brygði engan veg skapi við þessar fréttir, ok var jafnglaðr, sem áðr. Nú sat Grettir við skip um hríð, því at hann fékk engan fararskjót, sem hán um gæzt at Sveinn hæt maðr, er bjó at Bakka, upp frá Þingnesi; hann var góðr bóndi ok kátr maðr, ok kvað opt, svá at gaman var at. Hann átti merhryssi eitt, brúnt

at lit, allra hrossa skjótast; þat kallaði Sveinn Söðulkollu. Grettir fór eina nátt burt af Völlum, því at hann vildi eigi at kaupmenn yrði varir við. Hann fékk sér kufl svartan, ok steypiti utan yfir klæði, ok duldist svá. Hann gekk upp hjá Þingnesi, ok svá upp til Bakka; var þá ljóst orðit. Hann sá brúnt hross við túnit, ok fór til ok lagði við beizl, steig á bak ok reið upp með Hvítá, ok fyrir neðan Bæ, ok svá til Flókadalsár, ok svá upp á götur fyrir ofan Kálfanes. Vinnumenn á Bakka stóðu upp í þann tíma, ok sögðu til bónda, at maðrinn var á bak kominn. Hann stóð upp ok brosti at, ok kvað þetta:

Hèðan reið á burt beiðir
bardells nær garði;
þjófr lét hönd um hrífa,
hjálmpollr, Söðulkollu;
sá man Freyr at fleirum
fullsterkr svaðilverkum,
Þundar skýss, enn þessu;
þat man hellr, at hann man bellinn.

Síðan tók hann hest sinn, ok reið eptir. Grettir reið þar til, er hann kvam upp fyrir bæinn á Kroppi; þar fann hann mann, er nefndist Halli ok kvazt fara skyldu ofan til skips á Völlu. Grettir kvað vísu:

Segðu í breiðar bygðir,
bráðlyndr, at þú fyndir
uppi allt hjá Kroppi,
álpollr, Söðulkollu.
Þar var staddr á steddu
(strjúktu allmikinn Halli)
drengr sá, er drygir löngum
dufl, í svörtum kufl.

Ok nú skilja þeir, ok fór Halli ofan eptir götum, ok allt

ofan at Kálfaresi, áðr Sveinn kwam á móti hánú. Þeir kvöddust skjótt. Þá kvað Sveinn:

Sáttu, hvar reið hinn reitni
(raun er oss mikil) hrossi,
slyttimákr (at slíku),
slægr frá næstum bæjum?
Héraðsmenn skulu hvinni
hefning fyrir þat nefna;
bera skal bók at hváru
blán, ef ek nái hánú.

Máttu þat af því, kvað Halli, ek fann þann mann, er riða kvast Söðulkollu, ok bað mik þat segja ofan í byggðina ok héraðit; var sá mikill vexti, ok var í svörtum kufli. Eiga þykkist hann nökkut undir sèr, kvað bóndi, ok skal ek vita, hverr hann er, ok reið síðan eptir hánú. Grettir kwam í Deildartungu. Var þar úti kona; Grettir fann hana at máli, ok kvað vísu:

Færðu hafloga hirði
(hèr ferr braut gripr lautar)
allvelborin vella
vígdís, gamanvísu.
Ek vilda svá jöldu,
Yggs liðgjafi, riða
æst, at ek man gista,
orðrakk, at Gilsbakka.

Konan nam vísuna. Hann reið eptir þat leið sína. Sveinn kwam þar litlu síðar, ok var hún eigi inn gengin, ok þegar hann kwam, kvað hann þetta:

Hverr reið hótí fyrri
hèðan í róstuveðri
hart á hrossi svörtu
hjörgráðs boði áðan?

Hann man heldr at sönnu
hundeygr í dag undan
djarfr ok dádum horfinn
drengr sá rekast lengi,

Hón sagði þá slíkt, sem henni var kennt. Hann hugsaði
vísuna, ok mælti: eigi er úlíklígt, at þessi maðr sè eigi
min leika, en þó skal ek finna hann. Reid hann nú eptir
byggðinni; sá jafnan hvárr annars ferð. Veðr var bæði
hvasst ok vátt. Grettir kwam á Gilsbakka um daginn; ok
er Grímr Þórhallsson vissi þat, fagnaði hann hánum harðla
vel, ok bauð hánum með sèr at vera. Hann þekktist þat;
hann lét lausa Söðulkollu, ok sagði Grími, hversu hón var
til komin. Þá kwam Sveinn, ok steig af baki, ok sá þar
hross sitt; hann kvað þetta:

Hverr reid hryssu várri?
Hver verðr raun á launum?
Hverr sá hvinnit stœrra?
Hvat man kuðbúinn dufla?

Grettir var þá farinn af vásklæðum sínum, ok beyrði stökuna.

Heim reid ek hryssu at Grími
(hann er gildir hjá kotmanni),
þat man ek launa litlu;
láttu okkr vera sátta.

Svá skal jafnt vera, sagði bóndi, ok er fulllaunut hrossreidín.
Eptir þat kvað hvárr sínar vísur, ok kvazt Grettir eigi
mundu at finna við þat, er hann átti eptir sínu at sjá.
Var bóndi þar um náttina, ok þeir báðir, ok gjörðu at
þessu gaman mikit. Þetta kölludu þeir Söðulkolluvísur.
Um morguninn reid bóndi heim, ok skildust þeir Grettir vel.
Grímr sagði Gretti marga hluti norðan ór Miðfirði, þá sem
gjörzt höfðu meðan hann var utan. ok þat, at Atli var
engu bættr, en uppgangr Þorbjarnar öxnamegins var svá

mikill, at væri úvíst, at Ásdís húsfreyja gæti setið á Bjargi, ef svá stæði. Nú dvaldist Grettir fáar nætr með Grími, því at hann vildi, at engi frétt færi fyrir hánnum norðr um heiðar. Grímr bað hann vitja sín, ef hann þyrfti ásjár við, en forðast man ek lög, at verða sekr um bjargir við þik. Grettir kvað hánnum vel fara, en þat er líkara, at síðar muna ek meir við þurfa. Reid Grettir nú norðr Tívdægri, ok svá til Bjargs, ok kvam þar á náttarþeli; var fólk allt í svefni, utan móðir hans. Hann gekk á bak húsum, ok þær dyrr, er þar váru, því at hánnum váru þar kunnig göng, ok svá til skála, ok at rekkju móður sinnar, ok þreifadist fyrst fyrir. Hón spurði, hvern þar væri. Grettir sagði til sín. Hón settist þá upp, ok hvarf til hans, ok blés við mæðiliga, ok mælti: ver velkominn, frændi, sagði hón, en svipul verðr mér sonaeignin, er sá nú drepinn, er mér var þarfastr, en þú útlægr gjörr ok úbótamaðr, en hinn þriðr er svá ungr, at ekki má¹ at hafast. Þat er fornt mál, sagði Grettir, at svá skal bōl bæta, at bíða annat meira; en fleira er mönnum til hugganar, enn fēbætr einar, ok er þat líkast, at hefnt verði Atla, en þat er til mín kemr, þá munu þar ýmsir sínum blut fegnir, er vær eigumst við. Hón kvað þat eigi úlíkligt. Var Grettir þar nú um hríð á fárra manna vitorði, ok fréttist fyrir um atferli beraðsmanna. Höfðu menn eigi spurt til þess, at Grettir væri kominn til Miðfjarðar. Hann spurði, at Þorbjörn oxnamegin var heima, ok var fámennt hjá hánnum; þetta var eptir túnannir.

48. Einn vedrdag góðan reid Grettir vestr yfir hálsa til Þóroddsstaða; hann kvam þar nærri hádeg, ok drap á dyrr. Konur gengu út, ok heilsuðu hánnum; þær kendu hann eigi. Hann spurði at Þorbirni. Þær sögðu hann

¹⁾ i det følgende Blad i D er et Ilul, og den første Side næsten ulæselig.

farinn á engjar at binda hey, ok með hánum son hans
 sextán vetra gamlan, er Arnórr hét. Þorbjörn var starfs-
 maðr mikill, ok var nær aldri iðjulauss; ok er Grettir hafði
 þetta spurt, bað hann þær vel lifa, ok reið á burt, ok fram
 á veginn til Reykja. Þar gengr ein mýrr ofan ór hálsinum,
 ok var þar á slátta mikil, ok hafði Þorbjörn látið slá þar
 mikit hey, ok var¹ þá fullþurrt; ætlaði hann þat heim at
 binda, ok sveinninn með hánum, en kona tók rökin. Grettir
 reið nú neðan á teiginn, en þeir feðgarnir váru ofar, ok
 höfðu bundit eina klyf, en váru þá at annarri. Þorbjörn
 hafði sett skjöld sinn ok sverð við klyfina, en sveinninn
 hafði handöxi hjá sèr. Þorbjörn sá manninn, ok mælti við
 sveininn: maðr ríðr þar at okkr, ok skulu vit hætta at
 binda heyit, ok vita, hvat hann vill; ok svá gjörðu þeir.
 Grettir steig af baki; hann hafði hjálm á höfði, ok gyrðr
 saxinu, ok spjót mikit í hendi, ok engir krókarnir á, ok
 var silfrrekin fálrinn á; hann settist niðr, ok drap² ór
 geirna glann, því at hann vildi eigi, at Þorbjörn mætti aptr
 senda. Þá mælti Þorbjörn: þetta er mikill maðr, ok eigi
 kann ek mann á velli at sjá, ef þat er eigi Grettir Ásmundar-
 son, ok man hann þykkjast³ eiga ærnar sakir við oss, ok
 verðum við röskliga, ok látum engan bilbug á okkr sjá;
 skulu vit fara at með ráðum, ok man ek ganga at hánum
 framan, ok sjá, hversu til tekst með okkr, því at ek treysti
 mér við hvern mann, ef ek á einum at mæta, en þú gakk
 á bak hánum, ok högg tveim höndum í milli herða hánum
 með öxinni; þarftu eigi at varast, at hann gjöri þær mein,
 síðan er hann snýr baki at þær. Engan hafði Þorbjörn
 hjálm, ok hvárigi þeirra. Grettir gekk á mýrina, ok þegar
 hann kemr í skotmál við þá, skaut hann spjóti at Þorbirni,
 en þat var lausara á skaptinu, enn hann ætlaði. ok geigadi⁴

¹) *ulfr.* B, C. ²) *dro.* B. ³) *ulfr.* B C. ⁴) *seigadi.* B.

á fluginu, ok hljóp af skaptinu, ok niðr í jörðina. Þorbjörn tók skjöldinn ok setti fyrir sik, en brá sverðinu, ok snèri á móti Gretti, er hann kenndi hann. Grettir brá þá saxinu, ok sveipaði því til nökkut, svá at hann sá, hvar piltrinn stóð á baki hánum, ok því hafði hann sik lausan við; er hann sá, at piltrinn var kominn í höggfæri við sik, þá reiddi hann hátt saxit, laust hann bakkanum saxins í höfuð Arnóri svá hart, at haussinn brotnaði, ok var þat hans bani. Þá hljóp Þorbjörn mót Gretti, ok hjó til hans, en hann brá við buklara hinni vinstri hendi, ok bar af sèr, en hann hjó fram saxinu, ok klauf skjöldinn af Þorbirni, ok kwam saxit í höfuðit hánum svá hart, at í heilanum stóð, ok féll hann af þessu höggi dauðr niðr. Eigi veitti Grettir Þorbirni fleiri áverka. Leitaði hann þá at spjóti sínu, ok fann eigi. Gekk hann þá til hests síns, ok reið út til Reykja, ok lýsti þar vígunum. Kona sú, er var á engiteignum, sá á vigin; hljóp hún þá heim felmsfull, ok sagði, at Þorbjörn var veginn, ok þeir feðgar báðir. Þetta kwam mjök á þá úvara, er heima váru, því at engi vissi um ferðir Grettis. Var þá sent eptir mönnum á næstu bæi; kwam þar brátt margt manna; færðu líkin til kirkju. Þóroddr drápustúfr tók við eptirmáli um vigin, ok hafði hann þegar flokk uppi. Grettir reið heim til Bjargs, ok fann móður sína, ok sagði þenna atburð. Hón varð glöð við þetta, ok kvað hann nú hafa líkzt í ætt Vatnsdæla. en þó man þetta upphaf ok undirrót sekta þinna; veit ek þat víst, at þú mátt eigi hær langvistum vera sakir frænda Þorbjarnar, en þó mega þeir nú vita, at þær kann nökkut at þykkja. Grettir kvað þá visu:

Varð í veðrafirði
 vápn sóttr í byr Þróttar
 (æst fór arfs ok gneista
 aifang) vinr Hafla.

Nú er, ósjötlat, Atla
 andrán, þat er var, hánnum
 (dauðr hnè hann fyrr á friðri
 fold) makliga goldit.

Ásdís húsfreyja kvað satt vera; en eigi veit ek, hvat er þú ættlar nú til ráða at taka. Grettir kvazt nú mundu leita til vina sinna ok frænda vestr til sveita, en engi vandræði skal þér af mæðr leida, sagði hann. Bjóst hann þá til ferðar, ok skildu þau mæðgin með kærleikum. Fór hann fyrst til Mela í Hrútafjörð, og sagði Gamla mági sínum allt þat, sem til hafði borit um vígít Þorbjarnar. Gamli bað, at hann skyldi flýta sér ór Hrútafirði, meðan þeir halda flokkinum, frændr Þorbjarnar, en veita skulu vèr þér at eptirmáli um víg Atla, slíkt er vèr megum. Eptir þat reið Grettir vestr yfir Laxárdalsheiði, ok létta eigi fyrr, enn hann kvam í Ljárskóga til Þorsteins Kuggasonar, ok dvaldist þar lengi um haustið.

49. Þóroddr drápustúfr fréttist fyrir, hverr at vegit myndi hafa Þorbjörn, ok þá fæðga; ok er þeir kvámu til Reykja, var þeim sagt, at Grettir hefði þar komit, ok lýst vígunum á hendr sér. Þóroddr þóttist nú sjá, hversu farit hafði; fór hann þá til Bjargs, ok var þar margt manna fyrir, ok spurði, hvárt Grettir væri þar. Húsfreyja sagði, at hann hefði á burt ridit, ok hón færði hann eigi í fylgsni, ef hann væri hér; munu þér nú vel við una, at svá búit standi; var eigi ofhefnt fyrir víg Atla, þó at þetta kvæmi fyrir; spurðu þér eigi at, þótt ek hefða skapraun af því, er nú ok vel, þó svá standi. Ríðu þeir þá heim, ok þótti eigi hægt til atgjörða. Spjótið þat, sem Grettir hafði týnt, fannst eigi fyrr enn í þeirra manna minnum, er nú lifa; þat spjót fannst á ofanverðum dögum Sturlu lögmanns Þórdarsonar, ok í þeirri mýri, er Þorbjörn féll, ok heitir þar nú Spjóts-

mýrr, ok hafa menn þat til merkja, at Þorbjörn hafi þar drepinn verit, þótt í sumum stöðum segi, at hann hafi á Miðfítjum drepinn verit. Þeir frændr spyrja, at Grettir var í Ljárskógum; söfnuðu þeir þá mönnum saman, ok ætluðu til Ljárskóga. En er Gamli varð þess varr frá Melum, gjörði hann þeim Þorsteini ok Gretti vissu um ferðir Hrútfirðinga; ok er Þorsteinn varð þess varr, sendi hann Gretti inn í Tungu til Snorra goða, því at þá var málsfriðr með þeim, ok lagði Þorsteinn þat til ráðs með Gretti, at hann beiddi Snorra ásjá, en ef hann yrði eigi við, bað hann Gretti fara vestr á Reykjahóla til Þorgils Arasonar, ok man hann við þær tåka í vetr; hafst við í Vestfjörðum þar til sem sjöttlast þessi málaferli. Grettir kvazt hans ráðum hlíta mundu. Reið hann þá inn í Tungu, ok fann Snorra goða at máli, ok beiddi hann viðtöku. Snorri svarar: ek gjörumst nú gamall maðr, ok nenni ek nú eigi at halda seka menn, ef mik rekr engi nauðsyn til; eða hvað bar nú til, er öldungrinn vísaði þær nú frá sér? Grettir kvað Þorsteinn opt hafa vel til sín gjört, en fleiri man nú við þurfa, enn hans eins, ef duga skal. Snorri mælti: til man ek leggja orð mín, ef þær mætti lið at verða, en annarsstaðar skaltu til leita um vistaferli þín, enn hjá mér. Skildu þeir at svá mæltu. Snæri Grettir þá vestr til Reykjaness. Hrútfirðingar kvámost með flokk sinn á Sámssstaði; þá fréttu þeir, at Grettir var burt ór Ljárskógum, ok hurfu þar aptr.

50. Grettir kwam á Reykjahóla nær vetrnáttum, ok beiddi Þorgils vetrvistar. Þorgils sagði, at hánum væri til reiðu matr, sem öðrum frjálsum mönnum, en eigi er hér vönd vistargjörð. Grettir kvazt eigi um þat vanda. Er hér enn annarr hlutr til vandhæfa, sagði Þorgils: þeir menn ætla hér til vistar, er nökkut þykkja vanstilltir, sem eru þeir fóstbræðr Þorgeirr ok Þormóðr; veit ek eigi, hversu

yðr hentar saman at vera, en þeirra vist skal hær jafnan vera, er þeir vilja; nú máttu vera hær, ef þú vilt, en engum yðar skal duga at eiga illt við annan. Grettir sagði, at hann myndi á engan mann leita fyrri, ok einkanliga, ef bóndi vildi svá. Litlu síðar kvámu þeir fóstbræðr heim. Eigi féll blítt á með þeim Þorgeiri ok Gretti, en Þormóðr lét sér vel fara. Þorgils bóndi sagði þeim fóstbræðrum allt slíkt, sem hann sagði Gretti; en þeir gjörðu svá mikil metorð hans, at hvárigir lögðu öðrum öfugt orð, en þó fóru eigi þykkjur þeirra saman. Leið nú svá öndverðr vetrinn af. Þat segja menn, at Þorgils bóndi átti eyjar þær, sem Ólafseyjar heita; þær liggja út á firðinum, hálfa aðra viku undan Reykjanesi; þar átti Þorgils bóndi uxa góðan, ok hafði eigi sóttir orðit um haustið; talaði Þorgils um jafnan, at hann vildi ná hánnum fyrir jólin. Þat var einn dag, at þeir fóstbræðr bjuggust til at sækja uxann, ef þeim fengist hinn þriðl maðrinn til liðs. Grettir bauð at fara með þeim, en þeir létu vel yfir því; fara síðan þeir á teinæringi. Veðr var kalt, ok læk á norðan. Skipit stóð í Hvalshaushólmi. Sigldu þeir út, ok græddist heldr vindrinn; kvámu við eyjarnar, ok tóku uxann. Þá spurði Grettir, hvárt þeir vildi heldr leggja út uxann, eða halda skipinu, því at brjm mikit var við eyna. Þeir báðu hann halda skipinu. Hann stóð við mitt skipit á þat borð, er frá landi horfði, tók hánnum sjárinndir herðablöðin, ok hœlt svá, at hvergi sveif. Þorgeirr tók upp uxann aptan, en Þormóðr framan, ok hófu svá út í skipit; settust síðan til róðrar, ok reri Þormóðr í hálsi, en Þorgeirr í fyrirrími, en Grettir í skut, ok hœldu inn á flóann. Ok er þeir kvámu inn fyrir Hafraklett¹⁾, styrmdi þá at þeim; þá mælti Þorgeirr: frýr nú skutrinn skriðar. Grettir svarar: eigi skal skutrinn eptir liggja, ef

¹⁾ Hamraklett, D.

allvel er róit fram í. Þorgeirr féll þá svá fast á árar, at af gengu báðir háirnir¹. Þá mælti hann: legg þú til, Grettir, meðan at ek bæti at hánnum. Grettir dró þá fast árarar, meðan Þorgeirr bætti at hánnum; en er Þorgeirr tók at róa, höfðu svá lúizt árarar, at Grettir hristi þær í sundr á borðinu. Þormóðr kvað betra at róa minna, ok brjóta ekki. Grettir þreif erði tvau, er lágu í skipinu, ok rak borur stórar á borðstokkunum, ok reri svá sterkliga, at brakaði í hverju trè; en með því at skip var gott, en menn heldr í röskvara lagi, þá náðu þeir Hvalshaushólm. Grettir spyr, hvárt þeir vildi heldr fara heim með uxann, eðr setja upp skipit. Þeir kjöru heldr at setja upp skipit, ok settu þeir upp með öllum sjánum, þeim sem í var, ok jöklinum, en þat var mjök sýlt, en Grettir leiddi uxann, ok var hann mjök stíðr í böndunum, en allfeitr, varð hánnum mjök mætt; en þá er hann kwam nedan hjá Titlingsstöðum, þraut uxann gönguna. Þeir fóstbræðr gengu til húss, því at hvárigir vildu veita öðrum at sínu hlutverki. Þorgils spyr at Gretti, en þeir sögðu, hvar þeir höfðu skilit. Hann sendi þá menn á móti hánnum, ok er þeir kvámu ofan undir Hellishóla, sáu þeir hvar maðr fór í móti þeim, ok hafði naut á baki, ok var þar kominn Grettir, ok bar þá uxann. Undrudust þá allir, hversu mikit hann gat orkat. Læk Þorgeiri næsta öfund á um afl Grettis. Þat var einn dag nökkut eptir jól, at Grettir fór í laug einn saman. Þorgeirr vissi þat, ok mælti við Þormóð: förum vit til, ok vitum, hversu Gretti bregðr við, ef ek ræð á hann, þá er hann ferr frá lauginni. Eigi er mēr um þat, sagði Þormóðr, ok mantu ekki gott fá af hánnum. Fara vil ek þó, sagði Þorgeirr. Snýr hann nú ofan á brekkuna, ok bar hátt öxina. Grettir gekk þá nedan frá lauginni, ok er þeir fundust, mælti Þorgeirr: er þat

², *saet.* B, C, D; hánnr, A.

satt, Grettir, sagði hann, at þú hafir þat mælt, at þú skyldir aldri renna fyrir einum? Eigi veit ek þat svá víst, sagði Grettir, en skammt hefi ek fyrir þér runnit, kvað Grettir. Þorgeirr reiddi þá upp öxina. Í því hljóp Grettir undir Þorgeir, ok færði hann niðr allmikil fall. Þorgeirr mælti þá til Þormóðar: skaltu standa hjá, er fjandi sjá drepr mik undir sik? Þormóðr þreif þá í fætr Grettis, ok ætlaði at draga hann ofan af Þorgeiri, ok fékk ekki at gjört. Hann var gyrðr saxi, ok ætlaði at bregða; þá kvam Þorgils bóndi at, ok bað þá vera spaka, ok fást eigi við Gretti. Þeir gjörðu svá, ok snèru þessu í gaman. Eigi áttust þeir fleira við, svá at getið sè. Þótti mönnum Þorgils mikla gæfu til hafa borit, at stilla slíka ofstopamenn; en er vára tók, fóru þeir á burt allir. Grettir fór inn til Þorskafjarðar, var hann spurðr at, hversu hánnum hefði líkat vistargjörðin eða vetrvistin á Reykjahólum. Hann svarar: þar hefi ek svá verit, at ek hefi jafnan mínum mat orðit fegnastr, þá er ek náða hánnum. Fór hann síðan vestr yfir heiðar.

51. Þorgils Arason reið til þings með fjölmenni. Kvam þar allt stórmenni um landit. Brátt fundust þeir Skapti lögmaðr, ok tóku tal með sèr; þá mælti Skapti: er þat satt, Þorgils, at þú hafir haldit þá þrjá menn í vetr, er mestir újafnaðarmenn þykkja vera, ok þó allir sekir, ok stillt þá svá, at engi hefir öðrum mein gjört? Þorgils segir, at þat var satt. Skapti mælti: mikill höfðingsskapr er slíkt, eðr hversu þykkir hverr þeirra skapi farinn? eðr hverr hreystimaðr hverr þeirra man vera? Þorgils sagði: alla ætla ek þá fullröskva til hugar; en þeir eru tveir, at ek ætla hræðast kunna; er þat þó úlíkt, því at Þormóðr er maðr gudhræddr ok trúmaðr mikill, en Grettir er svá myrkfœlinn, at hann þorir hvergi at fara, þegar at myrkva tekr, ef hann gjörði eptir skapi sínu; en Þorgeir frænda minn

hygg ek eigi bræðast kunna. Svá man hverr skapi farinn, sem þú segir, segir Skapti; skildu þeir svá talit. Á þessu alþingi kærði Þóroddr drápustúfr um víg Þorbjarnar öxnamegins, því at hann hafði eigi fram komit á Húnavatnsþingi fyrir frændum Atla; hugði hann, at hær myndi hans mál síðr fyrir borð borit. Þeir frændr Atla sóttu Skapta at málinu, en hann kvazt sjá lögvörn í því, svá at þar myndi fullar fêbœtr fyrir koma. Síðan váru málin í gjörð lagin, ok var þat flestra ætlan, at vígin myndi á standast Atla ok Þorbjarnar; en er Skapti vissi þat, gekk hann til gjörðarmanna, ok spurði, hvaðan þeir tóku þat. Þeir kölluðu þá jafna bœndr, er veginr váru. Skapti spyrr: hvárt var fyrr, Grettir sekr gjörr, eðr Atli var veginn; en er þat var reiknat, þá varð þat vikumunr, er Grettir var sekr gjörr á alþingi, en hitt varð þegar eptir þingit. Skapti mælti: þat grunaði mik, at yðr myndi yfir sjást um málatilbúnaðinn, at þær hêldut þann aðila, er sekr var áðr, ok hvárki mátti sín mál verja nè sœkja. Nú segi ek Gretti ekki eigi at gjöra með vígsmálinu, ok taki eptirmál sá, sem næstr er at lögum. Þá mælti Þóroddr drápustúfr: hverr skal þá svara víginu Þorbjarnar bróður míns? Sjái þær sjálfir fyrir því, segir Skapti; en eigi munu frændr Grettis ausa fê fyrir hann eðr verk hans, ef hánum kaupist engi friðr; ok er þess varð varr Þorvaldr Ásgeirsson, at Grettir var af sagðr eptirmálinu, leituðu þeir þá eptir, hverlr næstir váru; urðu þá skyldastir þeir Skeggi, son Gamla at Melum, ok Úspakr, son Glúms af Eyri ór Bitru; þeir váru báðir kappsmenn miklir ok framgjarnir. Varð Þóroddr nú at lúka bœtr fyrir víg Atla; var þat tvenn hundruð silfrs. Þá lagði til Snorri goði: vill þær nú, Hróttfúðingar, sagði hann, at niðr falli fêgjald þetta, ok verði Grettir sýkn? því at ek ætla, at hann verði sárbeittr í sektinni. Þeir

frændr Grettis tóku vel undir þat, ok sögðust aldri hirða um fè, ef hann fengi frið ok frelsi. Þóroddr kvazt sjá, at hans hlutr varð erfiðr, ok læzt þenna mundu upp taka fyrir sína hönd. Snorri bað þá vita áðr, hvárt Þórir ór Garði vildi leyfi til leggja, at Grettir yrði sýkn; en er hann varð þess viss, brást hann reiðr við, ok kvað Gretti aldri skyldi ór sektum ganga eðr kómast, ok at firr, at hann verði sýkn, sagði hann, at meira fè skyldi leggja til höfuðs hánum, enn nökkurum öðrum skógarmönnum; en er hann tók þetta svá þvert, varð ekki af sýkninni. Tóku þeir Gamli feit til sín, ok varðveittu; en Þóroddr drápustúfr fékk engar bætr eptir Þorbjörn bróður sinn. Lögðu þeir Þórir þá fè til höfuðs Gretti, þrjár merkr silfrs hvárr þeirra; þat þótti mönnum nýlunda, því at aldri hafði verit meira lagt, enn þrjár merkr. Snorri kvað þetta úvitrligt, at bekkjast til at hafa þann mann í sektum, er svá miklu illu mætti orka, ok kvað þess margan gjalda mundu. Skildu menn við þat, ok riðu heim af þinginu.

52. Þá er Grettir kvam yfir Þorskafjarðarheiði í Langadal, lét hann sópa greipr um eignir smábœnda, ok hafði af hverjum þat, er hann vildi; tók hann af sumum vápn, en sumum klæði; lögðu þeir allmisjafnt af, en allir sögðust nauðgir láta, þegar hann var á burtu. Þá bjó í Vatnsfirði Vermundr enn mjófi, bróðir Vigastyr; hann átti Þorbjörgu dóttur Ólafs þá Höskuldssonar; hón var kölluð Þorbjörg en digra. Vermundr var þenna tíma til þings riðinn, er Grettir var í Langadal. Hann fór ofan yfir háls til Laugabóls; þar bjó sá maðr, er Helgi hét; hann var þar helzt fyrir bændum. Þaðan hafði Grettir góðan hest, er bóndi átti. Þaðan fór hann inn til Gjörðidals; þar bjó sá maðr, er Þorkell hét; hann var vel birgr at kosti, ok þó lítilmenni; hafði Grettir þaðan slíkt, sem hann vildi, ok þorði Þorkell

eigi at at finna, eðr á at halda. Þaðan fór Grettir til Eyrar, ok svá út þeim megin fjarðar, ok hafði af hverjum bæ vist ok klæði, ok gjörði mörgum harðleikit, ok þótti flestum þungt undir at búa. Grettir fór nú djarfliga, ok hafði engi varðhöld á sér; hann fór nú unz er hann kvam í Vatnsfjarðardal, ok fór þar til sels; dvaldist hann þar margar nætr, ok lá þar í skógum ok svaf, ok hugði eigi at sér. En er smalamenn vissu þat, fóru þeir til bæjar, ok sögðu, at sá dólgr væri kominn í byggdina, at þeim þótti eigi dæll viðfangs. Söfnuðust þá bæendr saman, ok höfðu þrjá tigu manna; leyndust þeir í skóginum, svá at Grettir vissi ekki til, ok létu smalamann halda njósnum til, nær færi gæfi á Gretti, en þó vissu þeir úgjörla, hverr maðrinn var. Nú bar svá til einn dag, þá er Grettir lá ok svaf, at bæendr kvámu at hánun; ok er þeir sáu hann, áttu þeir ráðagjörð um, hversu þeir skyldi taka hann, svá at minnst yrði manntjón í, ok skipuðu til, at tíu skyldi á hann hlaupa, en sumir skyldi bera bönd at fótunum. Þeir gjörðu nú svá, ok fleygðu sér ofan á hann, en Grettir brá við svá hart, at þeir hrutu af hánun; en hann kvamst á knè, ok í því gátu þeir kastað böndum á hann ok fœtr hánun. Þá spyndi Grettir svá fast við eyrun á tveimr, at þeir láu í roti. Nú hljóp á hann hverr at öðrum, en hann ruddist um fast ok lengi, en þó gátu þeir hlaðit hánun um stöðir, ok bundu hann. Eptir þat áttu þeir um at tala, hversu við hann skyldi gjöra; báðu þeir Helga af Laugahóli taka við hánun ok annast hann, þar til at Vermundr kvæmi heim af þingi. Hann svarar, at annat ætla ek mèt þarfara, enn láta húskarla mína sitja yfir hánun, því at ek á lönd erfið, ok kemr hann aldri í mína ferð. Þá báðu þeir Þorkel í Gjörðidal við hánun at taka; kváðu hann vera nógtamann. Þorkell mælti í móti, ok kvað engan kost á því, þar sem

ek ligg einn í húsi ok kerling mín, en hvar fjarri öðrum mönnum, ok komi þér eigi þeim kassa á mik, sagði hann. Þú Þórálfr á Eyri, sögðu þeir, tak við Gretti, ok gjör til hans vel um þingit; ella fær þú hann af þér til næsta bæjar ok ábyrgst, at hann verði eigi lauss; set hann svá bundinn niðr, sem nú tekr þú við hánnum. Hann svarar: eigi vil ek við Gretti taka, því at ek hefi hvárki til föng nè fè at halda hann; hefir hann ok eigi á minni jörðu tekinn verit, lízt mér heldr vandræði, enn virðing, við hánnum at taka, eðr gjöra nökkut með hánnum, ok hann kemr aldri í mín hús inn. Eptir þat leituðu þeir við hvern búanda, ok mæltu allir í móti, ok eptir þessu viðtali þeirra hafa kátir menn sett fræði þat, er Grettisfærsla hét, ok aukit þar í kátligum orðum til gamans mönnum. En er þeir höfðu þetta talat lengi, þá kvam þat ásamt með þeim, at þeir myndi eigi gjöra happ sitt at úhappi, ok fóru til, ok reistu gálga þar þegar í skóginum, ok ætluðu at hengja Gretti, ok hlömmuðu¹ nú mjök yfir þessu. Þá sá þeir ríða sex menn neðan eptir dalnum; var einn í litklæðum. Þeir gátu, at þar myndi fara Þorbjörg húsfreyja ór Vatnsfirði, ok svá var; ætlaði hún til sels. Hón var skörungur mikill ok stórvitr; hón hafði héraðsstjórn ok skipaði öllum málum, þegar Vermundr var eigi heima. Hón veik þangat at, sem mannfundrinn var, ok var hón af baki tekin. Bændr fögnuðu henni vel. Hón mælti þá: hvat þingi haf þér? eðr hvern er þessi hinn hálsdigri, er hér sitr í böndum? Grettir nefndi sik, ok heilsaði henni. Hón svarar: hvat rak þik til þess, Grettir, sagði hón, at þú vildir gjöra hér úspektir þingmönnum mínum? Eigi má nú við öllu sjá; vera varð ek nökkurstaðar. Slíkt er mikit gæfuleysi, segir hón, at vesalmenni þessi skyldi taka þik, svá at ekki lagðist

¹) hlökkudu. B. D.

fyrir þik, eða hvað ætlit þér nú af hánnum at gjöra? Bændr sögðu henni, at þeir ætluðu at festa hann á gálga fyrir úspektir sínar. Hón svarar: vera má, at Grettir hafi sakir til þess, en ofráð man þat verða yðr Ísfirðingum at taka Gretti af lífi, því at hann er maðr frægr ok stórættaðr, þó at hann sè eigi gæfumaðr; eðr hvað viltu nú vinna til lífs þér, Grettir, ef ek gef þér líf? Hann svarar: hvað mælir þú til? Þú skalt vinna eið, sagði hón, at gjöra engar úspektir hér um Ísafjörð, engum skaltu hefna, þeim sem í atfór hafa verit at taka þik. Grettir kvað hana ráða skyldu. Síðan var hann leyst; ok þá kvazt hann mest bundizt hafa at sínu skæplyndi, at hann sló þá eigi, er þeir höeldust við hann. Þorbjörg bað hann fara heim með sèr, ok fékk hánnum hest til reidar. Fór hann þá heim í Vatnsfjörð, ok beidd þar til þess, er Vermundr kwam heim, ok gjörði húsfreyja vel við hann. Varð hón af þessu mjök fræg víða um sveitir. Vermundr var úfrýnn, er hann kwam heim, ok spurði, hví Grettir væri þar. Þorbjörg sagði allt, sem farit hafði með þeim Ísfirðingum. Hvers naut hann at því, sagði Vermundr, er þú gaft hánnum líf? Margar greinir váru til þess, sagði Þorbjörg; þat fyrst, segir hón, at þú mant þykkja meiri höfðingi, enn áðr, er þú áttir þá konu, er slíkt þorði at gjöra; þá myndi þat ok ætla Hrefna frændkona hans, at ek mynda eigi láta drepa hann; þat hit þriðja, at hann er hinn mesti afreksmaðr í mörgum greinum. Vitr kona ertu, sagði Vermundr, í flestu, ok haf þökk fyrir. Þá mælti hann til Grettis: lítið lagðist nú fyrir þik, þvílíkr garpr sem þú ert, er vesalmenni skyldi taka þik, ok ferr svá jafnan úeirðarmönnum. Grettir kvað þá vísu þessa:

Mitt var gilt
 gæfuleysi
 í marþaks
 miðjum firði,

er gamlir
grísir skyldi
halda mër
at höfuðbeinum.

Hvat vildu þeir af þèr gjöra, kvað Vermundr, þá er þeir
höfðu tekit þik? Grettir kvað:

Sögðu mër,
þau er Sigarr veitti,
mægða laun
margir hœfa,
unz lofgróinn
laufi sæmdar
reynirunn
rekkar fundu.

Vermundr mælti: hvárt mundu þeir hafa hengt þik, ef þeir
einir hefði um vælt? Grettir kvað:

Mynda ek sjálfr
í snöru egnda
helzti brátt
höfði stinga,
ef Þorbjörg
þessu skáldi
(hón er allsnotr)
eigi byrgi.

Vermundr mælti: hvárt bauð hón þèr til sín: Grettir svarar:

Mik bað hjálp
handa tveggja
Sifjar vers
með sèr fara;
sú gaf þveng
Þundar beðju

góðan hest,
er mik gæddi friði.

Mikil man verða æfi þín ok erfð, segir Vermundr, ok er þær kennt at varast úvini þína, en eigi nenni ek at halda þik, ok hafa þar fyrir þykkju margra ríkra manna; er þær enn bezt at leita til frænda þinna, en fáir munu verða til at taka þik, ef öðru megu við koma; ertu ok eigi auðkvæðr til fylgdar við flesta menn. Grettir var í Vatnsfirði nökkura hríð, ok fór þaðan til Vestfjarða, ok leitaði til margra göfugra manna, ok bar jafnan eitthvert við, þat er engi tók við hánum.

53. Um haustið, er á leið, snæri Grettir aptr hið syðra, ok lètti eigi fyrr, enn hann kvam í Ljárskóga til Þorsteins Kuggasonar, frænda síns, ok var var þar vel við hánum tekit. Bauð Þorsteinn hánum með sèr at vera um vetrinn, ok þat þekktist hann. Þorsteinn var iðjumaðr mikill ok smiðr, ok hèlt mönnum mjök til starfa. Grettir var litill verklundarmaðr, ok því fór lítt skap þeirra saman. Þorsteinn hafði látið gjöra kirkju á bæ sínum. Hann lèt gjöra brú heiman frá bænum; hón var gjör með hagleik miklum, en utan í brúnni undir ásunum, þeim er upp hældu brúnni, var gjört með hringum, ok dynbjöllur, svá at heyrdi yfir til Skarfsstaða¹⁾, hálfu viku sjáfar, ef gengit var um brúna, svá hristust hringarnir. Hafði Þorsteinn mikinn starfa fyrir þessarri smíð, því at hann var járngjörðarmaðr mikill. Grettir var atgangsmikill at drepa járnit, en nennti misjafnt, en þó var hann spakr um vetrinn, svá at ekki bar til frásagnar. En er Hrútfirðingar fréttu, at Grettir var með Þorsteini, höfðu þeir flokk uppi er vára tók. En er Þorsteinn frétti þat, sagði hann Gretti, at hann leitaði sèr annars hælis, en vera þar, því at ek sè, at þú

¹⁾ Skarpsstaða, D.

vilt ekki starfa, en mætt henta eigi þeir menn, sem ekki vinna. Hvert vísar þú mætt þá? sagði Grettir. Þorsteinn bað hann fara suður um land, ok finna frændr sína, en vitja mín ef þeir duga eigi þér. Grettir gjörði nú svá, at hann fór suður til Borgarfjarðar á fund Gríms Þórhallssonar¹, ok dvaldist þar fram yfir þing. Grímr vísaði hánú til Skapta lögmanns á Hjalla. Grettir fór suður hinar neðri heiðar, ok létti eigi fyrr, enn hann kvam í Tungu til Þórhalls Ásgrímssonar, Ellidagrímssonar, ok fór lít með byggðum. Þórhallr kenndist við Gretti sakir forellra sinna, ok þá var Grettir nafnkunnigr mjök um allt land af atgjörfi sinni. Þórhallr var vitr maðr, ok gjörði vel til Grettis, en eigi vildi hann vist hans þar á lengdar.

54. Grettir fór ór Tungu upp til Haukadals, ok þaðan norðr á Kjöl, ok hafðist þar við um sumarit lengi, ok var nú eigi traust, at hann tæki eigi af mönnum plögg sín, þeim sem fóru norðr eðr norðan um Kjölinn, því at hánú varð illt til fefanga. Þat var einn dag, at Grettir var jafnan norðr á Dúfunesskeiði, at hann sá, at maðr reið norðan eptir Kilinum; sá var mikill á baki, ok hafði góðan hest, ok beizl háseymt, vel tornað². Annan hest hafði hann í taumi, ok á töskur. Þessi maðr hafði síðan hait á höfði, ok sá úglöggt í andlit hánú. Gretti leizt vel á hestinn ok þing hans, ok fór til móts við hann, ok heilsaði hánú, ok spurði hann at nafni, en hann kvazt Loptr heita; veit ek, hvat þú heitir, sagði hann, þú mant vera Grettir hinn sterki Ásmundarson, eðr hvert viltu fara? Ekki hefi ek staðnefnt um þat, sagði Grettir, en þat er eyrindi mitt, at vita, ef þú vilt af leggja nökkurt plagg af því, sem þú ferr með. Loptr svarar: því man ek fá þér þat, sem ek á? eðr hvat viltu við gefa? Grettir svarar: hefir þú eigi

1) Þorssonar, A. 2) tinnat, C, D; tinnat, B.

spurt þat, at ek legg eigi fè í móti? ok sýnist þó þat flestum, at ek fái þat, sem ek vil. Loptr mælti: bjóð þú þeim þessa kosti, er þeir þykkja góðir, en eigi vil ek svá láta þat, er ek á, ok fari hvarir sinn veg; ok reið fram hjá Gretti, ok keyrði hestinn. Grettir mælti: eigi munu vit svá skjótt skilja, ok þreif í taumana á hesti Lopts fyrir framan hendr hánú, ok hèlt báðum höndum Loptr mælti: far þú veg þinn, ekki fær þú af mèr, ef ek get á haldit. Þat man nú reynt verða, segir Grettir. Loptr seildist niðr með kinnleðrunum, ok tók taumana milli hringanna ok handa Grettis, heimtandi svá fast, at hendr Grettis hrukku niðr eptir taumunum, þar til sem hann dró af hánú allt beizlit. Grettir leit eptir í lófana, ok sá, at þessi maðr myndi hafa afl í krummum heldr enn eigi, ok leit eptir hánú ok mælti: hvert ætlar þú nú at fara? Loptr svarar, ok kvað:

Ætla ek regns
í hrunketil
steypi niðr
frá stófrerum;
þar má hængr
hitta grundar
litinn stein
ok land hnefa.

Grettir mælti: eigi er víst at leita eptir byggðum þínum, ef þú segir eigi ljósara. Hann mælti þá, ok kvað:

Er-at mèr dælt
at dylja þik,
ef þú vilt
vitja þangat;
þat er ór byggð
Borgfirðinga,

þat er Balljökul
bragnar kalla.

Síðan skildu þeir. Sær Grettir þá, at hann hefir eigi afl
við þessum manni. Þá kvað Grettir vísu:

Mær stóð málma skúrar,
mundangshvatr ok Atli
(staddir vilda ek svá sjaldan),
snarr Illugi fjarri:
þá er úfœlinn álar
endr dró mér ór hendi
(brúðr strýkr horsk, ef hræðumst,
hvarma) Loptr hinn armi.

Eptir þetta fór Grettir suðr af Kilinum, ok reið til Hjalla,
ok fann Skapta, ok beiddi hann ásjár. Skapti svarar: þat
er mér sagt, at þú farir heldr úspakliga, ok grípir fyrir
mönnum góðs sitt, ok samir þér þat illa, svá stórættudum
manni. Nú væri allt betra um at tala, ef þú ræntir eigi,
en með því, at ek skal heita lögmadr í landinu, þá stenz¹
mér eigi at taka við útleigdarmönnum, ok brjóta svá lögin.
Ek vil, at þú leitir þangat nökkur, at þú þyrftir eigi at
leggjast á fê manna. Grettir kvazt þat gjarna vildu, en
sagði þó, at hann þóttist varla einn saman vera mega fyrir
myrkfœlni. Skapti kvað hann eigi því einu mundu mega
við hlíta, er hánú þœtti bezt, ok trú þú engum svá vel,
at þér verði svá, sem í Vestfjörðum; hefir þat mörgum at
hana orðit, at hann hefir oftryggr verit. Grettir þakkaði
hánú fyrir heilræði sín, ok snèri aptr til Borgarfjarðar
um haustið, ok fann Grím Þórhallsson², vin sinn, ok sagði
tillögur Skapta. Grím bað hann fara norðr til Fiskivatna
á Arnarvatnsheiði, ok svá gjörði hann.

55. Grettir fór upp á Arnarvatnsheiði, ok gjörði sér

1) stendr, B, D. 2) saal. B, C, D; Þorarinsson, A.

þar skála, sem enn sèr merki, ok bjóst þar um, því at hann vildi nú hvervetna annat, enn ræna; fékk sèr net ok bát, ok veiddi fiska til matar sèr. Hánúm þótti dauðligt mjök á fjallinu, því at hann var mjök mýrkfœlinn. En er þat fréttu aðrir skógarmenn, at Grettir var þar niðr kominn, þá var mörgum hugr á at finna hann, því at þeim þótti mikit traust at hánú. Grímr hèt maðr norðlenzkr; hann var sekr. At þeim manni keyptu Norðlendingar¹, at hann skyldi drepa Gretti, ok hētu hánú frelsi ok fægðum, ef hann kvæmi því fram. Hann fór til móts við Gretti, ok beiddi hann viðtöku. Grettir svarar: eigi þykki mèr, sem þèr sè at hólpnara, þó at þú værir hjá mèr, eru þèr ok vandsènir, skógarmennirnir, en illt þœtti mèr einum saman at vera, ef annars væri kost; vil ek ok, at sá einn sè hjá mèr, at hann verðr at starfa slíkt, er til fellr. Grímr kvazt eigi til annars ætla, ok skoraði á hann fast um vistina. Lèt Grettir þá teljast, ok tók við hánú. Hann var þar nú fram á vetrinn, ok sat um Gretti, ok þótti eigi dælt at hánú at ráða. Grettir grunaði hann, ok hafði vápn sin hjá sèr nátt ok dag, ok þorði hann aldri at hánú at ganga þá er hann vakti. Þat var einn morgin, er Grímr kwam heim af veiði, at hann gekk inn í skálann, ok stappaði fótum, ok vildi vita, hvárt Grettir svæfi, en hann brá sèr hvergi við, ok lá kyrr. Saxit hëkk uppi yfir Gretti. Hugsar Grímr nú, at eigi myndi gefast betra fœri; gjörir hann nú hark mikit, svá at Gretti skyldi orð um finnast, en þat var eigi. Þóttist hann nú vita, at Grettir myndi sofnaðr, ok stillti at rekkjunni hljóðliga, ok seildist til saxins, ok tók ofan ok brá. Í því hljóp Grettir fram á gólfitt, ok greip saxit í því, er hinn reiddi, en annarri hendi í herðar Grími, ok rak hann niðr svá mikit fall, at hann lá nær í úviti.

¹) Hraðfróðingar, B, C, D.

Gafstu svá, þó at þú lètir góðvætliga. Hafði hann af hánnum þá sannar sögur, ok drap hann síðan. En nú þóttist Grettir sjá, hvat þat var at taka við skógarmönnum; ok leið svá vetrinn. At engu þótti Gretti meira mein, enn myrkfœlni.

56. Þórir í Garði spyr nú, hvar Grettir er niðr kominn, ok vildi setja til eitthvert ráð, at hann yrði drepinn. Maðr hét Þórir rauðskeggr; hann var manna gildastr, ok vígamaðr mikill, ok fyrir þat var hann sekr gjörr um allt landit. Þórir í Garði sendi hánnum orð; ok er þeir fundust, beiddi hann Rauðskegg fara sendiferð sína, ok drepa Gretti hinn sterka. Rauðskeggr kvað þat eigi auðveldaverk; sagði, at Grettir var vitr maðr, ok varr um sik. Þórir bað hann til ráða, ok er slíkt drengiligt, svá röskr maðr, sem þú ert, en ek skal koma þér ór sekt, ok þar með gefa þér nógt fê. Við þessu ráði tók Rauðskeggr. Sagði Þórir hánnum, hversu hann skyldi at fara, at vinna Gretti. Eptir þat fór Rauðskeggr fyrir austan land, því at hánnum þótti gruna mega síðr um ferðir sínar. Hann kvam at Arnarvatnsheidi, þá er Grettir hafði verit þar einn vetr; en er Grettir ok Rauðskeggr fundust, beiddi hann Gretti vetrökku. Hann svarar: eigi kann ek at láta fleiri svá opt leika at mér, sem sá, er hér kvam í fyrra haust, ok lèt allskjallkænliga, en þegar hann hafði hér verit litla hrið, sat hann um lif mitt. Nú man ek eigi á þat hætta optar, at taka við skógarmönnum. Þórir svarar: full várkunn þykkir mér þér á vera, þó at þú takir illa skógarmönnum, en heyrt mantu mín hafa getið um vígaserli ok újafnað, en aldri um slíkt dádleysi, at svikja lánardrottinn minn. Nú er því illt illum at vera, at margr ættar þar annan eptir vera; mynda ek ok eigi hafa hingat farit, ef ek ætta betra kosti, en eigi þykki mér vit upp gefnir, ef vit veitumst at.

Nú máttu hætta á við mik fyrst, hversu þér gezt at mér; lát mik þá fara á burt, ef þú finnr údyggð með mér. Grettir svarar: hætta má ek enn á við þik, en vit þat fyrir víst, ef ek gruna um svik við þik, þá verðr þat þinn bani. Þórir bað¹ hann svá gjöra. Eptir þat tók Grettir við hánum, ok fann hann þat, at hann myndi hafa tveggja manna megin, til hvers sem hann gekk. Var hann búinn til hvers sem Grettir vildi senda hann. Til einskis þurfti Grettir at vikjast, ok aldri hafði hánum þótt æfi sín jafngóð, síðan hann kwam í útlegð, en þó var hann svá varr um sik, at aldri sá Þórir færi á hánum. Þórir rauðskeggr var tvá vetr hjá Gretti á heidinni. Tók hánum nú at leiddast á heidinni at vera; hugsar nú um, hvert ráð hann skal gjöra, þat sem Grettir sæi eigi við. Eina nátt um vórit kwam á stormviðri mikit, er þeir váru í svefni. Grettir vaknadi, ok spurði, hvar bátr þeirra væri. Þórir spratt upp, ok hljóp til bátsins, ok braut hann allan í sundr, ok kastadi ýmsa vega brotunum, ok var því líkt, sem veðrit hefði fleygt. Eptir þat gekk hann inn í skálann, ok mælti hátt: eigi hefir nú vel til tekizt, vinr minn, sagði hann, at bátr okkarr er allr brotinn í sundr, en netin liggja langt úti í vatninu. Sæk þú þau þá, sagði Grettir, því at mér þykkir þér sjálfrátt verit hafa, er bátrinn er brotinn. Þórir svarar: þat er svá í atgörfi, at mér er minnst hent, er sund er, en flest annat þykkjumst ek reyna mega við hvern annan úbreyttan mann; máttu þat vita, at ek hefi eigi þér starf ætlat, síðan ek kwam til þín, mynda ek eigi biðja þessa, ef ek væra til færr at gjöra. Grettir stóð upp, ok tók vápn sín, ok gekk til vatnsins. Þar var svá við vaxit, at nes gekk fram í vatnit, en víkrhvarf mikit var öðru megin

¹⁾ *sauð.* B, C, D: kvað, A.

nessins; vatnit var djúpt at landinu. Grettir mælti: leggst út eptir netjunum, ok lát mik sjá, hversu færr maðr þú ert. Sagða ek þér áðan, sagði Þórir, at ek er eigi syndr, ok eigi veit ek, hvar nú er garpskapr þinn ok áræði. Ná má ek netjunum, sagði Grettir, en svík þú mik eigi, er ek trúir þér. Þórir svarar: ætla þú mér eigi slíka svívirðing ok dádleysi. Grettir mælti: þú mant sjálf gefa þér raun, hverr þú ert. Síðan kastaði hann klæðunum ok vápnum, ok lagðist eptir netjunum; sveipar hann þeim saman, ok ferr at landi, ok kastar þeim upp á bakkann; ok er hann ætlaði á land at ganga, þá greip Þórir vaxit, ok brá skjótt; hann hljóp þá skjótt á móti Gretti, er hann sté upp á bakkann, ok hjó til hans. Grettir kastaði sér á bak aptr ofan í vatnit, ok sökk sem steinn. Þórir horfði út á vatnit, ok ætlaði at verja landit, ef hann kvæmi upp. Kafaði Grettir nú sem næst bakkanum, svá at Þórir mátti eigi sjá hann, þar til sem hann kvam í vikina at baki hánun, ok gekk þar á land. Við þessu gat Þórir eigi sæt; fann hann eigi fyrr, enn Grettir tók hann upp yfir höfuð sér, ok færði niðr svá hart, at saxit hraut ór hendi hánun, ok fékk Grettir tekit þat, ok hafði ekki orða við hann, ok hjó þegar höfuð af hánun, ok lauk svá hans æfi. Eptir þat vildi Grettir aldri við skógarmönnum taka, en þó mátti hann varla einn saman vera.

57. Á alþingi frétti Þórir ór Garði dráp Þóris rauðskeggs; þóttist hann nú sjá, at eigi var auðvelt við at eiga. Tók hann þá þat til ráðs, at hann reið vestr yfir heiðar enar nedri af þinginu, ok hafði nær átta tigu manna, ok ætlaði at fara at taka Gretti af lífi. En er Grímr Þórhallason vissi þat, þá gjörði hann Gretti orð, ok bað hann vera varan um sik. Grettir hugði jafnan at mannaferðum. Þat var einn dag, at hann sá margra manna reið, ok stefndu

til byggða hans; hljóp hann þá í hamraskarð eitt, ok vildi eigi renna, því at hann sá eigi liðit allt. Í því kvam Þórir at með allt liðit, ok bað þá nú ganga í milli bols ok höfuðs á Gretti, ok kvað lítið mundu fyrir illmennit leggjast. Grettir svarar: eigi er sopit, þó at í ausuna sè komit; hafi þèr ok langt til sótt, ok munu nökkurir fá leiksmark, áðr enn vèr skiljum. Þórir eggjaði mjök menn til atsóknar. Hamraskarðið var mjótt, svá at hann gat vel varit öðru megin, en þat undraðist hann, at aldri var at baki hánnum gengit, svá at hánnum yrði mein at því. Fèllu þá menn af Þóri, en sumir urðu sárir; en þeir gátu ekki at gjört. Þá mælti Þórir: þat hefi ek spurt, sagði hann, at Grettir væri afbragðsmaðr fyrir hreysti sakir ok hugar, en þat vissa 'ek aldri, at hann væri svá fjölkunnigr, sem nú sè ek, því at þar falla hálfu fleiri, sem hann horfir bakinu við. Nú sè ek, at þèr er við tröll at eiga, en eigi við menn. Biðr hann þá frá hverfa, ok svá var gjört. Grettir undraðist, hví svá mátti verða; en þó var hann ákafliga móðr. Þórir snèri á burt ok hans menn, ok riðu norðr á sveitir; þótti mönnum þeirra ferð en sneypiligasta. Hafði Þórir látið átján menn, en margir sárir. Grettir veik nú upp í skarðið, ok fann þar mann mikinn vexti; hann sat upp við hamarinn, ok var sárr mjök. Grettir spurði hann at nafni, en hann sagðist Hallmundr heita, en þat má ek segja þèr til kenningar, at þèr þótti ek fast taka í taumana á Kili um sumarit, er vit fundumst; þykkjumst ek nú þat hafa launat þèr. Þat er vist, sagði Grettir, at mèr þykkir þú hafa sýnt mèr mikinn drengskap, hvenær sem ek get þat launat þèr. Hallmundr sagði: þat vil ek nú, at þú komir til heimkynna minna, því at þèr man langt þykkja þèr á heiðinni. Grettir kvezt þat gjarna vildu. Nú fóru þeir báðir samt suðr undir Balljökul; þar átti Hallmundr helli stóran, ok dóttur, gilda

vexti ok sköruliga. Þau gjörðu vel við Gretti, ok græddi hún þá báða. Þar dvaldist Grettir lengi um sumarit; hann kvað flokk um Hallmund, ok er þetta þar í:

Hátt stígr höllum fœti

Hallmundr í sal fjalla.

Þessi vísa er þar í:

Varð í viðris firði

vígfúss á benstíga

naðr í Virfils veðri

vápnhríðar fram skríða.

Kostr man köppum traustum

Keldhverfinga at erfa.

Olli hvatr ór helli

Hallmundr, er ek kvámt undan.

Svá hafa þeir frá sagt, at Grettir dræpi sex menn á fundinum, en Hallmundr tólf. Þá er á leið sumarit, fýsti Gretti aptr til byggða, at finna vini sína ok frændr. Hallmundr bað hann sín vitja, er hann færi suðr um land, ok hæt Grettir því. Fór hann þá vestr til Borgarfjarðar, ok þaðan til Breiðafjardardala, ok leitaði ráða við Þorstein Kuggason, hvert hann skyldi þá á leita, en Þorsteini þótti nú fjölgast mótstöðumenn hans, ok kvað fá mundu við hánnum taka; en fara máttu suðr á Mýrar, ok vita, hvat þar býr fyrir. Grettir fór nú suðr á Mýrar um haustið.

58. Þá djó í Hólmi Björn Hitdælakappi; hann var Arngeirsson, Bersasonar goðlauss, Bálkasonar, er nam Hrutafjörð, sem fyrr segir. Björn var höfðingi mikill ok harðfengr, ok hœlt jafnan seka menn. Grettir kvam í Hólum, ok tók Björn vel við hánnum, því at vinátta hafði verit með hinum fyrrum frændum þeirra. Grettir spyrr, ef hann vildi hánnum nökkura ásjá veita. Björn sagði, at hann ætti svá sökótt um allt land, at menn myndi forðast hjargir við

hann um þat, er sekt nemr, en heldr skal ek þær gagn gjöra, ef þú lætr þá menn vera í friði, sem í minni vernd eru, hversu sem þú gjörir við aðra menn hær í byggð. Grettir játadi því. Björn mælti: at því hefi ek hugat, at í því fjalli, sem fram gengr fyrir utan Hítará, man vera vígi gott, ok þó fylgsni, ef klókliga er um búit; er þar bora í gegnum fjallit, ok sèr þar neðan af veginum, því at þjóðgatan liggir niðri undir, en sandbrekka svá brött fyrir ofan, at fáir menn munu upp komast, ef einn maðr rúskr er til varnar uppi í hœlinu. Nú lízt mér þat helzt ráð ok umtalsmál at vera þar, því at þaðan er hægt at leita til fanga ofan á Mýrar ok út til sjáfar. Grettir kvast hans forsjá hlíta muodu, ef hann vildi nökkut til leggja. Fór Grettir þá í Fagraskógafjall, ok bjóst þar um. Hann tjaldaði með gráu vaðmáli fyrir boruna á fjallinu, ok þótti sem þar sæi í gegnum neðan af götunum. Reið hann þá til fanga ofan í byggðina. Þótti Mýramönnum mikill vágestr kominn, er Grettir var. Þórðr Kolbeinsson bjó þá á Hítarnesi; hann var skáld gott. Í þenna tíma var fjandskapr mikill með þeim Birni ok Þórði, ok þótti Birni eigi verr enn hálfneytt, þó at Grettir gjörði úspekt mönnum Þórðar eðr fè. Grettir var jafnan með Birni, ok reyndu þeir margan frœkleik, ok vísar svá til í sögu Bjarnar, at þeir kallaðist jafnir at íþróttum, en þat er flestra manna ætlan, at Grettir hafi sterkastr verit á landinu, síðan þeir Ormr Stórolfsson ok Þórálfr Skolmsson lögðu af afraunir. Þeir Grettir ok Björn lögðust í einu eptir allri Hítará ofan frá vatni ok út til sjáfar. Þeir færðu stöttir þær í ána, er aldri síðan hefir þr rekit, hvárki með vatnavöxtum nè ísalögum eðr jöklagangi. Sat Grettir í Fagraskógafjalli svá einn vetr, at hán um váru engar atfarir gjörvar, en þó misstu þá margir síns fyrir hán um, ok fengu ekki at gjört, því at

hann hafði gott vígi, en átti jafnan vingott við þá, sem næstir hánnum váru.

59. Maðr hét Gísli; hann var sonr Þorsteins, sem Snorri goði lét drepa. Gísli var mikill maðr ok sterkr, ok afburðarmaðr í vápnum ok klæðum, ok gjörði um sik mikit, ok nökkut sjálfhælinn. Hann var siglingamaðr, ok kwam þat sumar út í Hvítá, er Grettir hafði einn vetr verit í sjallinu. Þórðr Kolbeinsson reið til skips. Gísli fagnaði hánnum vel, ok bauð hánnum varning sinn, sem hann vildi. Þórðr þá þat, ok tóku þeir tal með sér. Gísli mælti: er þat satt, sem mēr er sagt, at þēr verðr ráðfátt at koma í burt skógarmanni þeim, er yðr gjörir margt mein. Þórðr sagði: eigi höfum vēr til reynt, en mörgum lízt hann torsóttligr vera, ok hefir at því mörgum vorðit. Ván þykkir mēr, at yðr veiti þungt við Björn, er þēr rekit eigi þenna af yðr; er því verr, at ek man of fjarri í vetr, at ek mætti bæta af þessu ráði. Spyrja man þēr bezt þykkja við hann at eiga. Eigi þarftu at segja mēr frá Gretti, sagði Gísli; reynt hefi ek brattara, þá er ek var í herförum með Knúti konungi hinum ríka, ok fyrir vestan haf, ok þótti ek verja mitt rúm, ok kvæma ek í færi við hann, þá treysti ek mēr ok vápnum mínum. Þórðr kvað hann eigi til einskis vinna skyldu, ef hann ræði Gretti af, er ok meira fe lagt til höfuðs hánnum, enn nökkurum öðrum skógarmanni; ok váru áðr sex merkr silfrs, en í sumar lagði til Þórir ór Garði þrjár merkr, ok ætla menn, at sá muni nóg til vinna, er hlýtr. Allt verðr til sjárins unnit, sagði Gísli, ok er oss eigi sízt kaupmönnum, en nú skulu vit hljótt fara með þessu tali; kann vera, at hann sè varari um sik, sagði hann, þegar hann voit, at ek er í ráðum með þēr ok yðr. Ek ætla at vera í vetr úti á Snjófellsnesi¹

¹⁾ *Nif. B. D.*

á Ölduhrygg; eða er nökkut bæli hans á veginum? Man hann eigi við þessu sjá; skal ek eigi fjölmenni draga at hánú. Þóðri líkaði vel þessi ráðagjörð. Reið hann heim síðan, ok lét kyrrt um þetta. Hér fór, sem mælt er, at opt er í holti heyrandi nær. Þeir menn höfðu verit hjá viðrtali þeirra Gísla, sem váru vinir Bjarnar í Hitardal, ok sögðu hánú inniliga frá; en er þeir Grettir fundust, gat Björn um fyrir hánú; sagði nú reyna mundu, hversu hann stœði á móti; væri eigi úgaman, sagði Björn, þó at þú hrektir fyrir hánú, en drepir hann eigi, ef þú mátt annat. Grettir glótti við, ok gaf sér fátt um. Nær röttum um haustið fór Grettir ofan í Flysjuhverfi¹, ok sótti sér sauði; hann gat náð fjórum geldingum. Bændr urðu varir við ferð hans, ok fóru eptir hánú; þat var mjök jafnsnemma, at hann kvamst undir hlíðina, ok hinir kvámust at, ok vildu elta frá hánú sauðina, en eigi báru þeir vápn at hánú; þeir váru sex saman, ok flæktust á veginn fyrir hann. Hánú gjörði hermt² við sauðina, ok þreif tvá, ok kastaði forbrekkis, svá þeir lágu í úviti; ok er hinir sáu þat, gengu þeir at údjarfligar. Grettir tók sauðina, ok krækti saman á hornunum, ok kastaði um sína öxl sínum tveimr; gekk síðan upp í bæli sitt. Bændr hurfu aptr, ok þóttu illt hafa af fengit, ok undu þeir nú verr, enn áðr, sínum hlut. Gísli sat við skip um haustið, þar til er því var til blunns ráðit. Bar hánú margt til dvala, ok varð af því síðbúinn, ok reið litlu fyrir vetrnætr. Fór hann þá sunnan, ok gisti undir Hrauni fyrir sunnan Hítará. Um morguninn, áðr Gísli reið þaðan, talaði hann til fylgdarmanna sinna: nú skulu vèr ríða í litklæðum í dag, ok látum skógarmanninn þat sjá, at vèr erum eigi sem aðrir förumenn, er hér rekast dagliga. Þeir váru þrír saman, ok gjörðu svá; ok er þeir

¹) Flissu- (Flissu- D) hverfi, B, D. ²) saat C, D; erftu, A.

kvámu út yfir ána, þá talaði hann enn til: hær er mér sagt til skógarmannsins uppi í tindunum þessum, ok eigi er hær greiðgengt; eðr man hánnum eigi vel líka at finna oss ok sjá þing vár? Þeir kveða hann jafnan vanan þess. Þenna morgin hafði Grettir snemma upp staðit í bæli sínu. Veðr var kalt ok frjósanda, ok fallinn at snjár, ok þó lífill. Hann sá, at þrír menn riðu sunnan yfir Hítará, ok skein á skróðklæðin ok smelta skjölduna. Gretti kwam í hug hverlr vera myndi, ok þykkist munu þurfa at fá sèr eitthvert plagg af þessum; var hánnum forvitni á at finna þá, er svá mikit gambraði. Tekr nú vápn sín, ok hleypr nú ofan í skriðuna; ok er Gísli heyrði til, at grjótið sarglaði¹⁾, mælti hann svá: maðr ferr þar ofan ór hliðinni, ok heldr mikill, ok sá vill oss finna; verðum nú við röskliga, því at hær berr veiði í hendr. Fylgdarmenn hans sögðu þenna eigi mundu blaupa í hendr þeim, ef hann treysti sèr eigi, ok er vel, at sá hafi brek, er beiðist. Eptir þat blaupa þeir af baki. Grettir kwam at í því, ok tók til klæðsekks, er Gísli hafði fyrir aptan sik við söðul sinn, ok mælti: þetta man ek hafa, ek lýt opt at litlu. Gísli svarar: eigi skal þat vera, eðr veizt þú eigi, við hvern er þú átt um. Grettir svarar: eigi er mér þat svá glögggt um, man ek ok eigi at þessu mannamun gjöra, síðan ek mæli til svá lítils. Vera má, at þær þykki lítið, segir hann, en heldr vil ek láta þrjá tigu hundrada, en ofarliga man liggja újafnaðr í þær; ok sökjum at hánnum, piltar, ok sjáum, hvat hann má. Þeir gjörðu svá. Grettir lét hefjast fyrir, ok veik at steini þeim, er þar stendr við götuna, ok Grettishaf er kallað, ok varðist þaðan. Gísli eggjaði fast fylgdarmenn sína. Grettir sá nú, at hann var eigi slíkr fullhugi, sem hann læzt, því at hann stóð jafnan á baki mönnum sínum.

¹⁾ sarglaði, B, C; glamarráði, B.

Gretti leiddist nú þófit, ok sveipaði til saxinu, ok hjó annan fylgdarmann Gísla banahögg, ok hljóp nú frá steininum, ok sótti svá fast, at Gísli hrökk fyrir allt út með fjallinu. Þá fell annarr förunautr Gísla. Grettir mælti þá: þat sèr lítt á, at þú hefir víða vel fram gengit, ok illa skilst þú við þína felaga. Gísli svarar: sá er eldrinn heitastr, er á sjálfum ligg, ok er illt at fást við heljarmanninn. Skiptust þeir þá fám höggum við, áðr enn Gísli kastaði vápnunum, ok hefir á rás undan út með fjallinu. Grettir gefr hánnum tóm til at kasta því, sem hánnum líkar, ok í hvert sinn, er Gísli sèr ráðrúm til, kastaði hann einhverju klæði. Fór Grettir aldri harðara eptir, enn sund var í milli þeirra. Allt hljóp Gísli út yfir fjallit, ok svá um þveran Kaldárdal, ok svá um Áslaugarhlíð, ok fyrir ofan Kolbeinsstaði, ok svá út í Borgarhraun. Þá var Gísli í línklæðum einum, ok gjörðist nú ákaflega móðr. Grettir fór eptir, ok var jafnan í hendingu með þeim. Hann reif þá upp hrislu mikla. En Gísli létti eigi fyrr, enn hann kvam út at Haffjarðará; hón var gengin uppi, ok ill yfirferðar. Gísli ætlaði þegar út á ána. Grettir snaraði þá eptir hánnum, ok greip hann, ok kenndi þá aðsmunar. Rak Grettir hann þá niðr undir sik, ok mælti: ertu Gísli sá, er finna vildir Gretti Ásmundarson? Gísli svarar: ek hefi nú fundit hann, en eigi veit ek, hversu vit skiljum, ok haf nú þat, sem þú hefir fengit, en lát mik fara lausan. Grettir mælti: eigi man þèr skiljast þat, sem ek segi þèr, ok verð ek nú at gjöra þèr áminning; rekr síðan skyrtuna fram yfir höfuð hánnum, ok lætr ganga limann um bak hánnum ok báðar síðurnar, en Gísli fýsti jafnan at snúa sèr undan. Afhýðir Grettir hann með öllu, ok lét hann síðan lausan. Hugsaði Gísli þat, at fyrr vildi hann ekki læra af Gretti, enn hafa slíka flenging aðra; vann hann ok aldri optar til slíkrar húðstroku. En þegar Gísli

kvam fótum undir sik, hljóp hann út á hyl einn mikinn, ok svimaði¹ þar yfir ána, ok kvam um náttina á þann bæ, er í Hrossholti² heitir, ok var þá mjök þrekaðr. Þar lá hann viku, ok hljóp blástr í búkinn. Eptir þat fór hann til vistar sinnar. Grettir snèri aptr, ok tók upp þing hans, sem Gísli hafði niðr kastað, ok færði heim til sín, ok fékk Gísli ekki af þeim síðan. Mörgum þótti þetta makliga gjört við Gísla fyrir umfang sitt ok raup, er hann hafði af sèr gjört. Grettir kvað þetta um sameign þeirra:

Rennr, sá er rispar tönnum
 raunlitt, er skal bitast,
 marr, nè mæðist fyrri,
 mest, fyrir öðrum hesti,
 en fyrir mèr um Mýrar
 margnenninn dag þenna
 (fremd er hann firrðr ok sœmdum)
 fisandi rann hann Gísli.

Eptir um vórit bjóst Gísli til skips, ok bauð á því mestan varnað, at nökkurr blutr fœri suðr með fjalli, þat sem hann ætti; kvað þar sjálfan fjandann fyrir vera. Gísli reið suðr með sjá alla leið til skips, ok fundust þeir Grettir aldri síðan, ok þótti engum til hans koma upp frá því, ok er hann ór sögunni. Enn versnaði með þeim Þórði Kolbeins-syni ok Gretti; setti Þórðr nú mörg ráð til, at Gretti yrði á burt komit, eðr drepinn ella.

60. Nú er Grettir hafði verit tvá vetr í Fagraskógafjalli, ok er hinn þriðl var kominn, þá fór Grettir suðr á Mýrar, á þann bæ, er í Lækjarbug heitir, ok hafði þaðan sex geldinga at úvilja þess, er átti. Þaðan fór hann ofan til Akra, ok rak á burtu tvau naut til slátrs, ok marga sauði, ok fór upp fyrir sunnan Hítará. En er bœndr urðu varir

¹⁾ sýmt, B; svam, D. ²⁾ Hrossholt, B, D.

við ferð hans, gjörðu þeir orð Þórði á Hítarnesi, ok báðu hann fyrir bindast, at ráða Gretti af, en hann fór undan; en við bæn manna, fékk hann til Arnór son sinn, er síðan var kallaðr jarlaskáld, at fara með þeim, ok bað þá eigi láta Gretti undan reka. Váru þá menn sendir um alla byggðina. Bjarni hét maðr, er bjó á Jörfa í Flysjuhverfi; hann safnaði mönnum fyrir utan Hítará. Ætluðu þeir svá til, at sínu megin skyldi koma hvárir flokkarnir. Grettir var við þriðja mann; hét sá Eyjúlfr¹, er fór með hánum, son hónða ór Fagraskógum, ok var rúskr maðr, ok hinn þriðl maðr með þeim. Þeir kvámu fyrst Þórarinn frá Ökrum ok Þorfinnr ór Lækjarbug, ok váru nær tuttugu menn saman. Grettir vildi þá leita út yfir ána. Þá kvámu þeir Þorgrímr ok Arnórr ok Bjarni utan at ánni. Nes mjótt gekk fram í ána þeim megin, sem Grettir var. Hann rak fèit í framanvert nesit, þá er hann sá mannaförina, því at hann vildi aldri laust láta, þat sem hann fékk höndum á komit. Mýramenn ræðu þegar til atgöngu, ok létu gildliga. Grettir bað fylgdarmenn sína at geyma, at þeir gengi eigi at baki hánum. Eigi máttu í senn allmargir at hánum ganga. Varð þar hörð viðreign með þeim. Grettir hjó á tvær hendr með saxinu. ok varð þeim eigi auðvelt at sækja at hánum. Fèllu þá sumir Mýramenn, en sumir urðu sárir. Þeir urðu seinir utan yfir ána, því at vaðit var eigi allnær. Eigi höfðu þeir lengi barizt, áðr enn þeir hurfu frá. Þórarinn frá Ökrum var gamall maðr mjök, svá at hann var eigi í atsókninni. En er úti var bardaginn, þá kwam at Þrándr, son Þórarins, ok Þorgils Ingjaldsson, bróðurson Þórðar², ok Finnbogi, son Þorgeirs Þórballssonar ór Hítardal, ok Steinúlfr Þorleifsson ór Hraundal. Þeir eggjuðu menn mjök til atsóknar. Gjörðu þeir enn harða hrið. Grettir sá nú,

¹) *saal.* B, C, D; Eyvindr, A; *see nedenfor.* ²) Þórarins, B, C, D.

at annathvært varð at gjöra: flýja, eðr hlífast eigi við. Gengr hann nú svá hart fram, at engir hældust við, því at svá var mannmargt, at hánúm þótti úsýnt til undan-
kvámunnar, utan at¹ vinna sem mest, áðr enn hann félli; vildi hann ok hafa þann einhvern fyrir sik, er hánúm þótti manntak í vera. Hljóp hann þá at Steinúlfi ór Hraundal, ok hjó til hans í höfuðit, ok klauf hann í herðar niðr, ok þegar annat högg hjó hann til Þorgils Ingjaldssonar, ok kvam á hann miðjan, ok tók nálaga í sundr. Þá vildi Pránder fram hlaupa, ok hefna frænda síns. Grettir hjó til hans á lærit hægra, svá at ór tók allan vöðvann, ok varð hann þegar úvígr. Eptir þat veitti hann Finnboga mikinn áverka. Þá kallaði Þórarinn, ok bað þá frá hverfa; því at því verra munu þær af hánúm fá, sem þær berlst lengr, en hann kýss menn ór liði yðru. Þeir gjörðu svá, ok snæru frá. Þar váru fallnir tíu menn, en fimm sárir til úlflis ok örkumla, en flestir höfðu nökkurar skeinur, þeir sem á fundinum höfðu verit. Grettir var ákafliga móðr, en lítt sárr. Leitudu Mýramenn við þetta undan, ok höfðu fengit mikinn mann-
skada, því at þar féllu margir röskvir menn. En þeim utan yfir ána fórst seint, ok kvámu eigi fyrr, enn slitid var fundinum; ok er þeir sáu úfarir sinna manna, þá vildi Arnórr eigi hafa sik í hættu, ok fékk hann mikit ámæli af feðr sínum ok mörgum öðrum; ætla menn, at hann hafi engi garpr verit. Þar heitir nú Grettisoddi, er þeir börðust.

61. En þeir Grettir tóku sér hross, ok ridu upp undir fjall, því at þeir váru allir sárir; ok er þeir kvámu í Fagraskóga, var Eyjúlfr² þar eptir. Þar var bóndadóttir úti, ok spurði at úðendum. Grettir sagði af hit ljósasta, ok kvað vísu:

¹) *saul*. B, C; *udel*. D; *sem*, A.

²) *sual*. A, B, C, D.

Hæg munat, hirdisága
 hornflæðar, nú græða
 stór, þó at steyptust fleiri,
 Steinúlfs höfudskeina.
 Því er um Þorgils æfi
 þung ván, at bein sprungu;
 lýðr segir átta aðra
 auðhrjóta þar dauða.

Eptir þat fór Grettir í bæli sitt, ok sat þar um vetrinn. En er þeir Björn fundust, sagði hann Gretti, at hánú þótti nú mikít at orðit; ok man þér eigi hér vært vera á lengdar; hefir þú nú drepit bæði frændr mína ok vini, en eigi man ek kasta niðr því, sem ek hefi játað þér, meðan þú ert hér. Grettir kvazt hendr sínar ok líf eiga at verja, en illa er þat, er þér mislíkar. Björn kvað nú svá búit vera verða. Litlu síðar kvámu þeir menn til Bjarnar, sem misst höfðu frændr sína fyrir Gretti, ok báðu, at hann lèti eigi úeirðarmann þenna vera þar lengr til skap-raunar við þá. Björn sagði, at svá skyldi vera, þegar at vetri lètti af. Þrándr var grœddr, sonr Þórarins á Ökrum; hann var gíldr maðr fyrir sèr; hann átti Steinunni, dóttur Hrúts á Kambnesi. Þorleifr í Hraunsdal, faðir Steinúlfs, var mikill maðr fyrir sèr; frá hánú eru komnir Hraundœlir. Eigi er nú getið um sameign þeirra Grettis ok Mýramanna fleira, meðan er hann var þar í fjallinu; hèlt Björn ok vináttu við hann, en þó fækkuðust heldr vinir Bjarnar fyrir þetta, er hann lèt Gretti þar vera, því at menn undu illa við, at hafa frændr sína bótalausar. Um þing leitaði Grettir burt af Mýrum; fór hann þá enn til Borgarfjarðar, ok fann Grím Þórhallsson, ok leitaði hann þá ráðs, hversu hann skyldi þá breyta. Grímr kvezt eigi hafa efni til þess at halda hann, ok því fór Grettir til fundar við Hallmund vin

sinn, ok dvaldist þar um sumarit, þar til er á leið. Um¹ haustið fór Grettir í Geitland, ok beið þar til þess, er hjart veðr kvam; þá gekk hann upp á Geitlandsjökul, ok stefndi á landsuðr eptir jöklinum, ok hafði með sér ketil ok eldsvirki. Þat ætla menn, at hann hafi farit at tilvísan Hallmundar, því at hánum hefir víða kunnigt verit. Grettir fór þar til, er hann fann dal í jöklinum, langan ok heldr mjófan, ok lukt at jöklum öllum megin, svá at þeir skúttu fram yfir dalinn. Hann kvamst ofan í einhverjum stað; hann sá þá fagrar hlíðir grasi vaxnar ok smákjörr. Þar váru hverar, ok þótti hánú, sem jarðeldar myndi valda, er eigi luktust saman jöklarnir yfir dalnum. Á lítill féll eptir dalnum, ok sléttar eyrar báðum megin. Lítil var þar sólargangr, en þat þótti hánúm útal, hve margr sauðr þar var í dalnum. Þat fé var miklu betra ok feitara, enn hann hefði þvílíkt sèt. Grettir bjóst nú þar um, ok gjörði sér skála af þeim viði, sem hann fékk þar til. Tók hann sér nú sauði til matar; var þar betri einn sauðr til niðrlags, enn tveir annarsstaðar. Ein ær mókollótt var þar með dilki, sú er hánú þótti mest afbragð í vera fyrir vaxtar sakir; var hánú forvitni á at taka dilkinn, ok svá gjörði hann, ok skar síðan dilkinn. Hálf vætt mörs var í dilkinum, en hann var þó öllu betri; en er mókolla missti dilks síns, fór hún upp á skála Grettis hverja nátt, ok jarmaði, svá at hann mátti enga nátt sofa. Þess iðradist hann mest, er hann hafði dilkinn skorit, fyrir únáðum hennar. Hvert kveld, er hálförökkvat var, beyrði hann hóat uppi í dalnum, ok þá hljóp fèit allt til hins sama bóls hvert kveld. Svá hefir Grettir sagt, at fyrir dalnum hafi ráðit blendingr, þuss einn, sá er Þórir hét, ok í hans trausti hafði Grettir þar verit; við hann kenndi Grettir dalinn, ok kallaði Þórisdal.

¹⁾ Her begynder ny Linte i B, C, D.

Dætr kvað hann Þóri eiga, ok hendi Grettir gaman at þeim, enda tóku þær því vel, því at þar var eigi margkvæmt. En þá er fastað var, gjörði Grettir þá minning, at þá skyldi eta mör ok lifrar um langaföstu. Ekki bar þar til tíðenda um vetrinn. Þá þótti Gretti þar svá daufligt, at hann mátti þar eigi lengr vera. Fór hann þá í burt ór dalnum, ok gekk suðr þvers af jöklinum, ok kwam þá at norðan at miðjum Skjaldbreið. Reisti hann upp hellu, ok klappaði á rauf, ok sagði svá, ef maðr legði auga sitt við raufina á hellunni, at þá mætti sjá í gil þat, sem fellr ór Þórisdal. Síðan fór hann suðr um land, ok svá til Austfjarða; var hann í þessarri ferð um sumarit ok vetrinn, ok fann alla hina meiri menn, ok bægði hánnum svá við, at hvergi fékk hann vist nè veru. Svá fór hann aptr hit nyrðra, ok dvaldist í ýmsum stöðum.

62. Litlu síðar, enn Grettir fór af Arnarvatnsheiði, kwam sá maðr á heiðina, er Grímr hét; hann var sonr ekkjunnar á Kroppi. Hann hafði drepit son Eiðs Skeggjasonar ór Ási¹, ok varð fyrir þat sekr gjörr. Hann settist nú þar, sem Grettir hafði áðr verit, ok veiddi vel ór vatninu. Hallmundi læk öfund á, er Grímr var kominn í stað Grettis, ok hugsaði, at hánnum skyldi engi árferð í vera, þótt hann veiddi margt. Svá bar til einn dag, at Grímr veiddi hundrað fiska, ok bar heim til skála, ok bjó um úti, en um morguninn eptir, er hann kwam til, var í burtu hverr fiskr. Þetta þótti hánnum undarligt, ok fór til vatnsins, ok veiddi nú tvau hundruð fiska, færði heim ok bjó um, ok fór allt á sömu leið, at allir váru í burt at morgni. Nú þótti hánnum eigi at² einum brunni bera. Hinn þriðja dag veiddi hann þrjú hundruð fiska, bar heim, ok vakti yfir í skála sínum. Grímr sá út í hurðarboruna, ef nökkurr kvæmi til skálans

¹) Árnesi, D. ²) or. B, C, D.

Leið nú svá nökkut fram á náttina; ok er af var þriðjungur af nátt, þá heyrði hann gengit úti hjá, og stigit heldr hart; ok er Grímr varð þessa varr, tók hann öxi, er hann átti; þat var allhvasst vápn. Hann vildi vita, hvat þessi hafðist at. Kvámumaðrinn hafði mikinn meis á baki, ok setti niðr, ok litaðist um, ok sá engan mann úti. Hann baukar til fiskanna, ok þykkir nú gott hönd á at hafa; rótar ofan í meisinn öllum fiskunum. Þá er fullr meissinn. Fiskrinn var svá stórr, at Grímr ætlaði, at engi hestr myndi bera meira. Hann tekr nú, ok ræzt undir byrðina, ok í því, er hann vildi upp standa, hljóp Grímr út, ok hjó tveim höndum á hálsinn, svá at öxin sökk at hamri. Hinn brá við hart, ok hafði á rás með meisinn suðr á fjall. Grímr snéri eptir hánun, ok vildi vita, hvárt hánun hefði tekit. Þeir fóru allt suðr undir Balljökull; þar gekk þessi maðr inn í helli. Eldr var bjartr í hellinum; þar sat kona við, stór vexti, ok þó skaplig. Þat heyrði Grímr, at hón heilsaði föður sínum, ok nefndi Hallmund. Hann kastaði niðr hart byrðinni, ok andvarpaði hátt. Hón spurði, því hann væri blóðugr. Hann svararði, ok kvað þetta:

Þat er mér sýnt,
at sínu má
engi maðr
aflí treysta;
því at svá bregzt
á banadægri
hölda hugr,
sem heill bilar.

Hón spurði þá inniliga at viðskiptum þeirra; en hann sagði allt sem farit hafði. Skaltu nú heyra til, sagði hann, en ek man segja fra athöfnum mínum, ok man ek kveða þar

um kvæði, en þú skalt rista eptir á kefli. Hón gjörði svá.
Þá kvað hann Hallmundarkviðu, ok er þetta þar í:

Þóttu ek gildir,
er ek Gretti strauk
nógu fast
niðr af taumum;
sá ek hitt,
at horfa gjörði
sýna stund
sér í gaupnir.

Þat var næst,
er Þórir kvam
Arnarvatns
upp á heiði,
ok vit tveir.
við tigum átta
oddaleik
eiga knáttum.

Sýndust gild
Grettis handa
skýlihögg
á skjöldum þeirra;
þó frá ek mín
miklu stærri
eggja spor
ýtum sýnast.

Ek lét hendir
ok höfuð fjúka

brögnum af,
er at baki gengu;
svá at kappar
Kelduhverfis
átján þar
eptir lágu.

Hefir ek þursa
ok þeirra kyn
hart leikit
ok hamarsbúa;
en meinvætti
marga barða,
ok blendingum
at bana orðit.

Svá álfa kind
ok úvættum
nær hefi ek öllum
úþarfr verit. . . .¹

Margra athafna sinna gat Hallmundr í kviðunni, því at hann hafði farit um allt landit. Þá mælti dóttir hans: eigi hefir sjá maðr sleppifengr verit, ok var þat eigi úlíkligt, því at þú settir illa á stofn við hann; eðr hvern man nú hefna þín? Hallmundr svarar: eigi er víst, at þess verði auðit; vita þykkjumst ek, at Grettir myndi hefna, ef hann mætti sèr svá við koma, en eigi man hægt at ganga í móti gæfu þessa manns, því at hánun man mikit lagit verða. Eptir þat dró svá mikit mætti Hallmundar, sem fram leið kvæðinu; var þat mjök jafnskjótt, at kviðunni var lokit, ok Hallmundr dó. Hón bar sik þá lítt, ok grèt allsárt. Þá gekk Grímr

¹) *do te síðste Vers udel, B, D.*

fram, ok bað hana hreysta sik; ok verðr hverr þá at fara, er hann er feigr. Varð þetta mjök af tilstofningu hans, máttu ek varla sjá, at hann rænti mik. Hón kvað hann mikit hafa at mæla um þat, ok gefst illa újafnaðr. Gladdist hón þá heldr í viðræðunni. Þar dvaldist Grímr margar nætr í hellinum, ok nam kviðuna, ok fór þá lagliga með þeim. Grímt var á Arnarvatnsheiði um vetrinn eptir dauða Hallmundar. Eptir þat kwam Þorkell Eyjúlfs-son til móts við hann á heiðina, ok börðust þeir. Lauk svá þeirra viðskipti, at Grímr átti vald á lífi Þorkels, ok vildi eigi drepa hann, en Þorkell tók hann til sín, ok kwam hánú-
 utan, og gaf hánú mikit góðs, ok þótti þar hvártveggja vel gjöra við annan. Grímr varð síðan farmaðr, ok er mikil saga frá hánú sögð.

63. Nú er þar til at taka, at Grettir er kominn austan ór fjörðum, ok fór nú huldu höfði ok duldist, því at hann vildi eigi finna Þóri, ok lá úti um sumarit á Möðrudalsheiði, ok í ýmsum stöðum; hann var ok stundum á Reykjaheiði. Þat frètti Þórir, at Grettir var á Reykjaheiði, ok safnaði mönnum, ok reið á heiðina, ok ætlaði nú, at hann skyldi eigi undan taka. Grettir varð nálíga eigi fyrr varr við, enn þeir kvámu at hánú; hann var þá við sel, er þar stóð skammt frá veginum; þá var hann við annan mann. Ok er þeir sáu flokkana, ok varð skjótt til ráða at taka, þá bað Grettir, at þeir skyldi fella hestana, ok draga inn í selit, ok svá gjörðu þeir. Þórir reið um fram norðr eptir heiðinni, ok misstu vinar í stað, ok fundu ekki, ok hurfu nú aptr; ok er flokkurinn var vestr um riðinn, þá mælti Grettir: eigi man þeim ferðin þykkja góð, ef vær finnumst eigi; nú skaltu geyma hesta okkra, en ek skal fara móts við þá; væri þeim þat bjáleikr¹, ef þeir kenndi

¹) aleikr, B, C.

mik eigi. Förunautr hans latti þessa, en þó fór hann, ok tók sèr annan búning, ok hafði síðan hött niðr fyrir andlitit, ok hafði staf í hendi; gekk síðan á veginn fyrir þá. Þeir heilsuðu hánun, ok spurðu, hvárt hann hefði nökkura menn sèt riða um heiðina. Sèt man ek hafa þá, sem þèr leitið at; skorti yðr nú allitíð at finna þá, því at þeir váru hèr fyrir sunnan mýrarnar, þær sem eru til vinstri handar. En er þeir heyrðu þetta, þeystu þeir út á mýrarnar. Þar váru svá mikil fen, at þeir kvámust hvergi fram, ok urðu at draga ór hestana, ok hróktust þar í lengi dags; báðu þeir illa fyrir hánun, þessum förumanni, er þá hafði svá dárát. Grettir snèri skjótt aptr til móts við fèlaga sinn; ok er þeir fundust, kvað Grettir vísu:

Ríðk-at ek rækimeiddum
randar hótis á móti
(sköpuð er þessum þegni
þraut), fer ek einn á brautu.
Vilk-at ek Viðris bálka
vinnendr snara finna
(ek man þèr eigi þykkja
ærr), leita ek mèr færa.

Hnekki ek frá, þar er flokkar
fara Þóris mjök stórir;
er-a mèr í þys þeira
þerfiligt at hverfa.
Fordumst frægra virða
fund, á ek veg til lundar
(verð ek Heimdala at hirða
hjör), björgum svá sjörvi.

Þeir riðu nú sem hvatast vestr af, ok fram um bæinn í Garði, áðr enn Þórir kvað af fjallinu með flokk sinn. Ok

er þeir kvámu nær böenum, kvam maðr í för þeirra; sá kenndi þá eigi. Þeir sá, at kona stóð úti, ung ok skrautbúin. Grettir spurði, hver kona sú myndi vera. Sá hinn nýkomni maðr sagði, at þat væri dóttir Þóris. Þá kvað Grettir visu:

Svinn, mant segja kunna
sól Gullbúa stóla,
(opt þó at eigi skipti
orð mín) föður þínum,
hvar ek rið um bæ breiðan,
Barðjóðs ok nær garði,
(láðskreytis er lítið
lið) með dreng hinn þriðja.

Af þessu þóttist sjá vita hinn nýkomni maðr, hverir vera myndi, ok reið til byggðar, ok sagði, at Grettir væri um riðinn. En er Þórir kvam heim, þótti mörgum Grettir hafa vafit beðinn at höfði þeim¹. Setti Þórir þá gíslingar fyrir Gretti, hvar sem hann kvæmi. Tók Grettir þat til ráðs, at hann sendi fylgdarmann sinn vestr á sveitir með hestana; en hann fór upp til fjalla, ok var í dularkufli, ok fór svá norðr þar öndverðan vetr, svá at hann kenndist eigi. Öllum þótti Þórir nú hafa fengit af slíkt eða verra, enn fyrr, í þeirra viðskiptum.

64. Steinn hét prestur, er bjó at Eyjardalsá í Bárðardal; hann var búþegn góðr ok ríkr at fè. Kjartann hét son hans, röskr maðr ok vel á legg kominn. Þorsteinn hvíti hét maðr, er bjó at Sauðhögum² suðr frá Eyjardalsá. Steinvör hét kona hans, ung ok glaðlát. Þau áttu börn, ok váru þau ung í þenna tíma. Þar þótti mönnum reimt mjök sakir tröllagangs. Þat bar til tveim vetrum fyrr, enn Grettir kvam norðr í sveitir, at Steinvör húsfreyja at Sauð-

¹) ístedetfor de tre sidste Ord har B: fyrir þeim. C er overeensstemmende med A. ²) Sandhaugum, B, D.

högum¹ fór til jólatíða til Eyjardalsár eptir vana, en bóndi var heima. Lögðust menn niðr til svefns um kveldit; ok um náttina heyrðu menn brak mikit í skálann, ok til sængr bónda. Engi þorði upp at standa at forvitnast um, því at þar var fámennst mjök. Húsfreyja kvam heim um morguninn, ok var bóndi horfinn, ok vissi engi, hvat af hánum var orðit. Liðu svá hinu næstu misseri. En annan vetr eptir vildi húsfreyja fara til tíða; bað hún húskarl sinn heima vera. Hann var tregr til, en bað hana ráða. Fór þar allt á sömu leið, sem fyrr, at húskarl var horfinn. Þetta þótti mönnum undarligt. Sáu menn þá blóðdrefjar nökkurar í útidyrum. Þóttust menn þat vita, at úvættir myndi hafa tekit þá báða. Þetta fréttist víða um sveitir. Grettir hafði spurn af þessu, ok með því at hánum var mjök lagit at koma af reimleikum eðr aþrögungum, þá gjörði hann ferð sína til Bárðardals, ok kvam atfangadag jóla til Sauðhaga. Hann dvaldist þar, ok nefndist Gestr. Húsfreyja sá, at hann var furðumikill vexti, en heimasólk var furðu hrætt við hann. Hann beiddist þar gistingar. Húsfreyja kvað hánum mat til reiðu, en ábyrgst þik sjálf. Hann kvað svá vera skyldu. Man ek vera heima, segir hann, en þú far til tíða, ef þú vilt. Hón svarar: mér þykkir þú hraustr, ef þú þorir heima at vera. Eigi læt ek mér at einu getið, sagði hann. Illt þykkir mér heima at vera, segir hún, en eigi komumst ek yfir ána. Ek skal fylgja þér yfir, segir Gestr. Síðan bjóst hún til tíða, ok dóttir hennar með henni, lítil vexti. Hlaka mikil var úti, ok áin í leysingum; var á henni jakaför. Þá mælti húsfreyja: úfært er yfir ána bæði mönnum ok bestum. Vöð munu á vera, kvað Gestr; ok verit eigi hræddar. Ber þú fyrst meyna, kvað húsfreyja, hún er létтари. Eigi nenni ek at gjöra tvær ferðir at þessu,

¹) Sauðhaugum, B, D.

segir Gestr, ok man ek bera þik á handlegg mēr. Hón signdi sik, ok mælti: þetta er úfœra; eðr hvat gjörir þú þá af meyjunni? Sjá man ek ráð til þess, segir hann, ok greip þær upp báðar, ok setti hina yngri í knè móður sinnar, ok bar þær svá á vinstra armlegg sèr, en hafði lausa hina hægri hönd, ok óð svá út á vaðit. Eigi þorðu þær at æpa, svá váru þær hræddar. En áin skall þegar uppi á brjósti hánú; þá rak at hánú jaka mikinn, en hann skaut við hendi þeirri, er laus var, ok hratt frá sèr. Gjörði þá svá djúpt, at strauminn braut á öxlinni. Óð hann sterkliga þar til, er hann kvam at bakkanum öðrum megin, ok fleygir þeim á land. Síðan snèri hann aptr, ok var þá hálförökkvat, er hann kvam heim til Saudhaga, ok kallaði til matar; ok er hann var mettr, bað hann heimafolk fara innar í stofu. Hann tók þá borð ok lausa viðú, ok rak um þvera stofuna, ok gjörði bálk mikinn, svá at engi heimamaðr kvamst fram yfir. Engi þorði í móti hánú at mæla, ok í engum skyldi kretta¹. Gengit var í hliðvegginn stofunnar inn við gaslhlaðit, ok þar þverpallr hjá. Þar lagðist Gestr niðr, ok fór eigi af klæðunum. Ljós brann í stofunni gegnt dyrum. Liggr Gestr svá fram á náttina. Húsfreyja kvam til Eyjardalsár til tíða, ok undruðu menn um ferðir hennar yfir ána. Hón sagðist eigi vita, hvárt hana hefði yfir flutt maðr eðr tröll. Prestur kvað mann víst vera mundu, þó at fárra maki sè, ok látum bljótt yfir, sagði hann; má vera, at hann sè ætlaðr til at vinna bót á vandræðum þínum. Var húsfreyja þar um náttina.

65. Nú er frá Gretti² þat at segja, at þá er dró at miðri nátt, heyrði hann út dynur miklar. Því næst kvam inn í stofuna tröllkona mikil; hón hafði í annarri hendi trog, en annarri skálm, heldr mikla. Hón litast um, er

¹) *saal. ogsaa B; krotta, C; kitta, D.* ²) *Gesti, B, D.*

hón kvam inn, ok sá, hvar Gestr lá, ok hljóp at hánnum, en hann upp í móti, ok ræðust á grimmliga, ok sóttust lengi í stofunni. Hón var sterkari, en hann fór undan kænliga, en allt þat, sem fyrir þeim varð, brutu þau, jafnvel þverpilit undan stofunni. Hón dró hann fram yfir dyrnar, ok svá í andyrit; þar tók hann fast í móti. Hón vildi draga hann út ór bænum, en þat varð eigi fyrr enn þau leystu frá allan útidyraumbúninginn, ok báru hann út á herðum sér. Þæfði hón þá ofan til árinna, ok allt fram at gljúfrum. Þá var Gestr ákaflega móðr, en þó varð annathvært at gjöra, at herða sik, ella myndi hón steypa hánnum í gljúfrin. Alla náttina sóttust þau. Eigi þóttist hann hafa fengizt við þvilíkan úfagnað fyrir alls sakir. Hón hafði haldit hánnum svá fast at sér, at hann mátti hvárigri hendi taka til nökkurs, utan hann hœlt um hana midja, kettuna¹; ok er þau kvámu á árgljúfrit, bregðr hann flagðkonunni til sveiflu. Í því varð hánnum laus hin hægri höndin. Hann þreif þá skjótt til saxins, er hann var gyrðr með, ok bregðr því; höggðr þá á öxl tröllinu, svá at af tók höndina hægri, ok svá varð hann lauss, en hón steyptist í gljúfrin, ok svá í fossinn. Gestr var þá hæði stíðr ok móðr, ok lá þar lengi á hamrinum. Gekk hann þá heim, er lýsa tók, ok lagðist í rekkju. Hann var allr þrútin ok blár; ok er húsfreyja kvam frá tíðum, þótti henni heldr raskat um hýbýli sín. Gekk hón þá til Gest, ok spurði hvat til hefði borit, er allt var brotið ok bælt. Hann sagði allt sem farit hafði. Henni þótti mikils um vert, ok spurði, hverr hann var. Hann sagði þá til hit sanna, ok bað sækja prest, ok kvæzt vildu finna hann. Var ok svá gjört. En er Steinn prestur kvam til Sandhauga², varð hann brátt þess viss, at þar var kominn Grettir Ásmundarson, er Gestr

1) kvinnuna, B; udel. C, D. 2) saal. A.

nefndist. Prestur spurði, hvat hann ætlaði af þeim mönnum myndi vera orðit, er þar höfðu horfit. Grettir kvazt ætla, at í gljúfrin myndi þeir hafa horfit. Prestur kvazt eigi kunna at leggja trúnað á sagnir hans, ef engi merki mætti til sjá. Grettir segir, at síðar vissi þeir þat gjörr. Fór prestur heim. Grettir lá í rekkju margar nætr. Húsfreyja gjörði við hann harðla vel, ok liðu svá af jólin. Þetta er sögn Grettis, at tröllkonan steiptist í gljúfrin við er hón fékk sárit, en Bárðardalsmenn segja, at hana dagaði uppi, þá er þau glímdu, ok spryngi, þá er hann hjó af henni höndina, ok standi þar enn í konulking á bjarginu. Þeir dalbúarnir leyndu þar Gretti. Um vetrinn eptir jól var þat einn dag, at Grettir fór til Eyjardalsár, ok er þeir Grettir fundust ok prestur, mælti Grettir: sè ek þat, prestur, segir hann, at þú leggr lítinn trúnað á sagnir mínar; nú vil ek at þú farir með mèr til árinna, ok sjáir, hver líkendi þèr þykkir á vera. Prestur gjörði svá. En er þeir kvámu til fossins, sáu þeir skúta upp undir bergit; þat var meitilberg svá mikit, at hvergi mátti upp komast, ok nær fimm tigr faðma ofan at vatninu. Þeir höfðu festi með sèr. Þá mælti prestur: langt um úfært sýnist mèr þèr niðr at fara. Grettir svarar, fært er víst, en þeim man bezt þar, sem ágætismenn eru; man ek forvitnast, hvat í fossinum er, en þú skalt geyma festar. Prestur bað hann ráða, ok keyrði niðr hæl á berginu, ok bar at grjót ok sat þar hjá¹.

66. Nú er frá Gretti at segja, at hann lét stein í festaraugat, ok lét svá siga ofan at vatninu. Hvern veg ættar þú nú, segir prestur, at fara? Eigi vil ek vera bundinn, segir Grettir, þá er ek kem í fossinn; svá boðar mèr hugr um. Eptir þat bjó hann sik til ferðar, ok var fáklæddr, ok gyrdi sik með saxinu, en hafði eigi fleiri vápn. Síðan hljóp

¹) de Áre nidade Ord tilf, efter B, D.

hann af bjarginu ok niðr í fossinn. Sá prestir í iljar hánunum, ok vissi síðan aldri, hvar af hánunum varð. Grettir kafaði undir fossinn, ok var þat torvelt, því at iða var mikil, ok varð hann allt til grunns at kafa, áðr enn hann kvæmist upp undir fossinn. Þar var forberg nökkut, ok kvamst hann inn þar upp á. Þar var hellir mikill undir fossinum, ok fæll áin fram af berginu. Gekk hann þá inn í hellinn, ok var þar eldr mikill á bröndum. Grettir sá, at þar sat jötunn ógurliga mikill; hann var hræðiligr at sjá. En er Grettir kvam at hánunum, hljóp jötunninn upp, ok greip flein einn, ok hjó til þess, er kominn var; því at bæði mátti huggva ok leggja með hánunum. Trèskapt var í; þat kölluðu menn þá heptisax, er þann veg var gjört. Grettir hjó á móti með saxinu, ok kvam á skaptit, svá at í sundr tók. Jötunninn vildi þá seilast á bak sèr aptr til sverðs, er þar hëkk í hellinum. Í því hjó Grettir framan á brjóstið, svá at nálaga tók af alla bringspelina ok kviðinn, svá at iðrin steiptust ór hánunum ofan í ána, ok keyrði þau ofan eptir ánni, ok er prestir sat við festina, sá hann, at slyðrur nökkurar rak ofan eptir strengnum, blóðugar allar. Hann varð þá lauss á velli, ok þóttist nú vita, at Grettir myndi dauðr vera; hljóp hann þá frá festarhaldinu ok fór heim; var þá komit at kveldi, ok sagði vísliga, at Grettir væri dauðr, ok sagði, at mikill skaði væri eptir því líkan mann. Nú er frá Gretti at segja; hann lèt skammt huggva í milli, þar til er jötunninn dó. Gekk Grettir þá innar eptir hellinum; hann kveikti ljós, ok kannaði hellinn. Eigi er frá því sagt, hversu mikit fé hann fëkk í hellinum, en þat ætla menn, at verit hafi nökkut. Dvaldist hánunum þar fram á náttina. Hann fann þar tveggja manna bein, ok bar þau í belg einn. Leitaði hann þá ór hellinum, ok lagðist til festarinnar, ok hristi hana, ok ætlaði, at prestir myndi þar

vera. En er hann vissi, at prestur var heim farinn, varð hann þá at handstyrkja upp festina, ok kvamst hann svá upp á bjargit. Fór hann þá heim til Eyjardalsár, ok kvam í forkyrkju belginum þeim, sem beinin váru í, ok með rúnakefli því, er vísur þessar váru forkunnliga vel á ristnar:

Gekk ek í gljúfrit dökkva
gein veltiflug steina
við hjörgæði hríðar
hlunns úrsvölum munni.
Fast lá fram á brjósti
flugstraumur í sal naumu;
heldr kvam á herðar skáldi
hörð fján Braga kvánar.

Ok enn þessi:

Ljótr kvam mér í móti
mellu, vinr ór helli;
hann fékkst heldr at sönnu
harðfengr við mik lengi;
harðeggjat lét ek höggvit
heptisax af skepti;
gangs klauf brjóst ok bringu
bjartr gunnlogi svarta.

Þar sagði svá, at Grettir hafi bein þessi ór hellinum haft. En er prestur kvam til kyrkju um morguninn, fann hann keflit, ok þat sem fylgdi, ok las rúnirnar; en Grettir hafði farit heim til Sandhauga.

67. En¹ þá er prestur fann Gretti, spurði hann inniliga eptir atburðum, en hann sagði alla sögu um ferð sína, ok kvað prest útrúliga hafa haldit festinni. Prestur lét þat á sannast. Þóttust menn þat vita, at þessar úvættir myndi valdit hafa mannaðvörðum þar í dalnum; varð ok aldri mein

¹) B, D *hæf her ikke nu Linie.*

at aptrgöngum eðr reimleikum þar í dalnum síðan; þótti Grettir þar gjört hafa mikla landhreinsan. Prestur jarðaði bein þessi í kirkjugarði. Grettir var síðan á Sandhaugum um vetrið, ok duldist þó fyrir alþýðu manna. En er Þórir í Garði hafði af pata nökkurn, at Grettir væri í Bárðardal, þá setti hann menn til höfuðs hánnum. Ræðu menn hánnum þá, at hann skyldi á brott leita, ok fór hann þá vestr. En er hann kvam á Möðruvöllu til Guðmundar hins ríka, beiddi hann þá Guðmund ásjá, en hann kvað sèr eigi hent við hánnum at taka, en sá einn er þèr, sagði Guðmundr, at koma þèr þar niðr, sem þú mættir vera úhræddr um líf þitt. Grettir kvazt eigi vita, hvar þat væri. Guðmundr mælti: ey sú liggr á Skagafirði, er heitir Drangey; hón er svá gott vígi, at hvergi má komast upp á hana, nema stigar sè við látnir¹. Gætir þú þangat komizt, þá veit ek þat fyrir víst eigi þess manns ván, er þik sœki þangat, komist þú upp á hana, eðr þú sèr með vápnum sóttur eðr vælum, ef þú gætir vel stigans. Reynt skal þetta vera, segir Grettir, en svá gjörumst ek myrkfœlinn, at þat má ek eigi til lífs vinna mèr, at vera einn saman. Guðmundr mælti: vera má at svá sè, en trú þú engum svá vel, at þú trúir eigi bezt sjálfum þèr; en vandsènir eru margir. Grettir þakkaði hánnum heilræði. Fór hann þá burt af Möðruvöllum. Hann lætti eigi fyrr, enn hann kvam til Bjargs. Móðir hans fagnaði hánnum vel, ok þau Illugi bæði. Dvaldist hann þar nökkurar nætr. Þar frétti hann víg Þorsteins Kuggasonar; hafði þat orðit um haustið áðr enn Grettir fór til Bárðardals. Þótti hánnum nú mjök taka um at höggvast. Reið Grettir þá suðr Holtavörðuheiði, ok ætlaði at hefna Hallmundar, ef hann hitti Grím. En er hann kvam í Norðrárdal, frétti hann, at Grímr var fyrir tveim vetrum eðr þrimr á burt þaðan, sem

¹) harðir, B, D.

fyrir var sagt. En því hafði Grettir svá seint spurt þessi tíðendi, at hann fór huldu höfði þá tvá vetr, ok þann hinn þriðja, sem hann var í Þórisdal, ok hafði enga menn fundit, þá er hánúm vildi nökkurar fréttir segja. Snèri hann þá til Breiðafjarðardala, ok hafðist við í Austrárdal¹, ok sætti þeim mönnum, er fóru yfir Brattabrekku. Lèt hann þá enn sópa greipr um eignir smábœnda; þat var um hásumarsskeið. Þetta sumar, er á leið, fœddi Steinvör at Sandhaugum sveinbarn, ok hèt Skeggi; hann var fyrst kenndr Kjartani, syni Steins² prests at Eyjardalsá. Skeggi var úlíkr öðrum systkinum sínum fyrir sakir afis ok vaxtar; en þá er hann var fimmtán vetra, var hann sterkastr norðr þar, ok var þá eignaðr Gretti. Hugðu menn, at hann myndi afbragðsmaðr verða, en hann andaðist seytján vetra, ok er engi saga af hánúm.

68. Eptir víg Þorsteins Kuggasonar lagði Snorri goði fæð mikla á þá Þórodd, son sinn, ok Sám, son Barkar hins digra; en þat er eigi greint, hvat þeir höfðu helzt til saka, utan þat, at þeir hafa eigi viljat gjöra eitthvert stórvirki, þat er Snorri lagði fyrir þá, ok því rak Snorri goði Þórodd hurt frá sèr, ok kvað hann eigi fyrir aptr koma, enn hann hefði drepit einhvern skógarmann, ok svá varð at vera. Fór Þóroddr þá yfir til Dala. Þá bjó á Breiðabólstað í Sökkólfsdal³ ekkja sú, er Geirlaug hèt; hón hélt smalamann þann, sem sekr var orðinn um áverkamál; hann var frumvaxta piltungr. Þat frétti Þóroddr Snorrason, ok reið á Breiðabólstað; hann spurði, hvar smalamaðr væri. Húsfreyja kvað hann vera hjá fè; eðr hvat viltu hánúm? Ek skat hafa líf hans, segir Þóroddr, því at hann er sekr skógarmaðr. Hón svarar: þat er þèr engi frami, at drepa hann, veslinginn, slíkr ofgarpr, sem þú þykkist vera; man ek

¹) *de sidste fem Ord tilføiede efter B, C, D.* ²) Steinþór, D. ³) Sökkósdal, D.

vísa þér til meira þrekvirkis, ef þér er mikill hugr á at reyna þik. Hvert er þat? segir hann. Hón svarar: hér upp í fjallinu liggr Grettir Ásmundarson; fást þú við hann, þat er meir við þitt hæfi. Þóroddr tók vel máli þessu: ok skal svá vera. Keyrði hann þá hestinn sporum, ok reið eptir dalnum; ok er hann kvam á hæðirnar fyrir neðan Austrá, sá hann, hvar var ljósbleikr hestr með súðli; hann sá þar ok mikinn mann með vápnum, ok snèri þegar til móts við hann. Grettir heilsaði hánnum, ok spurði, hvern hann væri. Þóroddr nefndi sik, ok mælti: hví spyrst þú mik eigi heldr at erindum mínum, enn nafni? Því, sagði Grettir, at þau ein munu vera, at lítið man til koma; eða ertu son Snorra goda? Svá er ok víst, sagði Þóroddr, en þó skal nú reyna, hvárr okkar meira má. Auðvitað er þat, sagði Grettir, eðr hefir þú eigi frètt þat, at ek hefi orðit lítil heillapúfa um at þreifa flestum mönnum? Veit ek þat, segir Þóroddr, en þó skal nú nökkut til voga; ok brá sverði, ok sótti at Gretti með ákefð, en hann hlífði sér með skildi, en eigi bar hann vápn á Þórodd, ok fór svá um stund; eigi varð hann sárr. Grettir mælti þá: látum vit af þessum leik, því at engan sigr mantu fá í okkrum viðskiptum. Þóroddr hjó þá sem óðast. Gretti leiddist við hann at fást; þreif hann til Þórodds, ok setti hann niðr hjá sér, ok mælti: alls á ek kosti við þik gjöra, þat sem ek vil, ok eigi hræðumst ek, at þú verðir mér at bana, en hræðumst ek hærucarlinp Snorra goda, föður þinn, ok ráð hans, þau hafa flestum á knè komit; ok skyldir þú ælla þér þat, er þú gætir orkat; en eigi er þat barnafæri, at berjast við mik. En er Þóroddr sá, at hann kvam engu fram, sefaðist hann heldr, ek skildu þeir við þat. Reið Þóroddr heim í Tungu, ok sagði föður sínum sameign þeirra Grettis. Snorri goði brosti at, ok mælti: margr er dulinn at sér, ok varð ykkar mikill manna-

munr; þú hjótt upp á hann, en hann mátti gjöra við þik hvat er hann vildi, en þó gjörði Grettir vitrliga, er hann drap þik eigi, því at eigi mynda ek nennt hafa, at þín væri úhefnt; skal ek heldr leggja hánum til liðs, ef ek verð við staddr hans mál. Fannst þat mjök á Snorra, at hánum þótti Grettir vel hafa gjört við Þórodd, ok var jafnan vin hans síðan í tillögum sínum.

69. Grettir reið norðr til Bjargs litlu síðar, enn þeir Þóroddr skildu, ok duldist þar enn um stundar sakir. Þá gjörðist svá mikit bragð at myrkfœlni hans, at hann þorði hvergi at fara, þegar er rökkva tók. Móðir hans bauð hánum þar at vera, en kvazt þó sjá, at þat myndi hánum eigi duga, fyrir þann skuld, at hann átti sökótt um allt landit. Grettir kvað hana engar únáðir af sèr skyldu hafa, en eigi man ek þat lengr til lífs mèr vinna, segir hann, at vera einn saman. Illugi bróðir hans var þá fimmtán vetra gamall, ok allra manna gjörfiligastr; hann var hjá viðtali þeirra. Grettir sagði móður sinni, hvat Guðmundr hinn ríki hafði ráðit hánum, ok læzt mundu leita, ef kostr væri, at komast í Drangey, en þó kvazt hann eigi þar vera mega, nema hann fengi einhvern dyggvan mann at vera hjá sèr. Þá mælti Illugi: ek man fara með þèr, bróðir, en eigi veit ek, at þèr sè fylgd í mèr, utan þat, at trúr man ek þèr vera, ok eigi renna frá þèr, meðan þú stendr uppi, ok gjörr veit ek, hvat um þik líðr, ef ek fylgi þèr. Grettir svarar: þú ert svá manna, at mèr er mest gleði at, ok ef móður minni væri eigi í móti skapi, vilda ek gjarna, at þú færir með mèr. Ásdís mælti: þá er svá nú komit, at ek sè, at tvennum vandræðum gegnir; ek þykkjumst eigi Illuga missa mega, en ek veit, at svá mikil atkvæði eru at um hagi Grettis, at hann verðr eitthvert ór at ráða; en þó at mèr þykki mikit fyrir at sjá á bak ykkv báðum sonum

mínum, þá vil ek þat þó til vinna, ef Grettir væri þá nærr, enn áðr. Illugi varð glaðr við þetta, því at hann hugði gott til at fara með Gretti. Hón fékk þeim lausafé mikit. Bjuggust þeir þá til ferðar. Leiddi Ásdís þá frá garði; ok áðr enn þau skildu, mælti hón svá: nú farit þit þar synir mínir tveir, ok man ykkarr samdaudi verða¹; ok má engi renna undan því, sem hánnum er skapat; man ek hvárigan ykkar sjá sinni síðan. Látið nú eitt yfir ykkar ganga, en eigi veit ek, hverja heill þit sœkit þangat í Drangey, en þar munu þit beinin bera, ok margir munu þar fyrirmana ykkar þarvistar; sjáið þit vel fyrir² svikum; en vápnbitnir munu þit verða, en undarliga hafa mæð draumar gengit. Gætið ykkar vel við gjörningum, fátt er rammara, enn fornescjan. En er hón hafði þetta mælt, grét hón mjök. Þá mælti Grettir: grát þú eigi, móðir; þat skal sagt, at þú hafir sonu átt, en eigi dætr, ef vit erum með vápnum sóttir, ok lif vel ok heil. Eptir þat skildu þau. Þeir fóru nú norðr um sveitir, ok hittu frændr sína. Dvöldust svá á haust fram til vetrar; þá snæru þeir til Skagafjarðar, ok fóru norðr Vatnskarð, ok svá til Reykjaskarðs, ok svá ofan Sæmundarhlíð, ok svá á Langholt. Þeir kvámu til Glaumbæjar at áliðnum degi. Grettir hafði kastað hetti sínum á öxl sèr; svá gekk hann jafnan úti, hvárt sem var betra eðr verra. Þaðan fóru þeir; ok er þeir kvámu skammt á veg, kwam maðr til móts við þá, höfuðmikill, hár ok mjór, ok illa klæddr; hann heilsaði þeim, ok spurðu hvárir aðra at nafni. Þeir sögðu til sín, en hann nefndist Þorbjörn. Hann var einhleypr maðr, ok nennti ekki at vinna, ok skrumaði mikit, ok var hent at hánnum gaman mikit eðr dáruskapr af sumum mönnum. Hann gjörði sèr við þá dælt, ok sagði margt ofan ór héraði frá byggðarlagsmönnum. Gretti þótti

¹) ykkar línu samdi ættlaðr, B, D. ²) við, B, D.

gaman mikit at hánú. Hann spurði, hvárt þeir þœttist eigi þurfa þess manns, er starfaði fyrir þeim; vilda ek gjarna fara með ykk, segir hann. Svá fékk hann um talat, at þeir létu hann fylgja sér. Var fjúkanda mjök ok kalt. En með því, at þessi maðr var umfangsmikill ok hinn mesti gárungr, átti hann kenningarnafn, ok kallaðr glaumr. Mikit fannst þeim um í Glaumbœ, er þú gekkt þar heimbettulauss í því illviðri, sagði Glaumr, hvárt þú myndir því hraustari, sem þú vart úkulvísari; en hær váru bóndasynir tveir, afburðarmenn allmiklir, ok kvaddi sauðamaðr þá til fjár með sér, ok þóttust varla geta klætt sik fyrir kulda. Grettir mælti: sá ek einn ungan mann inn í dyrum, ok dró þar á sik vöttu sína, en annarr gekk á milli fjóss ok haugs, ok man ek hvárigan þeirra bræðast. Eptir þat fóru þeir ofan tit Reyniness, ok váru þar um náttina. Þaðan fóru þeir út á ströndina til þess bæjar, er at Reykjum hêt; þar bjó sá maðr, er Þorvaldr hêt, ok var góðr bóndi. Bað Grettir hann ásja, ok sagði hánú fyrirætlan sína, at hann vildi komast út í Drangey. Bóndi sagði, at Skagfirðingum myndi þat þykkja eigi vinsending, ok taldist undan. Grettir tók þá fésjóð, er móðir hans hafði gefit hánú, ok fékk bónda. Hann varð léttbrýnn við fèit, ok fékk til húskarfa sína þrjá at flytja þá um náttina í tungsljósi. Frá Reykjum er skammt til eyjarinnar, ok er þat vika sjós. En er þeir kvámu í eyna, þótti Gretti þar gott um at litast, því at hón var grasi vaxin, en sjábrött, svá at hvergi mátti upp á komast, nema þar sem stigarnir váru við látnir; ok ef upp var dreginn hinn efri stigin, þá var þat einskis manns færleikr, at komast á eyna. Þar var þá ok fuglberg mikit á sumrum. Þar var þá áttatigi sauða í eyinni, er bæendr áttu; þat váru mest hrútar ok ær, er þeir ætluðu til skurðar. Settist Grettir þar nú um kyrrt; þá hafði hann fimmtán

vetr eðr sextán í sekt verit, at því sem Sturla Þórðarson hefir sagt.

70. Þá er Grettir kvam í Drangey, váru þessir héraðs-höfðingjar í Skagafirði. Hjalti bjó at Hofi í Hjaltadal, son Þórðar Hjaltasonar, Þórðarsonar skálps¹. Hjalti var höfðingi ok gífugmenni mikil ok vinsæll. Þorbjörn hét bróðir hans; hann var mikill maðr ok sterkr, ok harðfengr ok úðell. Þórðr faðir þeirra hafði kvángast í elli sinni, ok var sú kona eigi móðir þeirra bræðra. Hón var illa til stjúpbarna sinna, ok verst til Þorbjarnar, því at hann var illfengr ok úfyrirleitinn. Þat var eitt sinn, at Þorbjörn öngull sat at tafl; þá gekk stjúpmodir hans hjá, ok sá, at hann teufi hnettafl; þat var stórt halatafl. Henni þótti hann úpreifinn, ok kastaði at hánnum nökkurum orðum, en hann svaraði illa. Hón greip þá upp töfluna, ok setti halann á kinnbein Þorbirni, ok hljóp af í augat, svá at úti lá á kinninni. Hann hljóp upp, ok þreif til hennar úþyrmiliga, svá at hón lagðist í rekkju af, ok af því dó hón síðan, ok sögðu menn, at hón hefði verit úlètt. Síðan varð hann hinn mesti úeirðar-maðr; tók hann þá við fè sínu, ok bjó fyrst í Viðvík. Halldórr Þórðarson², Þórðarsonar frá Höfða, bjó at Hofi á Höfðaströnd; hann átti Þórdísi Þórðardóttur, systur þeirra bræðra, Hjalta ok Þorbjarnar öngula. Halldórr var gildir bóndi ok ríkr at fè. Björn hét maðr, er bjó á Haganesi í Fljótum; hann var vinr Halldórs at Hofi. Þessir veittust at hverju máli. Tungusteinn hét maðr, er bjó á Steinsstöðum; hann var Bjarnarson, Úfeigssonar þunnskeggs, Krákuhreiddar-sonar, þess er Eirekr í Goðdölum gaf tunguna niðr frá Skálamýri. Steinn var frægr maðr. Eirekr hét maðr, son Hólmgöngustarra, Eirekssonar ór Goðdölum, Hréaldssonar. Geirmundarsonar³ örðigskeggja; hann bjó at Hofi í Goðdölum.

¹) skálp, D. ²) son Þorgeirs, B, D. ³) Eirekssonar, Hlf, B, D.

Þessir váru allir virðingamenn miklir. Bræðr tveir bjuggu þar, sem heitir at Breiða í Slèttahlíð, ok hèt Þórðr hvárr-
tveggja; þeir váru rammir at afli, ok þó gæfir mennu. Þeir
áttu allir part í Drangey. Svá segja menn, at eigi ætti
særri menn í eyjunni, en tuttugu, ok vildi engi 'sinn part
öðrum selja. Þórðarsynir áttu mest í, því at þeir váru
ríkastir.

71. Nú¹ líðr fram at sólhvörfum; þá bjuggust bæendr
at sækja slátrfè sitt í eyna. Þeir skipuðu skútu, ok fèkk
hverr mann fyrir sik, en sumir tvá. En er þeir kvámu
nær eyjunni, sáu þeir þar menn á felli. Þat þótti þeim
undarligt, ok gátu þess til, at nökkurir menn myndi hafa
brotið þar skip sitt, ok komist þar á land. Reru nú þar
at, sem stigarnir váru, en hinir, sem fyrir váru, drógu upp
stigana. Þá þótti bæendum undarliga við bregða, ok kölluðu
á þá, ok spurðu, hverlr þar væri fyrir. Grettir nefndi sik,
ok svá sína fèlaga. Bæendr spurðu, hverr hann flutti út í
eyna. Grettir svarar: sá flutti mik, sem farit átti ok
hendrnar hafði, ok meiri var minn vinr, enn yðvarr. Bæendr
svöruðu: láttu oss ná fè váru, ok far til lands með oss, ok
haf frjálst þat, sem þú hefir niðr lagt af fè váru. Grettir
svarar: vel er þat boðit, en þó munu nú hvárir hafa þat,
sem fengit hafa, ok er þat skjótt at segja yðr, at hèðan
ferr ek eigi, nema ek sè dauðr um dreginn; eigi læt ek
laust þat, sem ek hefi höndum á komit. Nú þögnuðu
bæendr, ok þótti mikill vágestr kominn í Drangey; buðu
þeir hánum nú marga kosti, bæði með fægjöfum ok fögrum
heitum, en Grettir neitti öllu, ok fóru bæendr á burt við
svá búit, ok undu illa við sinn hlut; sögðu þeir héraðsmönnum,
hverr vargr kominn var í eyna. Þetta kwam mjök á þá úvara,
ok þótti eigi hægt til atgjörða; áttu þeir um þetta at tala

¹⁾ B, D *have her ikke ny Linte.*

um vetrinn, ok gátu eigi ráð til sæt, at koma Gretti ór eygni.

82. Líðr nú þar til, er menn fara til Hegranessþings um várit; kwam fjölmenni mikit ór öllum hærudum, þeim sem menn áttu þangat at sækja. Sátu menn þar lengi á várit bæði yfir málum ok gleði, því at þá var margt gleðimanna í hærudum. En er Grettir spurði, at alþýða manna var farin til þingsins, hafði hann gjört ráð við vini sína, því at hann átti ávallt gott við þá, sem næstir hán um váru, ok sparði ekki við þá, þat sem hann fékk til. Hann sagði at hann vildi fara til lands til atdrátta; en þeir Illugi ok Glaumr skyldi eptir vera. Úráðligt þótti Illuga þetta vera, en lét þó svá vera, sem Grettir vildi. Hann bað þá geyma stigans, ok sagði þeim þar á liggja. Eptir þat fór hann á land, ok aflaði þess; sem hann þóttist þurfa. Hann duldist nú, hvar sem hann kwam, ok varði engan, at hann myndi á land kominn. Nú spurði hann af þinginu, at þar var gleði mikil. Var Gretti forvitni á at koma til þingsins, ok tekr fornán búning, heldr vandan, ok kemr svá á þingit, at menn gengu frá lögrétu heim til búða. Þá töludu til sumir menn ungir, at veðr væri gott ok fagrt, ok sè gott ungum mönnum at hafa glímur ok skemmtan. Þeir kváðu þat allráðligt. Fóru menn þá, ok settust niðr fram frá búðunum. Gengu þeir Þórdarsynir mest fyrir skemmtaninni. Þorbjörn öngull var uppvözlumikill, ok ruddi fast til gleði; varð hverr til at fara, sem hann vildi; tók hann í hendr hverjum manni, ok hnykkti fram á völinn. Nú glímdu fyrst þeir, sem ústerkastir váru, ok þá hverr at öðrum, ok gjörðist af þessu gleði mikil; en er flestir höfðu glímt, nema þeir, sem sterkastir váru, áttu bæendr um at tala, hverr til myndi verða, at taka á öðrum hvárum þeirra Þórdanna, er fyrr váru nefndir; en þar varð engi til. Þeir gengu þá fyrir ýmsa menn, ok buðu sik fram; en því firr fór, sem nær

kallaði. Þorbjörn öngull litast þá um, ok sá, hvar maðr sat, mikill vexti, ok sá úglöggt í andlit hánun. Þorbjörn þreif til hans, ok kippti hánun fast. Hann sat kyrr, ok bifaðist hvergi. Þá mælti Þorbjörn: engi hefir setið jafnfast fyrir mēr í dag, sem þú; eðr hverr er þessi maðr? Hann svarar: Gestr heiti ek. Þorbjörn mælti: þú mant vilja skemmta nökkuru, ok ertu aufúsugestr. Hann svarar: skjótt þykki mēr margt skipast kunna, ok man ek eigi hlaupa í leik með yðr, en mēr er allt úkunnigt fyrir. Töluðu þá margir, at hann væri góðs fyrir verðr, ef hann vildi skemmta mönnum nökkuru, úkunnr maðr. Hann spurði, hvers þeir beiddi hann. Þeir báðu hann glíma við einhvern. Hann kvazt niðr hafa lagt at rjá; en gaman þótti mēr at því um skeið. En er hann afneitti eigi með öllu, báðu þeir hann því meir. Hann mælti: ef yðr þykkir undir um, at ek sè dreginn, þá munu þèr þat til vinna, at handsala mēr grið hèr á þinginu, ok þar til, sem ek kem til heimilis míns. Þá þutu upp allir, ok kvádust þat gjarna vilja. Hafr hèt sá maðr, er mest fýsti, at þessum manni væri grið gefin; hann var Þórarinsson, Hafrssonar, Þórdarsonar knapps, er land hafði numit upp frá Stíflu í Fljótum til Tunguár. Hann bjó á Knappsstöðum, ok var orðamaðr mikill. Hann sagði fyrir griðum með mikilli röksemd, ok er þetta upphaf á.

73. Hèr set ek grið, segir hann, allra manna á millum, einkanliga þessum sama Gesti til nefndum, er hèr sitr, ok at undir skildum öllum goðorðsmönnum ok gildum bændum, ok allrar alþýðu ungra manna ok vápnfærra, ok allir aðrir héraðsmenn í Hegransþingi, eða hvaðan sem hverir eru at komnir nefndra manna eðr únefndra, hand-sölum grið ok fullan frið kvámumanni hinum úkunna, er Gestr nefnist, til gamans, glímu ok gleði allrar, til hèvistar ok heimferðar, hvárt er hann þarf at fara á legi eðr landi

eðr flutningi; skal hann bafa grið í öllum stöðum nefndum ok únefndum, svá lengi sem hann þarf til heillar heimkvámu, at höldnum tryggðum. Set ek þessi grið fyrir oss ok vára frændr, vini ok venzlamenn, svá konur sem karla, þýjar ok þræla, sveina ok sjálfráða menn. Sè sá griðniðingr, er griðin rýfr, eðr tryggðum spillir, rækr ok rekinn frá guði ok góðum mönnum ór himinríki, ok frá öllum helgum mönnum, ok hvergi hæfr manna í milli, ok svá frá öllum út flæmdr, sem víðast varga reka, eðr kristnir menn kirkjur sækja, heiðnir menn hof blóta, eldr brennr, jörð grœr, mælt barn móður kallar, ok móðir mög fæðir, aldir elda kynda, skip skríðr, skildir blika, sól skín, snjá leggrr, Finnrr skríðr, fura vex, valr flýgr várlangan dag, ok standi hánnum beinn byrr undir báða vængi, himinn hverfr, heimr er byggðr, ok vindr veitir vötn til sjáfar, karlar korni sá; hann skal firrast kirkjur ok kristna menn, heiðna hölda, hús ok hella, heim hvern, nema helvíti. Nú skulu vær vera sáttir ok sammála hverr við annan í huga góðum, hvárt sem vær finnumst á fjalli eðr fjöru, skipi eðr skíði, jörðu eðr jökli, í bafi eðr á hestbaki, svá sem vin sinn í vatni finni, eðr bróður sinn á braut finni, jafnsáttir hverr við annan, sem sonr við föður, eðr faðir við son, í samförum öllum. Nú leggjum vær hendr saman, ok allir vær, ok höldum vel griðin, ok öll orð tölud í tryggðum þessum, at vitni guðs ok góðra manna, ok allra þeirra, er orð mín heyra, eðr nükkurir eru nær staddir.

74. Tóku þá margir til orða, at mikit var um mælt. Gestr mælti þá: vel hefir þú um mælt ok sagt, ef þær spillit eigi um síðar; skal ek nú eigi dvelja, þat sem ek hefi til fram at láta. Eptir þat kastaði hann kufinum, ok því næst öllum bolklæðum. Þá leit hverr til annars, ok brá mjök vá fyrir grön; þóttust þeir kenna, at þetta var

Grettir Ásmundarson, því at hann var úlíkr öðrum mönnum fyrir vaxtar sakir ok þrekleika, ok þögnudu nú allir, en Hafr þóttist úsvinnr orðinn. Gengu nú tveir ok tveir saman af héraðsmönnum, ok ámælti hverr öðrum, en þeim mest, er fyrir gridunum hafði sagt. Þá mælti Grettir: gjörít greiðligt fyrir mér, hvat yðr býr í skapi; því at eigi sit ek lengi klæðlauss; eigit þér miklu meira í hættu, enn ek, hvárt þér haldit grid yður, eðr eigi. Þeir svöruðu fá, ok settust niðr. Þórdarsynir ok Halldórr mágr þeirra tóku nú tal með sér. Vildu sumir halda gridin, en sumir eigi. Hnippaði hverr kolli at öðrum. Grettir kvað vísu:

Dulizt hefir margr í morgin
menja runnr við kunnan;
renna víst á runna
ránsíma tvær grímur.
Skotið er heldr fur hölda
hvassorða leikbordí;
öld bilar orð at halda;
allt dró slafr af Hafri.

Þá mælti Tungusteinn: þykki þér svá vera, Grettir; eðr hvat munu þeir af ráða, höfðingjarnir?; en satt er þat, at þú ert afbragðsmaðr fyrir hreysti sakir, eðr sér þú eigi, at hverr þeirra kjár nefinu at öðrum? Grettir kvað þá vísu:

Heldu Hlakkar tjalda
hefendr saman nefjum,
Hildar veggs ok hjuggust
bræggnirðir til skeggjum;
ok gedstrangir gengu
(gríða tóku at iðrast)
sváfnis látrs í sveitir
sviptendr, er mik kenndu.

Þá mælti Hjalti Þórdarson: eigi skal svá vera, segir hann,

halda skulu vær grið vár, þó at vár hafa orðit byggindismunr; vil ek eigi, at menn hafi þat til eptirdæma, at vær sjálfir höfum gengit á grið þau, sem vær höfum sett ok seld; skal Grettir fara liðugr þangat, sem hann vill, ok hafa grið til þess, er hann kemr aptr ór þessarri ferð; eru þá úti þessi tryggðamál, hvað sem í gjörist með oss. Allir þökkudu hánum fyrir, ok þótti hann höfðingliga gjöra, slíkar sakir sem til váru. Þorbjörn öngull varð hljóðr við. Var þá talat til, at annarrhvárr þeirra Þórdanna myndi taka á Gretti, en hann bað þá ráða. Nú gekk annarr fram þeirra bræðra. Grettir stóð fyrir rætt, en hinn hljóp at hánum sem snarast, ok Grettir hvergi ór sporum. Grettir seildist aptr yfir bak Þórði, ok tók svá í brækrnar, ok kippti upp fótunum, ok kastaði hánum aptr yfir höfuð sèr, svá at hann kvam at herðum niðr, ok varð þat allmikitt fall. Þá mæltu menn, at þeir skyldi fara til báðir bræðrnir senn, ok svá var gjört; þá urðu allmiklar sviptingar, ok máttu ýmsir betr, en þó hafði Grettir ávallt annanhvárn undir, en ýmsir fóru á knè eðr slyðrur fyrir öðrum; svá tókust þeir fast á, at hvervetna var blátt ok blóðrisa. Öllum þótti at þessu hin mesta skemmtan; ok er þeir hættu, þökkudu allir þeim fyrir glímuna, ok var þat dómr þeirra, er hjá sátu, at þeir væri eigi sterkari tveir, enn Grettir einn, en hvárr þeirra hafði tveggja manna megin, þeirra sem gildir váru. Þeir váru svá jafnstærkir, at hvárgi bar af öðrum, ef þeir reyndu með sèr. Grettir var eigi lengi á þinginu. Bændr báðu hann gefa upp eyna, en hann neitti því, ok gátu bændr ekki at gjört. Grettir fór aptr til Drangeyjar, ok tók Illugi feginsamliga við hánum. Settust þeir um kyrrt. Sagði Grettir þeim nú frá ferðum sínum. Leið nú fram á sumarit. Öllum þótti Skagfirðingar mikinn drengskap sýnt hafa, hversu þeir hældu vel grið sín, ok má þá af

slíku marka, hverir dyggðarmenn þá væru, slíkar sakir sem Grettir hafði gjört við þá. Bændr þeir, sem úríkari væru, töluðu með sér, at þeim væri lítið gagn at eiga lítinn part í Drangey, ok buðu nú at selja Þórdarsonum; en Hjalti kvazt eigi kaupa vilja, en bændr skildu þat til, at sá, er kaupa vildi, skyldi annathvært drepa Gretti, eðr koma hánnum burt. Þorbjörn öngull kvazt eigi spara at bindast fyrir um atfór við Gretti, ef þeir vildi gefa hánnum fê til. Hjalti bróðir hans lagði af við hann sinn part í eyjunni, því at Þorbjörn var þeirra harðfengari, ok úvinsæll. Svá gjörðu þá fleiri bændr. Fekk Þorbjörn öngull þá mikinn hlut eyjarinnar með litlu verði; en hann hazt undir, at koma Gretti á burtu.

75. At áliðnu sumri fór Þorbjörn öngull með alskipaða skútu til Drangeyjar, en þeir Grettir gengu fram á bjargit. Töludust þeir þá við. Bað Þorbjörn Gretti gjöra fyrir orð sín, at fara ór eyjunni. Grettir kvað þess enga ván. Þorbjörn mælti: vera má, at ek mega gjöra þér þvílíkt liðsinni, þótt þú gjörðir þetta; en nú hafa bændr margir lagt upp við mik, þat er þeir hafa átt í eyjunni. Grettir svarar: nú kvaðu þat upp, at ek er ráðinn til at ganga hëðan aldri, er þú sagðist eiga mestan hlut eyjarinnar; er þat vel, þó at vit deilim kálit; en þat var satt, at mër þótti erfitt, at hafa alla Skagfirðinga í móti mër, en hër, er hvárrgi til sparandi, því at vit munum eigi kafna í vinsældum manna; máttu vel af leggja ferðir þínar hingat, því at allt er um gjört fyrir mër. Sinnar stundar bíðr hvat, sagði Þorbjörn, ok mantu ills bíða. Hættt man á þat verða, sagði Grettir; ok skildu við svá búit. Fór Þorbjörn heim aptr.

76. Svá er sagt, at þá er Grettir hafði tvá vetr verit í Drangey, þá höfðu þeir skorit flestallt sauðfê, þat sem þar hafði verit, en einn hrút létu þeir lífa, svá at getið sè;

hann var hausmögóttir at lit, ok hyrindr mjök. At hánura hendu þeir mikit gaman, því hann var svá spakr, at hann stóð fyrir úti, ok rann eptir þeim þar sem þeir gengu; hann gekk heim til skála á kveldin, ok gnèri hornum sínum við hurðina. Gott þótti þeim í eyjunni, því at þar var gott til matar fyrir fugls sakir ok eggja, en til eldiviðar var þar hneppst¹ at afla; ok lét Grettir jafnan þrællinn kanna reka, ok rak þar opt kefli, ok bar hann þau heim til elda. Ekki purftu þeir bræðr at starfa, utan at fara í bjarg, þá er þeim líkaði. Þrællinn tók at letjast mjök á starfanum; gjörðist hann nú möglunarsamr, ok úgeymnari, enn verit hafði. Hann skyldi geyma um eld hverja nátt, ok bauð Grettir mikinn varnað á því, því at skip var eigi hjá þeim. Nú bar svá til, at eldr slokknaði fyrir þeim á einni nátt. Þá varð Grettir styggur við, ok kvað þat makligt, at Glaumr væri býddr; en hann, þrællinn, sagði illa æfi sína, at liggja hær í útleigð, en vera braktr ok barðr, ef nökkut mistækist. Grettir spurði Illuga, hvað þá væri til ráða; en hann kvazt eigi annat sjá, enn þeir myndi þar verða at bíða til þess, er skip bæri at. Grettir sagði, at þeim var blint til þess at ætla; man ek heldr hætta til, hvárt ek komumst til lands. Mikit þykki mér þat, segir Illugi, því at vit erum upp gefnir, ef þær verðr nökkut. Eigi man ek á sundi drukkna, sagði Grettir; en þó man ek verr trúa þrælnum hëðan frá, svá mikit sem oss lá hær við. Þat var vika sjáfar, sem skemmst var til lands ór eyjunni.

77. Býst Grettir nú til sunds, ok hafði söluváðarkuð, ok gyrðr í brækr; hann lét sitja saman fingrna. Væðr var gott. Hann fór at áliðnum degi ór eyjunni. Allúvænligt þótti Illuga um hans ferð. Grettir lagðist nú inn á fjörðinn, ok var straumr með hánura, en kyrrt með öllu. Hann

¹) *Reitelse, for Membranens heppst; verst, D; illt, B.*

sótti fast sundit, ok kvam inn til Reykjaness, þá er sett var sólu. Hann gekk til bæjar at Reykjum, ok fór í laug um náttina, ok fór síðan í stofu. Þar var mjök heitt, því at eldr hafði verit um kveldit, ok var lítt rokin stofan. Hann var móðr mjök, ok sofnaði fast. Íá hann þar allt á dag fram; en er á leið morguninn, stóðu heimamenn upp, ok kvámu konur tvær í stofu fyrst; þat var griðkona ok dóttir bónda. Grettir var við svefn, ok höfðu fötin svarfzt¹ af hánnum ofan á gólfít. Þær sáu, hvar maðr lá, ok kenndu hann. Þá mælti griðkona: svá vil ek heil, systir, hær er kominn Grettir Ásmundarson, ok þykkir mér raunar skammrisjamikill vera, og liggrr berr; en þat þykki mér fádæmi, hversu lítt hann er vaxinn niðr, ok ferr þetta eigi eftir gildleika hans öðrum. Bóndadóttir svarar: því berr þær svá margt á góma? ok ertu eigi meðalfífla, ok vertu hljóð. Eigi má ek hljóð vera um þetta, sæl systirin, segir griðkona, því at þessu hefða ek eigi trúat, þó at nökkurr hefði sagt mér. Fór hón nú yfir at hánnum, ok gæðist, en stundum hljóp hón til bóndadóttur, ok skelldi upp ok hló. Grettir heyrði, hvat hón sagði, ok er hón hljóp inn yfir á gólfít, greip hann til hennar, ok kvað vísu:

Váskeytt er far flaska;
fár kann sverð í hári
eskiruðr fur öðrum
örvedrs sjá gjörva.
Veðja ek hins, at hreðjar
hafi-t þeir, enn vèr meiri,
þó at eldraugar eigi
atgeira sin meiri.

Síðan svipti hann henni upp í pallinn, en bóndadóttir hljóp fram. Þá kvað Grettir vísu:

¹) snarast, D.

Sverðlítinn kvað sæta,
 saumskorða, mik orðinn;
 Hrist gjörir hreifa kvista
 hœlin satt at mæla.
 All-lengi má ungum
 (eyleggjar, bið þú, Freyja)
 lágr í læra skógi
 lautu faxi mēr vaxa.

Griðka æpti hástöfum, en svá skildu þau, at hón frýði eigi á Gretti, um þat er lauk. Litlu síðar stóð hann upp ok gekk til Porvalds bónda, ok sagði hánnum til vandkvæða sinna, ok bað hann flytja sik út; og gjörði hann svá, ok lèði skip ok flutti hann út; ok þakkaði Grettir hánnum fyrir þenna drengskap. En er þat frèttist, at Grettir hafði lagzt viku sjáfar, þótti öllum frábærr frœkleikr hans bæði á sjá ok landi. Skagfirðingar ámæltu mjök Þorbirni öngli fyrir þat, er hann kwam eigi Gretti burt ór Drangey, ok kváðust mundu aptr taka hverr sinn part. Hánnum þótti sèr úhœgt um, ok bað þá vera góða í biðum.

78. Þetta sumar kwam skip út í Gönguskarðsósi; þar var sá maðr á skipi, er Hæringr hèt. Hann var ungr maðr ok fœrr svá vel, at hann kleif hvert bjarg. Hann fór til vistar með Þorbirni öngli, ok var þar fram á haust. Hann fýsti Þorbjörn mjök til at fara til Drangeyjar, ok kvazt vildu sjá, hvárt hón væri svá mikit bjarg, at hvergi mætti upp komast. Þorbjörn kvað hann eigi til einskis vinna skyldu, ef hann kvæmist upp á eyna, ok fengi veitt Gretti áverka, eða drepit hann. Gjörði hann þetta ágengiligt fyrir Hæringi; ok eptir þetta fóru þeir til Drangeyjar, ok skutu hánnum, austmanninum, upp í einhverjum stað, ok skyldi hann leynast at þeim, ef hann kvæmist upp á eyna; en þeir lögðu at stiganum, ok tóku tal við þá Gretti. Spurði

Þorbjörn Gretti, hvárt hann ætlaði eigi ór eyjunni. Hann kvezt í engu jafnráðinn. Mjök hefir þú á oss leikit, segir Þorbjörn, nær sem vær fáum þess hefnt, en eigi uggir þú margt at þér. Lengi áttust þeir þetta við, ok kwam eigi ásamt með þeim. En frá Hæringi er þat at segja, at hann kleif aptr ok fram um bjargit, ok fèkk upp komizt í einhverjum stað, þar sem hvártki hefir maðr farit áðr nè síðan. En er hann kwam upp á bjargit, sèr hann, hvar þeir bræðr vóru, ok horfðu baki við hánun. Hugðist hann nú á skammri stundu at vinna bæði til fjár ok frægðar. Þá varði einskis um hans ferðir, því at þeir hugðu, at hvergi mætti upp komast, nema þar, sem stigarnir vóru. Grettir fékkst við þá Þorbjörn, ok skorti þar eigi týgilig¹ orð af hvárumtveggja. Þá varð Illuga litið hjá sèr, ok sá mann kominn mjök at þeim. Hann mælti þá: maðr er hær kominn at okkr með reidda öxi, ok sýnist mér heldr úfriðliga láta. Snú þú í móti hánun þá, segir Grettir, en ek man geyma stigans. Illugi ræzt í móti Hæringi; ok er austmaðrinn sá þat, snèri hann undan einhverstaðar eptir eyjunni. Illugi elti hann, meðan eyin vannst; ok þegar hann kwam fram á bjargit, hljóp Hæringr þar ofan fyrir, ok brotnaði í hánun hvert bein; lauk hans æfi svá. Þar heitir Hæringshlaup síðan, sem hann týndist. Illugi kwam aptr, ok spurði Grettir, hversu hann hefði við þenna skilit, er hánun var ætlaðr. Eigi vildi hann mér at hlíta, segir Illugi, at sjá ráð fyrir sèr, ok braut hann bekrann ofan fyrir bjargit, ok biðl bæendr fyrir hánun, sem hann sè dauðr. Ok er Öngull heyrði þat, bað hann þá burt leggja; hefir ek nú farit tvær ferðir til móts við Gretti, en eigi man ek fara í þriðja sinn, ef ek verð þá einskis vísari; en nú þykki mér meiri ván, at þeir megi sitja í Drangey fyrir mínum sökum;

¹) skýrsilleg, B, D.

en þat ætla ek, at Grettir muni skemr sitja hær hëðan af, enn hingat til. Nú fóru þeir heim. Þótti þessi ferð verri, enn hin fyrri, ok sat Grettir þenna vetr í Drangey, ok hittust þeir Þorbjörn eigi þann vetr. Á þessum misserum andast Skapti lögmaðr Þóroddsson. Var Gretti þat skaði mikill, því at hann hafði heitið at ganga fyrir um sýknu hans, þegar Grettir hefði tuttugu vetr í sekt verit, en sjá var hinn nítjándi sektar hans, er nú var frá sagt um bríð. Um várit andaðist Snorri goði; ok margt bar til tíðenda á þessum misserum, þat sem eigi kemr við þessa sögu.

79. Þetta sumar á alþingi töluðu frændr Grettis margt um sekt hans, ok þótti sumum, sem hann hefði úti sekt síná, ef hann hefði nökkut af hinu tuttugasta ári, en þeir, sem sakir áttu við hann, vildu þat eigi, ok kölluðu hann margt útlegðarverk gjört hafa síðan, ok þótti sekt hans eiga at vara því lengr. Þá var nýr lögmaðr tekinn, Steinn Þorgeisson¹, Steinssonar mjöksiglanda, Þórissonar haustmyrkr. Móðir Steins lögmanns var Arnóra, dóttir Þórðar gellis. Steinn var vitr maðr. Hann var þá beiddr órskurðar; en hann bað þá rannsaka, hvárt þat væri af hinum tuttugustum tólf mánuðum, er þá var af sumrinu, síðan hann var sekr gjörr, en þat varð svá. Þá gekk at Þórir ór Garði, ok leitaði at færa í alla trega, þá er mætti, ok gat hann fundit, at Grettir hafði komit út at áliðnu sumri, ok hafði eigi hær á landi þat í sekt setið; ok urðu þá nítján tólf manudir, ok þrem fátt í, er frá því alþingi váru, ok til þess, er Grettir kvam út um haustið, er hann hafði hær í sekt setið. Þá sagði lögögumaðr, at engi skyldi lengr í sekt vera, enn tuttugu vetr alls, þó at hann gjörði útlegðarverk á þeim tímum, en fyrr man ek engan ór sekt segja; ok af þessu eyddist sýkn at sinni, en þótti nú at visu at ganga,

¹) Þorgeisson, D.

at hann myndi sýkn vera á öðru sumri. Þetta líkaði illa Skagfirðingum; ef Grettir kvæmist ór sektinni; báðu nú Þorbjörn öngul gjöra annathvært; leggja aptr eyna, eða drepa Gretti; en hánum þótti vandi á höndum, því at hann sá eigi ráð til at vinna Gretti, en vildi þó halda eyjunni; leitaði hann allra bragða við at stíga yfir Gretti, annathvært með harðfengi eðr brögðum, eðr á hvern hátt, er hann gæti þat gjört.

80. Fóstru átti Þorbjörn öngull, er Þuríðr hét; hún var mjök gömul, ok til lítils fœr, at því er mönnum þótti. Hón hafði verit fjölkunnig mjök ok margkunnig mjök, þá er hón var ung, ok menn váru heiðnir; nú þótti, sem hón myndi öllu týnt hafa. En þó at kristni væri á landinu, þá váru þó margir gneistar heiðnar eptir. Þat hafði verit lög hér á landi, at eigi var bannat at blóta á laun, eðr fremja aðra forneskju, en varðaði fjörbaugssök, ef opinbert yrði. Nú fór svá mörgum, at gjörn var hönd á venju, ok þat varð tamast, sem í æskunni hafði numit. Ok svá sem Þorbjörn öngull var þrotinn at ráðagjörðum, leitar hann þangat til trausts, sem flestum þótti úlíkligast, en þat var til fóstru sinnar, ok spurði, hvat þar væri til ráða at taka hjá henni. Hón svarar: nú þykki mér koma at því, sem mælt er, at margr ferr í geitarhús ullar at biðja; en hvat mynda ek síðr, enn þykkjast fyrir héraðsmönnum öðrum, en vera til einskis maðr, þegar at nökkut reyndi til? Nú sè ek eigi, at mér mætti firr um fara, enn þær, þótt ek rísa varla ór rekkju. Ef þú vilt mín ráð hafa, þá vil ek ráða, hversu með er farit. Hann játaði því, ok kvað hana sèr lengi heilráða verit hafa. Leið nú fram at tvímánaði sumars. Þat var einn veðrdag góðan, at kerling mælti við Öngul: nú er kyrrt veðr ok hjart; vil ek nú, at þú farir til Drangeyjar, ok troðir illsakir við Gretti. Man ek fara

með yðr, ok vita, hversu geymiliga hánun fara orð. Man ek hafa eitthvat fyrir satt, ef ek sè þá, hversu heilladrjúgir þeir munu vera, ok man ek þá mæla yfir þeim slíkum orðum, sem mèr líkar. Öngull svarar: letjumst ek á ferðir til Drangeyjar, því at jafnan er mèr verra í hug, þá er ek ferr í burt þaðan, enn þá ek kem. Þá mælti kerling: ekki skal ek til leggja með þèr, ef þú lætr mik engu ráða. Eigi skal svá vera, fóstura mín, segir hann; en þat hefi ek mælt, at ek vilda svá koma þar í þriðja sinni, at eitthvert skapaðist at með oss. Hætta verðr á þat, segir kerling, ok mantu margt erfiði verða fyrir at hafa, áðr Grettir er við jörðu lagðr, ok opt man þèr úsýnt um þykkja, hverr þinn hluti verðr, ok þungt mantu af fá um þat er lýkr; en þó ertu svá undir bundinn, at eitthvert verðr ór at ráða. Eptir þat lætr Þorbjörn öngull setja fram teinæring, ok stè þar á við tólfta mann. Kerling var í ferð með þeim. Tóku þeir róðrarleiði út til Drangeyjar; ok er þeir bræðr sáu þat, gengu þeir fram at stiganum, ok tóku þeir enn at tala um mál sín, ok sagði Þorbjörn, at hann var enn kominn at vitja þeirra mála, ef Grettir vildi á burt fara, ok kvazt enn leggja í lættan stað um fémissu ok þarvist, ef þeir skildi slysalaust. Grettir kvazt engi miðlunarmál á því hafa eðr gjöra, at fara þaðan; hefir ek þetta opt sagt, ok þarf þetta eigi við mik at tala, segir hann. Munu þèr þat at gjöra, sem þèr villt, en hèr man ek biða þess, sem at höndum kemr. Nú þóttist Þorbjörn sjá, at hans erindi varð ekki at sinni, ok mælti: vita þóttumst ek, við hverja heljarmenn at hèr er um at eiga, ok þat er líkast, at líði nökkurr dagr. áðr enn ek kem hèr optar. Eigi tel ek þat með skada mínum, þótt þú komir hèr aldri, segir Grettir. Kerling lá aptr í skut, ok váru borin at henni klæði; hón hrærdist þá ok mælti: þessir menn munu vera hraustir ok

hamingjulausir; verðr yðvar mikill mannamunr: þú býðr þeim marga kosti góða, en þeir neita öllum; ok er fátt víðara til ills, enn kunna eigi gott at þiggja. Nú mæli ek þat um við þik, Grettir, at þú sèrt heillum horfinn, allri gípt ok gæfu, ok allri vörn ok vizku, æ því meir, sem þú lifir lengr; vænti ek, at þú eigir hær fá gleðidaga hëðan frá, enn hingat til. Ok er Grettir heyrði þetta, brá hánum mjök við, ok mælti hann: hvat fjanda er á skipinu með þeim? Illugi svarar: þat hygg ek, at þat sè kerlingin fóstra Þorbjarnar. Fussum þeirri gjörningavætti, sagði Grettir; ok var þá eigi hins verra eptir ván, ok við engi orð hefir mér meir brugðit, enn þessi, er hón mælti; ok þat veit ek, at af henni ok hennar fjölkynngi leiðir mér nökkut illt; skal hón ok eitthvert til menjar hafa, er hón hefir okkr heimsótt; ok þreif upp stein stundarmikinn, ok kastaði ofan á skipit, ok kvam á fatahrúguna. Þat var þó lengra steinkast, enn Þorbjörn ætlaði, at nökkurr maðr myndi kasta. Við þat kvam upp skrækr mikill. Hafði steinninn komit á þjólegg¹ kerlingar, svá at í sundr gekk. Þá mælti Illugi: eigi vilda ek, at þú hefðir þetta gjört. Lasta þú eigi þetta, segir Grettir; en þat uggir mik, at of lítið hafi á komit, því at eigi væri af goldit fyrir okkr báða, þó at ein kerling komi fyrir okkr. Hvat man hón koma fyrir okkr? sagði Illugi; ok lítið leggst þá fyrir okkr. Þorbjörn fór nú heim, ok varð ekki af kveðjum, er þeir skildu. Hann mælti þá við kerlingu: nú fór, sem mik varði, at þú myndir litla sœmdarferð fara til eyjarinnar; hefir þú fengit örkuml, en vær erum engri sœmd at nærr, enn áðr, ok verðum at hafa bótalausá hverja svívirðing ofan á aðra. Hón svarar: þetta man upphaf úheilla þeirra, ok get ek, at hëðan af fari þeim heldr síganda; kvíði ek eigi því, ef ek lifi, at ek geta

1) Þjólegg, A.

eigi hefnt þessa atviks, sem mér hefir gjört verit. Hugstigin þykki mér þú vera, fóstura, sagði Þorbjörn. Nú kvámu þau heim, ok lagðist kerling í rekkju¹, ok lá nær mánuð. Þá var saman runninn leggrinn, er verr var. Tók hún þá á fœtr at fara. Mikinn hlátr gjörðu menn at ferð þeirra Þorbjarnar ok kerlingar, ok þótti nú opt á leikast í viðskiptum þeirra Grettis: þat fyrst á vörþingi um gríðasöluna; en í annat sinn, þá Hæringr týndist; ok nú hit þriðja sinni, er þjóleggr kerlingar brotnaði; ok varð hær ekki í móti leikit. Hafði Þorbjörn öngull mikla skapraun af þessum orðum.

81. Nú liðr fram á haustið, þar til at váru þrjár vikur til vetrar; þá beiddi kerling, at henni skyldi aka til sjáfar. Þorbjörn spurði, hvat hún vildi. Lítið er erindit, en þó má vera, segir hún, at þat væri fyrirboðan stærri tíðenda. Nú var svá gjört, sem hún beiddi; ok er hún kvam til strandar, haltraði hún fram með sjánum, svá sem henni væri vísat til, þar sem lá fyrir henni rótartre, svá mikit sem axlbyrðr. Hún leit á treit, ok bað þá snúa fyrir sér. Þat var sem sviðit ok gniðat öðru megin. Hún lét telgja á lítinn flatveg, þar gniðat var. Síðan tók hún hníf sinn, ok reist rúnir á rótinni, ok rauð í blóði sínu, ok kvað yfir galdra. Hún gekk öfug andsælis um treit, ok hafði þar yfir mörg römm ummæli. Eptir þat lætr hún hrinda trènu á sjá, ok mælti svá fyrir, at þat skyldi reka út til Drangeyjar, ok verði Gretti allt mein at. Þaðan fór hún heim í Viðvík. Eigi kvast Þorbjörn vita, til hvers þetta kvæmi. Kerling kvað hann vita síðar gjörr. Vindr var utan eptir firði, ok hóf rót kerlingar í móti veðri, ok þótti fara eigi vánu seinna. Nú sat Grettir í Drangey, sem fyrr segir, ok þeir allir fêlagar, ok létu vel yfir sér. Annan dag eptir, enn kerling hafði treit magnat, gengu þeir bræðr

¹) rekkju, A.

ofan fyrir bjargit, ok leituðu at eldiviði; en er þeir kvámu vestr um eyna, fundu þeir rôtartre rekit upp. Þá mælti Illugi: þetta er mikill eldiviðr, frændi, ok berum heim. Grettir spyrndi við fæti sínum, ok mælti: illt trè ok af illum sent, ok skulu vit annan eldivið hafa, ok kastaði út á sjá, ok bað hann Illuga varast at bera þat heim, því at þat er sent okkr til úheilla. Eptir þat fóru þeir til skála, ok gátu eigi um þetta fyrir þælnum. Annan dag fundu þeir trèit, ok var þá nær stigunum, enn hinn fyrra dag; rak Grettir þat á sjá út, ok kvað þat aldregi skyldu heim bera. Leið nú fram á sumarit; þá kvam á hvasst veðr með vætu, ok nenntu þeir eigi at hafa sik úti, ok báðu Glaum leita eldiviðar. Hann varð illa við, ok kvazt kvaldr, er hann skyldi kyeljast úti í hverju illviðri. Hann fór ofan fyrir stigann, ok fann þar röt kerlingar, ok þóttist vel hafa gengit, þreif upp, ok stritaði heim til skála, ok kastaði niðr, ok varð af dynkr mikill. Þat heyrði Grettir. Aflat hefir Glaumr nökkurs, ok skal ek fara út, ok sjá, hvat þat er; ok tekr upp bolöxi, ok gengr út. Glaumr mælti þá: fær þú eigi verr í sundr, enn ek hefi heim fært. Gretti varð skapfátt við þælinn, ok tvíhendi öxina til rötarinnar, ok eigi geymdi hann, hvat trè þat var; ok jafnskjótt, sem öxin kvam við trèit, snérist hón flöt, ok stökk af trènu, ok á fót Grettis hinn hæggra fyrir ofan knè, ok svá, at stóð í beini, ok var þat sár mikit; þá leit hann á trèit, ok mælti: sá varð nú drjúgari, er verr vildi, ok man þetta eigi eitt saman fara; er hér nú komit þat sama trè, sem ek hefi út kastað tvá daga; hefir þik nú, Glaumr, hent tvau slys: þat annat, at þú slökktir eld várn, ok þat annat, er þú bart heim þetta úheillatrè; en ef þik hendir hit þriðja slys, þá verðr þat þinn bani, ok vár allra. Þá tók Illugi, ok batt um skeinu Grettis, ok blæddi lítt, ok svaf Grettir vel um náttina, ok

svá liðu þrjár nætr, at engi kwam verkr í sárit, en er þeir þeystu til, var skeinan saman hlaupin, svá at nálíga var gróin. Illugi mælti þá: þat vil ek ætla, at þér verði eigi langt mein at þessu sári. Vel væri þá, segir Grettir, en undarliga hefir þetta til borit, at hverju sem verðr; en hinn veg segir mér hugr um.

82. Nú leggjast þeir niðr um kveldit; ok er kwam at miðri nátt, brauzt Grettir um fast. Illugi spurði, hví hann væri svá úkyrr. Grettir segir, at hánú gjördist illt í fœtinum, ok þœtti mér líkara, at nökkut litbrigði væri á. Kveiktu þeir þá ljós; ok er til var leyst, sýndist fótrinn blásinn ok kolblár, en sárit var blaupit í sundr, ok miklu illilígra, enn í fyrstu. Þar fylgdi mikill verkr, svá at hann mátti hvergi kyrr þola, ok eigi kwam hánú svefn á augu. Þá mælti Grettir: svá skulu vær við búast, sem krankleiki þessi, sem ek hefi fengit, man eigi til einskis gjöra, því at þetta eru gjörningar, ok man kerling ætla at hefna steinshöggsins. Illugi mælti: þá sagða ek þér, at eigi myndi gott fá af kerlingu þeirri. Allt man fyrir eitt koma, segir Grettir, ok kvað vísur fimf:

Opt¹ nam sköpum skipta
 skjómaegg í rómu,
 þá er ek berserkja birkis
 böðharða sjót varðag.
 Gall, er Hjarandi handa,
 Hristar naðrinn, missti;
 Björn lét brátt ok Gunnarr
 báðir líf ok náðir.

Enn kwam ek einu sinni
 út á breiðri skútu

¹) *de fide fœrle Vers udel, B, D. Her er en stor Lacune i C.*

í Dyrrhólmi; darra
 drengr elskaði lengi.
 Bauð Torfi þá þýðum
 þegn með stóru megni
 þrautir þungra spjóta,
 þarfr Væbrands arfi.

Svá varð skildr frá skáldi
 skeleggs minnis veggja
 meiðir, þótt margir stæði
 menn at vápna sennu,
 svá at úfærr varð ára
 endr af Grettis hendi
 hlynr í hríðum benja;
 hest gaf hann mæ at lesti.

Vítt frá ek at Þorfinnr þætti
 þegn sterkr svaðils verka
 (aldrs kvazt oddbörr skyldu)
 Arnórsson (mæ varna).
 Áræði brást eyði
 einlyndum, þótt mik fyndi
 úti, ormasetra;
 einn var ek eigi at beinni.

Gat ek fyrir geira njótum
 gætt, því at treysta ek mætti
 viðr umsátum ýta,
 aldrs, en þat var eigi sjaldan;
 nú hefir gild með göldrum
 gunnelda bör unnit

(römm eru ráðin grimmu)

rein afgömul steina.

Nú skulu vær vera varir um oss, sagði Grettir, því at svá munu þau Þorbjörn öngull til ætla, at eigi skuli þetta eitt saman fara; vil ek, Glaumr, at þú gætir stiga hvern dag hëðan í frá, en dragir upp á kveldi, ok gjörir þetta trúliga, sem mikit liggi við, en ef þú svíkr okkr, þá man þér skammt til ills. Glaumr hét góðu um þetta. Nú tók at harðna veðrátta, ok gjörði á landnyrðing mikinn með kulda. Grettir spurði hvert kveld, hvárt upp væri dreginn stiginn. Glaumr mælti: nú væri helzt manna ván mest; eðr man nökkurum svá mikill hugr á at ná lífi þínu, at þat vill til vinna, at drepa sjálfan sik? því at þessi veðr eru langt um úfer, ok tókit ætla ek nú garpskapnum hinum mesta, er þér þykkir sem allt muni ykkir at bana verða. Þú munt þik enn verr bera, enn hvárr okkar, sagði Grettir, til hvers sem taka þarf, en þó skaltu nú geyma stigans, þó at þú sèrt nauðigr. Ráku þeir hann út hvern morgin. Þoldi hann þat illa. Verkrinn tók at vaxa í skeinunni, svá at blës upp allan fótinn, ok lærit tók þá at grafa bæði uppi ok niðri, ok snérist um allt sárit, svá at Grettir gjörðist banvænn. Sat Illugi yfir hánun nátt ok dag, svá at hann gaf at engu öðru gaum; var þá liðit af annarri viku síðan Grettir skeindi sik.

83. Þorbjörn öngull sat nú heima í Viðvík, ok undi illa við, er hann gat eigi unnit Gretti; ok þá er liðin var vel vika, síðan er kerling hafði magnat rótina, þá kemr hón at máli við Þorbjörn, ok spurði, hvárt hann ætlaði eigi at vitja Grettis. Hann sagðist í engu jafnráðinn, sem því, eðr viltu finna hann? sóstra, segir Þorbjörn. Eigi man ek finna hann, segir kerling. en sent hefi ek hánun kveðju mína, ok vænti ek þess, at komit hafi til hans; ok þat þykkir mér

ráð, at þú bregðir við skjótt, ok farir fljótt í móts við hann, elligar man þér eigi auðit verða at sigra hann. Þorbjörn svarar: svá marga brakföð hefi ek þangat farit, at þangat kem ek eigi; er þat ok ærit eitt, at þau stórviðri ganga, at hvergi er fært, hver nauðsyn sem á er. Hón svarar: allráðlauss ertu, er þú sèr eigi brögð til þessa; nú man ek enn ráð þar til leggja; far þú fyrst, ok alla þér til manna, ok ríð út til Hofs til Halldórs mágs þíns, ok tak þá ráð af hánun; en ef ek ræð nökkuru um heilsufar Grettis, hvat má þá kalla örvænt, at ek ráða vindblöku þeirri, er á leikr um stundir? Þorbirni þótti verða mega, at kerling sæi lengra, enn hann ætlaði, ok sendi þegar eptir mönnum upp í hérað; váru þar skjót svör, at engir þeir, sem upp höfðu gefit sinn part, vildu nökkurn lætta undir leggja; kváðu, at Þorbjörn skyldi hafa bæði eyjarhlut ok atför við Gretti. Tungusteinn fékk hánun fylgdarmenn sína tvá; Hjalti bróðir hans sendi hánun þrjá menn; Eiríkr í Goðdölum sendi hánun einn mann. Þá hafði hann beiman sex menn. Ríðu þeir tólf ór Viðvík út til Hofs. Halldórr bauð þeim þar at vera, ok spurði at eyrindum. Þorbjörn sagði af hit ljósasta. Halldórr spurði, hvern þetta hefði ráðit. Hann sagði, at fóstura hans fýsti hann mjök. Þat man eigi góðu reifa¹, sagði Halldórr, því at hón er fjölkunnig, en þat er nú fyrirboðit. Eigi má fyrir öllu sjá um þat, segir Þorbjörn, en um skal nú lúka á einhvern hátt, ef ek má ráða; eða hversu skal ek fara þess, at ek komumst í eyrna? Sjá þykkjumst ek þat, segir Halldórr, at þú treystir einhverju, en ei veit ek, hversu gott þat er. Nú ef þú vilt áfram halda, þá far þú út í Haganes í Fljót til Bjarnar vinir míns; hann á skútu góða. Seg hánun orð mín, at hann ljái þér skipit. Þaðan man sigla mega inn

¹) sæta, D.

til Drangeyjar; en úsýn lízt mér ferð yður, ef Grettir er úsjúkr ok heill. Viti þér þat ok víst, vinni þér hann eigi með drengskap, at nóga á hann eptirmálmenn. Drept eigi Illuga, ef þér megit annat; en sjá þykkjumst ek, at eigi man allt kristiligt í þessum ráðum. Nú fékk Halldórr þeim 'sex menn til ferðar. Hét einn Kárr, en annarr Þorleifr, þriðl Brandr. Eigi váru nefndir fleiri; en þaðan fóru þeir átján út í Fljót, ok kvámu í Haganes, ok sögðu Birni orðsending Halldórs. Hann kvað þat skylt hans vegna, en sagðist ekki eiga Þorbirni vanlaunat; en hánúm sýndist þetta óraferð, ok latti mjök. Eigi létust þeir aptr mundu hverfa; fóru til sjáfar, ok settu fram skipit, ok var þar reidinn hjá í naustinu. Bjuggust þeir nú til siglingar. Öllum sýndist þeim úfært, sem á landi stóði. Nú vinda þeir á segl; tók skipit skjótan skrið ok mikinn fram á fjörðinn; en svá sem þeir kvámu aðaliga fram á fjörðinn ok á djúpit, hægdist veðri svá, at þeim þótti aldri of hvasst. Kvámu þeir um kveldit, er rökkvat var, inn til Drangeyjar.

84. Nú er frá því at segja, at Grettir var svá sjúkr, at hann mátti eigi á fœtr standa; sat Illugi yfir hánúm, en Glaumr skyldi halda vörð. Hann hafði þá enn mörg orð í móti, ok kvað þeim svá þykkja, sem falla myndi fjör ór þeim, þó at ekki bæri til. Nú fór hann út ór skálanum, ok allnaudigr; ok er hann kvam til stiganna, mæltist hann við einn saman, ok sagðist nú, at hann skyldi eigi upp draga stigann; tók hann nú at syfja mjök, ok lagðist niðr, ok svaf allan daginn, ok allt þar til, er Þorbjörn kvam til eyjarinnar. Þeir sá nú, at stiginn var eigi upp dreginn. Þá mælti Þorbjörn, brugðit er nú lagi, segir hann, ór því sem vant er, at engir eru menn á gangi, enda stendr stiginn þeirra; má vera, at fleira beri til tíðenda í ferð várri, enn vær hugðum fyrir öndverðu. Nú skulu vær flýta

oss til skálans, ok látum nú eigi áræðisskort verða. Vitum þat fyrir vist, ef þeir eru heilir, at vær munum þurfa, at hvern dugi sem bezt. Síðan gengu þeir upp á eyna, ok lituðust um, ok sá, hvar maðr lá skammt frá uppgangi, ok hraut fast. Þorbjörn kenndi Glaum, ok gekk at hánum, ok rak sverðshjöltin við eyra hánum, ok bað mannfýluna vaka; ok sannliga er sá eigi vel staddr, er lif sitt á undir þínum trúnaði. Glaumr sèr upp, ok mælti: nú ætla þeir at láta, sem vant er; eðr þykkir ykk of mikit frelsi mitt, þó at ek liggja hær í kuldinum? Öngull mælti: ertu villauss, er þú skynjar eigi, at úvinir yðrir eru komnir, ok munu drepa yðr alla. Þá mælti Glaumr ekki, en æpti upp sem hann mátti, er hann kenndi mennina. Gjörðu annathvært, segir hann Öngull, at þú þegi í stað, ok seg oss frá hýbýlum yðrum, ella drep ek þik. Þá þagði Glaumr, sem hánú væri í vatn¹ drepit. Þorbjörn mælti: eru þeir at skála, bræðr? eðr hví eru þeir eigi á felli? Eigi er þat hit hœgra, segir Glaumr, því at Grettir er sjúkr ok kominn at bana, en Illugi sitr yfir hánú. Öngull spurði at heilsufari hans, ok hvat til hefði borit, en síðan sagði Glaumr, hversu til hafði borit um skeinu Grettis. Þá hló Öngull, ok mælti: satt er hit fornkveðna, at langvinirnir rjúfast sízt; ok hitt annat, at illt er at eiga þræl at einkavin, þar sem þú ert, Glaumr, ok hefir þú skemmliga svikit þinn lánardrottinn, þó at hann væri eigi góðr. Margir lögðu illt til hans fyrir sína údyggð, ok lömdu hann nálíga til bótleysis, ok létu hann þar liggja; en þeir gengu heim til skálans, ok kvámu við hurðina stundarfast. Þá mælti Illugi: knýr haustmagi hurð, bróðir, segir hann; ok knýr heldr fast, sagði Grettir, ok úþyrmiliga; ok í því brast sundr hurðin. Þá hljóp Illugi til vápna, ok varði dyrnar, svá at þeir náðu

1) svefn, D.

eigi inngöngu. Sóttust þeir þá lengi, ok kvámu þeir engu við, nema spjótalögum, ok hjó Illugi öll þau af skapti; ok er þeir sá, at þeir gátu ekki at gjört, hlupu þeir upp á skálann, ok rufu. Þá færðist Grettir á fætr, ok þreif spjót, ok lagði út á milli víða. Þar varð fyrir Kárr, heimamaðr Halldórs frá Hofi, ok stóð þegar í gegnum hann. Öngull mælti, ok bað þá fara varliga, ok geyma sín vel, því at vær meguð sigra þá, ef vær geymum ráðs at. Rufu þeir nú um ásendana, ok treystu síðan á ásin, þar til er hann brast í sundr. Grettir mátti eigi af knjánun rísa; greip hann þá saxit Kársnaut. Í því hlupu þeir ofan í tóptina, ok varð nú hörd svipan með þeim. Grettir hjó með saxinu til Vikars, fylgdarmanns Hjalta Þórðarsonar, ok kvam á öxlina vinstri, í því er hann hljóp í tóptina, ok sneið um þverar herðarnar, ok undir hina hægri síðuna. ok tók þar sundr þvert manninn, ok steiptist búkrinn ofan á Gretti í tvá hluti; gat hann þá eigi upp rétt saxit svá skjótt, sem hann vildi, ok í því lagði Þorbjörn Öngull í milli herða hánun, ok var þat mikit sár. Þá mælti Grettir: berr er hverr á bakinu, nema sèr bróður eigi. Illugi kastaði skildi þá yfir hann, ok varði hann svá Gretti rúskliga, at allir menn ágættu vörn hans. Grettir mælti þá til Önguls: hverr vísaði yðr leið í eyna? Öngull mælti: Kristr vísaði oss leið. En ek get, sagði Grettir, at hin arma kerlingin, fóstira þín, hafí vísat þér, því at hennar ráðum mantu treyst hafa. Fyrir eitt skal nú yðr koma, sagði Öngull, hverjum sem vær höfum treyst. Þeir sóttu nú at fast; en Illugi varði þá báða alldrengiliga; en Grettir var með öllu úvigr bæði af sárum ok sjúkleika. Þá bað Öngull, at þeir skyldi bera skjöldu at Illuga, því at ek hefi engan fundit hans líka, eigi eldra mann. Þeir gjörðu nú svá, at þröngdu at hánun með víðum ok vápnun, svá at hann kvam engri

vörn fyrir sik. Gátu þeir þá handtekit hann, ok hældu hánnum. Hann hafði flestum veitt nökkura áverka, þeim sem í atsókninni váru, en drepit þrjá fylgdarmenn Önguls. Eptir þat gengu þeir at Gretti; var hann þá fallinn áfram. Varð þá engi vörn af hánnum, því at hann var áðr kominn at bana af fótarsárinu; var lærit allt grafit upp at smápörmum. Veittu þeir hánnum þá mörg sár, svá at litt eðr ekki blöeddi. En er þeir hugðu, at hann myndi dauðr, þreif Öngull til saxins, ok kvað hann nógu lengi hafa borit þat; en Grettir hafði fast kneppt fingr at meðalkaflanum, ok varð eigi laust. Fóru þeir þá til margir, ok gátu ekki at gjört. Átta tóku þeir til, áðr enn lauk, ok fengu ekki at gjört at heldr. Þá mælti Öngull: því skulu vær reka sparmælit við skógarmanninn? ok leggit niðr höndina við stokkinum; ok er þat var gjört, hjuggu þeir af hánnum höndina í úlsliðnum; þá réttust fingrnir, ok losnuðu af meðalkaflanum. Þá tók Öngull saxit tveim höndum, ok hjó í höfuð Gretti; varð þat allmikit högg, svá at saxit stózt eigi, ok brotnaði skard í miðri egginni; ok er þeir sá þat, spurðu þeir, því hann spillti svá grip góðum. Öngull svarar: þá er auðkenndara, ef at verðr spurt. Þeir sögðu þessa eigi þurfa, þar sem maðrinn var dauðr áðr. At skal þó meira gjöra, segir Öngull; hjó hann þá á háls Gretti tvau högg eðr þrjú, áðr af tæki höfuðit. Nú veit ek víst, at Grettir er dauðr, sagði Öngull. Lèt Grettir þann veg líf sitt, hinn vaskasti maðr, er verit hefir á Íslandi; var hánnum vetri fátt í hálf-timmtugum, er hann var veginn; en þá var hann fjórtán vetra, er hann vó Skeggja hit fyrsta víg, ok þá gekk hánnum allt til vegs framan til þess, er hann átti við Glám þræl, ok var hann þá tuttugu vetra; en er hann féll í útlegð, var hann hálfþrítögr; en í sekt var hann vel nírtján vetr, ok kvam opt í stórar mannraunir, ok hèle ávallt vel trú sína,

úr því sem ráða var; sá hann flest fyrir, þó at hann gæti ekki at gjört.

85. Hér höfum vær mikinn garp at velli lagt, sagði Þorbjörn; skulu vær nú hafa höfuðit með oss til lands, því at eigi vil ek missa fjár, sem lagt hefir verit til höfuðs hánnum; mega þeir þá eigi dyljast við, at ek hefi drepit Gretti. Þeir báðu hann ráða, ok létu sèr þó fátt um sinnast, því at öllum þótti úprúðliga at unnit. Þá mælti Öngull við Illuga: mikill skaði er þat um svá röskvan mann, sem þú ert, er þik hefir hent sú úvizka, at ráðast til illvirkja með útlegðarmanni þessum, ok verða fyrir þat dræpr ok úgildir. Illugi svarar: svá frami veiztu þat, sem úti er alþingi í sumar, hverlr útlægir verða; en eigi mantu nè kerling fóstura þín dæma þessi mál, því at galdrar ykkir ok forneskja hafa drepit Gretti, þó at þèr bærit járn á hann dauðvána, ok gjörðit svá mikit niðingsverk ofan á fordæðuskap. Þá sagði Öngull: röskliga segir þú, en eigi man svá vera. Vil ek sýna þat, at mèr sýnist mannskaði í þèr, ok man ek gefa þèr líf, ef þú vilt vinna oss trúnaðareid, at hefna engum þeim, er í þessarri ferð hafa verit. Illugi mælti: þat þótti mèr umtalsmál, ef Grettir hefði mátt verja sik, ok hefði þèr unnit hann með drengskap ok harðfengi; en nú er þess engi ván, at ek muna þat til lífs mèr vinna, at vera slíkr údrengr, sem þú; er þat skjótt af at segja, at engi skal yðr úþarfari enn ek, ef ek lifi, því at seint man fyrnast mèr, hversu þèr hafit unnit á Gretti; kýs ek miklu heldr at deyja. Þá átti Þorbjörn tal við forunauta sína, hvárt þeir skyldi láta Illuga lifa eðr eigi. Þeir kváðu hann ráða skyldu atgjörðum, því at hann hafði ráðit ferðinni. Öngull kvazt eigi kunna at eiga þenna mann yfir höfði sèr, er engum tryggðum vildi losa eðr heita þeim; ok er Illugi vissi, at þeir ætluðu at höggva hann, þá hló hann, ok

mælti svá: nú ræðu þér þat af, er mér var nærr skapi. Leiddu þeir hann þá, er lýsti, austr á eyna, ok hjuggu hann þar, ok lofudu allir hans hreysti, ok þótti hann öllum úlíkr sínum jafnöldrum. Þeir dysjuðu þá bræðr báða þar í eyjunni, en tóku síðan höfuð Grettis, ok báru með sér, ok allt þat, sem þar var fémælt í vápnum ok klædum. Saxit góða lèt Öngull eigi í skipti koma, ok bar þat lengi síðan. Þeir höfðu Glaum með sér, ok bar hann sik allilla. Veðr fell þegar um náttina. Ræru þeir til lands um morguninn. Fór Öngull þar á land, sem hánú þótti gegnast, en sendi út skipit til Bjarnar; ok er þeir kvámu mjök inn til Óslands, þá tók Glaumr svá illa at bera sik, at þeir nenntu eigi at fara með hann lengra, ok drápu hann þar, ok grèt hann hástöfum áðr, enn hann var höggvinn. Öngull fór heim í Viðvík, ok þóttist vel hafa fram gengit í þessarri ferð. Höfuð Grettis lögði þeir í salt í útibúri því, er Grettisbúr var kallat, þar í Viðvík; lá þat þar um vetrinn. Öngull var úþokkaðr mjök af þessum verkum, þegar at menn vissu, at Grettir hafði með gjörningum unninn verit. Sat Öngull um kyrrt fram yfir jól, þá reið hann til móts við Þóri í Gardi, ok sagði hánú af vígum þessum, ok þat með, at hann þóttist eiga fê þat, er lagt var til höfuðs Gretti. Þórir sagði, at hann myndi eigi dylja þess, at hann hefði ollat sektum Grettis; hefi ek ok opt fengit hart af hánú, en eigi vilda ek þat til lífs hans vinna, at gjöra mik at údádamanni eðr fordæðu, sem þú hefir gjört; man ek síðr leggja þér fê, at mér sýnist þú úlísismaðr vera fyrir galdr ok fjölkyngi. Öngull svarar: meirr ætla ek at þér komi til fêfesti ok vesalmennska, enn at þú hirðir, með hverju at Grettir væri unninn. Þórir sagði, at skjótr væri vegr með þeim, at þeir skyldi bíða alþingis, ok hafa þat, er

lögmanni sýndist réttast. Skildu þeir með því, at þar stóð á illu einu með Þóri ok Þorbirni öngli.

86. Frændum þeirra Grettis ok Illuga líkaði stórilla, er þeir frétu vígin, ok tóku svá upp, at Öngull hefði gjört nðingsverk, at drepa dauðvána mann, ok í annarri grein um fjölkynngi; sóttu þeir at hinu vitrustu menn, ok mæltist illa fyrir mál Önguls. Hann reið nú vestr til Miðfjarðar, þá fjórar vikur vátu af sumri; ok er þat fréttist til ferða hans, stefndi Ásdís at sèr mönnum, ok vátu þar margir hennar vinir, Gamli ok Glúmr mágar hennar, ok synir þeirra, Skeggi, er skammböndungur var kallaðr, ok Úspakr, er fyrr var getið. Ásdís var svá vinsæl, at allir Miðfirðingar snèrust til liðs með henni, ok jafnvel þeir, sem áðr vátu úvinir Grettis; var þar hinn fyrsti maðr Þóroddr drápustúfr, ok flestir Hrútfirðingar. Öngull kemr nú til Bjargs með tuttugu menn; þeir höfðu höfuð Grettis með sèr. Þá vátu enn eigi komnir allir þeir, sem henni höfðu liði heitið. Þeir gengu inn í stofu með höfudit, ok settu niðr á gólf. Húsfreyja var í stofu, ok margir menn aðrir. Eigi varð at kveðjum við þá. Öngull kvað þá vísu:

Flutta ek upp ór eyju
 úmett höfuð Grettis;
 þann grætr nála nauma
 nauðuglig hárraudan.
 Hèr máttu (gjálfrs) á gólfi
 griðbíts höfuð líta,
 þat man (fagrlogs Fríði)
 fúna allt, nema saltit.

Húsfreyja sat kyrr á meðan hann kvað vísuna; eptir þat kvað hún vísu:

Mundu-t síðr, enn saudir,
 sýrgarpr, fyrir dýri

(komit er norðr at njörðum
 nýtt skaup) á sjá hlaupa,
 ef styrviðir stæði
 stála Frey í eyju
 (verit hefi ek lofs um lýði
 lætt) úsjúkan Gretti.

Þá mæltu margir, at eigi væri undarligt, þó at hón ætti hrausta sonu, svá hraust sem hón var, þvílík skapraun sem henni var gjör. Úspakr var úti, ok átti tal við fylgdarmenn Önguls, þá sem eigi höfðu inn gengit, ok spurði at vígunum, en allir lofudi vörn Illuga; þá sögðu þeir frá, hversu Grettir hafði haldið fast saxinu, þá er hann var dauðr; þat þótti mönnum undarligt. Þá var senn margra manna reið vestan at; váru þar komnir margir vinir húsfreyju, ok þeir Gamli og Skeggi vestan frá Melum. Öngull hafði þar ætlat at hefja feralsdóm eptir Illuga, því at þeir kölluðu sèr allt fè hans; en er fjölmennit kwam, sá Öngull, at hann gat ekki at gjört; váru þeir hinir áköfstu, Úspakr ok Gamli, ok yldu veita Öngli atgöngu, en þeir, sem vitrari váru, báðu þá hafa við ráð Þorvalds frænda síns ok annarra höfðingja, ok sögðu, at því verr myndi mál Önguls fyrir mælast, sem fleiri vitrir menn sæti yfir; varð þá svá á meðal gengit, at Öngull reið burt, ok hafði með sèr höfuð Grettis, því at hann ætlaði at hafa þat til alþingis. Reið hann nú heim, ok þótti þungliga á horfast, því at flestir allir höfðingjar á landinu váru annathvært skyldir eðr mægðir við þá Gretti ok Illuga. Þetta sumar fékk Skeggi skammhöndungr dóttur Þórodds drápustúfs; gekk Þóroddr þá at málum með frændum Grettis.

87. Nú ridu menn til alþingis, ok urðu færri lið-veizlumenn Önguls, enn hann ætlaði, því at málit mæltist illa fyrir. Þá spurði Halldórr, hvárt þeir skyldu hafa höfuð

Grettis með sér til alþingis. Öngull læzt þat ætlaat hafa. Þat er úráðligt, segir Halldórr, því at nógu margir munu vera mótstöðumenn þínir, þó at þú gjörir eigi slíkar áminningar til þess at vekja upp harma manna. Þá váru þeir komnir á veg, ok ætluðu at ríða suðr Sand. Öngull lét þá taka höfuðit, ok grafa niðr í sandþúfu eina; er þat kölluð Grettisþúfa. Á alþingi var fjölmennt, ok bar Öngull fram mál sín, ok hrósaði mjök verkum sínum, at hann hefði drepit þann skógarmann, er gildastr hefði verit á landinu, ok þóttist eiga fè þat, er lagit var til höfuðs hánú; en Þórir hafði hinu sömu svör, sem fyrr váru sögð. Þá var lögmaðr beiddr órskurðar; hann kvazt heyra vilja, ef nökkurar gagnsakir kvæmi þær í móti, er þær fyrir mætti Öngull missa sektarjárins, elligar myndi hann hafa slíkt, sem til höfuðs hánú var lagit. Þá kvaddi Þorvaldr Ásgeirsson til Skammböndung, at bera fram sökina, ok stefndi Þorbirni öngli annarri stefnu um galdr ok fjölkynngi þá, er Grettir myndi hafa bana af fengit; en annarri um þat, er þeir vógu at hánú hálfdauðum manni, ok lét varða skóggang. Nú varð mikill sveitardrátt, ok urðu þeir fáir, er sinnaðu Þorbirni; varð nú öðruvís, enn hann hugði, því at Þorvaldi ok Ísleifi magi hans þótti þat úlísisverk, at gjöra manni gjörningar til bana; en með tillögum skynsamra manna varð sú lykt á málum þessum, at Þorbjörn skyldi sigla samsumars, ok koma aldri síðan til Íslands, meðan þeir lifði, er eptirmál áttu eptir Illuga ok Gretti. Var þá í lög tekit, at alla forneskjumenn gjörðu þeir útlæga; ok er hann sá, hvern hans kostir myndi vegða, hafði hann sik af þinginu, því at þá var búit, at frændr Grettis myndi at hánú ganga; fèkk hann ok ekki af því fè, er til höfuðs Grettis var lagit, því at Steinn lögsögumaðr vildi eigi, at þat gyldist fyrir niðingsverk. Engu váru þeir menn

bættir, er fallit höfðu með Þorbirni í Drangey; skyldi þat vera jafnt, ok víg Illuga; líkaði þat þó frændum hans allilla. Riðu menn nú heim af þinginu, ok fellsu niðr allar sakir þær, er menn höfðu á höndum Grettis. Skeggi son Gamla, en mágr Þórodds drápustúfs, en systurson Grettis, fór norðr til Skagafjarðar með atgangi Þorvalds Ásgéirssonar ok Ísleifs mágs hans, er síðan var biskup í Skálholti, ok samþykki alls almúga, ok fékk sér skip, ok fór til Drangeyjar, at sækja lík þeirra bræðra, Grettis ok Illuga, ok færðu út til Reykja á Reykjaströnd, ok grófu þar at kirkju, ok þat til marks, at Grettir liggir þar, at um daga Sturlunga, er kirkjan var færð at Reykjum, váru grafin upp bein Grettis, ok þótti þeim eigi geysi stór, ok þó mikil. Bein Illuga váru grafin síðan fyrir norðan kirkju, en höfuð Grettis var grafit heima at Bjargi at kirkju. Sat Ásdís húsfreyja at Bjargi, ok var svá vinsæl, at aldri váru henni únáðir gjörvar, ok eigi heldr meðan Grettir var í sekt. Skeggi skammhöndungr tók við búi at Bjargi eptir Ásdísi, ok var mikill maðr fyrir sér. Hans son var Gamli, faðir Skeggja á Skarfsstöðum, ok Ásdís¹, móðir Odds munks. Margir menn eru frá hánum komnir.

88. Þorhjörn öngull rézt í skip at Gásum með allt þat, sem hann mátti með komast af fè sínu, en Hjalti, bróðir hans, tók við jörðum. Öngull fékk hánum ok Drangey. Varð Hjalti síðan höfðingi mikill, ok er hans eigi getið lengr við þessa sögu. Öngull fór til Norvegs; lét enn mikið um sik. Þóttist hann mikit þrekvirkir unnit hafa í drápi Grettis. Virðu² ok margir svá, þeir sem úkunnigt var, hversu þat hafði til borizt; en margir vissu, hversu frægr maðr Grettir hafði verit. Sagði hann þat eitt af viðskiptum þeirra, sem hánum var til frama, en lét hitt liggja niðri í sögunni, sem minnr var til frægðar. Þessi saga

¹) *Isledeiff*, ok Ásdís har B, D faðir Ásdísar. ²) *Rettelse for Membranens urðu*.

kvam um haustið austr til Túnbergs. Er Þorsteinn drómundr frétti vígin, varð¹ hann mjök hljóðr við, því at hánú var sagt, at Öngull væri mjök gildir ok harðfengr. Minntist Þorsteinn ummæla þeirra, sem hann hafði þá er þeir Grettir töludust endr fyrir löngu um handleggina. Þorsteinn hēlt nú frēttum til um ferðir Önguls. Váru þeir báðir í Norvegi um vetrinn, ok var Þorbjörn norðr í landi, en Þorsteinn í Túnbergi, ok hafði hvárrgi sēt annan; en þó varð Öngull viss, at Grettir átti bróður í Norvegi, ok þótti vansēt við í úkunnu landi, ok því leitaði hann sēr ráðs, hvert hann skyldi á leita. Í þenna tíma fór margt Norðmanna út í Miklagarð, ok gengu þar á mála. Af því þótti Þorbirni fýsiligt, at fara þangat, ok afla sēr svá fjár ok frægðar, en hafa sik eigi í Norðrlöndum fyrir frændum Grettis. Bjó hann nú ferð sína ór Norvegi, ok fór út í lönd, ok létti eigi fyrr, enn hann kvam út í Miklagarð, ok gekk þar á mála.

89. Þorsteinn drómundr var ríkr maðr, ok hafði hina mestu virðing. Hann spurði nú, at Öngull var farinn ór landi, ok út í Miklagarð. Þrá hann skjótt við, ok seldi frændum sínum eignir sínar í hendr; en hann rēzt til ferðar, ok leitaði eptir Öngli, ok fór jafnan þar eptir, sem hann fór undan. Vissi Öngull ekki til hans ferða. Þorsteinn drómundr kvam út í Miklagarð litlu síðar, enn Öngull, ok vildi fyrir hvern mun drepa hann, en hvárrgi kenndi annan. Nú vildu þeir koma sēr í sveit með Væringjum, ok var því vel tekit, þegar þeir vissu, at þeir váru Norðmenn. Þá var Mikael katalak konungr yfir Miklagarði. Þorsteinn drómundr sat nú um Öngul, ef hann mætti at nökkuru kenna hann, ok gat þat eigi leikit fyrir fjölmennni. Lá hann þar jafnan vakandi, ok undi lítt við sinn hag; þóttist hann

¹) af det følgende Blad i A ere 10 Linier foroven ganske bortskorne og tre for endesl; den saaledes manglende Text er tagen efter C.

mikils hafa misst. Nú var þat þessu næst, at Væringjar áttu at fara í herför nökkura, at friða landit af hernaði; ok áðr enn þeir fóru heiman, var þat siðr þeirra ok lög, at eiga vápnaping, ok enn gjörðu þeir svá; ok þá er vápnapingit var sett, þá skyldi allir Væringjar þar koma, ok svá þeir, sem þá ælluðu at ráðast til ferðar með þeim, ok sýna vápn sín. Hér kvámu þeir báðir, Þorsteinn ok Öngull. Bar Þorbjörn fyrr fram sín vápn. Hann hafði þá saxit Grettisnaut; en er hann sýndi þat, þá dáðust margir at, ok sögðu, at þat væri allgott vápn, ok kváðu þat mikit lýti á, at skarðit var í miðri egginni, ok spurðu hann, hvat til hefði borit. Öngull sagði þat frásagnarvert; því at þat er þessu næst segjanda, at úti á Íslandi, segir hann, at ek drap kappa þann, er Grettir hēt hinn sterki, er þar hefir mestr garpr verit ok fullhugi, því at hann gat engi unnit, fyrr enn ek kwam til; ok með því, at mér varð auðit at vinna hann, þá bar ek af hánnum, en þó hafði hann mörg mín öfl; hjó ek þá í höfuð hánnum með saxinu, ok þá brotnaði skarð í eggina. Þeir sögðu, er næstir stóðu, at sá hefði verit harðr í haus, ok sýndi hverr öðrum. Af þessu þóttist Þorsteinn vita, hvar Öngull var; beiddist at sjá saxit, sem aðrir. Lèt Öngull þat til reiðu, því at flestir lofuðu hreysti hans ok framgöngu; hann hugði, at þessi myndi svá gjöra; en hann vissi enga ván, at Þorsteinn væri þar, eðr frændi Grettis. Tók Drómundr nú við saxinu, ok jafnskjótt reiddi hann þat upp, ok hjó til Önguls; kwam þat högg í höfuðit, ok varð svá mikit, at í jöxlum nam staðar; féll Þorbjörn öngull ærulauss¹ dauðr til jarðar. Við þetta urðu menn mjök úkvæða; greip gjaldkerinn staðarins þegar Þorstein, ok spurði, fyrir hverja sök hann gjörði slíkt úhæfuverk þar á heilugu þingi. Þorsteinn

¹) udel. B, D.

sagðist vera bróðir Grettis hins sterka, ok þat með, at hann hefði aldri hefndinni fram komit fyrr enn þar; ok þá tóku margir undir, at sjá hinn sterki maðr myndi mikill fyrir sèr hafa verit, þar sem Þorsteinn hefði rekizt svá langt út í heim at hefna hans. Ráðsmönnum staðarins þótti þetta líkligt; en fyrir því, at engi var sá þar, er kynni nökkut um at bera með Þorsteini, þá váru þat lög þeirra, at hverr sá, er mann dræpi, skyldi engu fyrir týna nema lífinu. Fekk Þorsteinn skjótan dóm, ok heldr harðan; hann skyldi setja í myrkvastofu í dýflizu eina, ok biða þar bana, ef engi leysti hann út með fè. En er Þorsteinn kwam í dýflizuna, var þar maðr fyrir; sá hafði þar lengi verit, ok kominn at bana af vesöld. Þar var bæði súlt ok kalt. Þorsteinn mælti við þenna mann: hversu þykki þèr æfi þín? Hinn svarar: harðla ill, því at mæ'r vill engi við hjálpa, en ek á enga frænder til at leysa mik. Þorsteinn mælti: margt er fyrir úráðum um slíkt, ok verum kátir, ok gjörum okkr nökkut at gleði. Hinn kvað sèr at engu gaman verða. Þó skulu vit prófa, segir Þorsteinn. Tók hann þá, ok kvað kvæði. Hann var raddmaðr mikill, svá at varla fannst hans líki Sparði hann nú ekki af. Almenningsstræti¹ var skammt fram frá dýflizuoni. Kvað Þorsteinn svá hátt, at gall í múrnum; ok hinum, er áðr var hálfdaurð, þótti mikit gaman at vera. Lèt hann svá ganga fram á kveldit.

90. Spes hét göfug garðshúsfreyja þar í staðnum, harðla rik ok stóráttuð. Sigurðr hét bóndi hennar; hann var auðigr, ok ættsmæri, enn hón; hafði hón verit gefin hánum til fjár. Eigi varð ástriki mikit með þeim hjónum, ok þóttist hón næsta vargefin. Hón var stórlýnd ok svarkr mikill. Svá bar til, at þá er Þorsteinn skemmti um kveldit, at Spes gekk um strætið nær dýflizunni, at hón heyrði

¹) Almennastræt, D.

þangat rödd svá fagra, at hón kallaðist enga slíka heyrta hafa. Hón gekk með marga sveina, ok bað þá víkja þangat, ok vita, hverr þessa ágætu rödd hefði. Þeir kölluðu nú, ok spurðu, hverr þar væri svá harðliga spenntur. Þorsteinn nefndi sik. Þá mælti Spes: ertu þvílíkur atgjörfimaður á annat, sem á kveðandi? Hann sagði lítið bragð at því. Hvat hefir þú til saka, segir hón, er þik skal kvelja hér til hana? Hann sagði, at hann hefði drepit mann, ok hefnt bróður síns; en ek gat þat eigi með váttum sýnt, sagði Þorsteinn, ok því var ek hér settr, sagði hann, nema nökkurr vildi mik út leysa; en mér þykkir þess engi ván, því at ek á hér engan skyldan mann. Mikill mannskaði man þat, ef þú ert drepinn; eðr var bróðir þinn slíkur frægðarmaður, sá er þú hefndir? Hann sagði, at sá var meirr enn hálfu gildari maður. Hón spurði, hvat til merkja væri um þat. Þá kvað Þorsteinn vísu þessa:

Eigi máttu átta
eggþings boðar, hringa
grund, ór Grettis hendi
geðrakks koma saxi,
áðr hvarðyggir hjuggu
herðendr fetils gerðar
axlarfót af ýti
unnblaks hugarrakkum.

Mikil ágæti eru slíkt, sögðu þeir, er skildu vísuna; ok sem hón vissi þetta, mælti hón svá: viltu þiggja líf at mér, ef kostur er? Ek vil gjarna, sagði Þorsteinn, ef þessi sölag; minn er ok út leystr með mér, sem hér sitr; ella munu vit sitja hér báðir. Hón svarar: meira mannkaup ætla ek í þér sè, enn hánun. Svá sem þat er, sagði Þorsteinn, þá munu vit fylgjast burt hëðan annathvært báðir, eðr hvárrgi okkar. Hón gekk þá þangat, sem Væringjar vǫru, ok beiddi

útlausnar fyrir Þorstein, ok bauð fè til. Þeir váru þess fúsir. Fékk hón svá um gengit¹ með vinsældum sínum ok ríkdómi, at þeir váru báðir út leystir. En þegar Þorsteinn komst ór dýflizunni, fór hann til móts við Spes húsfreyju. Tók hón hann til sín, ok hèlt hann á laun; en stundum var hann með Væringjum í herferðum, ok reyndist hinn næsti fullhugi í öllum framgöngum.

91. Í þenna tíma var Haraldr Sigurðarson í Miklagarði, ok kvam Þorsteinn sèr í vináttu við hann. Þótti Þorsteinn nú mikilhæfr, því at Spes lét hann eigi fè skorta. Lögðust þau nú á hugi, Þorsteinn ok Spes. Fannst mönnum ok henni mikit um atgjörfu hans. Varð henni fèskylmt mjök, því at hón hèlt sèr mjök til vinsælda. Bóndi hennar þóttist ok finna, at hón tók sèr háttaskipti, bæði í skaplyndi ok margri breytni, ok einkanliga í fjárauðn. Saknaði hann bæði gulls ok gripa, er hurfu ór hennar geymslu; ok eitt-hvert sinn talaði Sigurðr bóndi hennar við hana, ok segir, at hón taki undarliga breytni upp: þú gefr eigi gaum at góðsi okkuru, segir hann, ok súkkar þik ýmsa vega; en svá er, sem ek sjái þik í svefni, ok viltu aldri vera þar stödd, sem ek er; nú veit ek fyrir víst, at eitthvert berr til. Hón svarar: ek sagða þér, ok svá frændr mínir, þá er við kvámum saman, at ek vilda vera sjálfráð ok frjáls allra þeirra hluta, sem mèt stæði vel at veita; ok af því spari ek eigi fè þitt; eðr viltu nökkut aðra hluti við mik tala, þá sem mèt megi blygð í verða? Hann svarar: eigi er mèt þat grunlaust, at þú haldir einhvern þann mann, er þér þykkir betri, enn ek. Eigi veit ek, segir hón, at mikit sè fyrir því, en þó vil ek þat ætla, at þú megir þat með engum sannindum segja; en eigi munu vit tvað ein við talast, ef þú berr þessa úvissu at mèt. Hann lét, nú falla niðr

¹) Her mangler et blad i D.

þetta tal at sinni. Þau Þorsteinn hældu fram hinu sama, ok váru eigi viðsjál við orði vándra manna, því at hón treysti vizku ok vinsældum. Opt sátu þau á tali, ok skemmtu sér. Þat var eitt kveld, er þau sátu í einu lopti, þar sem í váru gripir hennar. Hón bað Þorstein kveða nökkut, því at hón hugði bónda sitja við drykk; sem hann átti vanda til. Hón strengdi aptr dyrnar; ok er hann hafði kveðit um stund, var brotizt á hurðina, ok kallat, at upp skyldi láta. Var þar kominn bóndinn með marga sveina. Húsfreyja hafði lokit upp einni stórrí kistu, ok sýndi Þorsteini gripi sína; en er hón kenndi, hvern var, vildi hón eigi lúka upp dyrnar. Hón talar við Þorstein: skjót er ráðagjörð mín; hlaup hér niðr í kistuna, ok lát hljótt um þik. Hann gjörði svá. Hón rak lás fyrir kistuna, ok settist þar upp á. Í því kvam bóndi inn í loptið, ok höfðu þeir þá brotið upp loptið. Húsfreyja mælti: því fari þér með svá miklu harki? eðr fara úfríðarmenn eptir yðr? Bóndi svarar: nú er vel, at þú gefr sjálf raun, hver þú ert; eðr hvar er sá maðr, er mest renndi raustum áðan? get ek at þér þykki hann fagrhljóðari, enn ek. Hón mælti: engi er allheimskr, ef þegja má; ferr þér ok svá; þú þykkist vera slægr, og ætlar, at þú munir festa á mærlýgi þína, en hér man raun á verða; ef þú hefir satt at mæla, þá tak þú hann, því at eigi man hann hlaupa út um veggina eðr ræfrit. Hann leitaði um húsit, ok fann eigi. Hón mælti: hví tekr þú hann eigi nú, ef þú þykkist þó eptir vísu ganga? Hann þagnaði þá, ok þóttist eigi vita, við hver brögd hann var kominn, ok frétti fylgdarmenn sína, hvárt þeim heyrðist eigi, sem hán um. En er þeir sá, at húsfreyja mislíkaði, varð ekki af vitnisburði þeirra, ok sögðu, at jafnan heyrði eigi eptir því, sem var. Gekk bóndi þá út, ok þóttist vita sannindum, þó at hann fyndi eigi manninn. Lèt hann þá

af at forvitnast um húsfreyju ok hagi hennar langa stund. Annan tíma var þat, en miklu síðar, at þau Þorsteinn ok Spes sátu í fatabúri einu. Þar váru inni klæði bæði skörin ok úskörin, er þau bóndinn áttu. Sýndi hón Þorsteini marga dúka, ok röktu í sundr; ok er þau varði minnst, kvam þar at þeim bóndinn með marga menn, ok brutu upp loptið; en meðan þeir gjörðu þat, rak hón klæðin ofan á Þorstein, ok studdist við klæðahladann, er þeir kvámu inn í húsit. Hvárt muntu enn þræta, segir bóndi, at hær væri maðr hjá þær? munu þeir menn vera hær nú, er sá ykkir bæði. Hón bað þá vera eigi svá óða; man yðr nú ekki bresta, en látið mik vera kyrra, ok skýfit mæð hvernig. Þeir leituðu nú um húsit, ok fundu ekki; gefa upp um síðir. Þá mækti húsfreyja: gott er þat jafnan, at gefa betri raun, enn margir ætla, ok var þess ván, at eigi myndi þær þat sinna, sem eigi var til; eða viltu nú, bóndi, ganga við heimsku þinni, ok bera mik undan þessu illmæli? Hann mækti: síðr ber ek þik undan, at ek þykkjumst víst vita, at þú ert sönn at þessu, sem ek hefir á þik borit; skaltu ok verða þik við at hafa um þat mál, ef þú getr þat af þær fært. Hón kvæð sèr þat eigi í móti skapi; skildu þau með því tal sitt. Eptir þetta var Þorsteinn með Væringjum jafnan, ok þat segja menn, at hann hafi leitað ráða undir Harald Sigurðarson, ok ætla menn, at þau hefði eigi svá ór ráðit, ef þau hefði eigi hans við notið, ok hans vizku. Ok þá fram liðu stundir, gjörði Sigurðr bóndi orð á því, at hann myndi fara heiman at einhverjum erindum sínum. Eigi latti húsfreyja hann þess; ok er bóndi var á burt, kvam Þorsteinn til Spes, ok váru þau þá jafnan bæði saman. Svá var háttað í garði hennar, at hann var húsaðr fram yfir sjáinn, ok váru þat nökkur hús, er sjáinn gekk upp undir. Þar sátu þau Spes ok Þorsteinn jafnan. Þar var lítill hlemmr í

gólfinu, svá at engi vissi, nema þau tvau. Skyldi hann opinn standa, ef skjótt þyrfti til at taka. Nú er frá bónda at segja, at hann fór hvergi á burt, nema hann leyndist, ok vildi speja um húsfreyju. Bar þat ok svá til, at þá er þau varði sízt á einu kveldi, ok þau sátu í sjáfarloptinu ok skemmtu sèr, at þar kwam bóndinn at þeim úvörum með fjölda fólks, ok leiddi nú nökkura menn til gluggs, er á var á húsinu, ok bað þá sjá, hvárt eptir því væri, sem hann sagði. Allir sögðu, at hann hefði rétt talat, ok svá myndi fyrr hafa verit. Hlupu nú á loptið; ok er þau heyrðu brakit, mælti hón til Þorsteins: hær verðr þú niðr at fara, hvat sem kostar. Gjör mær vísbending, ef þú kemst fram undan húsunum. Hann kvað í¹ við, ok steypiti sèr niðr í gólfrit, en húsfreyja spyrndi fæti sínum á hlemminn. Föll hann síðan aptr í lag, ok sá hvergi nývirki á gólfinu. Kwam bóndi í loptið ok hans menn. Þeir fóru nú leitandi, ok fundu ekki, sem ván var. Loptið var autt, svá at þar var engi hlutr inni, nema slétt gólfrit ok pallar. Sat húsfreyja þar, ok læk at fingrgullum sínum. Hón gaf sèr fátt at þeim, ok lét sem hón ætti ekki um at vera. Nú þótti bónda öllu kýmiliga, ok spurði fylgdarmenn sína, hvárt þeir hefði eigi sèt manninn. Þeir kváðust fyrir víst hafa sèt hann. Þá mælti húsfreyja: hær man koma at því, sem mælt er, at þrisvar hefir allt orðit forðum. Hefir þær ok svá farit, Sigurðr, sagði hón; þú hefir gjört mær þrisvar únáðir, at því sem mær þykkir; eðr eru þær nú nökkuru hyggjari, enn fyrir öndverðu. Ek var nú eigi einn til frásagnar, segir bóndi; skaltu fyrir allt þat eiga undanfærslu, því at ek vil með engu móti þessa svívirðing hafa úbætta. Ek ætla, sagði húsfreyja, at þú beiðir þess, er ek vil bjóða, því at mær þykkir allgott at færast undan þessum áburð; er

1) Ja, B.

hann svá á lopt kominn, at mèt verðr mikill vanmatnaðr í, æf ek hrind hánú eigi af mèt. Einn veg skaltu þess synja, segir bóndi, at þú hafir eigi gefit góðs mitt nè gripit. Hón svarar: þann tíma, sem ek færumst undan, skal ek einn veg hrinda af mèt öllum þeim greinum, sem þú hefir til mín at tala; en hygg at, hvar niðr skal koma; vil ek þegar undanfærslu fyrir svá fallin orð fyrir þenna áburð. Bóndi lét sér þetta vel nægja, ok gekk í burt með sína menn. Nú er frá Þorsteini at segja, at hann lagðist fram undan húsunum, ok gekk upp þar, sem hánú líkaði, ok tók sér eina skíðu með loganda eldi, ok hélt upp, svá at sjá mátti ór garði húsfreyju. Hón var löngum úti um kveldi, ok um náttina, því at hón vildi vita, ef Þorsteinn kvæmi á land; ok er hón sá eldinn, þóttist hón vita, at hann var á land kominn, því at þau höfðu þetta ráð gjört með sér. Eptir um morguninn bauð Spes bónda sínum, at þau skyldu við talast fyrir biskupi um sín mál; ok hann var þess alþúinn. Koma þau nú fram fyrir hann, ok hefir bóndi hinar sömu sakir við hana, sem fyrr var greint. Biskup spurði, hvárt hón hefði við þetta kennd verit fyrr, en engi sagðist þat heyrt hafa. Þá spurði hann, með hverjum líkendum hann bæri þetta at henni. Hann leiddi þá fram menn, er sèt höfðu, at hón sat í læstu húsi, ok þar einn maðr hjá henni; ok á því sagði bóndinn sér grun, at sá maðr myndi gleypja hana. Biskup sagði, at hón mátti vel færað undan þessum áburð, ef hón vildi. Hón kvað sér nú allvel líka; trúi ek, sagði Spes, at mèt verði gott til eiðakvenna um þetta mál. Var henni nú nefndr eiðr, ok ákveðinn dagr til at fram skyldi koma. Fór hón eptir þat heim, ok lét vel yfir sér. Fundust þau Þorsteinn ok Spes, ok gjörðu ráð sín.

92. Nú leið sá dagr, ok þar til sá dagr kvam, sem

Spes skyldi vinna eiðinn; þá býðr hún til öllum sínum vinum ok frændum, ok setti sik til með hinum bestum klæðum, er hún átti. Margar dýrar konur gengu með henni. Þá váru á vátviðri mikil. Vegrinn var vátr, ok ein veisa mikil yfir at fara, áðr enn til kirkju kvæmi; ok svá sem Spes ok skari hennar kemr fram at veisunni, var þar fyrir fjölmenni mikit, ok fjöldi fátækra manna, er sèr báðu ölmusu, því at þetta var almenningsstræti. Allir þóttust þeir skyldir vera at fagna henni, sem kunnu, ok báðu henni góðs fyrir þat, er hún hafði þeim opt vel við hjálpat. Þar var einn stafkarl milli annarra fátækra manna, mikill vexti ok hafði sitt skegg. Kvendit nam staðar við fenit, því at hoffólkinu þótti fenit úhreint yfirferðar; ok svá sem þessi hinn mikli stafkarl sá húsfreyna, at hún var betr búin, enn aðrar konur, mælti hann svá til hennar: góða húsfreyja, sagði hann, haf til lítileti, at ek bera þik yfir fen þetta, því at vær erum skyldir til, stafkarlar, at þjóna þér, þat sem vær kunnum. Hvat, mantu vel bera mik, sagði hún, er þú getr eigi borit sjálfan þik? Þó væri þér lítiletisraun, segir hann; ok má ek eigi bjóða betr, enn ek hefi til, ok man þér til alls betr takast, at þú hafir eigi matnað við fátækan mann. Vit þat fyrir víst, segir hún: berir þú mik eigi vel, þá verðr þat þitt húðlát, eðr annarrar svívirðingar meiri. Feginn vil ek hætta á þat, sagði hann, ok færðist á fætr út á dikit. Hún lét sem hún hugði allillt til, at hann bæri hana, en þó fór hún á bak hánum. Stumraði hann nú allseint, ok gekk við tvær hækur; ok er hann kemr á mitt fenit, reiðir hann á ýmsar hliðar. Hún bað hann herða sik; ok skaltu aldri verri fœr sit hafa, enn þá, ef þú fellir mik hér í niðr. Lættar nú veslingr áfram, ok færir nú í aukana, kostar alls kapps við, ok kemst allnær landinu, ok þá drepr hann fœti, ok

rýkr áfram, svá at hann kastaði henni upp á bakkann, en féll sjálfir í díkit upp undir hendr; ok í því, er hann liggr þanninn, grípr hann til hennar, húsfrúinnar, ok festi hvergi á klæðunum; tekr hann þá saurugri hendi upp á knè henni, ok allt á lærit bert. Hón spratt upp ok bannaði, sagði, at jafnan hlyti illt af vándum förumönnum; ok væri þat makligt, at þú lægir lamdr, ef mèt þætti eigi skömm í því sakir vesaldar þinnar. Hann mælti þá: missæl er þjóðin; ek þóttumst gjöra vel við þik, ok hugða ek til ölmusu af þér, en ek hefir af þér heitingar ok hrakning, en ekki til gangs; ok lét sem hánú kvæmi í allt skap. Þótti mörgum hann aumligr, en hón kvað hann vera hinn mesta bragðakarl; en er margir báðu fyrir hann, tekr hón til pungs síns, ok váru þar í margir gullpenningar. Hón bristir niðr penningana, ok mælti: haf þat nú, karl; aldri man þat gott, at þú hafir eigi fullt fyrir þat, er ek hefi hrakit þik, enda er nú við skilizt eptir því, sem þú vant til. Hann tindi upp gullit, ok þakkaði henni fyrir vel gjört. Gekk Spes til kirkju, ok var þar fjölmenni mikit fyrir. Gekk Sigurðr at með kappi, ok bað hana færa sik undan áburði þeim, sem hann hefði á hana borit. Hón svarar: eigi sinna ek þínum áburði; eðr hvern mann kallast þú hafa sæt í húsi hjá mèt? því at jafnan verðr til einhverr dugandi maðr at vera hjá mèt, ok kalla ek þat blygðarlaust; en fyrir þat vil ek sverja, at engum manni hefi ek gull gefit, ok af engum manni hefi ek saurgazt líkamliga, utan af bónda mínum ok þeim vanda stafkarli, er tók sinni saurugri hendi á lær mèt, er ek var borin yfir díkit í dag. Nú tóku margir undir, at þetta væri fullr eiðr, ok henni væri þat eigi mannlýti, þó at karl hefði síðat á henni váveifliga. Hón sagði, at þat mætti telja, sem til væri. Eptir þetta sór hón út svá fallinn eið, sem nú var greint.

Mæltu þat margir, at hón myndi þat sanna, sem mælt er, at lítið skyldi í eiði úscert. Hón kvezt þat ætla, at vitrum mönnum skyldi svá litast, at þetta væri eigi um grun gjört. Þá töluðu til frændr hennar, at slíkt væri mikil skapraun burðugum konum, at hafa bótalaus þvílíka álygi; því at þat var þar dauðasök, ef kona varð opinber at því, at hón hóradist undir bónda sínum. Spes heiddi þá biskup, at hann gjörði skilnað þeirra Sigurðar, því at hón sagðist eigi vilja þola álygi hans. Fluttu þetta frændr hennar. Varð þá svá með atgangi þeirra, at þau váru skilin, ok Sigurðr fèkk lítið af góðsinu; var hann gjörr ór landi burt. Fór þar, sem víða eru dæmi til, at hinir lægri verða at lúta. Gat hann ok engu fram komit, þó at hann hefði rétt at mæla. Spes tók nú við öllum penningum þeirra, ok þótti hinn mesti kvennskörungur. Þá er menn hugðu at eiðstaf hennar, þótti mönnum sem grunr hefði í verit, ok ætluðu, at vitrir menn myndi hafa diktað fyrir henni þessi atkvæði. Gátu menn þá upp grafit, at sá stafkarl, sem hana hafði borit, var Þorsteinn drómundr, en þó fèkk Sigurðr enga rétting þessa máls.

93. Þorsteinn drómundr var með Væringjum, meðan mestr orðrómr lèk á málum þessum. Verðr hann svá frægr, at þar þótti varla þvílíkr atgjörfsmaðr komit hafa, sem hann. Fèkk hann af Haraldi Sigurðarsyni hinn mesta heiðr, því at hann virði frændsemi við hann; ok hans ráðum hesir Þorsteinn fram farit, at því er menn ætla. Bráðliga eptir þat, er Sigurðr var ór landi rekin, hóf Þorsteinn bónorð við Spes; tók hón því scemiliga, en veik þó til frænda sinna. Váru þá stefnur at áttar, ok kvam þat ásamt með þeim, at hón myndi sjálf mestu fyrir ráða. Var þá keypt með þeim, ok urðu þeirra samfarir góðar, ok höfðu auð fjár. Þótti Þorsteinn mikill gæfumaðr, hversu hann hafði ráðit ór

sínum vandræðum. Váru þau ásamt tvá vetr þar í Miklagarði. Eptir þat sagði Þorsteinn húsfreyju sinni, at hann vildi vitja eigna sinna aptr til Norvegs. Hón sagði hann skyldu ráða. Seldi hann þá eignir þær, er hann átti, ok höfðu þá of lausafjár. Ræðust þau þá þaðan ór löndum með góðu föruneysi, ok fóru alla leið, unz þau kvámu í Norveg. Tóku frændr Þorsteins harðla vel við þeim báðum, ok sá þat brátt, at hón var ör ok stórlýnd; gjörðist hón brátt harðla vinsæl. Áttu þau börn saman, ok sátu nú at eignum sínum, ok undu vel sínu ráði. Þá var Magnús konungr hinn góði yfir Norvegi. Fór Þorsteinn skjótt á fund hans, ok var þar vel tekinn, því at hann var mjök frægr orðinn af því, er hann hafði hefnt Grettis hins sterka. Vita menn varla dæmi til, at nökkurs manns af Íslandi hafi hefnt verit í Miklagarði, annars enn Grettis Ásmundarsonar. Svá er sagt, at Þorsteinn yrði hirðmaðr Magnús konungs. Sat Þorsteinn um kyrrt níu vetr, síðan hann kwam aptr í Norveg, ok þóttu þau hinu mestu sæmdarmenn bæði. Þá kwam utan ór Miklagarði Haraldr konungr Sigurðarson, ok gaf Magnús konungr hánun hálfan Norveg við sik; váru þá báðir konungar í Norvegi um hrið. Eptir andlát Magnús konungs undu margir lítt, þeir sem höfðu verit vinir hans, því at allir unnu hánun; en mönnum varð vangætt til lyndis Haralds konungs, því at hann var harðr ok refsingasamr. Þorsteinn drómundr gjörðist þá hnignandi, ok var þó hinn hraustasti maðr. Þá var liðit frá drápi Grettis Ásmundarsonar sextán vetr.

94. Þá eggjuðu margir Þorstein at fara á fund Haralds konungs, ok gjörast hánun handgenginn; en hann tók eigi undir þat. Þá mælti Spes: þat vil ek, Þorsteinn, segir hón, at þú farir eigi á fund Haralds konungs, því at vit eigum öðrum konungi meira vangoldit, ok þarf fyrir því

at hugsa; en vit gjörumst nú gömul bæði ok af æskuskeiði, ok hefir gengit meir eptir ástundan, enn kristiligum kenningum eðr röksemdum réttinda. Nú veit ek, at þessa okkra skuld megu hvártki leysa okkrir frændr nè fémunir; vil ek vit sjálf gjöldum skyld fyrir; nú vil ek breyta ráðahag okkrum, ok fara ór landi ok á páfagarð, því at ek trúi, at svá má mitt mál leysast. Þorsteinn svarar: mér eru þessir hlutir jafnunnigir, sem þér, er nú talar þú; er þat skylt, at þú ráðir þessu, er svá gegnir vel, er þú lætt mik ráða, er miklu var úvænligar stefnt; ok skal svá breyta í öllu, sem þú segir fyrir. Þetta kwam mjök á menn úvara. Nú var Þorsteinn tveim vetrum meirr enn hálssjötugr, ok þó hraustr til allra athafna sinna. Bauð hann nú til sín öllum frændum sínum ok tengdamönnum, ok gjörði bera fyrir þeim ráðastofnan sína. Tóku vitrir menn vel undir þat, ok þótti þó hinn mesti skaði at burtför þeirra. Þorsteinn sagði eigi víst um aptrkvámu sína; vil ek nú þakka yðr öllum, segir hann, hversu þér gengut um mitt góðs, meðan ek var ór landi næst; nú vil ek bjóða yðr ok biðja, at þér takit við fè barna minna ok þeim sjálfum, ok fæðit þau upp eptir því, sem yðvarr er manndómr, því at ek er svá til aldrs kominn, at jöfn ván er, hvárt ek kem aptr eðr eigi, þótt ek lifa; skulu þér svá fyrir öllu sjá, því sem ek á hær eptir, sem ek man eigi aptr vitja til Norvegs. Þá svöruðu menn, at margt væri gott til ráða, ef húsfreyja væri eptir til umsjár. Þá mælti hón: því fór ek utan ór löndum ok ór Miklagarði með Þorsteini, ok fyrirlèt ek bæði frændr ok fè, at ek vilda, at eitt gengi yfir okkr bæði; nú hefir mér hær gott þótt; en eigi slægir mik hær til langvista í Norvegi eðr hær í Norðrlöndum, ef hann ferr á burt; hefir ok jafnan þokki með okkr verit, ok ekki at áskilnaði orðit; nú munu vit bæði ásamt fara, því at okkr er kunnigar um þá hluti

marga, er orðit hafa síðan vit fundumst. Ok er þau höfðu þenna veg á gjört um hagi sína, þá bað Þorsteinn valinkunna menn skipta í sundr fenu í helminga; tóku frændr Þorsteins þann helming, er börnin skyldi eiga, ok fæddust þau upp með födurfrændum sínum, ok urðu síðan hinir mestu þroskamenn, ok er mikil ætt frá þeim komin þar í ríkinu; en Þorsteinn ok þau Spes skiptu í sundr sínum blut fjárins, ok gáfu sumt til kirkna fyrir sál sinni, en sumt höfðu þau með sèr. Ræðust þau nú til Rómferðar, ok báðu margir vel fyrir þeim.

95. Fóru þat nú allan veg þar til er þau kvámu til Rómaborgar. Svá sem þau kvámu fram fyrir þann, er til þess var skipaðr, at heyra skriptamál manna, þá sögðu þau sannliga allt, hversu farit hafði, ok með hverjum klóksköpum þau höfðu sinn hjúskap bundit. Þau gáfu sik auðmjúkliga undir þvílíkar skriptir sèr til yfirbótar, sem hann vildi á þau leggja; en fyrir þann skuld, at þau höfðu sjálf orkæzt hugar á, at bæta sína meinbugi án allri þröngvan ok hatri af kirkjunnar formönnum, þá var þeim lætt um allar álögur, svá sem fremst mátti vera, en beðin með blíðu, at þau skipaðist nú sem skynsamligast fyrir sinni sál, ok lifði breinliga þaðan í frá, at fengiðni lausn allra sinna mála. Þóttu þau vel ok vitrliga farit hafa. Þá mælti Spes: nú þykkir mér vel farit hafa ok lyktæzt okkart mál; höfum vit nú eigi úgæfu saman átt eina, kann vera, at heimskir menn dragi sèr til eptirdæma okkra hina fyrri æfi; skulu vit nú gjöra þá endalykt okkars lífs, at góðum mönnum sè þar eptir líkjanda; nú skulu vit kaupa at þeim mönnum, sem hagir eru á steinsmíði, at þeir gjöri sinn stein hváru okkra, ok mættim vit svá bæta þat, sem vit höfum brotið við guð. Nú lèt Þorsteinn lagða verða peninga til steinsmíðar báðum þeim, ok þvílíks annars, sem þau þurftu, ok

þau máttu eigi missa til viðrleifis; ok at lyktaðri þessarri smíð, ok á viðrkvæmiligum tíma, ok öllum hlutum tilbúnum, skildu þau sína stundliga samvist at sjálfráði sínu, at þau mætti því heldr njótandi verða heilagrar samvistu annars heims. Settist þá í sinn stein hvárt þeirra, ok lifðu svá langan tíma, sem guð vildi skipa, ok endu svá sína æfi. Hafa þat flestir menn sagt, at Þorsteinn drómundr ok hans kona Spes þykkja verit hafa hinir mestu gæfumenn, ór því sem ráða var; en eigi hafa börn hans nè afkvæmi til Íslands komit, svá at saga sè frá gjör.

Hefir Sturla lögmaðr svá sagt, at engi sekr maðr þykkir hánum jafnmikill fyrir sèr hafa verit, sem Grettir hinn sterki. Finnir hann til þess þrjár greinir: þá fyrst, at hánum þykkir hann vitrastr verit hafa, því at hann hefir verit lengst í sekt einhverr manna, ok varð aldri unninn, meðan hann var heill; þá aðra, at hann var sterkastr á landinu sinna jafnaldra, ok meir laginn til at koma af aþrögöngum ok reimleikum, enn aðrir menn; sú hin þriðja, at hans var hefnt úti í Miklagarði, sem einskis annars íslenzks manns; ok þat með, hverr giptumaðr Þorsteinn drómundr varð á sínum efstum dögum, sá hinn sami, er hans hefndi. Lýkr hær sögu Grettis Ásmundarsonar¹, várs samlanda. Hafi þeir þökk, er hlýddu, en sá litla, er krabbað hefir söguna. Er hær verksins endir; en vær sèm allir guði sendir, amen.

¹) Her ender Sagaen efter flere Papirshaandskrifter. Istedetfor det Følgende Aar G: á fræði því, er Grettisfæsla heittr, ok ísfrðingar gjörðu, þá er þeir höfðu höndum tekit Grettli Ásmundarson, en mar:ir hafa síðan við aukit kätligum orðum; er þetta upphaf á; men Diglet synes med Villie at være gjort ulæseligt.